

以付之我 皇上踐祚者也昔周之世武王崩成王立
周公相之本朝攝政王之輔 世祖亦猶周公之相
成王疏不閒親典策具在以周公之元聖尙不免管蔡
流言逮風雷示警於金縢而忠悃益見現在近支諸王
中能持大體邁於載垣端華者尙不乏人一□□之言
應請毋庸過慮又如垂簾聽政之制宋宣仁太后稱爲
女中堯舜羣情歡洽國本無傷我 文皇后當開國
初年雖無垂簾明文而有聽政實用因時制宜惟期允
當不易爲今之計非 皇太后親理萬幾召對羣臣
無以通下情而正 國體非 另簡近支親王佐理庶

務盡心匡弼不足以振綱紀而順人心惟有籲懇 皇
上俯納芻蕘卽奉 皇太后權宜聽政 二聖並

崇而於近支親王中擇賢而任仍秉 命而行以待我

皇上親政以前一切用人行政大端不致變更紊亂

以承到治於無窮 宗社幸甚臣民幸甚如此庶於

親親尊賢之大經既不相悖且於該王等亦可保全終
始受福良多此皆中外臣工所欲言而未發者奴才先
爲言之奴才忝爲大臣受 國厚恩屢奉 先皇帝

手詔嘉勉云朕所望於該大臣者至大至遠又奉有忠
勇性成赤心報國等諭每誦 天語感激涕零今外

患固宜亟平而內憂尤當早慮奴才天良所迫何忍不言何敢不言伏願 皇上乾綱獨斷迅賜施行並請將此摺發交惠親王愷親王恭親王醇郡王公同閱看如有尙未盡善之處應令大學士九卿科道集議以 聞庶大局可全而人心可定謹不揣冒昧披瀝上陳無任激切待 命之至

咸豐十一年十一月十九日內閣奉 上諭御史鍾佩賢給事中孫楫奏請將載垣等造作之諭旨銷除各摺片載垣等假傳諭旨造作贊襄政務名目並於御史董元醅條奏一摺擬旨時擅自改寫各情形業經疊次降

旨明白宣示矣茲據該給事中等奏載垣等造作擅改之件不應載之 實錄儼同 顧命亦不應登之冊籍假託綸音擬請降旨銷除以期信今傳後等語朕奉

母后皇太后

聖母皇太后懿旨所奏不爲無見

載垣等種種悖之欺蒙之罪中外臣民皆已備悉所有造作贊襄政務諭旨確係矯傳自不應纂入 實錄中惟遽將其銷毀又恐無以示將來而徵罪案至董元醇所奏一摺當日發交載垣等擬旨原令其將所請垂簾暫理朝政飭令廷臣會議其請於親王中簡派一二人輔弼開具空名諭旨祇候簡派並於大臣中擇其可充

師傅之任者公同保舉乃載垣奏對時卽已嘵嘵置辯及擬諭旨遂敢陽奉陰違擅自改寫一切駁斥迨述旨時未卽允照所擬宣發而載垣等膽敢於次日發交摺件壓擱不辦竟將所擬諭旨堅請發下又以未用玉印不足爲憑再行瀆請斯時駐蹕木蘭遠距京師未能卽日回鑾若不暫允所請載垣等跋扈情形其勢將有不可問者是以隱忍姑從將所擅擬諭旨鈐蓋御印實出於不得已言念及此能無痛恨所有載垣等矯傳贊襄名目及擅擬駁斥董元醇諭旨著卽銷除惟此案係王大臣大學士六部九卿等於內閣會同刑部議定罪名

伊等造作之諭旨二道卽著內閣刑部隨同本案檔冊錄存以著信讞並著軍機處卽隨此次諭旨照錄一分存檔另錄一分交南書房收存均著低二格寫以示區別庶使姦邪逆踪不得溷載方策以重綸音而昭炯戒
欽此

同治四年春二月講官編修蔡壽祺疏劾議政王攬權納賄議政王欲逮問壽祺 兩宮震怒初五日 召見大學士周祖培瑞常吏部尙書朱鳳標戶部侍郎吳廷棟刑部侍郎王發桂內閣學士桑春榮殷兆鏞 諭以王植黨擅政漸不能堪欲重治王罪諸臣莫敢對 太

后屢諭諸臣當念先帝毋畏王王罪不可追宜速議
祖培頓首言此惟兩宮乾斷非臣等所敢知太后
曰若然何用汝曹爲異日皇帝長成汝等獨無咎乎
祖培奏言此事須有實據容臣等退後詳察以聞且
言請與倭仁公同查明具奏太后始命退初六日倭
仁等八人會議於內閣召蔡壽祺質證其事蔡惟指出
薛煥劉蓉二人餘不能指實初七日諸大臣覆奏上
太后出硃諭示諸臣且諭曰詔旨多有別字及詞
句不通者汝等爲潤飾之祖培奏請添恭親王議政之
初尙屬勤慎二語太后又諭曰此旨卽下內閣速行

之不必由軍機遂下 詔略云本月初五日據蔡壽祺
奏恭親王事查辦雖無實據自出有因恭親王議政之
初尙屬勤慎迨後妄自尊大諸多狂傲倚仗爵高權重
目無君上視朕沖齡諸多挾制往往暗使離閒不可細
問每日召見趾高氣揚言語之間諸多取巧妄陳凡此
重大情形姑免深究恭親王著毋庸在軍機處議政革
去一切差使不准干預公事以示朕曲爲保全之意以
後召見引見等項著派惇親王醇親王鍾郡王孚郡王
四人輪流帶領特諭倭仁等受 詔出始 召見樞臣
文祥等三人初八日惇親王上疏言恭親王事屬曖昧

徒以語言小失驟予罪懲情狀未明無以昭示天下

皇太后遂諭孚郡王及樞臣文祥等傳諭王公大學士
九卿翰詹科道明日於內閣會議以惇親王疏及蔡壽
祺原疏並發閱視且令文祥等述所受 旨是日 詔

奉 兩宮皇太后懿旨宣示恭親王過失斥退軍機處
議政盡奪一切差使初九日 兩宮召見大學士倭仁
周祖培瑞常朱鳳標尙書萬青藜侍郎基溥吳廷棟王
發桂殷兆鏞及軍機大臣等 太后諭倭公等九人曰
恭王恣肆已甚必不可復用又曰卽如載齡人才豈任
尙書者而王必予之又曰惇王今爲疏爭前年在熱河

言恭王欲反者非惇王耶汝曹爲我平決之 諭軍機大臣等則曰若等固謂國家非王不治但與外廷共議之合疏請復任王我聽許可也諸臣至內閣各述所受旨則大異是日押班者爲鍾郡王乃各引王爲證王言固皆聞之諸公相顧色然不成議而退十四日醕郡王及降調通政使王拯御史孫翼謀皆上疏爲恭邸陳請 詔以各奏摺命王公大學士九卿翰詹科道彙同前日惇親王摺一併議奏十六日 詔曰朕奉 慈安皇太后 慈禧皇太后懿旨前據惇親王醕郡王降調通政使王拯御史孫翼謀先後陳奏恭親王雖經獲咎

尙可錄用當交王公大學士九卿翰詹科道會同詳議具奏茲據禮親王世鐸等大學士倭仁等會議覆奏並據內閣學士殷兆鏞都察院左副都御史潘祖蔭內閣侍讀學士王維珍給事中廉誠及各科道等聯銜各摺均以恭親王咎由自取惟係懿親重臣應否任用予以自新候旨定奪等語所見大略相同惟給事中廉誠等摺內所稱廟堂之上先啟猜嫌根本之閒未能和協駭中外之觀聽增宵旰之憂勞等語持論固屬正大而於朝廷辦理此事苦心究未領會雖前日面諭軍機大臣等隨同孚郡王赴內閣傳諭諸臣而科道仍有此語實

有不能不再行宣示者恭親王誼屬懿親職兼輔弼在親王中倚任最隆恩眷最渥特因其信任親戚不能破除情面平時於內廷召對多有不檢之處朝廷杜漸防微若復隱忍含容恐因小節之不慎致誤軍國之重事所關實非淺鮮且歷觀史冊所載往往親貴重臣有因遇事優容不加責備卒至驕盈矜誇鮮克有終者可爲前鑒日前將恭親王過失嚴旨宣示原冀其經此懲儆之後自必痛自斂抑不至再蹈愆尤此正小懲大誡曲爲保全之意如果稍有猜嫌則悖親王等摺均可留中又何必交廷臣會議耶茲覽王公大學士等所奏僉以

恭親王咎雖自取尙可錄用與朝廷之意正相脗合現
既明白宣示恭親王著卽加恩仍在內廷行走並仍管
理總理各國事務衙門此後惟當益矢慎勤力圖報稱
用副訓誨成全至意至在廷臣工均爲國家倚任惟當
同矢忠赤共濟時艱毋得因此稍存疑慮畏難苟安致
蹈因循積習將此宣諭在廷臣工知之 李越縵先生
日記載此事頗詳余嘗借觀節錄之蓋是時先生方主
文勤家授其子讀也

文文忠

祥

在政府最久知大體有廉操恭邸初與相得

其後以

大婚保舉之事意不合自是事無巨細顯

與文相齟齬文相不能堪癸酉隨扈上陵歸卽欲請假
恭邸賢王其待大臣猶不能無稍褊處

癸酉二月十三日醕親王奏請將山東所獲戕害僧邸
之張凌雲致祭該親王圓寢摺中有云去年係軍機大
臣擬 旨現在乃 天子當陽迴不相侔等語恭邸
閱之不懌令章京辦奏稿辯明其事朱修伯丈勸阻不
可李文正鴻藻又力言之而恭邸意未解卒奏之蓋兩
邸意見之深始此

勝克齋保統兵皖中頗自縱恣軍士飢寒不加體恤十
一月尙有露體者他省解到棉衣適勝欲作棉地毯辦

差者卽以棉衣之棉爲之軍餉解到先以開支私用月需二十萬所至雞鴨海菜綢緞諸物皆預儲攜帶以聽供求索蔣壩坐船內有女子二有待我五年之約營中頑童極多大都皆賊中生擒之小長髮也此袁篤甫在皖親見之者宜乎其敗也見朱大理筆記

光緒初元醕親王上懇賜矜全一疏奉 皇太后懿旨前據醕親王奏舊疾復發懇賜矜全當諭令王公大臣大學士六部九卿妥議具奏茲據奏稱該王因傷痛過甚觸發舊疾哀懇出於至誠自不得不量爲體恤擬請將該王所管各項差使均予開除惟每年 東陵 西

陵應行致祭時仍請飭宗人府酌開該王銜咨行太常寺擬定于向章改遣行禮之處題請遵行每月朔望及元旦各節及 列聖 列后忌辰誕辰應詣奉先殿行禮恭懸恭收 聖容應詣壽皇殿行禮並大 殿拜表仍照向例輪流行禮嗣後恭遇皇帝升殿及皇帝萬壽均擬請毋庸隨班行禮如遇朝廷大政仍宜時備顧問倘有條奏事件亦可於兩宮前呈遞等語均著照所請行至每年七月十月萬壽及元旦令節皇帝行禮時毋庸隨班慶賀均著詣壽康宮行禮該王公忠體國懋著賢勞自應量予恩施著以親王世襲罔替用示優異另

片奏普陀峪工程重大請仍飭該王照料等語卽著該王隨時前往妥爲照料該王所管神機營本日已降旨改派伯彥訥謨祜景壽管理惟該王辦理多年經武整軍著有成效深堪嘉尙仍著將應辦一切事宜隨時與伯彥訥謨祜等悉心會商妥議籌辦以昭慎重欽此

光緒五年六月二十三日奉 懿旨 醇親王奕譞奏懇裁撤差使家居養疾一摺 醇親王奕譞舊疾未痊卽著安心調理所有神機營一切事宜著毋庸會同商辦以示體恤一俟病體稍愈卽行具摺請安欽此

光緒十二年六月初十日欽奉

慈禧端佑康頤昭

豫莊誠皇太后懿旨前因 皇帝沖齡踐祚一切用人
行政王大臣等不能無所稟承允准廷臣之請垂簾聽
政並諭俟 皇帝典學有成卽行親政十餘年來 皇
帝孜孜念典德業日新近來披閱章奏論斷古今亦能
剖決是非權衡允當本日召見醇親王奕譞及軍機大
臣禮親王世鐸等諭以自本年冬至大祀 園丘

爲始 皇帝親詣行禮並著欽天監選擇吉期於明年
舉行親政典禮 皇帝聞諭後當卽長跪懇辭醇親王
及軍機大臣亦以時事多艱萬幾鉅繁 皇帝日就月
將學無止境如蒙從緩將來躬親庶務必更能貫徹無

遺益臻上理實爲天下臣民之幸再三籲懇情詞亦出至誠惟念垂簾之舉本屬一時權宜 皇帝繼統御極仰承 穆宗毅皇帝付託之重當此典學有成正宜與內外臣工勤求治理宏濟艱難自應欽遵同治十三年十二月初七日懿旨卽行親政以慰深宮期望之意壇廟大祀均應親詣行禮以昭誠敬卽於本年冬至大祀 園丘爲始躬親致祭並著欽天監於明年正月內選擇吉期舉行親政典禮所有應行事宜及應復舊制之處著各該衙門敬謹查照成案奏明辦理將此通諭中外知之欽此

光緒十二年六月十五日欽奉

慈禧端佑康頤昭

豫莊誠皇太后懿旨醇親王奕譞奏籲請體念時艱俯
允訓政禮親王世鐸等奏合詞籲懇訓政數年伯彥訥
謨祜等奏籲請從緩歸政以懋聖學各一摺覽奏均悉
垂簾之舉出於萬不得已十餘年來深宮訓導欣見

皇帝典學有成特命於明年正月內舉行親政典禮審
慎宣綸權衡至當不容再有游移天下之事至繁至頤
皇帝親政之始容有未及周知全在各大臣共矢公
忠盡心輔助內而樞臣外而疆吏均係股肱心膂之臣
彌此丕基責無旁貸其各殫竭血誠力圖振作於應辦

事宜任勞任怨毋得稍涉因循推諉致負委任 皇帝
幾餘念典本無止境一切經史之功繙譯之事尤在毓
慶宮行走諸臣朝夕講求不憚煩勞俾臻至善總之帝
德王道互相表裏 皇帝親政後正可以平日所學見
諸措施用慰天下臣民之望當亦爾諸臣所至願也該
王大臣等所請訓政數年及暫緩歸政之處均毋庸議
至醇親王摺內所稱宮廷政治內外並重歸政後當示
照現在規制凡宮內一切事宜先請懿旨再於 皇帝
前奏聞俾 皇帝專心大政等語念自 皇帝沖齡嗣
統撫育教誨深宮十餘年如一日卽親政後亦必隨時

調護遇事提撕此責不容卸此念亦不容釋卽著照所
請行本日欽天監奏遵旨選擇吉期一摺 皇帝親政
典禮於明年正月十五日舉行所有應行事宜著各該
衙門敬謹預備欽此

光緒十二年六月十八日欽奉

慈禧端佑康頤昭

豫莊誠皇太后懿旨 醇親王奕譞奏重申愚悃籲請勉
允訓政禮親王世鐸等奏再行瀝誠籲懇訓政數年錫
珍等奏揆時度勢親政尙宜稍緩貴賢奏舉行親政關
繫綦重各一摺覽奏均悉垂簾聽政厯稽往代皆出權
宜之舉行之不慎流弊滋多史冊昭垂可爲殷鑒前因

皇帝典學有成特降懿旨及時歸政此深宮十餘年來殷殷盼望之苦衷天下臣民自應共諒故於十四日王大臣等合詞籲陳均未允准數日以來 皇帝宮中定省時時以多聆慈訓俾有稟承再四籲求情詞肫摯茲復披覽該王大臣等章奏瀝陳時事艱難軍國重要醕親王摺內兼以念及宗社仰慰 先靈等詞諳諳

籲請迴環循覽悚惕實深國家際此時艱飭紀整綱百廢待舉 皇帝初親大政決疑定策實不能不遇事提撕期臻周妥旣據該王大臣等再三瀝懇何敢固持一己守經之義致違天下眾論之公也勉允所請於 皇

帝親政後再行訓政數年爾中外大小臣工務當各抒忠赤盡力助勳以期力振委靡其臻郅治於諸臣有厚望焉至錫珍等及貴賢摺內請飭廷臣會議等語 皇帝親政係國家及時應舉之盛典業經特降懿旨通諭遵行豈如臣下條陳事涉疑似者尙須集議況王公大學士六部九卿兩次陳奏眾議僉同豈必待添入翰詹科道乃爲定論耶所奏殊屬非是著毋庸議 醕親王前次片奏內有親政前期交卸神機營印鑰等語現旣允准訓政醕親王亦當以國事爲重略小節而顧大局所管事宜仍著照常經理俟數年後斟酌情形再行降旨

欽此

光緒十五年正月十八日 上諭朕叔惇親王薨逝已降旨派貝勒載澄前往奠醊朕於本日恭奉 慈禧端佑康頤昭豫莊誠皇太后親臨府邸賜奠用示篤念親親至意欽此

二十日欽奉 慈禧端佑康頤昭豫莊誠皇太后懿旨御史屠仁守奏歸政屆期直陳管見一摺據稱歸政伊邇時事方殷請明降懿旨外省密摺廷臣封奏仍書皇太后聖鑒懇恩披覽然後施行等語覽奏殊深駭異垂簾聽政本屬萬不得已之舉深宮遠鑒前代流弊特

飭及時歸政上符

列聖成憲下杜來世口實主持

堅定用意甚深況早經降旨宣示中外天下臣民翕然
共遵今若於舉行伊始又降懿旨飭令仍書聖鑒披覽
章奏是出令未幾旋即反汗使天下後世視予爲何如
人耶況垂簾權宜之舉與高宗純皇帝大廷授受

訓政之典迥不相侔何得妄爲比擬至歸政後只醅親
王單銜奏件暫須徑達深宮醅親王密陳數條亦爲
皇帝初裁大政軍國重要事件宮中定省可以隨時稟
承並非著爲典常使訓政之事永無底止該御史此奏
既與前旨顯然相背且開後世妄測訾議之端所見甚

屬乖謬此事關係甚大若不予以懲處無以爲逞臆妄
言紊亂成法者戒屠仁守著開去御史交部議處原摺
著擲還欽此

二十三日欽奉

慈禧端佑康頤昭豫莊誠皇太后

懿旨御史林紹年奏督撫報效有關政體民生請旨飭
禁一摺海軍爲經國要圖自光緒十一年創辦以來規
模略具需款浩繁前據總理海軍事務衙門奏准由兩
江等省於正雜諸款內騰挪巨款分年撥解天津交李
鴻章發商生息各省籌解之銀專備海軍不時之需其
每年息銀則以補海軍衙門放項之不足並無令各省

督撫報效之事該御史此奏乃以朝廷責進獻督撫肆
誅求等語任意揣測危詞聳聽實屬謬妄林紹年著傳
旨嚴行申飭欽此

二月初二日欽奉

慈禧端佑康頤昭豫莊誠皇太

后懿旨本日據吳大澂奏請飭議尊崇醕親王典禮一

摺 皇帝入嗣

文宗顯皇帝寅承大統醕親王奕

譔謙卑謹慎翼翼小心十餘年來深宮派辦事宜靡不
殫竭心力恪共盡職每遇優加異數皆再四涕泣懇辭
前賞杏黃轎至今不敢乘坐其秉心忠赤嚴畏殊常非
徒深宮知之最深實天下臣民所共諒自光緒元年正

月初八日醕親王卽有豫杜妄論一奏內稱歷代繼統之君推崇本生父母者以宋孝宗不改子傅秀王之封爲至當慮 皇帝親政後僉壬倖進援引治平嘉靖之說肆其姦邪豫具封章請俟親政時宣示天下俾千秋萬載勿再更張其披瀝之誠自古純臣居心何以過此深宮不能不嘉許感歎勉從所請者也茲當歸政伊始吳大澂果有此奏若不將醕親王原奏及時宣示則後此邪說並進妄希議禮梯榮其患何堪設想用特明白曉諭並將醕親王原奏發鈔俾中外臣民咸知我朝隆規超越古今卽賢王心事亦從此可以其白嗣後闕名

希寵之徒更何所容其覬覦乎爲此通諭中外知之醅
親王原奏云臣奕譞跪 奏爲披瀝愚見豫杜僉壬妄
論恭摺具奏仰祈 慈鑒事臣嘗見歷代繼承大統之
君推崇本生父母者備載史書其中有適得至當者焉
宋孝宗之不改子偁秀王之封是也有大亂之道焉宋
英宗之濮議明世宗之議禮是也張璠桂萼之儔無足
論矣忠如韓琦乃與司馬光議論牴牾其故何歟蓋非
常之事出立論者勢必紛沓擾攘雖乃心王室不無其
人而以此爲梯榮之具迫其主以不得不視爲莊論者
正復不少恭惟 皇清受 天之命 列聖

相承 十朝一脈至隆極盛曠古罕覯詎 穆宗教

皇帝春秋正盛遽棄臣民 皇太后以 宗廟社

稷爲重 特命 皇帝入承大統復 推恩及臣

以親王世襲罔替渥叨 異數感懼難名原不須更

生過慮惟思此時 垂簾聽政 簡用賢良廷議旣

屬執中邪說自必潛匿倘將來親政後或有草茅新進

之徒趨六年拜相捷徑以危言故事聳動 宸聽不幸

稍一夷猶則 朝廷徒滋多事矣合無仰懇 皇太

后將臣此摺留之 宮中俟 皇帝親政時宣示廷臣

世賞之由及臣寅畏本意千秋萬歲勿再更張如有以

治平嘉靖等朝之說進者務目之爲姦邪小人立加屏
斥果蒙 慈命嚴切 皇帝敢不欽遵是不但微臣名
節得以保全而關乎君子小人消長之機者實爲至大
且要所有微臣披瀝愚見豫杜僉壬妄論緣由謹恭摺
具 奏伏乞 皇太后聖明洞鑒光緒元年正月初
八日奏上留中

光緒十六年十一月二十一日內閣奉 上諭朕欽

奉 慈禧端佑康頤昭豫莊誠壽恭欽獻皇太后懿
旨自古帝王以孝治天下必推本於所生而禮有經權
尤必折衷至當方足以昭示來茲恭讀 高宗純皇

帝御製濮議辨援引禮經垂爲定論稱所生曰皇帝本
生父歿則稱本生考立廟於其邸第爲不祧之廟祀以
天子之禮合乎父爲士子爲大夫葬以士祭以大夫之
義則尊親之誼交盡而於公義私恩兩無遺憾 聖

訓煌煌昭垂萬世洵爲協於天理人情之至皇帝入嗣

文宗顯皇帝誕承大統光緒元年正月醕親王奕
譔密陳豫杜妄論一路內稱歷代繼統之君推崇本生
父母者以宋孝宗不改子傅秀王之封爲至當將來如
有以治平嘉靖之說進者務目之爲姦邪小人立加屏
斥等語持論正大敬徵 高宗純皇帝御論正相脗

合其志慮之忠誠防維之深切方之古純臣何以加茲
上年二月初二日因吳大澂之奏持降懿旨將王之密
疏宣示中外俾天下臣民咸知我朝隆軌超軼前代而
醕親王寅畏之本心從此昭然若揭詎意夫不假年溘
然長逝痛惜之極悲感彌深醕親王著定稱號曰皇帝
本生考所有一切飾終喪祭典禮自宣恪遵

祖

訓詳定彝章用遂皇帝恩義交盡之忱兼表賢王終始
不渝之志著派御前大臣軍機大臣翁同龢孫家鼐會
同禮部妥議以聞欽此

醕賢親王薨逝一切典禮皆創行 皇上詣府行祭奠

禮祭文由翰林院恭撰其文起首日維年月日 皇帝
謹致祭於本生考醇賢親王之靈云云常熟翁檢討斌
孫撰擬文內有云誦戒勉二詩已括周孔傳心之要讀
防微一疏足杜宋明議禮之爭此一聯最爲警切蓋
王嘗進戒勉二詩於 上又有杜漸防微之疏也

蕉廊脞錄卷一終

蕉廊脞錄卷二

求恕齋叢書

錢塘吳慶坻撰

吳興劉承幹校

同治三年七月十三日奉 上諭戶部尙書倭仁奏請
將軍需報銷變通辦理一摺據稱軍需報銷向來必以
例爲斷然其閒制變因時亦有未能悉遵之處各省軍
需歷年已久承辦旣非一人轉戰動經數省則例所載
征調但指兵丁而此次成功半資勇力兵與勇本不相
同例與案遂致歧出在部臣引例核案往返駁查不過
求其造報如例而各處書吏藉此需索糧臺委員借以

招搖費無所出則浮銷苛斂等弊由此而起請將同治三年六月以前未經報銷各案開具簡明清單奏明存案并請飭禁勸捐歸補名目等語所奏係爲因時杜弊起見軍需報銷一事本有例定章程惟近來用兵十餘年蔓延十數省報銷款目所在多有若責令照例辦理不獨虛糜帑項徒爲委員書吏開需索之門而且支應稍有不符於例卽難核准不得不著落賠償將帥宣力行開甫邀恩錫旋迫呼甚非國家厚待勳臣之意著照所請所有同治三年六月以前各處辦理軍務未經報銷之案惟將收支款目總數分年分起開具簡明清

單奏明存案免其造冊報銷此係朝廷破格恩施各路
統兵大臣各省督撫具有天良務須督飭糧臺委員核
實開報不得因有此旨任意影射浮冒並著嚴禁勸捐
歸補名目及私設釐卡等弊如有不肖委員仍以前項
情弊巧爲嘗試別經發覺除將承辦各員嚴辦外必將
各該統兵大臣及各該督撫等從重治罪部中書吏如
有在各處招搖撞騙濛混包攬者并著嚴行拏辦以懲
奸蠹其自本年七月起一應軍需凡有例可循者務當
遵例支發力求撙節其例所不及有應酌量變通者亦
須先行奏咨備案事竣之日一體造冊報銷不得以此

次特恩妄生希冀將此通諭中外知之欽此 謹按軍需報銷自乾隆朝刊頒則例准銷各款有條不紊然蕞事之後造冊請銷一收一支不能針孔相符於是部吏得以持其短長嚴加駁詰而所謂部費一款每百幾釐幾毫者數遂不貲自帥臣以逮末僚凡厠身行間勻攤追賠無一漏脫存者及身死者子孫久迫追呼非呈報家產盡絕由地方官驗明加結具文咨部不能完案其有前經帥臣奏咨後難結算者則歸屬兵省分州縣流攤名爲軍需挪墊兵差挪缺等款亦動經數十年始得歸補而州縣又不勝其累是以部費一說視爲固然萬

口同聲略無隱諱蓋自停遣督餉大員後每遇征伐帥
臣兵餉兼操內而戶部外而藩司支數可稽用數無考
而軍中大小將吏得以多立名目肆爲侵冒皆恃部費
爲護符貪狡成風眞堪痛恨然猶全用旗綠官兵調發
若干死亡若干人數尙有可核而浮冒侵漁弊已如是
若此次廣西髮逆倡亂捻匪繼之烏夷又繼之回匪又
繼之越時至十四年行師至十餘省招募之勇十居七
八經制之兵十纔一二某路某帥招募若干撤換若干
某路某戰傷亡若干更補若干其立營補額均未隨時
奏咨備案其隨營執事文武員弁條入條出亦不報部

存查爲薪爲糧扣曠扣建紛紜轆轤無從清釐各路統
兵大臣肆意專擅非不知事後報銷無憑核算必成不
了之局亦惟賴別籌部費耳乃荷 聖主如天之仁不
以擅行召募浮冒滋多逐年參稽水落石出行專制之
嚴譴追濫費之帑金轉蒙 大賚宏頒錄功宥罪旣往
不咎咸與維新凡在事之獲保身家者不下數千萬人
而州縣得免於流攤部書失望於需索 湛恩汪濊開
國二百二十年所未有也當癸亥甲子之交江南官軍
嚴圍復合百道環攻收復之機端倪可觀戶部書吏知
復城之不遠也報銷之難緩也約同兵工兩部蠹吏密

遣親信分赴髮逆被擾各省城潛與各該省佐雜微員
中狙詐狡黠向與部書串通又能爲筦庫大吏關說者
商議報銷部費某省每百幾釐幾毫粗有成約一面遣
派工寫算之清書攜帶冊式就地坐辦蓋各省藩糧鹽
關四庫款目及捐輸釐金等項存庫舊籍報部清冊其
名目省各不同不得不就地查核以求符合此輩資斧
紙筆皆由部書墊給統歸分年准銷部費內增扣歸款
合計所墊在數萬金而其時王夔石中丞方官戶部郎
中灼知將來報銷萬無了局因創請免冊報私議堂司
同僚中多有聞而善之者至是江南報捷中丞適以京

察授湖北安襄鄖荆道將出都矣倭大司農約同堂上官密取中丞議稿參閱酌定七月十二日齊赴戶部內署召司員中工楷書者數人局內堂門某錄稿某用印某繕摺至漏三下辦畢乃偕各堂官隨議政恭親王詣宮門遞摺 兩宮皇太后召問稱善 命卽頒諭宣示中外 詔書旣降都人士歡聲如雷各部書吏聞而大駭有相向泣者茲事詳見李黼堂中丞寶章齋類稿此同治朝曠典也不可以無記

家荔裳侍郎嘗語人曰林文忠辦事必替人設想故人感之入骨此可爲用人之法自其爲知府以至總督凡

所辦之案皆鈔有副本凡二十六馱目錄四篋以二僕專司之其明察非由寄耳目於人蓋遇事好問開誠以待故人亦樂於傾吐也

益陽胡文忠公薨於軍羅少村觀察祐從文忠久哭之慟將斂少村以手按文忠胸閒雖微冷而與肢體異久之若翁翁動力持勿遽斂猶冀其復蘇也至三日摺弁回文忠疾亟時奏請開缺之摺奉 硃批湖北巡撫著李續宜暫行署理接統各軍少村乃附文忠耳大聲讀之文忠平日兩目光如電至是忽大張若微頷之者侍者駭走旋一暝不復視少村再按心閒則方寸寒於冰

鐵矣文忠血誠謀國耿耿寸丹死而不死必待親聞

俞旨付託有人而後瞑也

胡文忠公在黔日先大父與吳文節公合疏保之其後往來書牘甚夥親筆數通在晉陽日爲陸紫英攜去今檢得二通爲文忠集中所遺者錄之如左文云仲昀老伯大人閣下奉手諭感誦不能去手敬想鈞候萬福勳望日隆至以爲慰制置全蜀其地吏治民情殆不如秦地之瀘美黔中之禍迄無定局邊防虛糜殊少良將竊謂近年大局自以求將才爲先務大寇未平民且狡起戎心一盜夜呼千人駭辟篝火狐鳴所在皆是求將於

已亂之國是所謂亡羊而補牢也求將於未亂之國是所謂未雨綢繆也蜀人多聰明伶俐之士頗少負固不拔之槩以全省之大必有奇才老伯之慧眼求之必有應召而至者矣椎魯質直不愛錢不怕死庶幾得之至吏治之積實兵禍之所由起老伯大人明於天人之際卓識遠猷曲成不遺在外近四十年封疆老臣中外一人而已殆如裴晉公之於唐韓忠獻之於宋庸淺如姪不必贊詞楚邊不必設防徒糜餉糈與其設防於邊而日久懈生終不可戰不如物色良將於督標另置選鋒嚴立課程日夜訓練

城市之人卻不可恃南塘選兵一必取鄉僻之人樸而耐勞也

且有警隨機應變平時有藜藿不採之威臨事有折衝
千里之勢計無有切於此者矣時局所慮在無將無餉
而實則兩患仍在當事之非才譬之草木均可爲藥惜
無嘗百草之人詳其性審其味而因病處方耳又嘗試
之始必猝然遇毒因而自悔其初心則視天下無可爲
之事聖賢豪傑睿知過於常人然古無不受欺不喫虧
之豪傑也仙佛尙有魔劫況以身任天下者哉軍興六
年矣凡天下之財如鹽課釐金牙帖捐輸均可濟餉有
人經理以開其生財之道行閒諸將能尙廉恥敦氣節
力戰制賊以節其流則數年內浪費之財豈尙不足耶

湖北兵政吏治人才殆難言狀而兵勇之怯懦將備之
虛憍亦一時無兩目下城賊之食將絕倘無他變或可
倖成秦餉爲襄陽土匪猝起久不到營隆貺至厚無如
匪不滿千府縣自潰秀帥發兵又潰昨以南岸千二百
人援剿或有濟乎騶從入蜀必先求者姪之餉耳迪庵
與姪之水師敢戰人能言之老伯亦素信任而不疑姪
之立志必使營哨之官盡廉潔不私一錢其章程所定
薪水又實足以養其廉而兼有愛士之餘力擴充此義
楚軍可以大強亦可以久而不弱然此時積欠近三十
萬強兵與弱兵廉將與貪將混而同之或且軒輊而偏

私之是則天時人事之不可以理解者矣幼讀李忠定傳輒憤不能食今則曉然於命之所在乃轉坦然矣武漢若復肅清境內尙有所待姪意欲添舟以載陸師如杜征南王龍驤之蹟古人以舟兼陸如平淮夷而賦江漢之詩及漢之樓船橫海下瀨旬踐之習流夫差之餘皇呂蒙之伏精兵冒白衣皆未嘗不登岸也若得水師之專水戰者八千人分爲兩翼得陸師之習陸戰者萬二千人分爲兩部各以一留後以一東征陸軍亦載於舟中水師先導陸師突起擊之出不意而攻不備吳會之地必可速勝舟中攜三月米錢薪煤則陸師可三月

不賈水師所攜亦如此惟三月之火藥礮子各須三十萬筋而陸師之坐船必須另造大不易耳其必分兩班者凡戰久必多傷必疲兩班則力不疲而戰守胥有賴耳且深入與賊戰可倖大勝賊必堅守不出以老我師以逞其故智我仍登舟以歸賊知班師矣必他計而改途後之留守者改爲征兵飄忽千里豈非將軍從天而下耶多方亟疲之法莫捷於此即使無功亦使賊多備而虞我力爭上游則於吳越之事必紓

水師舳板十
六人長龍廿

人其大者或倍之再倍之必不能舍舟而陸此非另備一軍不可水師易強在哨官得人頭工柁工得人則一船之人不能退亦不能逃逃則自溺耳陸師束伍難於水師亦異於水師故陸師難強非另以陸師改水師

不可其陸師之長夫每十人須三人又必另覓人以駕舟是又於長夫之外添一枝水手經費頗繁其設計爲此者特取其神速出入變化莫測耳又陸師藉舟以運其神奇而長夫又必不可少蓋深入之時或江岸以內一百二百里須安營壘故費不可省耳如此計不可爲則非節節打通不可竊料賊之堅守已成慣技非三五年所能蕺事而天下之財力竭矣東南之賊黨多矣吳越之禍端又必日亟惟姪之從事除黔中外從戎已三年絕無三日之餘糧足以從吾所志上年欠餉太久一潰了事本年又欠至數十萬軍心尙堅軍政尙有律然心彌苦矣安得粵西始事之時之餉假我三四十萬金得以添船添勇爲此大舉亦不過空言無補耳以老伯知己之感故敢發

其狂愚以備異日之采擇姪師久無功心跡不能自見
卽欲自陳惴惴然恐其不情中朝大老自黔中作守後
音驛不時不惟不敢亦不暇伸紙作書意緒萬端詞不
能擇尙乞鑒恕愚姪胡林翼頓首又一通云仲昀老伯
大人鈞座時局艱難一年之中禍變若此讀手諭如讀
劉子政屈靈均文字抑塞悲憤憂思惘惘皖南北軍情
已另疏前函中金陵蘇常及分犯嚴州之賊均已並力
西犯若知滬瀆之兵不足顧忌而鎮江揚州之兵固守
尙自恐不贍故得悉數西犯而無復忌憚矣鄂餉自蜀
吳阻兵商賈不通積欠甚鉅近年臺臣非復大公無我

仁愛鄂民如老伯之在秦在蜀時也且各省亦均爲京
餉迫切自顧不暇惠不及鄰時實然也固不足責惟水
陸亦萬人欠餉三百萬以飢軍禦強寇如履春冰臨白
日一生危殆固在意中天末孤臣一身不足惜獨惜以
僨事被惡聲而東南七省均將同流合污爲賊所淪胥
而鎔成一片耳刻下援賊眈眈日伺吾釁軍出雜沓批
答甚煩前月大病尙不得死活亦癢耳手此載請鈞安

林翼頓首

沈文定在樞廷最久兼管譯署值外交艱棘之秋日本
侵我琉球之案俄羅斯還我伊犁之案臺臣講官交章

論列咸咎總理衙門之失機文定承文文忠寶文靖後
一意持重 東朝憚於發難 德宗正在沖齡不得已
之苦衷固不能歸罪文定一人也其持躬清介爲同朝
所無外吏餽贈多卻而不受所居東廠胡同邸第門外
不容旋馬入朝從未乘坐大轎與後來風氣迥不侔矣
然其官戶部時以持正幾爲榮文忠祿所傾厥後文忠
入政府 孝欽顯皇后恩禮有加後亦稍稍惡之嘗因
病請假比疾亟 孝欽一日語善化曰榮祿用心太過
有時有偏處我從前幾受伊欺蒙善化因從容請 太
后詳言之 太后曰榮祿在內務府時屢言沈桂芬之

壤處且言不將沈桂芬調開不好辦事吾亦疑沈桂芬
太迂謹一日貴州巡撫出缺適沈桂芬未入直我有旨
放沈桂芬爲貴州巡撫而寶鋆李鴻藻堅不承旨謂本
朝從無以軍機大臣尙書出任巡撫者沈桂芬在軍機
多年並無壤處臣等皆深知之如 太后不收回成命
臣等萬不能下去碰頭者再我乃允許之此事實爲榮
祿欺我也善化嘗與榮泛論舊日樞臣榮頗詆吳江甚
矣大臣之忤刻也

崇公綺謝病不出者二十餘年己亥有 旨將召用日
與靜海相國密謀廢立事一日相約至榮相宅榮直樞

廷未歸二公坐以袂榮相歸二公袖一稿以東朝有廢立意告榮且援漢霍光事相證翼榮贊助之榮曰此何等事而兩君鹵莽爲之乎且不慮外人干涉乎二公意未已榮遽拂衣入內二公乃踉蹌去其後慶親王以李文忠詢各國公使語上聞此議始寢

今上宣統之初以醇親王載灃爲監國攝政王所有攝政王禮節經廷臣會議奏請奉旨准行凡十六條

府第定於西苑中海劃出集靈囿一帶並於三所卽阿哥所作爲平日休息之地命鑄金章鈐於諭旨

自十一月二十一起卽在養心殿召見樞臣賜

坐惟梁敦彥不賜坐 召見畢卽看書至懋勤殿選用
書籍

隆裕皇太后移居長春宮東暖閣 上居西暖閣便於
照料俟 召見事竣 上仍至 養心殿傳膳休息
兩宮甚爲親愛

景廟上仙之前數日忽 命匠人將瀛臺舊設之杙橈
鋸其足若干寸語侍臣云將爲若輩之用頃 召見禮
節例需用矮橈一時未備惟內務府大臣知前日之事
猛憶及之遂取以應用亦奇兆矣

孝欽顯皇后訓政時凡臣工密奏留中者扁鐻數篋其

鑰匙自帶嗣於病中付 隆裕皇太后收藏頃已由
攝政王請鑰匙下將於暇時一一披閱另備二篋存儲
近日要件其鑰匙亦自行佩帶云

順德李文誠公於光緒二十年七月順天學政任滿還
直 南齋時邊事日亟公與同直陸公潤庠張公百熙
陸公寶忠聯銜奏請起用恭忠親王略曰倭患之貽誤
於前日者不足言矣此際前茅失利藩籬全潰疆臣無
囊底之智當軸窮發蹤之方上無以酬浩蕩之施外無
以塞臺諫之劾推原其故毋亦當國者處疏遠之地而
懷疑畏之罪也夫同一李鴻章何以前時所向有功今

日一籌莫展同一倭國何以往時犯臺灣而不利今日
戰高麗而無前外朝諸臣皆病政府非才不知以今日
事勢揆之固然其無足怪也夫以禮親王世鐸之才思
平庸其不足以驅駕李鴻章亦明矣領袖如此餘人之
退聽者可知政府之執政權者如此總署之稟承政府
者又可知一旦事會艱危計維仰稟 宸謨規避擔荷
救過不暇何論立功此次軍務遂至仰煩 宸廑添派
大臣會議夫既增派則政府安用政府尙不足恃會議
又安有權無惑乎其無功也疆臣視政府爲避趨政府
又聽疆臣爲進退兩相推諉卽互相貽誤究其用意避

處分焉而已一歸宸斷庶隱然自立於無過之地縱有降謫爲罪亦輕此其爲計甚工而不知國家已陰受其病也然而勢使之然也夫事勢至今日無人不知恭親王之當棄瑕錄用矣然而政府不敢言前日不言而今言是自求禍也外廷不敢言以爲言之未必用且罪在不測也夫時事至艱危而猶避不測之罪是國家養士終無食報之日也養士又安用哉夫恭親王之過失自在皇太后皇上洞鑒之中臣等亦無勞多瀆矣特念咸豐末年時事之難有逾今日計其才具在當日實收指臂之助揆以當日之成效責以今日之

時艱或冀一番振作若慮不堪任使再有負乘則以

皇太后之聖明臣知其不敢再負 聖恩自速官謗

臣愚以爲今日者允宜開張 聖聽豁除瑕類庶收其

識塗之效以贖其往日之愆如得請於 皇太后則

國家之福實式憑之語曰君子不施其親又曰故舊

無大故則不棄其於今日事理若合符節詩曰發言盈

廷誰敢執其咎今樞廷無執咎之人而築室有道謀之

患豈發言盈廷無一人能決是非足以啟 聖心而贊

廟謨者臣實恥之臣實痛之計 皇太后 皇

上聖慮崇深未必不曾紓 宸眷但早收一日之用或

早成一日之功宇內生靈免於塗炭其有繫於億萬
年丕基之遠者實非淺鮮若遲久後用無論挽回匪易
一經敗壞方議拯救縱使及事所傷實多疏且上公慮
天威不測願獨受其咎摺末有臣文田主稿語陸張
諸公固不許乃刪之書御稱 旨由是廷僚交章奏
請者踵相接九月初一日恭親王遂以管理海軍大臣
督辦軍務節制前敵諸將帥逾月復入軍機

光緒季年創行立憲議改官制樞臣頗主其說張文襄
駁之電文四千餘言中間無事自擾數語意蓋有所指
乃未幾而九年籌備章程出文襄入樞府年餘尋以疾

薨於位而世變已不可究矣讀此文有餘恫焉 議改
外官制事敝處昨電復京師錄稿奉覽其文曰效電悉
愚繹 諭旨以定官制爲立憲預備則此次官制之應
如何改定自以有關於立憲之利害爲主其無關憲法
者似可不必多所更張轉致財力竭蹶政事叢脞人心
惶擾攷各國立憲本指不外乎達民情采公論兩義此
二事乃中國聖經賢傳立政之本原唐虞三代神聖帝
王馭世之正軌心同理同中外豈有殊異 聖諭剴切
深厚自應切實籌議推行謹分條奉復如左一設四鄉
讞局議事員董事員詳讀尊電各條惟設鄉官設議事

會董事會兩法有關立憲本意竊惟中國風尙鄉紳自愛者以不管公事爲有品或遇有關利害安危大端偶一任之或必須地方官敦請始來與議其平日自願管地方事者及好管地方瑣細事者多非端廉之士若槩名爲官必不免徇私作威包攬利權嚇詐鄉愚抗擾政令諸弊故四鄉分理細故詞訟之鄉紳不宜名之爲官只可同爲鄉長若當日團長團總之例亦不宜襲日本分區之制名爲區官查咸豐同治年間髮捻爲亂皖豫山東及直隸南數府處處辦團流弊滋多除黔團通賊謀逆如苗沛霖之類不計外卽不爲匪之團亦多有抗

糧抗案擅殺尋仇諸弊幸官軍剿平髮捻諸團或懲或散始漸敕平今豈可導之使亂至議事董事兩會未嘗不可設立但一須正其名義二須定其權限名義者只可名局不可名會查各省府縣多有紳局或主捕盜清匪如廣東之安良局沙田局之類或主籌費濟公如四川之三費局夫馬局陝西河南之車馬局之類此外隄工善舉各局所在多有名沿其舊則不僭不驕屏去會名使不至爲江湖會聯莊會三合會哥老會各種作亂之會匪所影射此名義也權限者議事之員但許有議事之責不予以決斷之權其議決之可否悉由官定以

審度其可行與否至董事之員只可供地方官之委任
調度不宜直加以輔助地方官辦事之名若權限逾分
必致官爲董制事事掣肘雖有地方監督之說徒存虛
文而已其爲害殆不可思議故議事之員能議而不能
決董事之員宜聽官令而不宜聽紳令此權限也尊電
因擬裁知府故未言及府城之議事董事各員茲鄙意
擬請仍留知府則府城亦應照州縣辦法層遞設立議
事局董事員其權限亦與州縣之紳董同以總達各縣
之民情供知府之委任惟分理各鄉讞局之鄉長及議
事董事之員須由本縣人公同推舉其推舉此各項紳

董者必須家有中人產業而又素行端謹者方許列名
爲推舉人由官選定派充稟報如公派不公准其赴省
控告民舉不公准本縣官停議另舉如此則民情可上
達公論可上聞而紀綱等級尙未廢棄破除紳謀官斷
互相補救似與 朝廷勤求民瘼之意相合俟行之十
年以後學校日增士民智識日開道德日進設有囂張
惡習狂悖言行隨時訓導儆戒俾其道德之效不致爲
犯上作亂之行其智識之效能諳習一鄉之情形明曉
全國之大勢並能通知中外交涉之大端國家政事兵
事之梗槩究其要歸必其智識不離于道德尙武不越

乎法律範圍方爲合格屆時體察果能臻如此之程度再議立憲之大舉自然有利無弊若十年以後人民道德未能盡純智識未能盡充則尙須從緩僅照以上所言各府縣分設鄉長分設議事董事各員官紳互相維持策勉亦足以破壅蔽杜徇察窮簷之疾苦采巖穴之良謀尙不至大有流弊也一議改州縣之制攷本朝沿明制州縣分三等曰繁曰中曰簡本有等差與漢唐縣官之制大同小異今欲重其品秩而又分爲三等則大縣稱州中縣稱廳小縣稱縣可也蓋外間同知稱廳理民通判理苗分防州同州判民間亦稱廳似體制

較州爲稍遜至廢去知府而令大縣稱府則似有未安
各省幅員遼濶輪舶罕通每一府所轄少則四五縣多
者至十縣各縣距省遙遠極遠者至二三千里賴有知
府猶可分寄耳目民冤可伸理災荒可復勘盜匪可覺
察飭緝若盡歸省城攷察豈能徧及待該縣稟報至省
禍亂已成控告到院司民命已斃矣故裁去知府一說
萬分窒礙勢有難行稱府而無屬縣名義亦難解似不
必蹈襲日本之故套以東京西京大阪三處專名府也
既有屬縣則事繁體尊附郭之首縣不宜裁矣至每州
縣各設佐治官分掌財賦巡警教育監獄農工商及庶

務甚爲有益惟員少不足濟用祿少不足養廉員多俸厚經費太鉅今日州縣之俸大率因處分被罰其養廉亦多司庫因公款扣抵不能全領安有餘力鉅款爲新設之州縣佐治官籌俸廉哉似宜聽州縣量力延訪委員較爲可行一議改省城院司各官之制第一層辦法諸多不便院司合爲一署同畫一稿定時入署一節晷刻有限必致草率敷衍一也京城每一部皆一類之事然且每司各自有印各自有稿若一省督撫及各司道則兼有各部之事若併爲一署無此廣大靡舍能容許多官吏能存許多案牘二也近因患責任不專故督撫

只留其一今設兩丞豈不又添兩巡撫乎定多牽掣推
諉三也院司局各有等級各有責成各有印信能自行
文牘其閒交駁異同亦可收匡助之益卽有謬誤責有
攸歸倘併爲一稿必仍是一人作主若督撫矜於則兩
司徒畫黑稿若兩司跋扈則督撫祇如贅瘤六部堂官
雖多仍是一人主稿先行東三省事務較簡豈能以例
內地外省衙參之期司道公見不過略譚大指並不能
立時籌定辦法大率有重要事必須與司局著重之一
二員或二三員便坐燕見或至日晡或至夜分縱談深
慮反復籌思乃能籌定一議卽京部堂司商推要政亦

都是司官赴宅內詳陳密談乾隆以前名臣皆是如此若到署片刻不查案不思索恐未能遽籌得至當不易之辦法四也至於府縣文牘直達於省由省徑行州縣一節查照例公牘無論上行下行乃是層層遞轉若緊要事體州縣一面徑稟督撫一面分稟司道局府謂之通稟通詳督撫亦徑批札州縣軍興以來此類甚多至今猶然不患不能直達也至每省設高等審判廳行政司法各有專職一節尤所未喻一省之中臬司卽是高等審判廳矣另設一廳何爲若謂臬司是行政之員須另有司法之官則臬司問案擬罪仍須督撫核批達部

者須督撫核轉總須俟部復始定然則臬司及督撫卽是司法之行政刑部卽是司法矣何必剿襲東語多此紛歧哉傳聞獻議者並有擬由高等審判廳以直達法部督撫但司檢察不司裁判之說不勝駭異想貴大臣未必允行假使萬一採用其言則以後州縣不親獄訟疆臣不問刑名昔孔聖知本專論聽訟魯莊勝齊惟恃斷獄若州縣不審判則愛民治民之實政皆無所施以此求治未見其可且外州縣距省或數百里以至二三千

里若裁去知府則冤獄偏斷何處申理小民尋常訟案亦必將賣產爲資赴省上控卽使省控而督撫臬司

亦不能審判仍須取決於法部理院夫老弱窮嫠安能
奔馳數千里而京控乎京師部院能日訊全國數千萬
起之訟案乎假如文武官吏有犯而督撫不能審判何
以號令屬官乎第二層辦法似尤多窒礙之處民政以
警察爲大端乃臬司分內事何以不屬臬司而屬藩司
理財乃藩司分內事何以不屬藩司而又別立財政司
且通省財政關係極重而秩視運司轉較學臬爲小卽
如現在藩學臬運糧鹽關河權限本自分明不相淆混
乃亦議改變則尤可不必矣若知府一官鄙見必須留
之不宜裁撤因其去民較近轄屬較小可爲院司分任

攷察旣留知府則巡道似可裁撤惟各省設巡道之本
意大率以兵備爲主前三十年軍務近二十年教案等
事則道員之責較重取其官階較崇調遣武營較易故
地理學家之要訣須先將一省各道之疆域分清則一
省之形勢脈絡瞭然於胸此可知前人建設巡道之有
深意有關係矣至知府職司如所屬州縣錢糧奏銷災
荒蠲緩私讞審轉州縣倉庫交代盤查出結代賠之款
皆知府考成州縣出缺由知府委員代理均不由巡道
轉詳議者或慮司之下府之上添一道員徒多層折重
複此未知外官例章職守道府各有取義也至如湖北

之襄陽道則有關三省邊防教案湖北新設之施鶴道亦專爲教案邊防均甚有關係似不應在裁撤之列此外卽如湖南鎮筵江南徐州河南南汝光四川建昌甘肅寧夏安徽廬鳳潁此數處皆非糧鹽關河然豈可無道台鎮守然則各省道員似以不裁爲尤妥在省之官除藩學臬三司仍舊不改三司之外尊電擬留糧鹽關河四項道員惟旣不分巡則道字之名義不協此四項擬改名爲參政秩從三品此外緊要各局所視該省必需者留之不必各省一律該局總辦擬名爲參議秩正四品以裁缺道員及候補道充之蓋前明官制外省本

有參政參議副使僉事之屬正是兩司副貳今設此以爲知府升轉三司之階庶免過于躐等若不裁巡道則一切名目可仍其舊矣抑更有進者旣設議事董事之紳又增佐治之官則州縣應議應辦之事日多各種治理皆賴財用學校警察農商工業河隄水利凡一切厚民生捍民患之事非財不濟各國制度皆分國家稅地方稅兩端斷宜劃分酌留不致竭澤而漁庶教養諸政可以實行此方是立憲要義愛民眞際應請貴大臣於此項一併議及是所感幸總之今日預備立憲只須合立憲之用意不必求合于海外立憲國之官制大抵中

國疆域廣大數倍于東西各國而輪船火車電線通者
什一不通者什九且立國之本原歷代政體相沿之成
局國民性情之利病目前國家之實力中外各自不同
豈能事事強合況君主立憲之國惟日本與德爲然故
論者謂中國立憲宜仿此兩國法德與日之官制曷嘗
相同哉請檢攷之可悉也竊惟今日國事多艱 宵旰
焦勞貴大臣公忠體國故求治之心不自覺其過亟特
是度德量力善俗以漸經典明訓用法宜得法外意史
冊良規方今天災迭乘民窮財匱亂匪四起士氣浮囂
外省之學堂無不思干預公事攘取利權海外之學生

尤爲狂妄動輒上書政府干預 朝政凌辱監督橫索
錢財電致本省督撫詆斥地方官及加查核十無一眞
其悖謬情形罄牘難書而待舉之新政甚多州縣外受
督責內憂賠累疲于奔命無米爲炊督撫支左絀右掇
過不遑但能撫綏鎮遏平靜无事已自不易若改變太
驟全翻成局需費太多課虛責有不惟官吏耳目眩惑
无從措手權力改變呼應不靈竊恐民心惶惑以爲今
日卽是官民平權刁民地棍藉端鼓眾抗糧不完釐稅
不納緝盜匪則抗匿不服籌賠款則抗欠不交傳訊不
到斷案不遵一切紀綱法度立卽散亂踰越國紀一失

而難收民氣一縱而難靖恐眉睫之禍將有不忍言者矣昔唐賢有云天下本無事乃庸人自擾之耳洞竊以爲不然无事自擾尙无大害若方今四海有事之日再加之以擾則不可支矣且庸人安能擾天下惟才敏氣盛急于立功名之人察理不眞審勢不明貿然大舉乃能擾天下耳宋王安石豈庸人哉洞近年以來於各種新學新政提倡甚力倡辦頗多豈不願中華政治煥然一新立刻轉弱爲強懾服萬國第揆之民心衡之物力實不宜多有紛更官制各條以洞愚見論之似不盡與立憲關涉竊謂宜就現有各衙門認真攷核從容整理

舊制暫勿多改目下先從設四鄉讞局選議紳董事入手以爲將來立憲之始基如能實力奉行此尙是達民情采公論之實際亦可稍慰環海望治之心至目前民生困窮動輒思亂欲求養生感民心之術則以少取於民爲先多興實業次之練兵雖要尙不如安民得民之尤亟憲法精意總不外好惡同民耳總之立憲本義在于補救專制之偏日本立憲之要語曰萬事決于公論果能事事虛衷諮訪好惡同民雖官制仍舊無害其爲立憲政體如不能集思廣聽事事皆爲國民公益計則雖盡改照日德官制名目仍無解于上下之睽隔民

情之困苦怨咨也貴大臣所議似宜慎重圖維博采周諮然後奏請施行方于立憲體裁有合洞衰病迂庸媿无奇謀速化聳動四方之策承問奉復曷勝惶悚幸惟裁察如有管見容當續陳之洞肅洽等語祈賜教洞嘯張文襄公遺摺爲陳仁先侍御 曾壽 屬草陳弢庵閣學寶琛潤色而公於枕上改定之中有云臣平生以不樹黨援不殖生產自勵他無所戀惟時局艱虞未能補球累朝知遇未能仰酬將死嗚哀不敢不據其愚泣陳於聖主之前當此國步艱難外患日棘民窮財盡百廢待興朝廷方宵旰憂勤預備立憲但能自強不息終可轉

危爲安伏願我 皇上親師典學發憤日新所有因革
損益之端務審先後緩急之序滿漢視爲一體內外必
須兼營理財以養民爲本恪守祖宗永不加賦之規教
戰以明恥爲先母忘古人不戢自焚之戒至用人養才
尤爲國家根本至計務使明於尊親大義則急公奉上
自然日見其多方今世道凌夷人心放恣奔競賄賂相
習成風尤願我 皇上登進正直廉潔之士凡貪婪好
利者概從屏除舉直錯枉雖無赫赫之功而默化潛移
國家實受無窮之福正氣日伸國本自固凡此愚誠之
過計皆爲聖德所優爲倘荷聖明採擇則臣雖死之日

猶生之年 下略 先一日已擬定 特諡文忠或文正比
遺疏上以不樹黨援不殖生產二語觸某邸之忌臨時
忽易前議改諡文襄云

京師貢院聚奎堂壁閒石刻明萬厯庚戌取士詩七律
一章耀州王圖作王字則之官侍郎萬厯三十八年主
會試見明貢舉考略天啟四年其子淑卞亦主試和原
韻附刻于石閱三百年片石無恙自來主鄉會試者多
用原韻賦詩相贈答光緒辛卯鄉試余充同考官副主
考徐壽蘅侍郎樹銘有詩余和詩四章越九年庚子之
變八國聯軍入城其後借河南省城舉行鄉會試又至

丙午而科舉廢貢院鞠爲茂草矣

本朝以一甲第一人位至大學士者聊城傅以漸武進
呂宮崑山徐元文金壇于文襄敏中會稽梁文定國治
韓城王文端杰大庾戴文端衢亨吳縣潘文恭世恩至
光緒閒南皮張文達之萬常熟翁同龢壽州孫文正家
孫嘉定徐郟元和陸潤庠凡十三人

道光閒東閣大學士王公鼎病卒遂不復開東閣至光
緒十年左公宗棠授東閣大學士蓋相距幾四十年矣
長沙王益吾祭酒先謙自江蘇學政告歸卽不出著書
滿家不與外事新學盛行獨持正論致遭時忌宣統二

年春省城米價騰貴羣情洶洶當事者措置弗善巡警道賴承裕出南門彈壓被眾攢毆營官楊明遠挾之入城城內外痞徒麇集閱於巡撫署岑撫懼不敢出眾益驕聚者益多乃斫旗杆毀轅門以洋油潑大門縱火焚大堂衛隊發槍傷人各大街皆罷市各官吏及紳士皆集于撫署布政使莊賡良等步行勸開市眾稍散巡撫上疏自劾遽以巡撫關防授莊布政布政不警輒用關防鈐告示而自稱護理巡撫時並未奉旨也總督瑞澂惡湘中三司之不先電聞也

年老回署後志之

又中讒遷怒於湘紳

按察周儒臣已與莊布政擬電馳告總督而莊湘紳黃自元等電總督請以莊布政爲巡撫總

督遂 疏劾官紳若干人而王祭酒以電文中首列名遂
遭嚴譴奉 旨降五級調用孔憲教葉德輝楊鞏皆革
職永不敘用德輝交地方官嚴加管束巡撫岑春煊布
政莊賡良巡警道賴承裕皆革職按察周儒臣革職留
任長沙府知府長沙善化二知縣並革職留任方事之
起一面安撫一面查拏肇事之人尙易結束曾不意釀
茲大獄也

巴陵謝君維藩字麀伯壬戌翰林忼慨尙志節官編修
時值畿輔水災兩上疏諫 大婚繁費請節用以振飢
民語切直 上優詔答之官山西學政復屢疏言邊事

戊寅歲飢集同志設廠爲粥以食餓者口徒步騎陽中
懷胡餅數枚自啖遘疾遽歿順天府尹上其事 詔以
生平善行載本籍志乘蓋異數也其友丹徒陸襄鉞刻
其詩曰雪青閣詩集南皮張尙書薌濤先生將輯其詩
與臯蘭吳柳堂仁和家子儁兩先生詩合之爲三良集
屠仁守字梅君湖北孝感人吳兆泰字星階湖北麻城
人皆由翰林官御史屠以光緒十四年十二月上疏請
皇太后收回成命仍前聽政 懿旨嚴責交部議革
職吳於十六年九月疏請停頤和園工程奉 旨交部
嚴議亦革職兩御史皆湖北人又先後居虎坊橋東阡

兒胡同又十七年二月御史高燮曾請行日講奉旨
駁斥高亦湖北人

法源寺僧靜涵自畫小影徧乞公卿名流題詠常熟翁
尙書吳縣潘文勤南皮張尙書豐潤張幼樵副都貴筑
黃再同編修詩皆有詩再同詩中一聯云白憐僧鬢垂
垂短紅妬花顏歲歲妍頗寓伊鬱之感未幾奔其尊人
子壽先生之喪於武昌遽以毀卒訃至京師同人於法
源寺爲位而哭之余亦與焉重展舊題可勝悵惘編修
嘗讀書寺中其西偏室三楹榜曰書龕再同手書也

舊例 殿試收卷官在 保和殿左門外收卷試日京

朝官有朋好與試者得衣冠入於收卷官案頭請觀試卷名曰接場相沿久矣光緒癸未榜發山東陳冠生冕書名重一時宗室意園祭酒最器之以大魁相期許陳亦自負不作第二人想接場日祭酒偕志伯愚張延秋梁節庵諸人往觀陳卷眾皆稱賞祭酒忽喏曰誤矣策中詔字何單擡耶陳婦翁廖侍郎趨視大駭遣人覓陳已出矣祭酒乃奮筆於詔上添特字侍郎揖之而出比傳臚陳卷果第一而其事頗喧傳臺官有上言一殿試關防不密者於是奉旨自後由監試王大臣於殿上收卷丙戌余應殿試卽在殿上交卷見監試王大

臣於卷尾畫押始退出自是接場之風息矣

是科 殿試讀卷大臣覆 命折彌封第二名宗室壽

慈聖諭諸臣曰宗室曾得鼎甲否副都張佩

綸對蒙古崇綺得狀元漢軍楊霽得探花今宗室得榜
眼可謂熙朝盛事 諭曰既如此卽定壽耆第二可也

時副都 眷倚方隆奏對尤敏意園祭酒盛稱于梁節

庵節庵曰不然倘我得奏對壽子年必不得矣道光戊

戌宗室靈桂列一甲三名 成廟諭曰我家子弟不必

與寒士爭此一名乃改爲第四節庵熟於掌故好談諧

嘗以之語余云

光緒庚子鄉試各省 簡放正副考官尋以拳亂停止
考試者十一省考官多中途折回或赴 行在或留止
他省迨十月 行在簡放學政其前放考官折回者得
十一人子子士鑑先充湖北考官未出京隨扈赴 行
在所亦同時拜命明年辛丑六月補行鄉試者五省則
甘肅廣東廣西雲南貴州也

陸吾山觀察襄鉞以副貢生入貲官于汴累擢至開歸
道以廉直名于時丁憂起復到京向例丁憂實缺道服
闋吏部奏聞遇有道員缺卽蒙 簡放會有人言吳清
卿中丞請尊崇醕親王典禮疏出觀察手樞廷諸公知

之東朝亦有所聞越年餘屢有道缺而簡放未及乃歸陝西迨庚子兩宮西幸駐蹕西安觀察以在籍道員隨同迎駕姓名得達天聽而觀察自官牧令至河道有賢能聲辛丑夏簡浙江糧儲道一日有內監某至其家以僕某薦觀察謂內監不當與官僚接以義折之內監乃奪氣去亦持正之一端也

崇文門內裱褙胡同舊有于忠肅公祠初名忠節祠卽公故宅爲之者見人海記歲久祠廢淪爲民居小屋數椽俗呼爲土地祠宗室伯希祭酒盛昱居第在裱褙胡同稔知其事同里金忠甫濮紫泉兩前輩商之祭酒清

釐故址凡民居佔住者量給賞令遷讓於是祠址復完
鳩工庀材重建祠宇奉忠肅神位以歲二月設祭合郡
入咸洫別建屋二十餘楹爲杭郡人應鄉會試者棲止
之所其地距貢院近也

土地廟斜街全浙會館舊爲吾鄉趙天羽先生吉士故
宅康熙間捐作會館雍正十二年重修有李敏達衛陳

文簡元龍二碑

李碑周景柱書
陳碑許王猷書

碑云趙公歸里後爲豪

強者攘踞爲己物先生之孫鶴皋走京師訟之官不得
白乃捐白金三千贖還其後一被火厄一爲地震修費
畫棟蕩爲榛墟少詹姚君聖湖孝廉潘君荆山有志修

改值敏達入覲捐奉爲倡兩浙搢紳共輸金成之其旁
闢室數楹俾僧靜山居之更百餘年屋舍傾圮公車來
者不復就居光緒十六年鄉人於南首隙地重構屋宇
最後一層曰景賢祠仍舊額也中祀趙先生及李敏達
陳文簡清恪四公其新構之屋曰拄笏軒綠天深處紫
藤精舍皆趙先生舊題按杭郡詩輯趙先生小傳云其
地卽月張園故址先生築寄園以居北游者吾師瑞安
黃漱蘭通政撰聯云粉鄉萃吳越英華各勵脩名敢道
人文甲天下槐市繼朱查觴詠重新別業恰逢春閨似
當年昔竹垞移居下斜街初白贈詩有最愛今年春帶

閏句是年亦閏三月故云青田端木國瑚嘗居藤舍注
易見太鶴山人詩稿

京師武林會館在長巷二條衚衕創自前明康熙六年
重修有碑記其事有扁額四一曰德音堂黃文僖公題
一爲 御製千叟宴詩乾隆五十年正月 賜州同
加一級溫世爵刑部司獄范紹慶一採花沈清藻一會
魁諸以謙其初聞爲綢業公所其後館役孫玉私售器
具並出賃收其租金歷年久幾無過問者同治二年京
官呈請中城御史查拏清釐仍歸入會館光緒四年以
其地僻遠乃售去得白金二千兩別購市屋收租息以

佐會館之用越數年復於崇文門西城根購阿克丹侍郎舊宅爲仁錢試館光緒庚寅會元夏曾佑壬辰榜眼吳士鑑皆寓試館聞捷音者也

京師楊梅竹斜街蘊和店舊爲梁文莊公故宅中有藤花廳昔日文莊游讌地讀海昌祝止堂侍御感賦長古有主翁一旦騎箕去折券千緡他姓據之句似文莊薨後卽已易主可想見文莊清節矣又汪文端公第藤花最盛今則時晴齋故址無從指識惟朱竹垞檢討海波寺街古藤書屋二百年來屢易主人而藤花老本故猶存也

京師陶然亭在黑窯廠南慈悲庵內康熙閒江郎中藻
所建取白香山詩更待菊黃家釀熟與君一醉一陶然
之句以名之又名江亭士大夫讌集勝地也曹習庵學
士詩穿荻小車如泛艇出林高閣當登山情景最合庵
內有遼壽昌五年金天會九年石幢各一

蕉廊脞錄卷二終

蕉廊脞錄卷三

錢塘吳慶坻撰

吳興劉承幹校

吾鄉丁飛濤先生澎又號藥園與仲弟景鴻季弟滌皆以詩名世號三丁先生成進士官禮部郎中時方冊立西宮念無嫺典恆者調入東省兼主客主客即古典屬國也貢使至必譯問主客爲誰廉知先生能詩以豹皮美玉賂吏人吏人竊藥園詩贖之歸國長安搢紳以爲榮以事牽累謫居塞外崎嶇二千里郵亭驛壁讀遷客詩大喜後車妾亦喜曰得非聞中朝賜環詔耶曰

上聖明賜我遊湯沐邑出關遷客皆才子此行不患無
友渡遼海望長白諸山上人以魚爲飯糧盡輒苦飢河
冰合常不得汲樵蘇不至五日爨無煙取蘆粟小米和
雪齧之日晡山鬼遙嘯夜聞扣門聲童子從隙窺之虎
方以尾擊戶先生危坐自若歲盡無錢磨墨市上書春
聯兒童婦女爭以錢易書去居東岡躬自飯牛與牧豎
同臥起暇輒爲詩溫厚無遷謫態國子藩公聞其名禮
爲上客凡五載始得歸見林璐所撰外傳先生詩名人
人知之此其謫居軼事也

周西坪修撰未第時大司寇勵公廷儀延之入幕以石

門逆書案屬爲勘核修撰得迹涉株連者二十四人力請除名勵公意不謂然修撰曰 聖主好生豈嗜多殺烈風雷雨必不終朝因擬爲奏對而二十四人者竟得免後督學陝西有妄思夤緣私諷家奴通款者修撰旣懲其奴而憫考生之愚思曲宥而明倣之覆試諸生日設盃盃公案上注水滿之召其人捧而擲諸堂下其人愕然乃語之曰爾惜之乎爾身之弗惜而惜此區區者乎卒使擲之復語之曰一經敗壞能復全乎吾與爾猶是也忘身徇賄其可乎其人免冠謝涕泣悔罪遂宥之王禮堂樹隱居北郭有米南宮癖收藏奇石甚富因自

號曰石交選其尤者七十有二梁山舟侍講書七十二
峯閣額以貽之後又得倪文貞公石交圖喜其與己字
合懸之閣中復摹鑄之今石歸余家皮之峭蒨廊以廊
外有巨石上鐫峭蒨二字不知何人題也

龔蘅圃侍御翔麟罷歸清貧居張駝園自號田居王石
谷爲作田居圖其先居橫河沈氏庾園園有玉玲瓏石
宋宣和花石綱之遺也道光間園歸沈蓮叔拱宸同治
間歸周琳粟家勳石故無恙余嘗徘徊其下旁有白皮
松亦百年物也

南潯莊氏私史之獄錢塘陸麗京仁和范文白海寧查

伊璜皆牽連被逮麗京弟梯霞脫身北走投其從舅氏
裘信甫謀申救信甫長安大俠也歎曰酷哉此禍顧前
者投牒訴誣沈閣不上奈何麗京至都復解浙候鞫而
捕梯霞嚴梯霞間道歸自詣獄父子兄弟僕從婦女百
餘口相向哭而裘信甫已陰以實情別白黑輸要路內
外無一人知者比錄囚呼名共二十一家長刀邀遮顛
踏入市陸范查三家竟獲免及信甫死梯霞爲制服三
年泣語子弟曰微舅氏爾曹皆黃沙白骨也世盛稱吳
六奇脫伊璜於難而裘信甫事罕有知者

吾杭藏書家若趙氏小山堂吳氏繡谷亭孫氏壽松堂

汪氏振綺堂海內無不知者至如乾嘉之間舊家遺俗率好儲書而名不顯著者尙多如東城郁氏禮字佩宣號潛亭錢塘諸生家素封藏書充牣潛亭又增益所未備時小山堂書已星散所餘殘帙尙多異本潛亭悉力購之所居駱駝橋去厲徵君樊榭山房一里而近傳鈔祕冊尤夥徵君歿後其家出所著遼史拾遺手稿要索厚價久之不售潛亭以四十金購得之中間尙闕五十葉百計求之不得鮑廷博以文偶步至青雲街見拾字僧肩廢紙兩巨麓檢視之皆厲氏所棄徵君手錄遼史拾遺稿本在焉亟市歸授佩宣芟如亂絲一一爲之整

理閉戶兩月綴輯成編適符所闕之數藏書之室曰東
嘯軒軒額爲董香光書庭中古桂二株相傳明萬歷間
所植交柯接葉清陰覆檐室中牙籤萬軸都成碧色潛
亭晨夕校錄於其間百年以來滄桑幾易東城郁氏子
姓寂寥里中故老無復有知潛亭其人者吳中葉鞠裳
侍講藏書記事詩載佩宣事頗詳

雍乾間錢塘梁氏勳閥旣顯門才極盛而以文莊公孫
履繩玉繩弟兄爲尤著履繩字處素號夫庵於諸經中
尤精左氏傳嘗鐫小印文曰臣有左傳癖撰左通若干
卷析爲六類曰廣傳曰攷異曰補釋曰駁證曰古音曰

臆說錢竹汀詹事見之歎服中年徂謝未及成書補釋
一門三十二卷采摭繁富其子祖恩刊行之玉繩字隴
北號諫庵著史記志疑三十六卷元號略四卷古今人
表攷九卷誌銘廣例二卷呂子校補二卷督記七卷蛻
稿四卷總題爲清白士集蓋諫庵分居塔兒巷山舟先
生書清白堂額昇之因以自號每一書成輒就錢竹汀
盧召弓孫頤谷諸先生商榷故踳駁絕少諫庵寄弟處
素書云後漢襄陽樊氏顯重當時其子孫雖無名德盛
位世世作書生門戶吾仰之慕之願與弟共勉之其風
尙可想矣

顧涑園太守光乾隆戊午舉人以大挑知縣宰清豐有

惠政累擢廣州知府粵督某嫉之遽引疾歸後五十餘年其邑人有禮天竺大士至杭州者知公里居無恙相率三十餘人登堂羅拜而去昔時人情之厚如此仁和

湯典三

禮祥

爲詩紀其事詩云山雞愛毛羽志士重修

名況乃爲民牧毀譽尤易成清豐有賢宰吾鄉推耆英憶昔漳衛水一決連魏城哀哉城下骨尙帶蛟龍腥賑恤招流亡溝壑餘零丁三上河渠書議格終不行紀災淚盈紙鴻鴈同哀鳴距今五十載父老來西陵自言清豐民我曹皆侯生侯今喜健在侯昔何賢能有少年

子傳聞自父兄今幸睹侯面恨未竹馬迎或長跽不起
或稽首階庭或起焚爐香或笑或涕零何以獻我侯紫
棗雜黃橙何以頌我侯壽考而康寧我公前致問小惠
何足稱無端念衰朽而我媿益增願爾爲良民願不負
太平手摩父老頂歡愛如孩嬰出門尙回顧觀者填柴
荆允矣古遺愛亦足驗民情民情有如此願共惜賢聲
太守所居在東城河側敝屋數楹顏曰河干屢自稱河
干先生

于忠肅不諫易儲事後人爭疑之相傳齊次風侍郎嘗
宿祠中夢忠肅告曰當日諫易儲疏留中不發外人無

知者子異日入史館當爲我表章之既而侍郎果直
禁廷與修明史遍檢前明檔案無之餘姚邵二雲先生
習聞其語入館後留意蒐訪最後于通政使署得當時
舊冊有大學士于某爲太子事一摺具載月日數百年
疑案至是始定惜疏稿卒不可得見按此事又見阮文
達擘經室集及先大父養吉齋餘錄

厲徵君東城雜記原名城東雜錄見抱經堂文集跋云
吾祖居在東里坊其北則艮山門其東南則慶春門于
東園最相近桑叟甫先生之居在焉先君子從幼往來
里人有雙先生之稱後之人有續錄者亦可以爲東里

重矣吾祖居卽所謂數間草堂者也

武林卓珂月人月崇禎初作千字大人頌錯綜成章甚有思理開章云大人御天君子名世立千秋基興諸夏利高文起家建景閏帝二百餘年我皇陟位河澄寶出鳳舉毛從虞雲兩旦漢日再中羣黎作乂列州攸同可謂高文典冊篇中嶽伯分佐歲星可招貢珠盈寸舍矢五扶投淵潔耳何傷盛朝帳染墨蹟帷集書囊武功稱甲吉運始丁誠推韓轂令賞終纓語皆警策枇字云鬱尊黃金膳枇素木枇音匕義取祭用素枇也杷字云姑婦任績夫男秉杷杷田器也按卓氏爲塘棲望族明季

國初門才極盛珂月詩有刊本他文罕見漁洋池北
偶談載此一節亟錄之吾鄉羅鏡泉以智嘗集自來重
次干文者凡數十家珂月作亦列其中張仲甫先生嘗
爲之跋兵火以後不可復覩

家小穀太守清皋西穀府丞清鵬爲穀人祭酒孿生子
幼時聲貌無異家人幾不能辨以羈角左右別之祭酒
封翁晚年日雙瞽兩孫至前則摸羈角呼之曰爾皋皋
耶爾鵬鵬耶年十七同入縣學後隨祭酒於揚州安定
書院命小穀與兄小酉作鱗魚詩小酉句云安得萬錢
供箸下卻逢四月住江南小穀詩云人情爭染脂韋易

世味能消骨鯁難祭酒笑曰大兒不脫寒儉氣要亦名士風流八兒乃欲爲強項吏耶一時傳爲美談

張仲甫舍人應昌嘉慶庚午舉人以恭繕實錄議敘中書舍人中歲苦羸疾不復應禮部試惟以箸述自娛所箸有春秋屬辭辨例編八十卷補正南北史識小錄國朝詩鐸藝壽軒詩鈔煙波漁唱同治九年詹事府詹事夏同善通政司副使朱智鴻臚寺卿許庚身 奏進春

秋屬辭辨例編特蒙耆年好學甚屬可嘉之諭老年子姓彫落招嗣子嗣孫賃屋菜市橋東榜其門曰家傳孝友里近忠清蓋所居近忠清里距吾家僅百武耳晚通

禪悅腰腳轉健年七十餘猶步登韜光爲詩紀之

舍人清貧而性孤介杭州東城講舍薛慰農太守創設制義外兼課經解詩賦太守去官卽主講席繼之者爲海鹽張銘齋先生先生歿里人有言于郡守欲延舍人主講者舍人辭不就自言年衰耄經義詞章皆荒落豈足勝講授之任顧家無儋石儲其嗣子雲齋浼余勸阿翁勉就此席余知不可而雲齋固以請一日從容謁舍人語此事舍人厲聲曰兒輩不曉事卽長官延聘我必堅辭必強我當以死拒之余斂容歎服時又有薦會稽李萼客來主講者李亦辭不就後見越縵堂日記言杭

州張舍人謀此席甚力不欲與爭此則傳聞失實舍人介節余固親見其事親聞其語者不可不爲辨之也

龔闇齋觀察以部曹直樞廷屏絕華侈退直輒閉戶讀書時人有熱官冷做之誚外簡徽州知府調安慶時奉

特旨搜捕教匪餘黨皆有真姓名安徽州縣有緝獲解省者皆令首府親鞫之公察知纍纍桎梏者皆非真教黨也謂諸囚曰子當爲若輩申救之乃寓書大司寇戴簡恪公陳所獲逆黨冤誣狀戴公答書曰此十數人者皆上書名指拏之人未可輕縱於是諸囚皆棄市制府百文敏公以獲匪案上章臚薦列公名居首公

馳謁文敏辭官文敏曰爾之來吾知其爲辭保也然安
徽一省官半登薦剡豈可獨遺首府若以此去官尤不
可公曰不去官猶可若一條血翎子則斷斷不敢受也
文敏曰諾遂刪公名而心益器公明年具疏密保尋擢
授蘇松太道同官中以此案升擢賞翎枝者三年內皆
病死公旋乞歸六十一歲時患脾泄幾瀕于危恍惚見
前囚十餘人至呼冤不置公曰爾等之死由某某輩邀
功也何仇我爲曰某某等均就冥誅矣公許救我而不
救豈得無憾公曰余上刑部尙書牘稿故在余無力救
爾等固吾之憾也命家人檢原稿焚之囚遽散去疾遂

廖壽七十五歲而終公子寶琦述其事且言公七十生朝兒孫奉觴爲壽公猶舉前事爲戒云

魏春松御史成憲官臺諫以清介聞嘗召見垂問家世上曰汝讀書人家也御史因倩人繪圖顏曰讀書人家以誌恩遇晚年主講紫陽書院課文字外時時以讀書立品爲諸生勸先大父贈詩有曰平生但識忠孝字爲報門生休問奇

仁和曹柳橋丈籀初名金籀字葛民少工詞章三十後一意治經嘗言治經宜先通小學生平頗精許書於羣經尤致力春秋篤好穀梁家言年五十成春秋鑽燧一

書多用數梁義著說文訂譌稿焜于兵所存惟古文原
始一卷晚年裒前所已刻書及亂後所作文字彙爲一
編名曰籀書道咸間居城東地饒水竹近南宋紅亭醋
庫遺址與里中諸老結紅亭詩社久之移居皋園之西
偏顏其室曰市隱草堂同治初徙居鹽橋之東賀衙巷
於宅東隙地闢小園榜曰臥霞先大父戊辰歸里丈與
張仲甫高古民兩先生時相過從余撰杖侍談嘗呼余
爲小友年七十矣高晚大譚意氣如少年惟喜嫚罵人
多疾之歲丁丑與族姪舉人曹鴻藻構訟不勝著三世
聞見錄臚列巡撫布按道府仁和知縣場大使諸人姓

名分爲陽類陰類加以評隲蓋以陽爲君子陰爲小人也書詞拉雜頗類風狂於是布政衛公榮光言于撫軍梅公啟照請窮治撫軍以屬按使升泰升泰飭仁錢二縣逮之時丈已病疽發于背金丈曰修出爲緩頰翌日而丈遽歿乃逮刻字匠焜其版撫軍奏聞禡候選訓導職以原書咨軍機處備案余時在里中竊歎諸當事以褊衷而摧抑一文儒殊無謂又歎丈以經生耄年晚而不能以道自守卒用文字賈馮爲里黨所訾可深惜也譚復堂日記嘗痛詆之稱爲曹老人謂其實不知學此又文人相輕之習丈嘗入京師年五十時吳縣潘文勤

師壽以聯曰代推小學有達人天假大儒以長日語極推重蓋說經治小學文勤固深佩之也

富陽董文恪文恭父子爲一代名臣文恭旣正揆席嘗圖形紫光閣川陝平 賜騎都尉世職年七十九薨於

位 睿廟臨奠御製輓詩中一聯云但有詩書貽子姪絕無貨幣置莊田並 命刻詩墓次以示後人數傳而

後子姓乏絕文恭孫婦邱安人煢煢居京邸同治己巳南歸謁祠墓稽譜牒以族孫瑾承殤子繼曾後瑾有末疾不能備宿衛其子長齡是爲文恭五世孫當襲世職先大父與許信臣中丞高辛才僕少霞兩觀察請於

巡撫楊公疏聞於朝先臣之門絕而復續而邱安人力
縣宗祏動合禮意亦可謂賢矣

族伯父筠軒先生自江西告歸與里中諸老結鐵華吟
社起戊寅訖乙酉湖山踴宕余亦常侍末坐社集以湖
上爲多因於永賴祠側遺安室榜曰鐵華吟社先生自
爲跋云昔童參政創西湖八社凡南北山勝處悉麗壇
坵吾社乃僻在一隅隘矣然柔艣輕輿惟意所適舉湖
山之寥廓幽邃以供吾儕之嘯詠有日貢其奇而不竭
者是八社廣而吾社未嘗隘也同社諸君抗懷往事有
內史今昔之感謂宜署榜以詔來茲於是乎書光緒十

年上巳

仁和王文勤公入樞府由吳江汲引頗爲清流所抨擊
尋乞養親歸以滇案降官服除卽家拜湘撫擢滇督再
蒙特召又出督直隸未幾復召入軍機庚子之亂 兩
宮西狩 文勤懷軍機處印單車追及至懷來扈從入
秦自是 東朝眷倚益隆 恩禮優渥年七十七告歸
命馳傳歸戊申家居聞 兩宮升遐隨班哭臨遂疾
篤薨於里第生平相業無可稱述然當己庚之間 東
朝意主廢立嘗示意文勤文勤力陳不可庚子拳匪之
訃亦頗諫諍幾爲端王諸人所誣陷微榮文忠力保全

之亦與袁許諸公同棄柴市矣余嘗得文勤日記數十
巨冊皆其官京師及鄂湘時所紀論人論事皆有識在
鄂臬湘藩湘撫任公餘無日不觀書者老輩固不可及
又辛未三月某日日記一則云郭子美軍門來晤近以
省親不先請 旨飭部議處語次頗自微畏因以 君
父之恩臣子之分迎機而善道之並爲言到此地位惟
以忠君敬上虛己下人乃爲人所不可及若以勛業日
多兀冪自喜便使人一覽無餘矣渠聽之悚然感佩之
情溢於言表因知其天資過人本屬一時奇傑再能斂
才就範尤爲不世之才國家禦侮需人所貴有以善全

之也讀此數語可想見其愛才之篤待友之誠

余從祖姑母歸山陰徐公業鈞字鴻治以名孝廉出宰山左所至多善政平生篤學嗜古尤長於詩從祖姑母字月蕙善度曲兼工詩詞閨中酬唱爲樂公試京兆從祖姑自蜀寄五古一章公旣和之並以長箋合寫寄歸公屢困場屋嘗有下第過臨邛題壁二絕句曰云云一自諷一自解胸次卓然吐棄塵俗宜其卒爲良吏也

葉貞甫丈荅友人辭絕勝營諮軍書云新雨乍晴忻奉手教得與諸君子賜書並讀一過竊以爲愛之太深知之轉淺期之太厚待之轉薄古來士大夫行止去就視

所向之枉直邪正以爲斷柳下惠不易介介之推不言
祿各行其志良非得已孟氏曰說大人則藐之勿視其
巍巍然此言可說之大人也若不可說則直藐之并不
必有巍巍之見存易曰不事王侯高尙其事此言不可
事之王侯也若可事則無損吾志又何必有高尙之見
存觀人觀己惟慎所從見理欲圓立品欲方成心不可
有定識不可無持躬處世俛仰乃適今使孤雲出岫託
足便非小草向榮屈節以就斤斤于趙孟之貴賤卽頂
上轉丹腰閒佩紫不過朝華夕落身世浮漚已耳是何
足爲榮辱哉至所言不能忘情得無告者過乎夫以覲

面不識之人有雲泥相隔之分何情之有何不能忘之
有此中推挽固自有人然而聖門亦仕季氏何以費宰
獨辭不强以同聲之應宰我欲窮仁者畢竟從井不可
難罔以非道之端區區一官位誠卑矣而不可卑者氣
節職誠小矣而不可小者器識彼可以勢燄熏灼威力
制馭者無他人惟心目中時時有烏紗在患得患失傍
徨於寤寐畏首畏尾固結其功名斯可以受風雲之叱
咤而以是爲雷雨之經綸僕則不能也生長儒家稍知
廉恥涇涇之見決不可移以故郵檄七至封泥在完惜
不知其所言何事邀伽婦縱窮魔技而來信天翁自有

知命之學彼而劾我我不怨之彼不劾我我亦不德之
前則句留淇右禰衡之刺遲通今將長嘯蘇門淵明之
腰不折青氈一片待賈而沽未始不可娛菽水況貧乃
士之常年來抗塵容走俗狀欲捧毛生之檄依然范叔
之寒則卽屠刀放下寶山空回尙可立錐何愁餓葶行
素居易此衷夷然蒙書來殷殷俯教此皆愛我期我而
勸我者敢不徑遂披瀝暢其所欲言若汎汎者交則惟
謝之曰某不敏負明公教自知暴棄行當待罪泉麓而
已蛙蚓微吭鳴不驚人鷗鷺閒心伸于知己統惟鑒察
不具百一丈有才名時勝克齋保方督師河北欲羅致

幕下勝驕蹇慢士丈逆知其必敗故堅不就召也

陳扶雅先生善嘉慶辛酉舉人治經學爲古文辭十應禮部試卒以大挑官教諭晚入汪氏東軒吟社與先大父相酬唱其歿也莊芝階舍人爲之傳先生孫學繩字硯傳工駢文爲人掌書記咸豐辛酉客浙布政使幕遭寇亂轉徙江北嘗箸兩浙庚辛紀略言賊陷浙事與平浙紀略及談浙諸書小有異同然當時在幕中見聞固較真也後有自述駢文一首注云先曾大父諱祖蕃字古歡著傳信閣詩稿先大父諱善字扶雅著研經日記四書古義晉書校勘記兩晉疆域考福建通志列傳稿

損齋文集先大母汪諱玠字孟文箸古韻軒詩稿竹閒
書訣先君子諱錫字子諒著省園詩文集又藏書五千
餘卷金石碑拓書畫數百種武進張皋文編修虞氏易
等稿本十三種城破皆燬于火先生嘗從皋文游以所
箸周易虞氏義九卷易氏消息二卷畀先生皋文卒言
於太傅儀徵相國爲刊行之而先生及其先人箸述今
悉不傳良可痛惜

嘉善查禮齋先生奕照又號丙塘自號龍山老樵初白
老人曾孫少壯奔走四方爲人司章奏阿敬敏公百文
敏公尤敬禮之以薦得淮安府同知棄官歸里以詩酒

目娛年八十九卒箸東望閣詩鈔二十卷勝琴館詞鈔一卷別有敬業堂詩集註惜未刊行詞鈔中有慶春宮一闕題云余年二十六客京師始從高慕陶習琴嘉慶初遇武林李玉峯手授十二曲玉峯爲海內第二手曲盡指法之妙蓋於今四十年矣吾鄉人今殆無知有李玉峯其人者

先大父官黔久嘗箸黔語二卷可繼田山薑張介侯兩黔語之後慶坻刊於京師在蜀以贈陳衡山大令刻入叢書光緒癸卯使滇往來經黔郡縣周覽巖洞諮訪人物證之舊聞往往而合顧兵火之後文獻無徵往時鄭

莫兩家流風餘韻無復存者可爲嘖息楊大見心以其
尊人雪漁編修手書黔陽雜詠五十首卷子示余讀之
如理故籍如賡昔游詩中所紀黔中掌故有出於田張
二書之外者足爲後來志乘取資憶余滇行兩經安順
府假館試院見雪漁所書啟秀堂楹帖嘗有詩云山
城日莫暫投裝墨妙重瞻啟秀堂羨煞故人歸隱早十
年清譽滿蠻鄉今讀此卷而雪漁墓有宿草矣

楊雪漁編修家遭粵匪之亂盡室自燔子身跳免轉徙
至漢口始得以教授自給嘗館大冶縣易培初大令所
值縣試屆期忽一魏姓介易之司會計者求見雪漁謝

之越日又至延入書室則縣署所與交易之錢肆主人也既而促坐密語曰縣試在卽某有子某某前官縣試曾列案首不得入泮今又將試矣君爲官閱試卷幸提挈之縣官清正不敢干故敢以私請雪漁拍案起曰汝視楊某何如人官清正我乃不清正耶某惶愧走出君遽告大令大令立傳其人痛斥之監禁至試畢始釋

雪漁生有自來其告終之前數日寢疾作譫語言有僧徒多人來相迓頻作拱手狀又言前身爲某寺僧名寶光號普慧又時時沈吟數語曰曲罷當筵人生一世鶴來華表瞬息千年若自挽若偈語殆所謂去來不了了者

歟

庚子袁太常之喪歸杭州雪漁撰聯語挽之曰時局艱
哉讀三疏洋洋禍福不可知盡犬馬愚誠而已男兒死
耳歎孤忠耿耿是非終有定問春秋直筆何如此事弔
挽措辭最難此聯可謂得體

歸安沈義民先生偉田道光丙午舉人咸豐庚申官吳
縣知縣有惠政粵匪陷蘇州先生守死不去賊至痛斫
之身受十七創暈絕一老人救之而甦掖之出自投於
河者再蘇人多德先生者又救之護持至滬與母夫人
重相見先生精于醫懸壺市中以供甘旨自號曰醫隱

又曰再生子其見母詩云有母六十九視我傷遍身痛
不在我體乃在我母心其書憤詩曰此仇不能報此罪
何從贖搔首問蒼天浩劫何太酷其後李文忠公知先
生有循聲且以抗賊受刃傷當時以知縣不知下落入
告文忠乃專疏據實以聞請復原官補江陰知縣光緒
初母夫人壽九十四先生六十一矣母九十七而卒先
生服除不復出壽亦逾八十先生鄉舉後恆寓杭州花
園巷與先君子訂交余垂髫時常見之光緒丙子謁先
生於江陰見額際項間創痕猶在云

艮山門外百步塘有水月庵水月老人故居也老人孫

姓名文字文石號水月會稽諸生隱于杭榜所居爲梅園性恬靜一介不取間爲長短句問其年嘗稱九十髮盡禿人多以僧呼之瀋陽范忠貞公撫浙嘗訪之老人昔從忠貞大父游時忠貞尙幼老人撫其頂曰是兒當建節吾土吾猶見之至是忠貞太夫人以告忠貞遂物色焉屏騶從往數與縱談捐俸爲建百步塘勒石紀之時西溪多虎患老人語忠貞曰山頭大蟲任打門內大蟲休惹忠貞遷閩督老人又言曰耳後火發時須要有主意其後忠貞竟死耿難老人素不喜與世事及是人以爲前知爭就之老人益厭惡避去不知所終土人

改其居爲水月庵肖老人若僧象召其徒奉之爲香火院王文貞池北偶談稱之爲水月和尙蓋當時固誤傳爲僧也家穀人祭酒嘗與黃相圃姚春漪至其地皆有詩逮今百年無復有知者也

樊榭徵君墓在西谿法華山下王家陽嘉慶十四年里中諸老葺之爲置墓田付交蘆庵僧常源爲納糧供祭之用歲以春秋酌酒澆墓家祭酒穀人先生撰記山舟學士書之蔣蔣村請阮文達公書墓碑文達有詩記事徵君無嗣其粟主不知何時供奉於湖墅黃文節祠道光九年趙雪門鉞蔡木龕焜李西齋堂與同里諸老以

徵君墓在西谿主宜近祔乃移奉交蘆庵以姬人朱氏
月上祔祀其側月上主蓋徵君手書也時胡書麓學士
有文記之今諸文詩碑石尙存而栗主經亂燬失同治
間道州何子貞丈來游交蘆庵乃補書徵君及月上二
木主里人奉祀于寺之東偏松生丁丈乃以奚鐵生畫
西溪圖卷子及高邁菴錢松壺戴文節諸畫卷付與僧
藏之光緒間里人增設徵君夫人蔣木主同祀龕中又
增一龕祀杭堇浦先生及其夫人二妾杭厲同時又皆
無後溪山勝地神靈往來重賴後賢香火不墜亦禮所
宜也惟杭先生墓相傳在大馬山汪子用丈求之累年

竟不可得

桑孝子祠在杭城觀橋街有石坊一祠祀錢塘孝子桑天顯天顯字文侯居大樹巷鬻養笛爲業性至孝父病膈天顯合羊脂和粥以進及父卒乃抱鐺日夜泣人爲繪桑孝子抱鐺圖歿後里人私謚曰孝勇弼甫先生孝子子也雍正間召試通知性理賜進士官工部屯田司主事薦試博學鴻詞弼甫子繩球字夔石諸生有青桐書屋學語弼甫之經營建祠立坊也集資未成繩球節嗇修脯積鏹盈千將以成父志未幾病亡遭胥匿其後里人乃爲成之咸豐間寇亂祠煨坊存同治間里人釀

貨重修歲時奉祀用資觀感余居里中每經行坊下輒肅然起敬世風日敝倫紀蕩然亟書之以詔來者

張甫先生幼嘗受業於勞餘山及壯益究心宋儒之書性孤潔方官水曹歸寓輒反扃其戶以杜雜賓乞養歸闢餘山書屋於東臯別業著有論語躬行實踐錄歷主大梁道山濂溪歷下講席執業者咸稱桑門弟子好山水遊日能步行百里徧陟五嶽自署獨往生又號五岳詩人所至吟詠成帙洞庭嵩山華山泰山衡山恒山閩嶠諸集皆紀游之作也

西谿花鳴在開化涼亭之左地極幽邃修篁古木不漏

日色中多梵氏居其可資游憩者曰六齋曰在澗庵曰
眠雲室曰九松精舍曰休庵曰梅溪庵曰溪飲庵曰怡
雲庵曰肯庵曰飲峯庵曰樹雪林曰白雲堆凡十二處
報恩寺唐元貞間建在萬松嶺下咸淳臨安志報恩院
紹定間御前承應者也元至正間築城移建大井巷併
入海會寺成化間仍徙故址有舞鳳軒萬菊軒銅井諸
勝宏治十年叅政周木改寺爲萬松書院僧寂源于萬
歷王子改建南山楊梅嶺下名報恩庵見西湖志及武
林梵志今則問報恩寺已無知之者惟鳳山門外有庵
一屋宇湫隘繚以土垣其中地頗平曠多植桃樹花時

絳雪彌望嘗與丹徒戴壺翁攜茗具往游焉

黃文節公祠在杭城迤北湖墅舊名青莎里有村社曰蘇家廟相傳其神爲山谷何徵君春渚書黃文節公祠額榜于門建清風閣于祠後按公宦跡未嘗至浙而吾鄉社而祀之故老相傳未知何据兵火而後祠亦廢矣永賴祠祀明浙江巡撫龐公在鳳林寺右祠久廢光緒初烏程龐芸皋雲鎔捐資重修祠側有遺安堂飲淥軒雲抱水邊樓鐵華吟社卽附設遺安堂之後龐公南海人嘉靖癸丑進士治浙行一條鞭法民德之爲建祠祠有萬歷十六年立侍御龐公遺愛碑陳善書

左文襄公祠爲竹素園故址 世宗憲皇帝嘗御書竹
素園扁及七言聯以賜中多亭館其題額曰湖山春社
亦舊題雍正九年總督李衛創建以祀湖山之神曰香
泉室曰最景樓曰臨花舫曰水月亭曰桃溪深處曰流
觴亭曰觀瀑軒皆舊名也辛亥以後祠廢

丁家山下 先塋之左舊有履泰將軍廟問其緣起罕
有知者後閱武林舊事西湖三堤路有履泰將軍廟注
云有天澤井葛仙翁所植古松將軍錢唐人姓孫名顯
忠仕吳越時嘉熙中趙與權尹京禱雨有驗奏聞因勅
封天澤侯

香祖筆記云杭州臬署本宋岳忠武王宅東偏有王祠
祠後又有一祠並祀文信國及元伯顏養濟院則祠嚴
嵩爲土地皆不知起於何時按岳王祠今尙存文信國
祠後移于西湖三台山見兩浙防護錄養濟院已廢

杭州府署土地神相傳爲蘇文忠公集公詩語爲靈籤
事涉傳會然瀆公甚矣京師翰林院衙門以韓文公爲
土地神其不經正相類 先大父詩云生前遭遠斥死
後辱卑棲如何磨蝎恨生死似昌黎

葵巷南宋時名葵巷不知何時訛作葵地鄰東城有吳
氏舊廬沈輔之丈映鈴自嶺南歸得此屋葺而新之名

後又爲嚴小農河督煨所居咸豐兵火園坵樹石無恙
吳梅村書滄浪書屋楹尙存同治初吳曉帆僕少霞陸
存齋萬篋軒四君購得榜曰四間別墅未幾鬻于官改
八旗會館旣改建浙江忠義祠設采訪忠義局祠側餘
地建前學政張文貞前布政繆武壯二公祠又別建張
文節公祠文節直 上書房以寇亂假歸省親圍城中
賦絕命詩自經死

忠清里舊名昇平巷

萬歷府志坊巷門
有昇平坊卽此

北爲褚家塘明

正德十五年巡按浙江監察御史唐鳳儀建忠清里坊
時胡世寧起徒中拜湖廣按察之命鳳儀欲爲建坊世

甯謝曰賴主上寬仁得免罪戾幸矣何以坊爲唐有僕射褚公里人也當時諫易后忠莫大焉我明四川按察僉事王琦兵部郎中項麒皆與同里清望重一時世甯願爲之執鞭者也若移樹坊之工爲三公表世教民所益良厚鳳儀感其義遂爲樹忠清里坊於塘南巷口云見萬歷杭州府志姚靖西湖志

揚清祠嘉靖間提學孔光奏建祀王公琦項公麟琦以四川按察僉事告歸清介絕俗枵腹以歿諸孫貧至爲傭麟官兵部郎中文學孝友以疾歸四十餘年閉戶以終一子貧贅依人胡端敏言舉世尙通達而賤方介以

致二公泯沒無聞乃請於官立坊以表章之而二公之名遂與褚公並傳逮今數百年屢燬屢建過其祠者咸景仰流風不置云祠有夏壽嵩重建祠碑同治初仁和知縣姚光宇重修祠碑

余家居岳官巷攷巷名所自不得其說後讀汪槐塘沆文集爰贈君家傳云爰氏於宋建炎間自汴徙家鹽官不知何代復徙省城相傳前明中葉有孝廉雲橋與從弟龍山並官司訓居貢院東今所稱學官巷是其舊址乃知岳官爲學官之譌爰氏後遷居大方伯里贈君名鏈字千波子荃乾隆己卯舉人官盧氏知縣考嘉靖仁

和縣志此巷舊名打鐵小巷

忠清里有趙松谷殿成目耕園具泉石花木之勝後歸沈氏沈名清藻字研香乾隆乙未一甲三名進士里人皆稱爲沈探花家光緒初歸永康應敏齋寶時疏泉疊石多蒔名花榜曰適園中有憇鶯花館豆花疏雨山房諸勝劍州李榕爲之記

承平時士大夫於湖上築別業供游賞者不可殫紀如徐文穆清風草廬翁蘿軒白雲山房孫景高寶石山莊陶篁村泊鷗山莊錢叔美野鷗莊朱彥甫長豐山館黃霽青小竹林潘紅棨怡綠莊汪小米水北樓錢秋峴綠

楊村舍王安伯小輞川其最著者興廢不常至咸豐庚辛之亂蕩然無一存者光緒間高白叔舍人築紅櫟山莊地爲明戴大有讀書處有且住軒小仇池室藏山閣鷗渡此可通舟處田田榭聽雪犖确亭諸額室宇精絜樸素無華騷人墨客每樂讌游於此

吾杭自明季張右民與龍門諸子創登樓社而西湖入社西泠十子繼之其後有孤山五老會則汪然明李太虛馮雲將張卿子顧林調也北門四子則陸蠡思王仲昭陸升鬻王丹麓也鷺山盟十六子則徐元文毛馳黃諸人也南屏吟社則杭厲諸人也湖南詩社會者凡二

十人茲爲最盛嘉道問屠琴隴應叔雅馬秋藥陳樹堂
張仲雅諸人有潛園吟社而汪氏東軒吟社創于海甯
吳子律小米舍人繼之前後百集舍人刊社詩爲清尊
集戴簡恪寓杭州天后宮有秋鴻館詩社亦驂靳焉潛
園東軒皆有圖東軒吟社圖費曉樓畫今尙存汪氏潛
園圖則不可得見咸同以後雅集無聞光緒戊寅族伯
父筠軒先生創鐵華吟社首尾九年先生歿而湖山獻
詠風流闐寂矣

國朝浙江重宴鹿鳴者康熙丁卯周天相丙子吳大燾
甲午萬承式附癸巳恩科錢家墜丁酉趙世玉雍正癸

卯陳克鎬己酉吳嗣富乾隆乙卯附丙辰恩科馮浩戊
午顧光范崇榮乾隆丁卯梁同書壬午余集袁枚乾隆
丙午汪農嘉慶庚午張應昌張先生以同治庚午重宴
鹿鳴是科考官爲順德李公文田李公鄉試舉主張惕
齋興仁先生從子也以門下門生禮來謁先生有紀恩
詩裝作冊子李公署其冊首曰國朝浙榜重宴鹿鳴第
十五人并繫以詩一時和者甚眾亦鄉邦故事也

西湖山水甲天下鼎革之際勝國遺老隱姓名遯跡湖
上者尤多 先高祖杭郡詩輯無名氏一卷據夏基西
湖覽勝詩選所載得二十四人曰閉戶先生曰河渚生

曰花間散人曰靠天翁曰墨憨曰鳧友曰泊菴曰漱石
翁曰蕤菴曰渡船翁曰焦梧生曰龍井山樵曰烟水客
曰天容子曰小林逋曰竹逸曰心菴嬾叟曰松牖書史
曰璧菴曰藤石曰山澤臞叟曰拙存生曰藝園遺老曰
長嘯客是殆月泉吟社之流不僅膏肓泉石也

蕉廊脞錄卷三終

蕉廊脞錄卷四

錢塘吳慶坻撰

吳興劉承幹校

方正學先生被難時有魏典史澤者匿先生幼子于笥
中以出適外家陸氏時籍禁方甚不可留乃變姓名居
江陰缺方字之末筆而爲六幼子名朗避難時才四歲
至本朝嘉慶間十四傳矣六承如字賡九爲李申耆先
生箸錄弟子明史惟云先生二子皆自經不云更有幼
子六氏譜云朗尙有兄曰德宗避松江更姓俞申耆先
生爲賡九題正學讀書箴詳識顛末必有依据今浙江

候補知縣六某亦其裔也有小印曰正學後人

姚湘字夢峽餘杭人明季諸生明亡不肯鬻髮隨金堡
飄泊楚粵堡以事繫獄出獄後爲僧夢峽不知所終船
山年譜云湘附永歷實錄金堡傳船山有荅姚夢峽秀
才見柬之作兼呈道隱黃門此詩編入順治七年庚寅
明桂王永歷五年也

先曾王父小羅浮山館詩有哭毛海客七言長歌一章
蓋知簡州殉土寇之難者海客名大瀛寶山諸生善屬
文工詩試輒不利五十外以薦舉得官教匪起湖北蹂
躪河南陝西四川大府奏毛隨營以功擢知縣尋知簡

州土賊復發城守踰時援不至城陷罵賊不屈死著有
戲鷗居叢話洪北江嘗記其客山東巡撫國泰幕事則
海客固振奇人也其孫嶽生有文名

張古虔司馬中寅大興人道光十五年舉人咸豐初以
同知候補蜀中善書學顏魯公筆意 先大父嘗乞司
馬書楹帖余頗珍異之近得司馬之子林所爲行述及
順天府志先賢傳知司馬官松潘直隸廳同知咸豐庚
申番夷叛城破死之事聞 贈道銜給世職於陣亡地
方暨原籍建專祠入 國史忠義傳書學平原忠亦似
之昔人言心畫可以見人之性情氣節諒哉

朱光縉字侶喬浙江錢塘人以府同知需次蘇州咸豐十年春蘇垣告警前署布政使蔡映斗督兵防堵平望光縉爲之副及賊至或勸之走光縉曰此固不足以守然大吏勉吾死守義不可不死且城已被吾母度必死毋死不能救又不忠於所事是重吾罪也乃率勇丁逆戰一晝夜死者相枕藉遂揮佩刀刺賊目因被害母吳氏妻戴氏妾楊氏等城陷日皆投池死

成都浙江會館中祀浙人宦蜀有政蹟者而以死勤事別立一龕中有倪公霖死金川之難吾邑人知之者罕謹錄之倪霖字雨蒼仁和人偉姿容好騎射性落拓不

羈納貲爲縣丞分發四川署巴縣丞木洞巡檢補西昌
丞權簡州州判金川軍興檄調軍中爲登春營巡捕官
霖探知降番欺飾狀請移師就大營以壯聲威毋爲敵
誘木果木之變又請由美卧溝間道出攻賊眾謂其卑
官好紛呶狂誕幾至窘辱霖憤歎不已迨登春營出戰
霖荷戈從戰死事具西昌縣志

仁和曹燮坤官廣西全州知州咸豐二年夏洪秀全大
股北竄犯全州燮坤誓死守半月賊盡銳來攻援絕城
陷死之見沈映鈴退庵隨筆

沈耀章字鳳臺錢塘監生成豐十年署雲南永川知縣

賊攻永川縣無兵耀章齧指血書速救永川四字遣人疾馳詣四川重慶鎮總兵某乞援兵久不至城陷遇害沈壽榕玉笙樓集有弔沈君詩

華學本字惺子仁和諸生與餘杭令某善招入幕中軍事起餘杭當賊衝縣城防守頗倚之咸豐辛酉杭州再陷學本方里居挈其妾楊投井賊猝至妾先入井死學本被戕

陸文烈公官湖南按察使與余善喜劇談嘗言其官撫宜縣學教諭時江蘭生太守槐序方知撫宜縣事議修城招學官紳士集議是夕公夢一人來謁名刺書王臺

二字既入見曰今日議修城之江大令卽吾後身也吾於明季官此李自成寇邊撫寧城圯不可守乃具牛酒犒師去自成一片石敗退復過此則吾城守已完力卻之卽甲申歲事也今江令來踵修吾意良慰因書一長聯昇公未有補前身未了因緣語且曰吾修城有碑記事在南門甕城中又有生祠在城隍廟側翌日公以語江江色變良久乃能言公歸檢縣志明末縣令有王臺訪南門碑故在訪祠已傾圯而故址猶存因爲葺祠宇書楹聯云補前身未了因緣是幻是真吾不信也考我公當年政蹟以享以祀禮亦宜之次日又夢其人復至

日子疑我晚節之不終乎我以不從薙髮之令削迹歸山陰原籍終身不復出公醒而識之謂王固抗節完貞者故歷久而神靈不昧如此也

庚子京師之變宗室伯莈太史壽富殉節臨死作三絕句爲書以寄華瑞安太史學瀾明年瑞安典試貴州瀕行以此函歸其家人閩卓觀察孝復以付石印傳於世書云大事已去侍國破家亡萬無生理老前輩如能奔赴行在敢祈力爲表明侍於此地此時雖講西學並不降敵家人有不願死者尙祈量力照拂如死亦聽之外有先人奏疏年譜及平生著作並以奉瀆亦祈量力保

全之敢百拜以請匆匆不及走別是爲至憾詩云衮衮諸公膽氣粗竟將血氣喪鴻圖請看國破家亡後到底書生是丈夫曾蒙殊寵對承明報國無能愧此生惟有孤魂凝不散九原夜夜祝中興薰蕕相雜東林黨黨禍牽連竟陸沈今日海枯看白石二年重謗不傷心

番禺汪兆鏞己丑舉人東塾弟子也頃寄示所作辛亥

三秀才行曰辛亥之變湘潭何性存秀才

承鑫

方客粵

東某提督所亂作遂自經香山李郇雨秀才

澤霖

居邑

城南爲童子師聞變閉門絕粒五日死江陰趙煥文秀

才彝鼎

遭難痛憤不食三日未殊手書絕命辭大旨以

朝廷養士三百年豈容謬倡排滿之說書畢至三賢
廟自經死之皆一介諸生耳大節凜凜如此爲賦辛亥
三秀才行油幘老記室白屋村夫子藐然青青一衿耳
臨難誰能責以死偉哉乃有三義士何生橐筆細柳營
妖氛忽犯循州城城亡義不圖苟生碧燐夜照豐湖清
同時李趙二文學徒聞賊民之興大詫愕蔑棄禮教曷
爲國志士豈忘在溝壑畢命辭成萬夫卻絕粒投繯神
自若得此類池芹藻不寂寞嗚呼興亡自古何代無痛
絕眴息海水枯長白山隸漢版圖東塾著說徵班書妄
辨種族欺瞽愚大盜移國罪當誅茫茫天意何爲乎九

域從此流毒痛三子一瞑翔霄衢蟬蛻不受滓濁汗愧
死印纍綬若卿大夫 聖清三百年養士之澤報區區
同治乙丑丙寅間余隨侍太原治舉業從永清劉西樓
先生仲篋講授先生癸亥進士卽用知縣發山西方嚴
耿介不諧於俗 先大父重其學行命師事之先生于
論文外尤以窮理盡性相敦勉越二年先生權某縣事
余亦侍 先大父南歸先生卒以清貧殁于太原迨余
官京師得見先生後人恂謹有家法後閱光緒順天府
志先賢傳乃知先生父諱毓崑字貢林號壽山諸生天
性孝友母嘗得驚悸症惡聞聲崑每省視必解屨戶外

徐步榻前有女弟適張氏壻爲父兄所凌虐乃析居貢
林爲購田宅與己居無異嘗曰吾終鮮兄弟何必異視
吾妹嘗於中夜起涕泗不止人問之則曰吾夢二親承
歡如平時醒則杳矣時年已六十其孺慕如此道光十
二年大旱請于知縣萬侯勸捐賑卹並首倡捐資全活
甚眾子伯壘道光乙巳進士仲篋亦以孝聞有父風按
府志據永清縣志采錄度修縣志時在癸亥前故未載
先生科目也

夏子松侍郎事繼母孝其女兄弟之同母異母者凡九
人友愛之如一其已嫁而家貧乏者皆招使同居并其

姊妹之夫與其戚屬皆與焉家屢空而食指恒數十人戚友有就謀者無少卻急人之急或輾轉稱貸以周之官屢遷而清貧如寒士往往日止一飯丁卯簡江蘇學政未行丁繼母憂奉喪歸又其女兄子婦及二殤女一老僕之棺由潞河南下而戚友及鄉人之櫃託附其艘同歸者凡六家會賊擾東昌河路梗乃改道天津附番船而南船價巨前託之者所出貲皆不足或勸以婉告其人使自歸其櫃侍郎不可各爲之益價而同歸焉侍郎立朝大節具見復堂所撰碑銘此盛德事當別書之爲鄉里後生勸

侍郎封翁教子嚴居恒稍不當必訶斥侍郎少有羸疾
官京師時疾幾殆夢封翁詔之曰爾福薄食天家祿幾
許應卽死勿貪戀也旣而疾稍瘳又數年計所入俸與
夢中封翁所告已越其數竟無恙後復夢如前且盛責
之曰勿貪戀若官至一二品卽死矣官宮詹以史館保
案掌院將以加閣學銜請于朝力辭乃免其後擢侍
郎直毓慶宮以勞悴薨于江蘇學政任所夢中言果
驗

富陽龍門村孫步蟾家貧服田奉母不少懈年十七父
卒號慟絕而復蘇者三鄰里喻以母在何遽死乃力營

殯葬奉母如初後數歲母疾劇醫藥無效步蟾奉香北面拜禱於神刲臂肉和藥以進其夕母夢白衣老人予藥丸一食之覺而藥香猶在口頰病尋愈又七年母卒廬墓三載哀慕之思至老猶然同治十年卒年六十二巴陵謝麀伯前輩事親孝母太夫人持家儉麀伯每出得新物美饌必市歸以獻太夫人輒不悅後得甘旨付其所暱之友使轉奉于太夫人爲若其友所餉者然母怒必跪母前妮妮作小兒態且持母兩手批己頰母笑乃已太夫人待婢媪至仁厚曰彼猶是人也吾有何德而使若輩執卑下之役於我麀伯乙卯舉于鄉公車北

上過保定逆旅有客哭甚哀問之則黔人訪其戚不遇
餓且死謝憫之解橐贈以金又謀諸同行者集貲助焉
麀伯自記前生爲衡山某寺僧嘗道經其地入寺信宿
乃去寺僧贈以念珠朝夕不去手雖倉卒酬酢未嘗輟
也

餘姚翁瀛字大環康熙壬申游廣西道湖湘喜爲詩舟
中日以作詩爲事遇山水佳處輒登覽徘徊不欲去時
或上船頂吟嘯終夕露立舟子知其癖也亦不爲禁一
日舟次新塘得句云霜濃古寺鐘聞處一點空明透佛
燈明日手書鐫之篋是夕竟失所在其家聞信孀妻稚

子痛哭招魂同行者亦莫知其何繇也至雍正癸卯子
運標成進士痛不得父遺骸偕兄運槐操小舟溯洄衡
永間風號雨泣行路哀之爭相傳說丁未八月遇一老
人鄭海寰者述其弟海生於康熙三十一年十月七日
從敗葦中得一屍身佩小鑰遂同擇地瘞於白沙洲收
鑰封識以待其家人運標兄弟噉然而哭遣善走者馳
至家出鑰證之而合乃廬其父墓旁三月啟壙扶榇歸
仍留形蛻處加以封樹乾隆初運標官武陵知縣命兄
子會典營祠墓前額曰永思顏其庭曰啟鑰買田以畀
守者丁卯運標擢道州知州過展祠墓依戀數日乃去

至祁陽延見父老繾綣如故舊祁陽人莫不稱爲翁孝
子云嘉慶間族孫元圻爲湖南布政使復修祠宇云湖
南通志載其事而前祁陽知縣覺羅卓爾布撰啟鑰庭
記宗滌樓永州志稿寓賢傳載其事尤詳

錢塘許默齋先生承基仍世孝友父序賓遭親喪廬墓
終身默齋弟仲昭侍母疾刲股和藥創甚而殤年才十
餘歲也默齋思弟不已乃繪爲連枝圖作並肩坐石上
喁喁對語狀同時名流題詩者數百家

桑叟甫先生之弟字東愚隱居東郭足跡不出國門指
爪長尺餘人呼爲長甲處士東愚有採藥畫卷陳句山

先生爲題七律一章跋甫先生之父以孝名世所傳抱
鑑圖者也

翁同龢等奏爲已故儒臣孝行可風籲請列入 國史
孝友傳以彰至行摺竊惟 朝廷制治以孝爲先人臣
致身資於事父此天地之大經古今之通義也伏見故
國子監司業洽麟生有至性其學術以宋儒尹焞爲宗
律已教人鞭辟近裏同治初年該員之父景廉任伊犁
參贊旋統兵剿賊其時該故員年僅二十四匹馬出關往
來省視比長承侍左右色養無違景廉之疾篤也不欲
人侍該故員屏息戶外聽于無聲有呼則敬唯有所苦

則抑搔扶持終夕徘徊風露中履跡重沓倦則倚檐柱以息四十餘日用是成憂勞羸困之疾其父既沒該故員病已深矣既葬越小祥鹽酪不入于口醫者以豕肉汁進謂得此可脂膏五臟該故員屏而不飲臣等見其瘦骨柴立亦援古人居喪有疾之禮諄諄勸諭該員閉默涕泣而已苦塊之中編次其父遺稿一字之誤反覆審訂至於嘔血數碗死之夕遺書猶在旁也臣等以爲魯襄亡而子野毀不見絕于春秋此聖人教孝之微意然則卽死於毀歷代史冊猶且褒揚之況該故員蒸蒸之孝徵於平時孚于輿論眾著于宗族師友之間者乎

我朝功令孝子有旌閭之典國史列傳特立孝友一門光緒四年蘇松太道馮燧光以孝行可嘉准予立傳臣等竊惟太學爲教化所出之地該故員事親盡孝無愧人師臣等誼屬同官見聞確實合無仰懇天恩特降諭旨准將前國子監司業治麟列入國史孝友傳仍由館臣各行該旗查取事實清冊以備纂輯用以風勵天下疏上奉諭旨俞允

齊占魁直隸東安縣留犢邨民寄居於涿事祖母孝祖母疾亟醫巫告凶占魁禱於涿州之北塔求以身代祖母疾果瘳占魁乃躋塔巔自投而下震於地死之光緒

十四年三月十二日也年二十九州上其事請 旌禮
部議駁兼順天府尹潘祖蔭順天府尹高萬鵬奏援光
緒六年浙江會稽縣附生王繼毅母疾請代自沈鄞之
月湖得 旌例以請 詔俞之潘公爲文記其事而順
德李侍郎文田書之爲立石於北塔之側余至涿親至
塔下徘徊久之

羅江縣金山鎮西有明季義烈貞女王氏墓碑云明崇
禎末有官四川布政使王某到蜀惟一女從行聞京師
之變某欲興師勤王女力贊之懼已爲父累乃自殺遂
葬於此後人爲立石記其事惜傳聞未詳布政名字里

江南辛亥國變失職貧甚奔走浙東温台之間置眷屬于杭州癸丑夏七月之金陵邁疾還滬臥逆旅其戚姚某迎之歸疾亟馮氏從杭州馳至日侍湯藥翰卿卒無子嗣子在蘇州不至姚某經紀其喪馮氏哭之哀既送殯歸向姚某稽顙謝屬其孤女夜服阿夫容膏昇入醫院治之不效遂歿年三十九

硤石之卜家場有陸氏婦夫死子才五齡女一未周晬也孤苦無以存活夫弟勸改適不從願乞食撫孤誓不負死者於是攜子女丐于路辛酉賊至僅齧草以活賊平爲人傭稍稍能自贍子亦長矣賃破屋以居每歲餉

蠶必獲利天將以報其苦節矣

應先生撫謙字嗣寅號潛齋自稱無悶先生仁和人生而有文在其手曰八卦左重耳右重瞳稍長以斯道爲己任侍母疾數年不懈母爲娶婦終不入私室母卒終喪始行合禭禮大科之徵李公天馥項公景襄交章薦輿牀以辭范公承謨又欲薦之乃稱廢疾所著說經言性理諸書凡十二種河陽趙公士麟刻其性理大中儀封張清恪刻其潛齋文集乾隆府志入儒林傳

潛齋門弟子甚眾而篤信師說敦行不怠者以凌文衡沈志可爲最著文衡名嘉印錢塘人少爲杭郡司李吏

好讀書匿書直合案下夜伺他吏熟睡然燈默誦四十
後棄爲吏受業于潛齋盡得其傳六十後注禮書日幾
葉謄寫日幾葉皆有課程嘗言學問須到造次顛沛必
於是方有得力處志可名士則仁和諸生嗣母周性嚴
厲常加譴責長跽待罪雖勞不怨學禮于潛齋居家授
徒端坐整肅盛暑不去冠襪嘗定宗祠祭規而尤詳於
古歛禮葬禮

錢朝彥字殷求號定林錢塘人明崇禎丁丑進士官句
容知縣丁父憂去明社旣屋閉門卻軌自比于棄妻妾
婦匿影牆壁同年故人官浙中者概不與見亦不報謁

家貧所居皆僦人老屋危椽析棟不蔽風雨己亥江上之變有言定林將爲內應者提督田雄下章捕之囚獄中十日偵者告曰錢公儒者莊坐圜圍若無所畏苦田意解乃放歸定林嘗師事漳浦黃忠端其詩與書法皆效之見吳農祥所撰傳吳允嘉武林耆舊集

陸圻字麗京一字景宣號講山錢唐人崇禎年選貢與弟培堦高文異采號爲三陸乙酉培以行人殉國縊死桐塢講山奉母隱居河渚而賣藥於茗雪間月一歸省莊籠私史獄起无妄被收久之得釋故被燼乃攜一老僕採藥名山老僕歸講山不返或云在嶺南爲僧名今

龍或云入武當爲道士竟不知所終少時詩名藉甚漁
洋山人推爲西冷十子之冠有威鳳堂集黃書厓武林
先雅載其軼事尤詳

汪汝謙字然明號松溪道人錢唐人明季由歙徙杭延
納名流文采照映有湖山主人之目迨陵谷淪移遂入
閩爲福廬武夷之遊比歸隱居東城與李太虛馮雲將
張卿子顧林調訂孤山五老之會年七十九彌留待盡
神明湛然猶要雲將諸公品畫談詩吹簫摘阮視蔭旣
移杭手告別而卒

張遂辰字相期號卿子又號西農仁和人高懷卷迹似

嚴君平鄭子真一流人好譚易精於醫學歲輒活數百人所居在城東至今名爲張卿子巷蓋當時婦孺皆震其名委巷流傳竟成故實西農每于歲闌輒勉誠子息云家足過年之用坐無寒士之求不惟有愧本心抑且無別流俗又嘗述其祖龍墩公貧止一布袍除日逢急卽解贈之樊榭東城雜記稱清門世德可以激薄停澆先正風流不徒以高隱名矣

張右民字用霖號東臯錢唐人用霖爲葛寅亮高弟窮究經籍天崇間與龍門諸子創登樓社明鼎旣革栖隱東城己未鴻博之徵撫臣欲以用霖應堅辭不就年八

十三乃卒四方會弔者八百餘家學者稱爲東臯先生
著有史論史略竹窻語錄東臯詩文集

丁文策字叔范號固庵錢唐人貌瘦削而面黑人目爲
黑丁少爲諸生有聲甲乙後遂棄去偕母妻避居駱家
莊巡撫張存仁聞其才迹所在而說之嘿不應承之以
威不動曰鐵石人也幅巾單衣躑躅風雪中旣哭二人
痛不能盡養鞠育兩弟周卹有無家貧授徒以給朝夕
學者稱爲江樵先生

虞鈞字峻民號兼山又號白菴錢唐人明季諸生少孤
侍祖母疾嘗搥胸肉療母氏王病篤戒之曰吾茹素四

十年慎母以曩事相累母沒終身不御酒肉廬墓側三
年有事而出雖風雨泥淖夜必趨至墓所人稱爲虞孝
子云易代後荷鋤自給不入城市其學以朱子爲宗明
經修行耆年益篤其卒也門弟子及其兄子私謚曰貞
孝先生

柴先生紹炳字虎臣號省軒又號翼望山人仁和人少
奇敏爲文宏博典麗父應權官莆田教諭故事學官子
弟許隨任赴試因試補莆田諸生移牒本籍浙學使不
可復歸應試自縣府以至學道三試皆第一宏光時馬
士英欲引進之以翰林官誥命中使馳召先生不爲動

馬怒曰渺小丈夫矜高乃爾耶先生歎曰吾深恨夫七尺軀以敗乃國事者蓋先生素羸弱軀短且瘠也其後布衣幅巾鍵戶南屏一以箸述爲事凡天文地理禮樂田賦水利兵制莫不窮竟原委勒爲一書康熙己酉詔舉隱逸巡撫范忠貞公以先生應力辭乃已家城東老屋數楹厠于壞垣廢圃間枯桑敗竹三徑荒寂一夕夢黃公道周劉公宗周倪公元璐吳公麟徵合一刺召先生遂沒沒有傳其爲冥官者

沈先生昫字朗思初名蘭先字甸華仁和人年十六入郡庠甲申後棄去與弟蘭或自相師友以考究性命爲

務嘗執經劉戡山之門事父博山與母氏秦至孝以束
脯爲養誨子毅中純中勿令干祿室無容榻衿無懸衣
披帙覽書凝坐終日嘗絕粒采階前馬藍食之或餽米
數斗不受其人固請則固辭方宛轉避謝間遂餓仆于
地其人惶駭去良久始蘇笑曰其意可感然適以困老
子耳卒無以爲歛應潛齋經紀其喪潛齋門人姚宏任
篤行君子請歛先生潛齋許之詳鮎埼亭集所爲墓誌

銘

顧卣字竺公亦曰琢公號山臣錢唐人美須髯善談諸
家貧支一足鐺於慶忌塔晚年移入城是時婁東虞山

以舊臣赴闕號于人曰吾輩起以紓清流禍也山臣曰
淫人能衛貞女耶吳中允太沖幽囚十年門生故吏搖
手不敢一問山臣獨冒死相對周旋患難君子賢之善
大小篆語人曰若爲我治良田十畝我爲若篆我死其
價可當秦十五城同時有施萬字大千號汗漫子亦以
詩名工篆隸摹印尤在何震陳士衡上惜皆不傳

陳廷會字際叔號瞻雲錢唐人六歲始能言九歲作寇
萊公枯竹生筍賦人爭奇之補諸生崇禎癸未郡東門
有海大鳥集焉人面獸身六翼四足際叔歎曰此鵝也
所見之國其下多放士因自號鵝客作鵝客問未幾金

堡徐繼恩陸圻應撝謙沈捷汪楓輩或挂衲空談或鑿
坏遁迹人皆服其先見與陸鯤庭有性命之契鯤庭殉
國難留書與別以書籍盡遺之際叔奔赴爲書以報地
下美其得死所後教其子繁昭學旣成舉其父所遺書
返焉

孫治字宇台號鑒庵仁和人幼與毛稚黃游聞子將之
門子將稱爲二俊乙酉後不應試自稱武林西山樵者
篤于友誼有魏姓友逮繫以愛女爲託及友被法卒娶
爲子婦陸驥武死亦以一女託之爲擇吳檢討任臣妻
之又爲立嗣以己甥女嫁焉吳百朋令南和卒于官囊

無遺貲爲經紀其喪以歸旣老貧甚以父殯未有葬地不得已出游遂歿于澤州所著有孫宇台集四十卷

張丹原名綱孫字祖望號秦亭錢唐布衣張氏在前明九世簪纓號甲族祖望爲都御史濂之元孫舊時第宅國初圈入駐防營城播遷無定後徙居西馬塍有從野堂又居秦亭山村因以爲號年三十二喪妻不再娶晚夢神人更名丹講服氣導引之術詩名在十子之列及門著籍甚眾少時游京師嘗冒大風雪從老宮監至天壽徧歷明代諸陵識其道里遠近寢隧規制而詳爲之記亦振奇之士也

沈謙字去矜六歲能辨四聲旣長補諸生才名爲西泠
十字之一鼎革後隱於醫其先人逸真先生善岐俞之
術故吳百朋贈詩有乃公術過長桑君之句先大父輯
杭郡詩時得里中金氏所藏去矜手書詩卷其自跋云
庚寅四月二十三日四鼓過寒山曉月映塔流屍觸船
披衣起視悲愴欲絕離亂之苦大略可見天明因錄本
年五言律四十四首聊以當哭詩中如鼓輦孤客淚書
札故人心孤冢兒啼苦空庭馬跡深白髮悲行役青山
厭亂離苦霧沈荆棘青燐見髑髏多悽婉之音

施相字贊伯號石農郡諸生性高潔不樂塵市屏居河

渚張村名曰幽居與徐介狷次交契爲築室于叢竹間
名曰竹廡狷次居其中十六年其後遺妻子返湖墅故
居獨與狷次嘯傲煙霞往返無定狷次卒會石農他出
其子雲蒸遠遊而雲蒸婦命穉子傳語諸門生曰徐先
生大故嘗聞翁言矣請以中堂奉棺含斂比石農歸撫
棺慟哭旋摩穉孫頂曰汝能代母傳言真吾孫也其篤
友誼如此

徐介初名孝直字孝先後改今名字堅石號狷菴又名
曠號淥溪仁和人明季諸生陸圻之甥也家塘栖落瓜
堰乙酉年二十棄諸生易其名曰介妻死不娶子死不

嗣去田園壟墓白衣冠垂五十年轉徙無定所後入河
渚愛浦澈陂塘之勝遂寄棲施石農廡下嚴毅疾惡狹
中鮮容非分之餉錙黍不受性豪于飲大醉取詩牋寸
寸碎之投水中曰世安有能讀徐生書者又善哭醉益
甚春晚聞杜鵑聲則拭淚擊涕發聲磴磴而不可止見
者以爲狂生曰我非狂乃狷也因號狷菴旣以爲狷不
敢希復易爲狷次云

姚文虞字德善亦仁人工詩甲乙之後澗壑自安蹤
跡與徐狷次相似善書狂草所作詩皆燬于火

徐宏道字景行仁和人明季福王建國南都景行爲督

工官入 本朝遂寄迹湖山以終

陳麗字貞倩號正菴錢唐人嘗從兄元倩治軍大梁爲
總兵官所規畫陰與孫吳兵法合當其時諸營纍纍如
兒戲獨貞倩軍屹不可動迨滄桑改易乃韜晦恣意爲
詩孫字台亟稱之貞倩弟晉明亦隱居不出

胡介初名士登字彥遠號旅堂錢唐諸生故居在河渚
人迹罕至及江上兵起入城僦居一畝田遂更其名以
示蠱上履二之志嘗一游京師梅村芝麓諸公皆折節
納交而彥遠意氣寡兀亦莫能籠絆之也

張兢光字又兢號覺庵長自名闕於祖望昆弟爲大父

行絕意仕進束修砥厲如後門寒素性峭獨自憊不妄
交一人所撰述稿藏笥中雖宗族子姪不得一讀柴虎
臣與爲鄰比始得窺之因呼毛馳黃諸公共訪之于是
覺庵之名始著

傅齡文字長質錢唐人父巖字野倩明崇禎甲戌進士
官歙縣知縣從朱閣部大典駐師金華王師下浙江
被執死之子三齡發齡熙抱父尸以殉齡文遷父柩歸
藜藿不充者十年而卒見武林耆舊集

吳本泰字美子號藥師又號櫛菴仁和人崇禎甲戌進
士除行人授吏部主事改南京禮部歷郎中甲申後隱

居不出西溪有蒹葭里歲丁亥桶菴自海上遷避卜居
丁是其地近秋雪曲水諸菴與僧智一寂瑞闔僧道援
輩往還參叩園居饒篁竹而乏梅智一移贈古梅數本
劬地種之因自號西溪種梅道者著西溪菴隱志四卷
徐之瑞字蘭生錢唐人崇禎丙子舉人申酉後棄孝廉
遜居北烏山與汪魏美萬履安巢端明齊名浙中謂之
四先生當時將欲推選蘭生不行或劫之以法則舉所
佩帨示之曰此我磬懸之具也嘗爲西湖竹枝詞以寓
變哀之怨

汪風字魏美錢唐人崇禎己卯舉人欽寄歷落寡言笑

時人目爲汪冷甲乙之後奉母渡三江躋括蒼崎嶇山
澤間者有年母老欲就養于兄澄魏美念母不忍遠離
而又矢志不入城市藏身北郭每間月輿母至相與抑
搔色笑爲樂是時湖上有三高士魏美其一也當事重
其名或割俸金爲壽不受監司盧公遠心相值于僧舍
問汪孝廉何在魏美應曰方在此今已去矣盧公悵然
不知應者之卽魏美也朱竹垞嘗訪之大佛寺僧寮竹
榻蘆簾不蔽風雪瓦鑪火死不能具盃茗又嘗偕魏處
士允構過朱時已初冬共宿樓上所攜布被猶未裝絰
年四十九歿於寶石僧舍時康熙乙巳也

關鍵字六鈐號蕉鹿錢唐人崇禎癸未進士甲申除丹徒命南中擁立六鈐請設沿江水柵諸客將之劫商船者又以計禽劇賊鄧七不半年遽棄官歸歸隱四十四年絕口不言世事尙書宛平王公相國眞定梁公皆同年交契欲推挽之卒不答兩公語督撫曰君部中有吾故人梅子眞嚴君平之流也爲我善視之六鈐謝病不一謁卒年七十有九

李南字逸度號遂初錢唐人相傳爲徐中山後人官右班鼎革後棄家遠遁因挾崑山李氏子同竄以伯季相呼故姓李以來南故名南疾革時子嘉錫跪請宗姓所

自及名與字瞋目叱之終不言故其子孫懵不知爲何氏也所居曰沙河塘賣藥自給不妄與人交惟施相徐介諸隱君相往來而已卒年八十五

馮軾字士式錢唐人自言鼎革後不閱題名墨藝嘗與沈去矜諸公結平泉詩社而毛稚黃稱其有抱石焚山之節蓋高隱士也

沈齊賢字寤伊錢唐諸生性峭直常以濟時爲己任時流寇充斥江浙騷動寤伊上書略謂餉不知措兵不知用地不知屯民不知恤束於具文畫界而保以聽流寇之蹂躪可乎不省甲申思陵殉社稷隨郡搢紳後哭臨

三日不食經旬復私立木主於里社朝拜畢伏地哭社
故祀雷神猙獰可怖寤伊怒目叱曰汝亦當爲國捍禦
徒赤髮金睛嚇里媪乎閻巷小兒環視而笑則起逐之
市人皆以爲癡會山陰劉公宗周至杭急往謁抗學論
時事聲淚俱下諸儒皆白冠環坐一生忽私語曰黃巢
朱溫恐亦天命寤伊直前奮拳毆之南都既立歎曰江
左敬仲安在欲獻策闕下恥以口舌得官遂遊跡皋亭
山下乙酉寢疾執弟子曰吾孔孟一綫尙在語不及他
卒後林璐爲之傳

周介隱莫知其名字人私諡之曰介隱云錢唐人學問

賅博爲同人推重萬歷丙辰歲忽棄去舉子業結廬父
墓之旁請於母曰有弟鄉舉可養母矣兒將守父墓遂
居廬中慶弔問遺皆絕母念之或月一至他人莫得見
也在廬四十七年惟以母喪一入城年八十二而歿臨
歿吐氣滿室如煙雲者久之或曰介隱善天文得祕授
知天下將有變不然何獨于丙辰而忽爲是耶介隱事
罕見紀載郵周容春酒堂集有介隱傳

蕉廊脞錄卷四終

蕉廊脞錄卷五

錢塘吳慶坻撰

吳興劉承幹校

永樂大典二萬二千八百七十七卷凡例目錄六卷位

西先生所記同凡一萬二千冊冊數與明史異向貯乾清宮其副本

在皇史宬後因恭藏聖祖仁皇帝實錄乃移貯

翰林院李穆堂侍郎始借觀而副本闕二千四百二十

二卷擬奏請發宮中正本鈔補之未果嘉慶丁巳乾清

宮災正本燬其存儲翰林院者虔敬一亭無人過問咸

豐庚申之變書漸亡失光緒元年重修翰林院虔置此

書不及五千冊矣明年丙子繆小珊入詞館詢之清秘堂云尙存三千餘冊求借觀不可得丙戌志文貞銳官侍讀入清秘堂辦事小珊始得借鈔人間稀有之本癸巳小珊重入京師詢之館人則僅六百餘冊矣庚子巨劫翰林院牙門闌入使館藏書星散大典僅存三百餘冊宣統元年學部請以歸圖書館藝風堂文集言之最詳按全謝山入詞館與穆堂共借永樂大典讀之大典其二萬二千七百七十七卷見鮎埼亭集卷數小異余家藏笠澤叢書爲後至元五年十一世孫惠原刊於書院不分卷以甲乙丙丁爲次後一卷補遺書法類趙

松雪紙墨精良有輔國公如嵩印怡情書室圖書素心
人怡情書室珍藏書畫圖章信郡王恬齋素心人珍藏
信邸珍藏諸小印據邵位西先生書目云此書有宋蜀
刻本十二行行二十一字又明李如楨校刊本碧筠草
堂仿元刊本吳人王岐所寫不無訛字嘉慶間許槿仿元刊本七卷
又云錢遵王云宋刊本祇上下二卷又補遺一卷元刊
乃分四卷余家所藏至元刊本正分爲四卷與讀書敏
求記合惟邵目云書院本有三山王益祥跋而此本無
之

司馬溫公年譜近所見者桂林陳文恭公刻本已酉三

月在長沙從劉笏雲借閱所藏明刊溫公年譜六卷嘉
靖壬辰涑水馬巒編輯溫公十八世孫露校刻馬巒序
闕前半首露跋云公曾孫吏部侍郎伋扈蹕南遷子孫
因家浙之紹興山陰露王父按察使相巴陵尹初皆起
家進士堅有還夏之志賫志而歿露父解元晰來夏奉
祀云云是溫公後人固嘗居浙復乃復歸夏邑也

仁和邵位西先生博極羣書嘗就所見諸家藏書記錄
於四庫全書簡明目錄冊端蠅頭細書上下皆徧咸豐
間爲瑞安項几山傅霖借鈔辛酉先生殉節書存項氏

同治己巳先生之子子俊順年在江甯介孫申頌言於

項氏得索歸別寫副本流傳都下祥符周季貺星論吳

縣王芾卿頌蔚武進董綬金康山陰胡右階念修皆有

遙鈔之本光緒癸卯先生之孫伯綱章游吳門見胡氏

鈔本乃更貽書中頌商定體例繕校付刊壬子之春蟄

居海上從伯綱借觀復為校勘新鈔之本而月而後卒

業茫茫浩劫古籍將湮抱此遺編如游宛委蕭寒寂寞

中亦假以送日耳

宋李壁撰王荆公詩注五十卷有劉辰翁評點者乾隆

辛酉海鹽張宗松清綺齋校刻本最精邵位西先生藏

元刊本即張氏所仿刻者中闕第三十第十卷末頁劫

後爲錢塘丁氏所得復以歸邵余與伯綱同寓滬北得見此本前有位西先生長跋詳述是書流傳端緒適清綺後人張菊生得元大德辛丑刊本前有詹太和撰荆公年譜及劉歸孫序王常題識皆乾隆重刻本所無全帙完好古香可挹書中有季滄葦印記後輾轉歸豐潤張氏者菊生先後得乾隆刻本至五六冊今復得此誠奇緣也位西先生跋一通附錄于後 謹按乾隆間

欽定天祿琳瑯書目後編元板類云王荆文公詩二函二十冊宋王安石撰李壁注劉辰翁批點壁字季章號雁湖登進士累官禮部尙書參知政事同知樞密院事

謚文懿事具宋史本傳辰翁字會孟號須溪廬陵人少
舉進士宋末不仕書五十卷前有劉歸孫序卽辰翁之
子也又詹太和所著王荆文公年譜目錄後有墨記僕
頃問詩於須溪先生及半山則恨李注本極少於是先
生出示善本併得其評點茲不敢私命刻之梓期與四
方學者共之門人王常謹題常字士吉安成人蓋大德
辛丑所刻而歸孫序之太和字甄老桐廬人每冊首有
白文謙牧堂藏書記末有朱文謙牧堂書畫記俱橫長
印又按乾隆六年辛酉武原張宗松重刊王荆文公詩
序云十年前購得華山馬氏所藏元刻本間取通行臨

川集勘之篇目既多寡不同題字亦增損互異乃歎是書之善不獨援据該洽可號王氏功臣也史稱李章嗜學如飢渴今雁湖集不存他著錄亦盡逸惟是書見稱藝林而流傳絕少因重鈔以廣其傳又曰李氏之注王詩猶施氏之注蘇詩任氏之注黃陳二家詩也山谷後山詩注尙有前明雕板東坡詩注則宋漫堂先生獲宋槧不全本補綴刊行今遂家有其書矣獨是書絕無僅有近代藏書家若絳雲若傳是俱不列其目華山馬氏至晚始得之故道古樓書目亦未之載衍齋沒後復隨雲煙飄蕩流轉數姓歸予插架又曰是書首尾完好惟

卷端失去魏鶴山序一篇第三十卷第五十卷失去兩
末頁又曰須溪評點雜亂注中觀者目眩今芟去使李
注孤行更覺心目開朗又乾隆四十一年丙申張載華
識云先兄青在每以失去鶴山序爲恨訪求不得宗人
芑堂好古士也客冬於武林鮑氏知不足齋錄以貽子
爰屬延一姪補刻卷端又張燕昌識云乾隆乙未冬十
一月二十三目余於杭城好友鮑以文知不足齋鐙下
得觀李雁湖注王荆文公詩宋槧不全本一卷之三卷
十五之十八卷二十三之二十六卷二十七之二十九
卷四十之四十七凡十七卷目分上中下每卷尾有庚

寅增注前後有晉府書畫之印及李氏德圭諸印吾宗
青在先生曾得馬氏藏本付梓以不得魏序爲恨今鮑
氏宋本有之亟錄以俟補入并詳所見卷帙冀好古者
廣其傳焉今按張青在刻本所自出卽此本也第三十
卷五十卷尾缺頁正同而書中間有夾籤乃刪薙須溪
評點而設所云得之華山馬氏此書印記乃吾鄉沈椒
園先生所藏豈流轉數姓而馬氏晚始得之不復加圖
印歟道光己酉余得之琉璃廠文華堂書肆先有張君
重刻本重鄉先輩椒園先生故物且須溪評點亦自有
意致乃以八金易置案頭頃讀天祿琳瑯後目知 內

府尚有完全元槧本前有詹太和王荆文公年譜張青
在重刻序例恨荆公獨無年譜姑取宋史本傳刻附卷
首不知原書自附年譜也又有劉歸孫序及王常題識
刻書年月張君但據陳直齋解題恨不得魏鶴山序文
不知魏序作於嘉定七年季章門人李西美醇儒初刻
是書之時宋本有之元本未必重載也謙牧堂乃大學
士揆敘家印記揆敘乃明珠之子刻通志堂經解之成
德其兄也咸豐元年六月二十日辰記

漳浦黃忠端公書孝經卷冊各一忠端夫人蔡氏所書
孝經卷一漢陽葉氏所藏忠端自跋一爲辛巳秋一爲

辛巳八月皆請室中筆墨也

冊舊藏亳州何氏忠端目題曰第二十九本有跋語

五條卷舊藏元和毛氏有忠端自跋一彭紹升所作頌一

按忠端公孝經別本自跋

云嚮在西庫寫此經一百二十本其七本有補幽風

席人

章末引詩云我稼既同上入執宮功畫爾于茅宵爾索綯亟其乘屋其始播百穀

餘八十本俱

依石臺原本又三十三本以聿修厥德移於天子之首

西庫無佳筆俱用禿筆書之云云葉氏所藏殆即其時

所書蔡夫人善臨池代公作行草幾奪真孝經卷題崇

禎甲申秋望日偶錄蓋臨忠端書葉氏又云夫人書孝

經別一卷末題明忠烈文明伯武英殿大學士黃道周

妻蔡氏玉卿書於石養山中之齋室凡二十九字

先生嘗為

夫人易名孝徽不著年月忠烈謚隆武所贈此卷當是丙戌後作忠端嘗進孝經大傳其序云臣繹孝經微義有五著義十二是十七者以治天下選士不與焉而士出其中蓋深痛于楊嗣昌陳新皆奪情而起無父無君之言滿天下乃退述是經以補講筵之闕崇禎庚辰被逮白雲庫下諸獄卒不敢有望于公惟日奉楮札丐書時公拷掠備至血肉淋漓日據敗几書孝經以當役錢而已忠端孝經定本善化賀耦庚先生嘗刊於黔中余家有是本幼童入塾卽以是本課之

忠端屢上疏言自古迄今決無數米量薪可成遠大之

猷吹毛數睫可奏三五之治者又云自古外患未弭則大臣一心以憂外患小人未退則大臣一心以憂小人今獨以遺君父而大臣自處於催科比較之末行事而事失則曰事不可爲用人而人失則曰人不足用此數語自來亡國之臣皆蹈此轍可勝歎哉

倪文正公元璐手稿四冊前二冊皆疏稿大氏爲戶部尙書時事論兵餉漕糧開採鈔幣鹽務車戶凡九首格式與本朝奏摺略同書牘三通詩文一百十首中多涂乙舊臧紹興陳氏留古齋今爲日本長尾甲雨山所得余從張菊生轉假讀之忠貞遺墨留天地間二百七十

年乃爲東人所獲惜哉按四庫書目倪文正集十七卷
續編三卷奏疏十二卷講編四卷詩集四卷文淵閣著
錄其詩又收入乾坤正氣集別有鴻寶應本十七卷今
有傳本又公門人唐九經嘗梓公遺詩未見

甲申傳信錄鈔本四冊當湖穉農錢勣撰凡十卷每卷

以四字標目卷一曰睿謨留憾癸未八月至甲申三月卷二曰疆

場裏革秦晉燕死難諸臣卷三曰大行驂乘甲申三月在京殉難諸臣卷四

曰跖舖餘鸞李闖拷掠諸臣卷五曰槐國衣冠李闖除授京省僞官卷六

曰赤眉寇略李闖始末卷七曰董狐剩笑甲申前後楚豫燕齊事略卷八

曰桑郭餘鈴吳三桂借兵復仇始末卷九曰戾園疑跡偽太子始末卷

蕉廊脞錄卷五

八求恕齋

十曰使臣碧血左懋第北使殉節始末自敘云一時人士所紀述

者有國變錄甲申紀聞國難紀聞見聞紀略國難睹記變難確傳燕都日記陳生再生錄孤臣紀哭陳方策揭凡十餘家今諸書傳本不恆見蓋遺佚者多矣

魯春秋不著撰人姓名記魯王監國時事其監國紀有云宏光元年乙酉夏五月南京不守江南及浙西郡咸望風下杭諸紳奉皇太后命敦請潞王翊鏐監國甫三日因原任都督陳洪範籍士馬錢糧北款錢塘知縣顧咸建不從棄去諸生沈乘建守城之策百姓暱王慈立殺乘原任兵部主事王道焜行人司行人陸培不應召

自殺云云按王陸二公死節見於紀載綦詳獨沈乘被
殺知之者鮮杭州府志忠義亦不載其人稱字孚中仁
和諸生武林且款乘獨大言誰主降議可斬請留方鄭
二總兵台守空武林門外民屢宿師猝死論者追惜之
魯春秋祇傳鈔本特表而出之以補志傳之闕

劉翰怡京卿得海寧查伊璜所箸罪惟錄凡一百冊分

紀志傳三門其書崇禎曰毅宗烈皇帝紀宏光曰安宗
簡皇帝紀後列魯監國唐王桂王則書曰附志其目二

十七曰天文曰五行曰冠服曰藝文

專錄敕撰書及賜碑

曰輿圖

曰禮曰樂曰土地曰貢賦曰屯田曰河渠曰班爵曰陵

志曰科舉曰直閣曰銓部曰典牧曰茶法曰錦衣曰學

校一職官曰外戚缺曰將帥曰鹽曰數曰封爵曰屬夷

傳凡三十五曰皇祖禰列傳曰皇后傳曰太子傳曰諸

王列傳曰翼運王國列傳徐壽輝等曰翼運外臣傳蔡伯顏等曰

啟運諸臣傳功曰抗運諸臣傳靖曰理學諸臣傳曰經

濟諸臣傳曰二字破損諸臣傳內有三曰致命諸臣傳

曰諫議諸臣傳曰諷諭諸臣傳曰清介諸臣傳曰乘時

諸臣傳曰循謹諸臣傳曰文史諸臣傳曰武略諸臣傳

曰播匿諸臣傳曰隱逸傳曰俠烈傳曰獨行傳曰庸誤

諸臣傳曰方外曰藝術曰回誤兩傳三人張沈論之曰

傲之日 曰蘭懿分目曰宦寺曰奸壬諸臣傳曰叛逆曰西

蕃曰蠻苗曰勝國列傳曰外國別有列朝帝紀逸篇列

朝逸傳則紀傳刪餘也紀前序一首為全書之敘志前

序一首則專論志列者二序草書學晉人藝風定為伊

璜自書伊璜於莊氏史案牽連罹既而不知其閉戶著

書乃有此巨帙為弘光作紀大書廟謚雍乾間書禁至

嚴此書幸存二百餘年沉埋祕籍復出人間奇已書中

於 本朝未入關前則書曰東師入關以後書曰北師

並無胡虜字樣每卷首眉間有大清順治二年編大清

順治四年編等字疑為後來人所增亦不知何所據也

蕉廊脞錄卷五

十求恕齋

接伊璜原著本名明書爲百二十卷後改名罪惟錄其
自敘署名左尹字曰非人有他時復原名之日卽此書
亦復舊明之日語伊璜名繼佑以應試時吏誤書作佐
遂名繼佐入粵後乃隱名曰左尹云

燭火錄三十二卷江陰雲墟散人李本天根撰記甲申
以後福潞唐桂魯諸王事起順治元年三月十九日莊
烈帝殉社稷至康熙元年十一月二十三日魯王薨于
金門止凡十有九年後有附記一卷則康熙二年至二
十九年臺灣鄭氏始末三藩叛後之事有乾隆十三年
六月自序名燭火者深慨夫三王臣庶以明末餘竊不

自照燭妄思西升東墜遂取滅亡為可哀也卷首有論

略一卷持論極有識又有紀元續表一卷引用羣書一

百十七種又采各省通志及諸家文集年譜三十七種

其書用編年體排日紀事前數卷紀李自成破燕京及

南都立國事最繁重後數卷紀永明王事稍簡略書中

多載奏疏文檄書牘為他書所未見者今亦為劉氏嘉

業堂所藏引用書目附錄于左御覽資治通治通鑑明

通鑑紀事本末三藩紀事本末精補緜陸

略儼難村大事紀沈周元甲乙事案郊鵝羶猓

先撥志始文秉明末五小史鯁三楊陸榮明季遺聞

疏游南北略計小奇殷頑錄楊陸榮明季遺聞

若思求野錄豁猴樵隱也是集自非逸叟明朝

怪異雜記礮燭道人核真略鵠鵠楊所知錄鐵鍊

萬花金谷	謙清利言	雞窗	歸草黃孔	西機略	滇黔耳聞	中襍記	亂志馮已	海角遺編	守記事許	廷獻王維	詩紀兩廣	末紀兩廣	頌賦授誌	趙吉士	甲申忠義	名臣賢行	國難錄徐	光東明
談往	虹筆記	柳軒	北聖	征行	人陽	畫壁遺稿	蒼舒	嶺樵	節略	華復	復	復	忠俠	忠志	寇志	崇禎	樵史	
議撮	堅瓠	思菴	北聖	紀略	孫可	安龍	感逸	私記	陰守	威南	兩粵	蜀難	蜀難	子	崇禎	明紀	足徵	
愚公	錄	三垣	政餘	北游	王貴	始末	真	九	虞	山	妖	閩	閩	閩	閩	閩	閩	
復社	新編	李給	南	南	南	南	南	南	南	南	南	南	南	南	南	南	南	

流寇長編二十卷吳江戴笠耘野崑山吳喬修齡同輯
紀明季流賊始末起崇禎元年戊辰終康熙三年甲辰
前十七卷以一年爲一卷排比月日紀載甚詳卷十八
下增甲申剩事四字其敘闖獻事兼載弘光隆武永厯
三王事至桂王爲吳三桂戕害而止末有流寇長編始
終錄一卷補遺一卷前有自敘二首痛言思宗好察好
佞好小人好速效好自大好自用廷臣善私善結黨善
逢迎善蒙蔽善守資格善因循善大言虛氣煤山之禍
眾力所成闖賊獨受其名耳其後論列國事敗壞所由
凡四十八事於天崇兩朝朝政之窳兵機之失言之痛

切是書僅鈔本爲禮邸舊藏有宗室文愨公家世藏禮
邸珍貺檀尊藏本禮府藏書四印伯羲祭酒藏書之一
書面有王文
敏公題字
近爲張菊生所得藏涵芬樓余借觀記其
大略如此

閱流寇長編卷十七紀甲申三月甲辰日一事云京官
凡有公事必長班傳單以一紙列銜姓單到寫知字兵
部魏提塘杭州人是日遇一所識長班亟行叩其故於
袖出所傳單乃中官及文武大臣公約開門迎賊皆有
知字首名中官則曹化淳大臣則張縉彥此事萬斯同
面問魏提塘所說按京師用長班傳送知單三百年來

尙沿此習特此事絕奇思宗孤立之勢已成至中官宰相倡率開門迎賊可爲痛哭者矣

上虞羅叔蘊振玉喜藏書耽翫古籍攷訂宋元版本尤

精塙辛亥京師變亂避地日本西京乃以所得敦煌石

室影照本

原本爲法人伯希和親至石室所得伯以影照本轉餉叔蘊

影印十八種

皆中土久佚之珍祕石室遺書之精華蓋原卷旣歸歐

洲東方學者無從窺見叔蘊節縮衣食爲之傳布俾千

年祕笈復顯於世彌可寶貴叔蘊於每書後皆有考訂

精博無倫士鑑購得之茲列其目如左 東山學舍精

印鳴沙石室佚書總目

隸古定尙書

夏商周書

糜

信春秋穀梁傳解釋 論語鄭氏注 六朝寫本晉紀

春秋後國語 閩外春秋 水部式 沙州圖經 附

西州圖經

諸道山河地名要略 十道志 張延綬

別傳 太公家教 陰陽書 星占 修文殿御覽 附

兔園策府

唐人選唐詩 右十八種用玻璃版上等

宣紙精印大小悉照原卷尺寸與原迹絲豪不爽誠奇

觀也前十七種均為原卷舊題惟唐詩一種殘闕無標

題叔蘊以所寫皆唐人詩又塙為唐人寫乃以唐人選

唐詩名之云爾

日本平安福井氏崇蘭館多藏宋元板本舊籍中有宋

甄劉夢得集三十卷外集十卷爲東山建仁寺舊藏相
傳千光國師入宋時齋歸後歸福井陽湖董授經康收
藏考訂與叔蘊相伯仲壬子之春相將東渡僑居西京
崇蘭館藏書遂得徧覽劉集首尾完善乃假歸以珂羅
板影摹佳紙精印集每半葉十行行十八字中縫有刻
工姓名書體道麗純仿開成石經真海內奇寶也授經
自跋謂際此流離轉徙牽於結癖投擲鉅貲以印此書
殊不自量然獲此百部行世不啻貽傳百部真本舉凡
舊鈔明刻訛謬相繩藝林嚮奉爲珍祕者可槩供覆瓿
於中山是編功匪淺鮮讀是跋爲是書幸又爲董君嘅

矣

永樂大典卷七千六百三杭字部有西湖老人繁勝錄一卷向無傳本甲寅冬繆筱山得於京師後歸菊生刊入涵芬樓叢書惜魚豕滿目余輟爲校正之其書雜記臨安故事自歲節朝賀孟夏詣景靈宮佛生日端午節六月六日崔府君生辰暑月納涼孟秋行幸中秋觀潮冬孟駕詣景靈宮宣宗聖節一陽節預賞元宵以及春教秋教殿司諸軍水教次第鋪敘上自朝儀下至市易僧尼瓦子勾欄戲劇凡器用飲饌之屬纖悉畢具亦武林舊事之亞也

永憲錄六卷江都蕭爽撰卷首紀 祖宗創造制度卷

一紀康熙六十一年事卷二紀雍正元年事卷三紀雍

正二年事卷四紀雍正三年事卷五紀雍正四年事卷

六紀雍正五年至六年二月以前事鈔本每葉中縫有

唵梔僊館四字惟一卷書周氏小娜嬛館蓋兩家合鈔

本也此鈔本 先大父舊藏同治七年自太原南歸行

河洛間時積潦數百里車行至艱載書之車屢覆往往

墮泥淖中夏抵杭州發匱則書爲水厄多朽腐不可收

拾此本文字亦太半殘闕其可辨識者十之六七耳余

嘗摘錄其自敘文曰恭惟 聖祖仁皇帝聰明□□□

□文武享國六十有一年深仁厚澤淪浹萬方我 世
宗憲皇帝繼□□統峻德豐功殊恩異惠不崇朝而徧
海宇重熙累洽□□□□小臣伏處草茅生逢 聖世
每思歌詠□□皇史實錄所未得見歲壬寅□□□恭
載□□□授受之時適閱邸鈔因略記大端既伏讀登
極詔引孔子三年無改之義且有永遵成憲不敢更張
之 旨故復蒐集甲辰及戊申二月以前事備諒陰後
三年而實見我 世宗憲皇帝益人敷治事事必推本
於 先帝成模大烈善則歸君之美孝思所至蟠際上
下日月合璧五星連珠而天昭其瑞河清五省穀秀九

政而地啟其祥百歲駢登三男並育而人臻其慶千古
未有之事萃於千古未見之時且草野遺賢盡蒐羅而
在列積賦浮租悉蠲除以更始明良喜起物阜民安何
其至哉若夫放流誅殛聖代豈廢兵刑彼天潢覬覦之
萌由十年儲位之虛愚氓浮議□□□一二奸頑造作
無稽以污人 聖德惑眾聞究之霧□□□ 世宗憲
皇帝之光明正大昭然億萬臣民之心目亦諸人之自
絕於天耳□□因時變易罔非監于 先世舊章 今
上皇帝復加裁酌必曰 奕 祖攸行此 聖祖仁皇帝
所以垂法萬世也集既成其中殘失良多以俟多聞者

續之或曰不慎其以僭妄取戾歟小臣曰然然否否生
太平之世飲和食德皆當不忘 累朝之盛美況丁未
秋有一切詔旨許官吏紀載刊刻其曉之令遂竊取以
有斯編奉揚 詔意名爲永憲云其凡例附後乾隆十
七年歲在壬申嘉平上浣江都草澤臣蕭爽拜手恭紀
按是書世鈔傳本繆菝風前輩得殘本一卷刻入叢書
欲得余家殘本補之時客海上未暇歸檢藏籍後數年
而菝風歿矣鈔本闕字太多今掇拾記此以存槩略云
杭州古志北宋圖經無考至南宋而有臨安三志乾道
志十五卷惟壽松堂孫氏藏宋槧殘本三卷采入 四

庫全書其後凡三刻仁和丁氏武林掌故叢編本仁和孫氏影宋本會稽章氏四川刻本淳祐志存者僅六卷見阮文達四庫未收書目胡書楚學士從永樂大典錄出釐爲十六卷於寺觀獨詳見學士崇雅堂詩集自注丁氏武林掌故叢編本八卷題曰淳祐臨安志輯逸蓋原稿經亂又佚其半矣咸淳志百卷傳鈔本得九十六卷則錢塘汪氏振綺堂景宋刻本也

順德李仲約侍郎藏松月堂目下舊見六冊鈔本不著編輯人侍郎据書中康熙三十五年二月三十日隨

上親征及先考皇八子云云定爲廉親王允禩之子允

禩於雍正四年命圈禁高牆改名阿其那者也書中紀
載首國初創業主帥次天聰年主帥次順治年主帥以
及議政大臣參贊大臣隨征明大臣次康熙年議政大

臣參贊大臣雍正年議政大臣參贊大臣軍機大臣七

六月初十日以西北兩路軍興欽派怡親王允祥大學
士張廷玉蔣廷錫密為辦理軍機事務按軍機大臣之
設於雍正初年人人知之而未詳年月東華錄南省公
餘錄養吉齋叢錄皆云雍正初此則年月日皆具亦故
事所當知者乾隆年議政大臣參贊大臣軍機大臣次宗人

府次領侍衛內大臣次散秩內大臣次內閣分滿漢次翰

林院皆詳著爵秩姓名及任事年月議政參贊以下并
詳其升授署調降革薨卒漢人或注其籍貫

蕉廊臚錄卷五

以上僅就所見第一
支求恕齋

冊言
之 天潢貴胄能秉筆紀述至爲難能而其書不傳可
嘆也

目下舊見首葉載詩一首云可喟當年一念差因何流
落帝王家我本西方一衲子黃袍換卻紫袈裟蓋 世
祖之作舊時傳 世祖棄臣民實遁跡爲僧疑爲齊東
野人語吳梅村清涼山讚佛詩相傳詠 世祖端敬皇
后董鄂氏事有指目下舊見所載詩爲證者細繹詞意
疑是 世祖未升遐之前所作語若禪悟不可凡斷也
吳尺鳧繡谷亭熏習錄稿本舊藏瞿氏清吟閣庚辛劫
後丁松生得集部稿本二冊起楚辭終明人別集凡二

百一十餘種惟闕總集清吟閣書目亦爲丁氏所得据書目繡谷亭熏習錄八冊此當是原書第六七冊近歲丁氏書散出湘潭袁伯夔得之仁和家印臣昌綬又得經部易類一冊乃與集部并爲校刊易類凡一百五種原冊內有埏記一紙備載子目易一百二十九書三十詩三十一春秋五十九周禮十三儀禮十禮記二十三三禮六樂八是易類尙闕二十餘種似爲未成之稿同里先正遺書放紛斷壁殘珪彌可珍惜印臣好右勤學尤有足多者

湘潭葉奐彬吏部藏杭堇浦先生訂譌類編六卷其目

曰義譌事譌字譌句譌書譌人譌天文譌地理譌歲時
譌世代譌鬼神譌禮制譌稱名譌服食譌動物譌植物
譌雜物譌凡十七類自序言丙寅春海寧門人范鳴遠
鶴年邀予作觀海之游因寄其聽濤樓者幾半載爰出
是編與老友俞正之楷共相訂質暇時遂次而編輯之
按是書無刊本舊藏漢陽葉氏平安館吳彬將梓行之
長沙變亂之餘此事遂廢

全謝山句餘土音三卷嘉慶間廣州有刻本癸丑吳興
劉承幹貞一得鈔本八冊分爲三十二卷鄞人陳銘海
星涯注銘海諸生性嗜書手鈔鄉先輩詩文集盈篋卒

年七十七著鷗兩山莊詩草見光緒鄞縣志藝文七注
文極繁富不免博而不精之弊卷一至卷二十八皆甬
上故事及詠四明土物卷二十九爲擬薤露詞凡七十
五首卷三十之三十二爲甬上雜歌皆爲明季忠義而
作江東風節矧灼千古甬上一隅遺聞軼事可傳者如
此之眾以今絜古當何如耶

杭州駐防旗人郝蓮字青門號飯山自號石甌山樵著
說餅齋吟草丁氏杭郡詩三輯采其詩誤作錢塘人近
烏程劉翰怡得其所選國朝人詩凡五十六冊蓋從朱
氏結一廬散出者與華陽王雪岑所藏二十冊紙墨一

色皆精鈔本蒐采極博余從兩家借觀綜其所采諸書
凡三十八種皆總集也編次體例尙未盡善窺其選錄
之指實主闡幽卷首以亭林爲之冠明季遺老甄錄最
夥或系小傳遺聞軼事往往而在起國初訖乾嘉間詳
於山澤而略於臺閣以詩存人用意良厚每卷尾間自
記校讀歲月始于庚寅訖于乙未用力可謂勤矣翰怡
欲爲劍龍之合余謀諸雪岑慨然諾之亦文字中一重
公案也

余記此後兩月復得三六橋都護所刊柳營詩傳云
青門善畫耽吟終身不娶蓄書數萬卷著西湖竹枝

詞說餅齋集嘉慶初浙江布政南昌劉鉞爲刊詩一

卷

郝氏詩選中有朱彬儒龔藍田張元麒三人詩皆杭人
爲詩輯續輯三輯所未經搜及者亟錄存之 朱彬儒
字錢湖錢塘人 冬日同郝青門俞蕈香游龍門嶺

探奇須絕頂雙屐躡層雲木落山逾瘦磴深泉不聞偶
逢樵牧侶暫與鹿麋羣日極蒼茫際前峯正夕曛 仲

春作 鳴榔驚曉夢新水溢方塘日暖花如醉春晴草
亦香湘簾籠翡翠芳砌睡鴛鴦無事研書坐鶯囀晝漸
長 龔藍田字是璋號半龔錢塘布衣精篆刻送別吳

子偃思歸里 寒風欺瘦骨 悵望白雲留 縱有千尊酒
難銷萬斛愁 覆巢危已甚 結隱念應休 料得高堂在 相
憐戒遠遊 送劉子小山 千山連抱水 環圍聽唱驪
歌送客歸 惆悵別情誰 得似江南江北 鴈分飛 張元
麒字孔書 號樸庵 錢塘人 喜吟詠 善飲酒 憶三十年前
朝夕過從 嗣出各爲 饑驅而樸庵兩遭 回祿四喪其妻
年五十甫得子 居室又遭 煨燼於是 席卷一空 潛居江
口 旋聞病歿 余與葦香往 訪盡日 不得其居址 蓋其耿
介之性 恥于千人 寄居外家 隣里不知其姓 其後屢詢
居人言 其外家亦已 遷移不識 又在何處 不特其詩稿

不可得卽其子亦不可知茲于舊篋中得其寄懷詩一首錄後 秋日寄懷諸友 憶自論交久憐予見日疏豈因鴻鴈少不寄一行書別後秋將晚相思月落餘問君重九日把酒意何如 右三人皆窮巷癯儒姓名不出里閭郝氏以故舊之交錄其數什幸而獲存不可聽其湮沒也又續輯卷三十二有陶鑿錢塘人字兩峰郝選作磐錢塘布衣字淨蘅有兩峰草堂詩鈔三輯卷十九有陸涸字文水錢塘人郝選作錢塘舉人有螺峰草堂集

陳松山給事田輯明詩紀事百餘卷所收明人別集五

百餘種總集二百餘種國變後貧不能出都乃以此七百餘種之書全售於日本人先是張菊生聞陳書至滬將籌二千金購之未及議值而先爲東人所得惜哉

莊芝階舍人家藏寶祐四年登科錄榜首爲文信國而陸秀夫謝枋得並列二甲天水將亡而是科人才獨盛黃薌泉先生嘗爲長歌詠之按錄中凡六百一人其最著者二甲第三人羅倚廬陵人饒雙峰高弟四甲第四十一人柴隨亨與其兄弟隱於樺林九磔之間人稱柴氏四隱四甲第八十一人陸夢發官太府寺丞有烏衣集四甲一百五人黃震四甲第一百十七人舒岳祥學

者稱閩風先生五甲第三十八人薛嶠有雲泉集五甲
第一百二十一入胡三省五甲第一百七十八人陳著有
本堂集是科覆考檢點試卷官爲王應麟錄首載六月
一日准敕依格賜進士期集錢一千二百貫文小錄錢
五百貫文七月一日准省劄爲期集所支用不敷再給
降題名小錄錢一千七百貫文並見詩注劫火以後此
錄不知尙在人間否

堇浦先生著武林覽勝記四十二卷無刻本友石山房
高氏藏鈔本題仁和杭世駿大宗輯東里盧文弨召弓
校其目爲水利隄塘橋梁園亭寺觀祠宇古蹟名賢方

外物產冢墓碑碣卷帙書畫藝文志餘外紀體例與西湖志相近志餘外紀各卷采摭尤備舊爲何春船元偉藏又有何夢華元錫印春船錄兩浙經籍志一則于卷前云賜書堂孫氏嘗以此書進呈外間稿本流傳絕少寒夜叢談二卷仁和沈梅村赤然撰曩錄入杭州藝文志未見刊本比得新陽趙氏光緒乙酉刊本第一卷談理取前哲之美言寓言有關於持身接物者蓋刺取諸史諸子精言而發明之體類連珠而不作駢儷語二卷談禮自敘謂邇來吾鄉喪葬婚嫁諸禮多不合于禮因舉古禮而以今俗類舉之以示矜俗之義三卷談瑣多

述官直隸時所聞見頗關掌故末附論作文作詩及學
書凡數則蓋爲其子弟輩道也先輩隨筆纂錄皆不虛
設如此

吳星寥徵君農祥譔著宏富見於乾隆杭州府志藝文
者凡三百四十二卷而世間傳本絕尠相傳徵君遺稿
藏蕭山王小穀太史家丁氏八千卷樓藏徵君手稿二
十九冊其後丁氏書歸江南圖書館此本乃復出于金
陵市上孫康侯峻得之余又見楊見心家有流鉛集十
六卷一章藻功序方文翰蔡如選定徵君子裕僧彌校
字嘉慶丁卯泰州宮節溪增祐藏跋云游京師時王徵

君平圃所贈平圃則得諸浙人云

儀徵鄭楓人

漢

官杭州知府日嘗刊杜集曰玉句草堂

本其自敘謂杜集藁本不下數十百家箋釋注解言人殊乃取舊本之善者刊爲袖珍版勞人僕僕舟輿便行匝也箋注概從刪削以少陵一生不爲鈎章棘句以意逆志論世知人聚訟紛如蓋無取焉余舊藏此本行役萬里必以自隨楓人有玉句草堂詩集未見楊芷姓雪橋詩話中載其一詩又有詞三卷爲其婿竹友所刻

楓人以召試得中書官
杭州修府志體例頗善

張船山日記二冊自題爲己庚雜記二卷首葉五行云

此乾隆己酉庚戌冬春之際從棧道北上紀程之書也
僕戊申春北上己酉夏西還己庚之際又北上辛亥夏
又西還遊雲棧四此其一也惜前後三次皆無日記聊
存此以爲談助嘉慶丁巳正月元夜重訂于京師末一
葉自序云武陵漁父入桃花源及歸處處誌之蓋桃源
人自忘情而漁父固有情人也余北馬南船足跡半天
下然煙雲過眼情隨事遷每於燈窗默坐之餘偶一追
念舊游往往昏如隔世以今視昔感慨深矣近自己酉
閏夏以來訂散記一編一身之動靜喜怒逐日記之家
居從略出遊則瑣屑必書日積月增濫如市儈間酒肉

帳簿東坡詩云泥上偶然留指爪鴻飛那復計東西余亦恐歲月易遷浮跡難定聊藉此以留之而已遂州張問陶夢名麟青書于鳳縣客舍時乾隆五十四年除夕前一日燈下造冊中所記纖悉必詳每雜以詼諧之詞排日有詩以詠史事者爲最勝其夢名麟青他書所未見也舊爲姚伯昂所藏伯昂船山門下士道光乙酉得於厰肆今在張紹原元普家

山陰王樂山某在阮文達滇督幕府與修雲南通志與文達持議不合辭去箸雲南備徵志若干卷以示師荔扉荔扉同時箸滇繫一書亦與通志有異同也滇繫旣

刊行樂山所箸世尠知之前乎樂山者有倪某在鄂文
端幕府箸滇雲歷年傳滇中有刊本倪氏後人流寓昆
明版尙存而印本絕少樂山備徵志葉柏皋提學滇中
嘗以稿本寄上海商務館印行之惜尙缺五卷無可蒐
尋矣倪君佚其名字性兀稟居文端幕每晨起卽收拾
臥具中弄白金百以備資斧至夕始啟之日以爲常蓋
示偶不合卽襪被去也時人目爲倪恠云

煙海紀聞鈔本八巨冊不箸撰人姓名自署曰閒園散
人紀道光間禁煙事首錄黃鴻臚摺子次廷臣會議摺
及諭旨次林文忠擬議章程摺二片奏二附戒煙藥

方次林文忠爲欽差大臣諭各國夷人文一道此後記
載不分門類略次年月凡上諭十六道浙撫閩督浙
提督江督廣督直督前後奏摺十八奏片三四省督撫
會奏摺一欽差伊里布奏摺一楊提督奏摺一廣督撫
咨浙撫藩咨欽差伊咨文各一漳州知府乍浦同知稟
各一裕撫致周督書一林文忠家書一粵人致閩人書
一無姓又英國人呈 皇帝文照會閩提督文僞示
文致定海地方官書各一又白夷供詞一又雜采粵東
日報各州縣探報全粵義士公檄三元里義民告白小
說目錄感事詩日記書札謠文駢體之屬最後則夷人照

會及要求款目奏定和約摺子

附清單

而以廷臣議覆收

稅事宜摺子終焉揣其詞意似是粵東人所爲雖編次
溥無條理而於此案本末大略已具亦足資後來考鏡
矣

先工部兄手鈔朝鮮詩錄凡四冊蓋從洪洞董研秋檢
討文渙借鈔第一冊自俠遜鄭夢周以下至女道士許
景樊各詩皆全錄明詩綜自王徽以下至高麗妓德介
氏止凡十家似是入國朝後詩人其後又錄鄭夢周詩
幾盈二冊繁簡失當又自柳得恭至李豐翼二十九家
中如申錫愚有與馮魯川王霞舉黃翔雲倡和之作朴

珪壽有贈沈仲復董研樵即研之作趙雲周徐衡溇申

轍朮宗源奎趙徽林均有和仲復研樵霞舉翔雲之作
徐相雨有懷倪豹岑方小東李芋仙之作俞致崇有同
許海秋黃翔雲王顧齋董研樵謁顧亭林祠之作則皆
同治初來游京師者二百年來朝鮮詩人奚止此數董
君采輯未博以其爲先兄遺墨且首尾精整無一率筆
乃裝治而謹弄之

阮文達石經儀禮攷文書面有一木記曰濂溪周氏書
屋刊在蘇揚發兌奉憲諭不許兌入浙江此語殊不可
解

永樂大典卷七千六百三杭字部有西湖老人繁勝錄

似從大典本遙鈔非原本也

繆藝風前輩得于京師以貽張菊生刊

入涵芬樓祕笈是錄紀南渡臨安繁盛之狀自來未見
箸錄鈔本不精譌斂滿紙菊生屬爲校勘客舍無書僅
爲校正譌字疑者闕之西湖老人不詳其姓名錄稱宣
宗聖節又言慶元間油錢云云似作追溯語當是理度
兩朝時人所紀起歲節聖駕登殿奏賀訖於守歲飲酒
雪夜散絮胎紙被飯貼子諸事皆按歲時月日次第記
事其大者若郊壇祠祀禁中大宴春秋教場登門放赦
其細者市易僧尼戲劇瓦子勾欄凡器用飲饌之屬纖

悉畢具間以市井俚語如操土風凡有標題不復提行
遠不逮夢梁錄武林舊事體例之善大氏信筆記述與
吳自牧周密有意著作殊科然如所言金國奉使賀
生辰一節及京都有四百四十行及四山四海諸名目
多出於二書之外當日行都富庶朝野酣嬉之象殆可
于言外見之涵芬樓刊成後原本不知何緣復出孫康
侯于滬上書攤得之自秣陵寄示乃重識其緣起如此
鄞人陳僅字餘山又號漁珊道光間官陝西歷延長紫
陽安康諸縣有惠政所箸濟荒必備一卷捕蝗彙編四
卷南山保甲書一卷竹林答問一卷讀選意籤一卷文

莫書屋詹詹言二卷繼雅堂詩集二十卷其王深甯先生年譜一卷訂錢竹汀王譜之譌尤四明文獻所繫也仁和胡珽字心耘官太常寺博士僑居吳下好收宋元舊本書手自校勘有得卽記與吳葉廷瑄調生友善咸豐庚申冬避亂滬濱辛酉四月歿於旅舍年四十藏書散亡所箸石林燕語集辨癩真子錄集證二書皆未刊余輯杭州藝文志錄其目以存其人蓋里中無復有知其人者矣調生吹網錄卷五附載其所記校勘語十二條則亂後追憶病中以屬調生者卷六載心耘輯宇文紹奕事實六條尤吉光之片羽矣

吾郡丁葑園禮部澎與仲弟景鴻弋雲季弟滌素涵並
有詩名時號鹽橋三丁先高祖暨先大父兩輯杭郡詩
葑園素涵詩皆入選求弋雲詩不得一字先大父嘗以
爲恨後四十餘年丁丈松生踵前例爲三輯得弋雲詩
數首劫火之餘獲此零璣碎玉殆所謂曠世相感者歟
又前輯求周介石禹吉詩亦不可得僅于葑園傳後附
載名字丁丈又得之拾遺之力可謂勤矣

青浦王蘭泉先生主講敷文書院嘗以西湖柳枝詞課
士時阮文達公爲巡撫謂自鐵厓沒後五百餘年無繼
聲者而鈍翁姑蘇柳枝詞和者亦尠因徧徵吳越士大

夫同作者凡數百人文達序而行之今此詩刊本不可復得矣湖海詩傳僅載山陰吳傑分水章柱歸安邵保和三家

楊靜岩景仁嘉慶乙丑進士官刑部箸式敬編皆當官爲政之要舉前代善行分類記述中有恤囚一門道光間張仲甫舍人刺取刊行蘭渚侍郎署司獄法戒四字以貽各省府州縣司獄吏目典史各官用意良厚今廢按察使改設法官新法待獄囚主寬仁然未若此書所述寬嚴得中無流失也

桐城蕭敬孚穆記章實齋先生事略及遺書本末鄉邦

文獻後生小子罕知之者今全錄之 實齋先生姓章氏世居浙江會稽之道墟其祖父以上嘗客遊北方遂入大興籍父鏞曾登乾隆元年丙辰 恩科順天舉人官湖北應城縣知縣先生幼讀書而資極魯鈍其父頗以不能世其家爲慮顧先生資雖魯而好深湛之思隆冬盛夏讀書恆至午夜不倦每有所得輒筆之于書年十六其父官湖北某縣時彼地有柯先生善教學其父延入官齋督之學先生自經柯先生指授學乃大進尤好讀乙部之書常有論說年四十應乾隆四十二年丁酉順天鄉試乃改歸會稽原籍中式舉人戊戌成進士

歸班銓選後官國子監典籍又改知縣不到省主講直隸蓮池書院及永平府河南歸德府各處書院中間又應安徽之和州直隸之永清湖北之天門石首安徽之亳州各州縣聘修志書至乾隆五十六七年兩湖總督鎮洋畢秋帆制軍創修湖北通志特請先生爲總纂又延一時英俊數人爲分纂先生乃別出心裁發凡起例推陳出新爲同事諸人所駭先生于諸分纂中除其老友桐城胡錕涪徵士虔外一概以奴隸視之諸分纂積不能平因先生爲制軍所重無敢雖何一時不敢不唯唯聽命逾年

高宗純皇帝特命畢公人覲別委他人署湖督而先生勢孤畢公回任尙遙遙無期一時分纂諸人各於當道讒言蠶起且指摘先生所筆于例不合籤條百出而諸當道均于修志事不甚了了乃以諸人批駁各條令先生一一覆答先生乃爲駁議一冊以復之且力詆分纂諸人一無所知妄肆譏評知勢不能爲乃作書以謝畢公卽以已所總纂各類席捲而去又以年已六旬精力漸衰遂不復應當代名公之聘嘗一訪舊交左良宇胡維涪于桐城居數月縱觀龍眠之山水顧而樂之將有終焉之志遂回紹興卜居于塔山之下牙籤萬卷明窗

淨几乃取笥中逐年所箸分冊命鈔胥繕爲清本凡三四十巨冊特造蕭山王晚聞太史宗炎家託爲細加編訂王公應命精心鈎稽逾年乃就時在嘉慶六年辛酉書成而先生歸道山享年六十有四王太史乃將所訂本仍歸先生長子華紱數年後華紱力不能刊乃求華亭姚春木徵君椿只就文史通義一種選刻內外篇五六冊刊本行世最後章氏子孫于全編力不能守乃歸之鄉人沈霞西沈氏家有四萬金藏書至咸同之間沈氏家亦漸落乃將四萬金之書悉售之於揚州書賈而章氏之書又爲紹興水澄巷某書坊得之又數年先生

族人章小雅以重資向某書坊購出遂挾此書回道墟
中途遇大風波舟覆小雅力抱此書躍水而出此書遂
一逃于水阨也至光緒甲午年小雅病歿書又歸諸乃
兄壽康穆均得時時假閱之王太史將書分三十卷前
爲文史通義內外篇凡十二冊中爲文集內外篇凡十
冊末爲湖北通志稿凡八冊文史通義係論修史各條
與唐人劉知幾分道揚塵劉氏所論爲史法先生所論
爲史意劉氏乃論官局纂修先生所論爲一家箸述體
大思精遠過劉氏文集多當代名人碑傳及熙朝掌故
文筆與文史通義不同卽以古文而論亦不媿爲一代

作者竹垞西溟諸公所不及也湖北通志雖未成書而所纂各類及其序例均出前人意表實在阮文達謝蘊山二公兩廣志之上先生之書大旨如是光緒戊戌章壽康以貧故託穆將此書作押于歸安吳申甫出三百金得之未幾吳氏書坊失火吳君狂奔將此書自火出之乃歸周萊仙此書又一逃于火阨也周萊仙封翁平日素服膺章氏之學將募人照王太史所編分卷繕寫欲爲付梓乃鈔甫完工周君物故其鄉人言周氏子孫欲力要穆代贖日再三催之穆念此書兩遭水火之阨非章先生默自呵護不得兩全擬籌資且將此書代贖

募資付梓不欲此書自我而亡焉沈子培先生命書原
委穆舊有記載及所爲章先生別傳兩文鈔入文集未
及攜出乃將兩文大意節錄一篇以應先生之命云癸
卯九月二十四日桐城蕭穆草于南昌府署西室之寄
舫

焦里堂道聽錄手稿凡二十巨冊中似分類蓋讀書隨
手紀述者老輩勤學精力過人有如此其中所記多國
初雍乾間人文集中語然如全謝山集當里堂時人間
尙無刊本故據以爲異聞今則人人知讀鮎埼亭矣
仁和王正功字莪山又號拙餘箬中書典故八卷書分

六門曰官制曰職掌曰儀式曰恩遇曰建置曰題名末
卷爲雜錄前有杭堇浦序後有乾隆五十七年錢塘趙
輯寧素門跋又乾隆三十年自敘一首言官內閣二十
年由中書舍人升典籍出爲襄陽同知告歸乃成是書
首葉有字數行言刻板字不必大每葉幾行行幾字云
云蓋將付梓而未成者乾隆杭州府志藝文列此書目
今乃得覩鈔本杭郡詩三輯有王正功詩二首僅書錢
塘人無小傳并不知其仕履得此帙可以補丁氏之闕
矣素門爲次閑先生之琛父杭郡詩續輯作趙箕或以
避寧字故改名耳

按葉名澧橋西雜記云嘗欲撰輯中書舊事攷後見仁和王正功中書典

故彙紀八卷甄錄考證
至爲詳核遂棄其稿

海寧俞浩撰西域考古錄十八卷一蘭州府二西寧府
三涼州府四甘州府五肅州直隸州六安西直隸州七
鎮西府八迪化直隸州九伊犁惠遠城十塔爾巴哈臺
十一喀喇阿爾十二庫車十三烏什阿克蘇十四葉爾
羌和闐十五喀什噶爾十六西藏十七蒙古源流書後
十八記魚通各土司俄羅斯攷略有東昌知府海鹽朱
錦琮序稱其徧采細素實事求是邊塞之險要疆域之
沿革今昔之形勢攻守之難易縷析條分瞭如指掌其
時 欽定新疆識略尙未進呈頒行四香以其見聞編

纂成帙粗具梗概圖說皆略要亦大略之椎輪矣浩字
湛持號四香嘗游山左客先大父幕中花宜館詩中有
窮愁一意箸奇書之句爲四香作也

項蓮生孝廉鴻祚善填詞有憶雲詞甲乙丙丁稿四卷
行於世許邁孫丈重刊譚復堂撰傳謂其詩不多作今
崔磐石方伯得其小墨林詩鈔小墨林禱箸手稿凡四
冊詩曰焦尾琴以其家不戒於火詩稿盡泥追憶得之
者曰枯蘭集則以喪其姬人多幽憶怨斷之音禱箸爲
駢散文及箴銘之屬卷耑有許文恪勞季言小印劫火
所遺惜無好事爲之刊行也

儒門法語長洲彭南昀先生集先賢語錄以訓士者蕭
山湯文端公重刻之道光己酉徐梅橋制府澤醕又刻
于蜀咸豐初元 先大父寄示先君子冊首書云辛亥
九月自成都寄彥偉收讀書之暇取而覽之便知終日
擾擾有多少可媿處隨處檢點琢磨卽是聖賢教人改
過工夫於身心自有益處修餘老人識慶坻珍弄此冊
時時展誦文端跋語曰非知之艱行之惟艱是所望於
躬行實踐之儒讀之彌慄慄焉

先曾王父夔州府君博極羣書仕不廢學嘗撰酒志二
十八卷爲目十二曰原始辨性述義備注詳品稽典列

事紀言考器徵令錄異識餘徵引書目多至千數百種
稿本存道福堂書樓比寇亂羣書散亡同治初余歸自
晉陽檢拾殘編勵得卷十三稽典五卷十四列事一卷
十五列事二凡一冊至可痛惜爰裝治成帙俾後人永
寶之冊面字爲公遺墨卷中黏簽增補者凡數十事蓋
彙成後續增者

歛樞司馬宗山姓魯氏博學彊識與鄧笏臣俞小甫邊
竺潭吳晉壬合刻所爲詞爲侯鯖詞其詩曰窺生鐵齋
集又希晦堂雜箸若干卷

杭州駐防三多字六橋撰柳營詩傳四卷蓋哀集杭州

滿洲駐防營中諸老輩之詩自巴泰

乾隆壬午舉人官光祿寺丞

以

下至玉昌

故江蘇糧儲道成豐庚申在浙守營有功辛酉全家殉難赫特赫納之從子

凡三

十人又閩秀二人未附爲詩餘者三人篇什雖不甚多

而百數十年間滿營文物之盛約略可見其書刊于光

緒庚寅辛卯間二十年後遂有黍離之歎是書之存不

可謂非幸矣前有俞曲園師序六橋自言采錄各家專

集其無專集者采諸廷湮巖武林城西古蹟考湮巖姓

巴爾達氏廩貢生工畫能詩箸蒼雪齋詩湖山勝蹟補

遺武林城西古蹟考八卷今亂後不知其書猶存否又

盛愷庭丈元嘗箸杭防小志亦未刊行亂離之後其家

子姓彫落此書遂不可問

灌縣彭洵字古香爲陝西知縣有循聲歸田後撰灌記
四卷卷一輿地記言古繩橋俗名索橋宋名評事橋
國初橋已久廢惟設義渡以濟嘉慶八年邑知縣吳君
仿舊制重建始更名安瀾云謹案先曾大父官灌縣知
縣實成此橋小羅浮山館集有詩紀其事先大父花宜
館詩鈔中亦有詩道光間東軒吟社嘗以命題胡書農
學士諸公詩見清尊集

家筠軒先生鐵華山館詩稿八卷分水石吟覃懷紀行
詩江皋集初衣集初衣續集詩多憂時感事之作其初

衣集自識有云偶有所觸輒增感愴劃然而嘯不自知涕泗之何從也初衣續集自識云劍南詩心游萬里關河外身臥一窗風雨中語極惻楚平生所學爲何事後世有人知此心則頗激昂自負年來拈管謝惻楚而喜作激昂語亦豈知激昂之無非惻楚哉蓋先生官戶部郎直軍機處咸豐庚申之變先生隨恭邸留京抗阻和議請殺巴夏里時不能用爲同列所擠辭樞廷差以道員候選授江西鹽道告歸創鐵華吟社首尾凡九年年八十一而卒其詩如讀宋史六首江城懷古四首皆隱痛於宗社蒙恥外侮日深如聞雍門之琴漸離之筑矣

蕉廊脞錄卷五終

蕉廊脞錄卷五

三才如心齋

蕉廊脞錄卷六

錢塘吳慶坻撰

吳興劉承幹校

涿州馮俊甫孝廉貽我遼刻石經柱拓本八紙柱凡八
面俗稱爲八稜碑沙門惟和書首行文曰大遼涿州涿
鹿山雲居寺續祕藏石經塔記又得房山西峪寺石經
拓本凡一百二十三紙則俗所稱小西天寫經是也

涿州城東北隅有雙塔俗呼爲南塔北塔者塔前有金
天會十年智度寺供養塔燈記又明嘉靖十三年重修
智度寺鐘鼓樓碑又嘉靖十四年新建智度寺天王殿

記碑頓詵撰 國朝順治二年重修智度寺碑馮銓時

爲禮部尙書宏文院內院學士按二塔皆唐時建智度

寺在南塔下雲居寺在北塔下寺久圯二塔皆完好塔

四周刻佛像累石圍之石上書護塔之石四字下書善

人某某造或一二人或十餘人無年月北塔下有遼碑

一乾純元年元碑一至元十二年明碑三嘉靖十二年王道撰

撰 崇禎十六年唐誠撰天會碑前列鄉人將仕郎試大理評事李

端謀撰同泰寺沙門法諳書後列邑長彰信軍節度使

金紫崇祿大夫檢校太保知涿州軍州事清河縣開國

子食邑五百戶張元徵中散大夫起居郎同知涿州軍

州事都騎尉東陽縣開國男食邑三百戶賜紫金魚袋
孟獬涿州軍事判官文林郎試祕書省校書郎張綱案
元徵見金史張汝弼傳碑所結銜與史合惟崇祿大夫
乃遼避太宗諱光改崇見遼史百官志意金初沿襲未
改歟祕書省据志當作祕書監

雅州府城東二十里

一作十里

姚橋鎮有高孝廉祠祀漢

高君貫方貫光兄弟中爲景賢堂堂之側高君碑在焉
完好微有缺損昔韓小亭觀察泰華始訪獲此碑于野
扶而植之咸豐六年丙辰何子貞編修視學來訪碑碑
在榛莽中屬雅州知府張君雅安知縣王君建祠移碑

祠中碑側觀察編修皆有題識余於己亥三月按試益遠先經雅州謁祠讀碑尋訪高君闕問土人無知之者一緯夫獨能識其處因紆道行田塍間望見石闕下輿仰瞻一闕文曰漢故益州太守武陰令上計史舉孝廉諸部從事高頤字貫光隸書二一闕文曰漢故益州太守陰平都尉武陽令北府丞舉孝廉高君字貫光隸書二十四字右闕下層一柱壞上層橫列隸書二十四字與闕文同闕前後上下及左側刻畫人物車馬之屬約百餘種徘徊久之按洪氏隸釋以爲高頤一人之闕王氏輿地紀勝碑目以爲高君兄弟二人之闕顧南原隸辨是洪

而非王海昌錢鍊江大令保塘清風室文鈔漢高君二
闕跋定爲高君兄弟二人之闕隸辨云兩闕一有高君
名字一不稱名而字缺其一予所見六十年前石刻貫
字之旁刻云缺一字近世所見乃有以光字補之者慶
坻屬雅安令唐君樵拓眎之光字明熘旁刻三字蓋已
磨去矣

涪州江中雙石魚 先曾大父小羅浮山館詩鈔有鑑
湖石魚篇云石刻雙魚一銜芝草一銜蓮花官是邦者
有循良績則見明吳江陳良謨知涪州江中石魚出者
三江中有宋元明人題名姚彥侍方伯爲川東道時得

石魚題名百餘種北宋二十三南宋六十三元十一明
以來不錄石魚在江心非冬春水涸不得見椎拓者少
故大半完善而蜀中金石諸書卒未箸錄物之羸晦固
有時耶余入蜀晚不獲覩方伯拓本聞王詠齋丈所述
如此

德陽縣黃許鎮道左有石刻上庸長三字光緒九年知
縣吳鼎摹刊旁有跋云鎮北有漢上庸長司馬君孟臺
神道見顧南原隸辨碑久蕪晦學使南皮張公時得之
今殘石尙存字多剝落惟餘三字可辨因以原碑螯軛
封護之而別刻三字於此余因紆道訪原碑上庸長三

字摩抄可識字體峭拔碑陰存上半螭首完好無損按隸辨引字原云在漢川今爲漢川州屬成都府實則碑所在已隸德陽縣境德陽距漢州四十里明代德陽縣故屬漢也

梓潼縣武連驛覺苑寺有顏魯公書逍遙樓三字碑款識二行前一行口口十年十月六日宿武連縣尉郭凡十五字以下剝落不可辨後一行大歷五年正月一日顏真卿書按山西金石記蒲州府逍遙樓有顏魯公大字石刻又廣西臨桂亦有摹刻每字徑二尺七八寸後署大歷五年正月一日顏真卿書則此碑亦後人所摹

刻耳

梁天監十三年題名石刻在雲陽縣磨厓椎拓者少字極完整文曰天監十三年十二月鄱陽王任益州軍府五萬人從此過故記之後有宋人題字四行曰嘉定九季花朝前七日同郡鄭子思爲拂塵於六百九十八年之後□□二字樞黏上一字似是王字下一字似是屯字其下有巽趙錦夫侍行德顯天麟十字最後小字二行云元祐八年十二月廿七日因打碑遊此記之按梁書鄱陽忠烈王恢文帝第九子天監十三年以荊州刺史遷益州武帝本紀及恢傳同是蓋其入益州時題名

也先伯祖曼雲公視壽堂詩鈔有雲陽山中觀梁天監
十三年鄱陽王題名詩

杭州陸軍協司令部築營於饅頭山上山舊名吳家山
其地多塋墓內有面東一穴壙堅固逾常力破而入棺
木完好棺上紅帛銘旌金書敕授文林郎河南道監察
御史晉封奉政大夫諱且口按此字已模糊顧公之柩
凡二十五字塚內有磚刻銘一文曰康熙三十一年歲
次壬申癸丑月二十七日寅時先侍御易簀自銘銘曰
物必趨於盡兮理必然也曰舍故而就新兮吾未能掉
臂而入也唯委順而遷化兮斯古今才不才之所共習

也康熙四十三年歲次甲申十二月丙子日不孝男之
珽泣血百拜敬書藏於吳家山之瑩域按顧且菴名豹
文杭州府志有傳先高祖杭郡詩輯錄其詩之珽字月
田亦有詩後嗣式微無人守墓亦可悲已

浙江巡撫署之東偏有鎮東樓在保安橋側明萬歷癸
未建樓下有碑首行曰浙江開府鎮東樓記碑文爲資
政大夫太子少保兵部尙書兼都察院左副都御史奉
命總督薊遼保定諸軍事前巡撫浙江賜飛魚蟒龍服
食從一品俸餉梁張佳胤撰按明史萬歷十年春杭州
兵變浙撫吳善言不能治命佳胤代善言一月而亂遂

定文敘平亂事頗略似惑於形家言以省城舊有鎮海

樓今存即俗稱鼓樓者是乃建茲樓以配之佳脣去浙代者為蕭

廩字可發已丑進士江西萬安人乃伐石補刊張文則甲申四月也佳

脣字肖甫嘉靖二十九年進士官至兵部尙書加太子

太保自薊遼召還理部事尋為御史彈劾謝病歸卒贈

少保諡襄敏工詩有嵒岷山房集陳臥子稱其莊雅為

李王後勁余修郡志蒐訪明以前石刻得之杭人殆無

知是樓緣起者

咸淳臨安志載宋理宗御製伏羲以下迄於孟子贊各

一首暨詔諭刊碑十六賜國子監即玉海所謂道統十

三贊是也明正德間移立杭州府學碑石尙完備 國
朝倪濤山友武林石刻記闕文王一右阮文達兩浙金
石志錄潛志舊文補之光緒元年乙亥丁竹洲丈摘取
十五碑中字摹寫成文不足者更配合上下偏旁集刻
補之築廊屋以護之顏曰道統石室十八年壬辰修治
府學尊經閣於後圃得原刻文王贊一石閱六百年神
物重還可謂奇矣

壽松堂孫氏藏淳化閣帖宋刻原石爲孫景高先生仰
曾藏皮置寶石峰下寶石山莊莊久廢今石存孫仁甫
炳奎家略有斷缺帖後梁山舟學士跋云往余於先叔

祖深父先生齋頭見舊拓閣帖石本也而上有銀錠鑿
紋相傳宋時賈相門客從賜本摹出故仍棠梨之舊今
春孫君景高於西吳舊家購得帖石若干枚洗剔苔蘚
椎拓一本示余精采煥發絕類宿覲覓前帖校一過凡
字迹波磔石片剝蝕之處無毫髮差殆宋刻原石無疑
惟失去鍾繇及謝萬書數百字耳辛丑臘日景高自跋
云余素嗜石刻每見傳揚舊本輒愛翫不釋手欲仿寶
晉停雲之韻事哀刻以供墨林清賞而未逮也張君芭
堂爲余購得閣帖舊石若干枚於禾中故家剝剔苔蘚
聯綴斷裂椎拓一本取佗本十餘種參校無有同者汪

君天潛出示梁氏所貽深父先生鑒定藏本校之纖毫無不昭合蓋卽此石原拓也委弃有年摹拓絕少故豐神完美就中與諸本尤異者卷三瓌之頓首下有秋字卷七朱處仁帖後增服食帖三行皆可補諸家釋文所未備初購得時缺魏鍾繇宣示帖及謝萬書三行閱數月芑堂復於原所藏處搜訪得之遂成完璧壬寅九月谿州銅柱在辰州府五代馬希範據南楚谿州峒蠻彭士愁寇辰澧二州希範遣將劉勅討之士愁遣子師曷以五州降附希範慰賚之令仍守其地希範自謂漢伏波將軍援之苗裔乃鑄銅柱銘戰功以踵故事學士李

宏皋爲之記柱高一丈二尺入地六尺下有石蓮花臺四面刻字余在湘得拓本文中引伏波銅柱銘有曰金人汗出鐵馬蹏堅子孫相連九九百年其語不類漢代文字疑爲臆造惟歐陽公五代溪州刺史彭士然柱文實作彭士愁可以證前史之誤

湖南學政衙門其先爲長沙府知府署相傳後漢時長沙太守韓玄城破死難其墓卽在今大堂煖閣下凡知府履任者多不利或謂學政爲 欽差官當可鎮壓於是兩署互易故學政署規制不逮府署之廣大署中大堂西有老樹一其高參天相傳爲韓公手植至今時有

神異又大門內庭左有大鐵鑊一亦韓公時故物壽陽
祁文端公嚮藻爲學政時有神木鐵舖二詩刻石壁間
神木詩云神木神木堂西廂槐身楮葉相抱藏中有赤
心通朝陽朱衣導從候來去云是韓公神所據三年借
爾蔭清風下無蒼鼠上無蟲鐵舖詩云鐵舖鐵舖門兩
腋腹奄脣厚徑五尺雨痕沈綠土花赤伊誰鎔鑄誰轉
移云是韓公飲馬池三年借爾鑑容止此中只貯湘江
水

光緒甲午正月黃仲弢前輩得于忠肅公填河鐵犀銘
拓本凡八行第一行填河鐵犀銘五字銘六行文曰百

煉玄金鎔爲眞液變幻靈犀雄威赫弈填禦隄防波濤
永息安若泰山固如磐石水怪潛形馮夷斂迹城府堅
完民無墊溺雨順風調男耕女織四時循序百神効職
億萬閭閻措之衽席惟天之佑惟四字提行
高一格惟帝之力
帝字以下提
行高一格爾亦有庸傳之無極銘凡六行銘前一行
填河鐵犀銘五字末一行正統十一年歲在丙寅五月
吉旦浙人于謙識十八字後有道光戊申七月旣望劉
師陸跋云黃叔瓚中州金石攷引閩興邦鐵犀鎮河廟
碑記云出大梁之安遠門東北隅四里許有回龍廟後
有鐵犀一狎踣踞半出土上背鑿銘乃正統丙寅巡

撫于忠肅所鑄以鎮水患者闖賊圍汴曾用萬夫移犀
他所千鎚百煨聲聞十里挾旬不能損其金軀僅於左
脇下穿一穴王子埋沒土中後人廟地而得之視其銘
詞隱隱隆起若商周彝鼎銀鈎無損良有神呵護矣其
銘曰云云文不重錄道光癸巳歲余客大梁嘗訪其地親至
所謂回龍廟者殿宇數楹梁柱締構頗新惟周垣未葺
問之土人謂數年前有議重修者庀材未竟而止中祀
神座神牌尙存乃明季泊 國朝有功於民社宣防者
殿外亭基上鐵犀宛然在焉銘文及前後題識分別犀
背左右各四行鎮河鎮禦並作土旁百神効職黃攷作

百辟蓋誤余摩抄文字確是鑄成非鑿出者流賊鎚鍛
經旬卒未能損其全體迄用狡謀灌城而犀終以土得
完迨二百餘年之後猶若新發於硎及余訪得時四百
餘年矣聞癸卯乙巳兩歲大梁再經水患環城皆水回
龍廟者諒已同在波流犀縱尙存當亦沈埋沙礫中未
知其出又在何時今日曝書拾得紙本不勝慨然時正
荆江盛漲之時因取裝池贈防江諸同事且存金石舊
話云按明史職官志巡撫河南等處地方兼管河道提
督軍務一員宣德五年遣兵部侍郎于謙巡撫山西河
南又本傳宣德初增設各部右侍郎爲直省巡撫忠肅

由御史超遷兵部右侍郎巡撫河南山西在官九年遷左侍郎時王振方用事有御史姓名類謙者嘗忤振謙入朝薦王來孫自代通政使李錫阿振指劾謙以久不遷怨望擅舉人自代繫獄三月已而振知其誤得釋左遷大理寺少卿山西河南吏民伏闕上書請留謙者以千數周晉諸王亦言之乃改命謙巡撫前後在任十九年正統十三年以兵部左侍郎召明年秋遂有土木之變此鐵犀蓋忠肅再撫河南時所鑄巡撫兼管河道而宣德元年以後河屢溢開封正統二年決濮州范縣三年決陽武及邳州越數年又決金龍口陽穀隄及張家

黑龍廟口河患無歲無之宜忠肅之懃懃於此也潘氏
乾坤正氣集所錄有誤字可藉以正之拓本破損余爲
重裝丙申三月朔祭忠肅祠敬奉歸祠中永永珍守並
要同郡諸子題識焉

江干徐村俗所稱九龍頭者美國教士設之江學堂丙
辰春拓地建築掘得一古墓有二棺又銅像一作壽星
騎鹿狀資盃二磚刻地券文一文凡十五行首行順刻
次行逆刻以後各行皆然顛倒讀之文近俚而語絕詭
異謬託於仙鬼之說蓋全仿南漢馬十二娘地券之文
王定叔拓以見示錄之以廣異聞文曰惟大明國大明

提行

浙江杭州府仁和縣義同坊二圖土地范明大王

大王以下爲第二行卽倒寫

祠下居住信士郎斗金奎金壁金有父

親郎兆玉別號明懷賜

賜字提行

進士第奉政大夫直

隸淮安府同知於天啟六年六月十四日戌時往九仙

山採藥忽遇天仙賜酒三杯酩酊一夢不還就憑白鶴

仙指引用九萬九千九百九十九貫文買到皇天后土

王真龍福地一穴坐落錢塘縣定北五圖徐村土名顯

聖隴三位夫人祠下東至青龍西至白虎南至朱雀北

至玄武上至青天下至黃泉今具六至明白給付與明

懷翁爲萬年陰宅倘有邪神野鬼魑魅魍魎侵僭坎穴

者將券投至東嶽聖帝案前以法驅遣自安葬之後福
蔭科甲聯芳位登台鼎子孫榮盛永保千秋此券天啟
天啟以下提行 七年七月二十一日申時立券人皇天
后土王 押

下列 三行 牙人張堅固 押

李廷實 押

代書人白鶴仙 押

四押字作篆文曰榮華富貴

地券 二大字作篆文

按天啟七年至今丙辰二百九十六年乃為外人所發
掘可謂奇切即兆玉字完白別字明懷萬曆癸丑進士

箸無類生詩集西湖金沙港先覺祠列名入祀子璧金字公是工詩嘗刊五雅固杭州舊族也

癸丑之歲湖州烏程縣某鄉新出宋故十進士衛公墻記文凡十行語頗簡質衛君諱毅夫字子剛世居嘉興府華亭縣淳祐改元八月葬於安吉州烏程縣澄靜鄉朱陽之原是年八月孤子國寶國卿書末行小字曰雲邑朱春刊宋時華亭縣屬嘉興府理宗寶慶二年改湖州爲安吉州皆與志合惟十進士之名未詳石爲王廌廌生所藏余得拓本亟付顧輔卿俾補入通志金石云劉聚卿藏吳越金塗塔拓本爲吾鄉魏稼孫手拓全塔

具備曩聞楊見心復言所見拓本甚多謂當日造塔時以保安人民四字分鑄其陰按金石契撫刻金雲莊藏者是人字陳默齋藏者是保字此拓本陰十九字同下一字似是保字而不甚明晰又余子士鑑京師得一拓本乃是金字疑八萬四千之塔分字標題殆不止如見心所云者自來著錄家皆無攷證不敢臆說塔爲周世宗顯德乙卯造實俶嗣爵之八年至明歲乙卯蓋十六甲子矣山河幻影宮殿荒蕪鷹虎剗剗人天慘澹讀吾宗聖徵祭酒題句不禁爲之一回腸一盪氣云

雲泉山風水洞唐人題名

左列凡七行

前國子監四門助教武儒衡元和二年二月口日題

吳興沈岫元此下脫二年正月三十日題

殿中侍御史內供奉鄭敦禮元和二年五月七日赴新

下似尚有二三字不可識

口似是州刺史李幼口元和元年十一月廿九日題

饒州刺史李夷簡上口遊元和二年四月十二日題

范陽盧縝元和四年年字全闕以文義定之十月廿五日口口富

陽令鄭暉口口後到凡四行此獨右行

監察御史李事舉杭州刺史賈全大理司直王口口口

口口口口凡四行第四行字不可辨石亦斜泐

吳越國投太湖水府銀簡拓本一玉簡拓本二劉蔥石
參議藏銀簡拓本舊藏嘉興鮑少筠吳江翁海村玉簡
拓本則上虞羅叔韞以贈劉者海村跋云順治元年夏
吳中大旱太湖龜坼簡村居民於湖底得錢武肅王龍
簡蓋投水府之告文也其文一百七十九字其質白金
重四十兩長五寸四分廣三寸七分翁之外祖沈拙齋
欲以銀四十易之不可乃假拓數十紙藏之後聞其家
卒鎔廢之幸有拓本流傳人間今錄其文曰大道弟子
天下都元帥尙父守中書令吳越國王錢鏐年七十七
歲二月十六日生自統制山河主臨吳越民安俗阜道

泰時康市物平和遐爾清晏仰自蒼昊降祐大道垂恩
今則特詣洞府名山遍投龍簡恭陳醮謝上答玄恩伏
願合具告祈兼乞鏐壬申行年四時履歷壽齡遐遠眼
目光明家國興隆子孫繁盛志祈玄祝允協投誠謹詣
太湖水府金龍驛傳於吳越國蘇州府吳縣洞庭鄉東
皋里太湖水府告文

寶正二年歲在戊子三月丁未二十六日壬申投 玉

簡長三寸五分廣二寸八分文略同惟伏願下多年年

無水旱之州

釋者謂是災字

歲歲有農桑之樂二語少合具告

祈四字楷法略似麻姑仙壇記拓本極精

曇山朱文公題名 左行

紹興甲寅閏十月癸未朱仲晦父南歸重游鄭君次山園亭周覽岩壑之勝裴回久之林擇之余方叔朱耀卿吳宣之趙誠父王伯紀陳秀參李良仲喻可中俱來字秀拔無一筆漫漶者

唐故徐處士故朱氏夫人墓誌銘 并序一行 文十六行 銘四行

夫人姓朱義陽人也系本陸終第五子安仁之後先封安仁爲曹姓食菜於周佐武王伐紂於邾後爲楚滅去邑爲朱氏吳標四族周隱七賢繼甘英豪布在方策由漢朝錦衣太守公處於會稽自斯一家遂爲越人也

夫人稟性淑順幼閑女儀望族移天疋於東海徐氏雍
雍著代肅肅承宗長若琴瑟之和不替女賓之敬實人
倫之軌範亦閨梱之徽猷年纔甲子一周懿夫先殞

夫人在疾樂業資生德長家豐鄉閭益敬冢男邱女婚
媪近周稚女童兒冠笄未備母能慈訓子等白眉天假
夫人之奇姿不假夫人之永壽以開成五年二月二日
邁疾不愈全而歸之勦于私寢享年六十有七育子十
有二人伯曰沛曰澤叔曰慶曰政季曰鼎曰遇長女媵
余氏次適於王仲女未疋先 夫人而口次納王氏禮
有請期季女二人幼而可喜以其年九月廿四日窆于

下曰浦首北去海塘一百餘步去懿夫墳西三步墳作
丙向之原禮也嗣孝楚毒悲感無時號□□泣枯其
淚內外霑涕日慘風悲龜筮既從□□宅兆慮邱阜改
彭彭字士鑑於敦煌石室經典釋文唐卷子殘本見尙
書於變字正作彭下注古變乃定爲變字勒石載辭嗚
呼哀哉迺爲銘曰

有美一人

性善若水

其德貞順

其容端美

年周甲子

良人已喪

惟殯晝哭

情同敬姜

平沙之垠

激澥之陽

夫人新墳

馬鬣封方

列生之行

刊石爲銘

萬古千秋

永口幽瑩

右唐徐處士朱夫人墓誌銘在餘姚縣某鄉光緒某年出土翁又魯教授得此石以貽其戚西湖壩魏君今藏魏氏

文內勦字義未知所本

王子八月梁節庵謁曲阜孔子廟復徧謁周公顏子之廟於顏子廟得至元殘石一命工拓歸見貽石上截已斷缺下截存字七行第一行僅一銘字二三行行八字曰雲篆其中玉壽其德帝翊斯文子孫千億四行至七行行五字曰稷埜遺民爲洙泗主人銘至正乙酉仲

冬吉日謹誌惜其人姓氏翳如要是宋之遺老山東郡
縣久淪於金絲厯至元而猶不忘宋室自號遺民其志
亦可哀矣

樊樊山辟地滬上銳意爲詩憂時感事一寄於篇什問
亦填詞其題士鑑九鐘精舍圖詞云第一鐘魯遽遺策
刻螭龍萬年永寶雲仍用筋頭垂玉土花繡綠曲阜古
城東第二鐘翰林得寶似宏農南齋書畫勤供奉花顛
散直墨池洗硯辛苦校魚蟲第三鐘翰林攷据阮兼翁
高齋彝鼎多清供榮發製作蒲牢款識聲采滿寰中第
四鐘吉金摹入剡藤中蒼然萬竹瀟湘夢國香九畹靈

文九曜看畫卷簾櫳第五鐘似庭龔簾不成龍鼓鼙北嚮山陵動湘靈鼓瑟漸離擊筑非復舊笙鏞第六鐘液

池鷓鴣散秋風天津橋畔聞鶉痛雁門踦矣

君病足居天津

西

山傾矣聲應洛陽銅第七鐘老萊衣綵返江東白華詩

好吹笙送臣忠子孝華鯨一吼棒喝震羣龔第八鐘回

思長樂一林楓聞鐘醒了春婆夢玉堂天上黃冠海角

開卷意何窮第九鐘紀羣間著不才融東南耆舊如星

鳳休休亭裏打鐘掃地莫唱白鳧翁跋云九鐘出於已

酉圖作於庚戌余題辭在壬子三四年間天崩地坼九

廟龍龔震虢不宥黃浦相逢同悲彼黍以九張機舊調

寫之其聲哀以思矣右詞九章自第五章以下假物抒
懷撫今追昔蓋不勝故君亡國漂搖風雨之悲水雲捶
琴皋羽碎竹同茲激楚益復纏綿我讀之淚涔涔下也
九鐘者余子士鑑在京師所得宣統己酉始出土在曲
阜縣西南十里鐘大小各不相侔銘文同而行數多寡
字數疏密篆體變化均不相襲文曰魯籒作餼鐘其萬
年子子孫孫永保用言士鑑爲攷證一篇定爲魯卿大
夫名原者卿大夫得用樂縣一肆此編鐘當十六枚今
僅得其九耳長沙王祭酒師稱其引据經傳頗爲精覈
閩縣林畏廬紆爲繪九鐘精舍圖並精拓九鐘於後將

徧徵題詠以張之

李忠毅公以勦海寇蔡牽力戰死天下惜之一時弔挽詩至夥余讀宋芷灣湘一首最奇崛寫忠肝毅魄颯爽如生其詩曰入海斬蛟登山射虎壯士出門寸心報主生也臣不敢知死也臣不敢辭臣知殺賊而已焉知生歸死歸汝賊蔡牽汝何么麼海水四晏無風鼓波汝賊蔡牽汝何多狗信信血入千里牙口汝賊蔡牽我來將軍將軍飛來汝聞不聞汝賊蔡牽汝何不柁上天入地將軍殺我汝賊蔡牽汝何不弓出日入月將軍如風汝賊蔡牽汝何不死罪大海小將軍守此迷迷離離將軍

之旗歌歌舞舞將軍之鼓將軍曰刀蒼天晝高將軍曰
矢怒潮夜死吁嗟乎臣不滅賊臣甘死賊臣且滅賊臣
竟死賊海水無情天風盡墨臣北面稽首謝天子聖德
天子無悼臣臣死臣之職大海蕩蕩天所圍雲車風馬
神靈來上帝許我梟厥魁明年蔡牽死戰士休徘徊龍
宮開靈風回

么妹黔中土司龍躍之妹也其祖爲黔苗長方吳三桂
據滇時檄諸苗策應獨與抗滇平論功賞總兵官四世
至躍秩遞降爲千總嘉慶初南籠狝苗滋事督軍檄躍
赴軍躍疾作遣么妹統所部三百人詣營聽指揮戰屢

捷是年八月十五夜破南籠賊巢擒其渠王囊仙韋七
絡鬚所遣八路軍么妹其一也督軍錄躍功而重賚么
妹遣之歸大興舒鐵雲位在軍中目擊其事震澤趙良
甫函作么妹歌良甫少負才氣十四試不得售嘗從楊
蓉裳芳燦游與顧蒹塘蘭厓徐廉峰楊伯夔齊名有同
岑五家詩之刻所著有樂潛堂詩集八卷菊潛菴剩稿
三卷飛鴻閣琴意詞二卷又當時有平良仄良之目平
良者曹按察楸堅亦工詩以兩人皆字良甫而曹趙音
相近也

如皋冒鶴亭廣生刊瑞安黃叔頌仲弢昆仲之詩曰二

黃先生集余獨憾吾師漱蘭先生詩無可蒐緝先生不以詩名而敦崇氣節時流露篇什間嘗見先生題丁氏雙烈圖七絕三章亟錄之亦吉光之片羽也詩云宏光殘局最傷神椎布能將正氣伸愧煞急裝諸婦女苦隨馬上窄衫人

明南京之變馬士英窄衫小帽躍馬出城隨行婦女皆急裝

婦節臣忠

等可哀更從九死別奇骸當時淺水西洋港一躍何曾

了念臺

戢山先生扁舟辭墓躍西洋港水淺不死絕勺水十三日然後正命

哦詩握翦紹

先芬二百年來雙節聞此幀君家猶木像永維忠孝到仍雲又於袁忠節水明樓集得附刊先生詩四章并錄之感事云邊將空吹月夜笳使臣枉泛海天槎世無士

雅雜聲惡廷少文貞豸角邪榻畔他人馱我室域中今
日算誰家處堂別有怡然趣燈火笙歌度歲華 青蠅

俟我海東隅敢道餘年強自娛運值奇窮招鬼侮病甘
坐廢厭人扶心真寒極腸猶熱愁到濃時淚轉枯生不
嫌遲嫌死晚眼看淨土豢狼軀喜聞壺公奉 召入都
云龕拯端須仗異材時屯陽九鬱雲雷推枰從古諮長
算乘傳親承敕外臺度實贊予淮蔡定光留作相洛師
來武昌柳亦知攀戀一一陶公手自栽 弱喻強張局
勢艱機神無滯在心閑國工始辦刀圭用羣筴方收履
屐間括地象圖形便在通天犀帶內臣放披忱入對天

章閣一豁籌邊 聖主顏

李愛伯先生詩關掌故者多先生歿後無爲之續刻者
余嘗錄四君詠四章不獨存先生詩也先生詩文稿多
在日記中越縵堂日記起咸豐間迄光緒己丑凡四十
餘冊今石印本闕最後一函蓋己丑以後之六年此詩
作于壬辰先生詩佚者多矣惜哉勤果鄉先正未接音
塵文恪則累世交親余與兒子士鑑又同出公門飫聞
緒論閻文介鄧鴻臚奏疏皆夙所心折十年以來風流
頓渺蓋不禁人亡國瘁之感云 四君詠并序云四君
者故兵部尙書山東巡撫大興張勤果公曜故東閣大

學士朝邑閻文介公敬銘故鴻臚寺卿歸善鄧君承修
故工部尙書壽陽祁文恪公世長也余與鄧君雅故同
官於朝朝夕相聚蓋十餘年勤果則自西域入朝始相
見甫半載別去而書問殷殷踰於故交文介來長戶部
僅以公事相見曹署三年中不過四五也然折節於余
肯受余之盡言有故交執友所難者文恪久官京師撫
塵曠絕三十餘年中嘗兩遇於廣坐及同官臺中甫數
月亦惟公事旅見二三次而相期甚至以古人見待四
君皆一時偉人其所建樹或已顯於世或不能自見而
守正嫉邪孜孜爲國鴻臚年少余十餘歲事余在師

友間忼槩奮迅風采照天下卒以此爲要人所忌鉏鋤
去官乞歸養親又爲大吏所齟齬鬱鬱以死尤爲可悲
中丞以儒家子納秩從軍二十餘已立功河朔及從左
文襄出師關外萬餘里掃穴犁庭疏勒烏孫復歸版籍
奇績軒天地至填撫齊魯治河尤有勞然其殉也以東
三省邊界多事欲整率舊部效命黑山白水間嘗詒書
於余懍懍以身將老諸帥多死思盡力爲國捍邊余未
及報而訃至所謂歿而猶視者相國以治賦僞嘗司胡
文忠曾文正軍餉人比之劉晏清操絕俗其入掌邦計
倣國計簿綜括天下財賦句稽出入世頗以聚斂目之

然爲 國家計久遠竭盡心力追劾戶部三貪吏逮捕
浙人大猾胡某尤快人心黜去曹郎不職者十餘人不
顧嫌怨及入政府卒以剛勁爲織人所扼沮纍萬端
主眷遂衰憂危去 國身後 贈典猶從減削司空承
其家法廉靜自持晚際時艱懃懃憂 國雖不自表異
而遇事守正比長冬官時同事者巧宦取容曹司承風
諸媚競利習爲故然深痛疾之而不能勝居常邑邑至
歿之日家無餘資嗚呼四君皆躋通顯而其旣也皆不
得意於世中丞遭際爲最亨然歿後負累鉅萬聞其病
甚時至斥距醫藥求速死是皆可悲也余窮於世交游

幾絕而如中丞鴻臚之傾心投分相國之折節司空之
引重有踰於尋常萬萬者自昔年歲在辛卯中丞薨於
愿城年甫六十今年歲在壬辰相國薨於虞鄉年七十
六閏六月鴻臚卒於家八月司空薨於位年六十八感
哲人之繼逝傷吾生之僅存夫傷鄧歎張交期恒有若
文介文恪未嘗有杯酒之歡從容之雅然而袁宏之賦
士行豈爲胡奴孫綽之泣眞長何干季野蓋燥濕之應
不以高下殊膠漆之投不以久暫判銅山崩而洛鐘應
桑葉落而長年悲豈特郢斤輟操牙絃絕響蓋彌有林
焚鳥槁川竭魚枯之痛焉逝者不作後世難誣徐孺莫

雞或生芻之未具林宗慟野知大厦之難支擬紫陽之
續騷我有兼痛較昌黎之哀董被止私情小雅能誹長
歌當哭各爲一詩以弔之後之覽者可以悲焉

尙書奮孤童束髮事戎纛一戰摧黃巾氣已無河朔

積仗開汴藩方伯少年獨

用晉書荀
羨傳語

誰何彈章來吹毛

恣趨趨

文宗惜將才

特詔付軍幄橫行雖回改專

征實董督拜

命益感厲殺賊日馳逐遂成嵩武軍千

里掃氛濁中原旣滌蕩長驅出秦蜀河湟聚花門妖彗

互地軸金城照組練玉門塞戈鏃孤軍轉戰前所至無

悍族天山水峩峩雪夜萬騎躡堅壘悉蹋平西域國卅

六直抵伊列河犁庭獮禽鹿偏師拓疏勒中屯鎮温宿

公駐阿克蘇最久 丁零亦請吏回紇胥受東漸次興耕桑遺黎

知誦讀稍暇歌投壺禮士若不足我友施士丐豪氣讎

視俗謫宦依幕府軍諮力推轂論功歸飲至入 覲天

顏穆 詔濬長安渠萬指瘁畚揭 帝命還左班寵以

八坐祿旌節撫青齊鳧藻滿川陸陽侯忽遘災淮濟并

窮瀆一身填橫流長隄斬山谷瓠子幸告成袞衣去何

速公家本始甯我生共鄉曲遠道無一面同聲致遐矚

京華喜相見深談屢跋燭傾吐悉肝膈倚仗勝骨月昔

冬貽我書憂 國淚可掬海寓多伏莽宿將半墓木根

蕉廊脞錄卷六

孟求恕齋

本東三省強虜正眈目欲及身未老盡瘁捍邊牧我書
未及報公訃已來告齋志視青冥百身竟莫贖豈止海
岱間瀕河萬家哭 右張勤果公

文介起科第浮湛戶曹郎烈烈胡文忠一疏揚明堂
清節比廉范心計如孔桑出司鄂軍餉千里無見糧忠
義相激發士馬日騰驤用其治賦功遂落欃槍芒積漸
受 主知三遷專齊疆強力故不怠所至蘇疲毗 內

召副司空堅臥還虞鄉 今上元二災三晉尤凋傷赤

地無遺黎存者爲強糗公時投袂起曾袁相扶將謂晉撫曾

忠襄公侍郎袁文誠公 肉骨逮秦豫畿輔資屏障平 詔拜大司

徒國計倚以強遂綜會計簿抉弊先持綱墨敗劾貪吏
巨蝨鋤奸商 帝心益眷注密勿參巖廊遂正中書席
主聖知臣良孤立無黨與眾沸成蝟唐屢疏爭不勝
去 國心傍徨養老乏上尊優秩無月羊余時居曹署
散拙守故常朝謁屢移病不識金與倉公意獨延竝音
問時琅琅屢欲強之起羣力期勸頗病公刻覈束溼
無舒長引義與公爭氣亢詞過剛公顧听然聽直諒無
它腸公既不安位我亦辭周行同官有袁宏謂爽問訊
公在牀猶傳太息言殷勤詢行藏公今歸帝所我忝司
臺章緘默取充位月日常憂傷寢門泣公訃秦樹雲蒼

茫 右閣文介公

鴻臚嶺南秀忼慨人中英少年取鄉賦入訾繫華纓浮
湛白雲署錄錄不自名一朝擢諫官建樹何諍諍 至
尊初御極親賢秉鈞衡 東朝再莅政堯舜有 孝貞
納諫如不及上書日有程延英立召對朝奏夕已令羣
少厲鋒氣危言恣彈抨有失不爾罪微善必予旌宦豎
皆側目出入莫敢撓漸致召朋黨報復仇萌君時婁拜
疏所言皆至誠亂始務防漸倖門先塞庚事或關國體
雖小必力爭 兩宮婁嘉歎手疏示公卿讀者爲流汗
邪佞相驚憂門庭日羅雀圖史無觴觥時時過子語大

厦期共堂私憂八關輩水火滋軋傾鬼域恐壞事有累
朝廷明世事易翻覆朝局如楸枰自詡稷契輩摧落
同枯莖羣犢破轅出一牛負重耕晉秩大鴻臚銜 詔
事遐征單騎出絕域拂赫方縱橫交南已吞噬嶺表方
窺偵荆國主棄地扶風欲逃盟君獨苦撐柱犁耜大呼
旬黶黶鬼門關毒霧天爲赧巨虺上樹立飛鳥晝不攖
醜夷更肆毒絕食陳鬼兵刀戟積雪列礮火殷雷轟從
官半瘴沒 廷議戒債成君獨以死誓終得持輸平還
歸見 天子造鄰陳哀鳴臣力此已竭戎心猶未盈幸
不辱 國命乞骸終餘生 長樂爲感動 温旨固留

行君復過余言進退心忤忤已中要人忌留去何重輕
臣衰况親老白華猶可營誠知 聖恩厚庶幾全萊嬰

歸臥白鶴峰足不來羊城奈何鵬鳥災玉棺遽下迎老
母猶在堂長夜目不瞑平生膠漆感事予猶事兄一朝

訃音至祝予老淚并婚媾竟未就稚子哀孤惻君最愛第四子

常攜以見余爲求佳對余欲以從孫女議昏適君告養歸而余孫女在里門遂輟議云爲君賦大

招靈車還 帝京搔首白髮短日莫傷我情持此問邠

老瓊海吐悲鯨謂潘孺初時歸瓊州 右鴻臚鄧君

文恪席華貫黃羊承遠裔儒學守素風三晉首門第相

國佐 宣宗益以大其世公幼稟庭誥淡泊自約制相

國致政歸徒步赴上計系踵登承明廉靜忘貴勢回翔
臺閣間所職祇辭藝篠簞皇華榮黼黻卿雲麗廉泉不
自潤車服日以儉 國是正多艱退食常泣涕馴至九
列崇志欲四海濟危言激同僚清節率羣吏泊拜大司
空壹志釐夙弊故事分六官戶工職金幣利藪害所叢
蠅蚋競嘍嘑營繕今將作都虞筦水利慕羶尤紛貶逐
臭類狂獠不問職所守祇爭骨可噬妄言效禽行脅肩
更俯睇旁觀爲泚汗一家得甘毳公本嫉惡嚴力欲振
頽滯屹然中流間左右苦牽曳眾濁憎獨清孤掌支羣
擠奈何不憇遺居位甫踰歲易簣餘空簞玲斂無複製

中藏出賜金債家已門逮公癩美鬻須煦嫗在辭氣
其中秉剛強匪石不可礪我生與公疏性分有神契我
晚始入臺公聞喜投袂庶幾鳴鳳來一旦豁氛棼逡遁
未卽發公叟道我噫不謂遽騎箕九京得無憐鉛刀遲
一割日中必致蕘餘生一息存此心千古口蕭然總帷
寒沈疴不能詣公在殯時余以病足不能往弔心常蹙然終期芹曝獻當公
絮雞祭三歎四君詠豈止哀已逝 右祁文恪公

梁文忠病中寄贈鄧鐵香鴻臚奏議刻本文忠書中言
鴻臚畫界受瘴病未三日卽棄母而死吾輩無不痛惜
其孤搜集遺稿刻成寄京今以一部分贈此公所欲看

之書也忠直清諫中無他腸同時言官未有其比今已
矣覽其遺書恍如在宏衍庵旁書窗對論時也世亂思
賢吾輩當何如哉余輯讜言錄采鴻臚奏摺數首今得
讀此集多昔所未見者忠鯁切直如見其人

長沙王葵園師詩學杜陵平生不輕作投贈余兩至湘
其後皆以疾告歸甲辰去湘師以詩贈行云廿年不踏
長安地夢想朋游醉文字聞君持節渡湘來喜入燈花
照無睡知君慧眼湘月明信君澄懷湘水清賢名一日
播萬口邦人引領神先傾甄文掾弊不遑恤遠接朱張
肯甫變鈞
兩學使
近無匹乘軺崔浩時其榮奏賦相如自稱疾

王程三載甫經年何意告別無留連君身豈藉官職重
所惜多士無良緣明廷袞袞登英傑不信扶危少施設
育才堂館高切雲勸學文書紛似雪樹人敢謂非嘉謀
城社狐鼠難可搜狂夫橫議懼民散相忍得非根本憂
我今伏處成衰暮箝口藏身真自悞君雖暫歸行人

朝莫忘青蒲陳諫疏已酉余感時局泯勢有去志師見
余和金甸丞太守句惜余之將去也有七言古一章見
示云自修學使見示和甸丞詩有山中故人昨有書函
底荷衣行料檢之句再次韻奉柬憶昔學館誇同年費

雲舫吳望雲
編修祭酒

聯步先歸田蘇臺攜手雜嘲笑我亦行謝

區中緣平生體性慙質直捷足甘輸當世特尙喜時多
箕穎流堯天不改蒼蒼色翻思袁許死建白我時倖作
懸輿客苟免偷生直到今蹙蹙空爲元化役羨君湛露
晞朝陽天庭騰上肩間黃清標學業有繼起珂里似是
高陽鄉教思爲澤文爲江千里春風綠楚苙荷衣漫續
靈均製虎氣龍身安可降長君一日吾誠忝李翰枯澀
羊欣儉乞書枉贈瑤華篇更啟金壺五龍檢王子余辟
地海上以詩寄師平江師有和作云中土餘殘局當年
仗一流嗟傷樊柳晚聳懼及瓜秋雷電生千嶂江湖吐
百洲與君睽隔意兩地感羈囚夢寐乾坤窄風塵歲月

徂直愁廿年後無復一人儒浮海君先將傳經子作徒
和詩聊自壯鄰德不嫌孤錄之以見吾師相愛之意

湘潭趙芷生提學啟霖官御史性剛直以言事得罪去
余電趣還湘請監督高等學堂比過武昌張丈襄留主
存古學堂講席文襄內召芷生謝歸余堅請主高等學
堂未幾詔復原官尋簡四川提學使先後有贈余詩
數章芷生學行在湘中士大夫當首屈一指余所最心
折者一別十稔世變瀕洞乃至於此錄其詩益不勝今
昔之感云詩凡五章其一曰千年道術何曾囿一代宗
風匪易任稍見斲輪成大輅翻從躍冶鑄祥金柔坯剛

賦艱難日聖伏神徂繼綫心獨愧支離疎磬效滄州回
首又春陰其二曰天涯何處識春歸盡日輕陰對掩扉
澗草漸生還漸長山禽時止亦時飛流年坐覺成新故
薄醉何容著是非冉冉春光堪悵望湖波添漲上苔磯
其三曰不將春事細平章誰信郊居氣味長海燕歸來
爭解語園蜂簇處但憐香清明風日銷詩句爛漫江山
寄草堂三尺漁竿吾道在濯纓猶自有滄浪其四曰三
年已感離羣久萬何堪別路長邛鉅偎依成小聚鷹鷂
寥闊不同行軒昂謨議隨青瑣牢落心情撫阜囊獨有
韋弦珍重意鳴雞風雨道難忘其五曰巫陽雲雨自朝

昏何處登樓望九門夢寐從君心莫逆蹉跎憐我舌徒
存橫流祇爲斯文懼方枘知非末俗尊目盡天涯春色
晚湘濱回首長荃蓀余去湘芷生以述別五古一章見
貽詩云三古重教學大旨明人倫陶化既有具遂使風
俗純誕章逮乖離斯文賴彌綸百世其可知損益相環
循斷斷濟時策變通謂宜民興學議初起擱然語更新
道器本該貫往訓故未湮云何事勦說鹵莽爲一鈞牛
從忘雞尸坐致諸夏淪夫子信宗匠宇量淵且醇爰初
莅湘浦士氣驕不馴公謂彼邪詞譁躁乃無垠從容董
其綱隳括實苦辛持剛而劑柔誠勉抑何諄不動聲與

色庠序還莘莘三年畏壘居輿情始歸仁若非鎮羣咙
僨張爲禍鄰湖外今謚如此功難具陳逝將理歸鞅誰
歟嗣清塵猗彼子衿徒朝夕視北辰風采所範圍隱紆
國步頻洶洶九州間飄搖會艱屯吾道要有託匱矣休
天均賦分愧蹇拙子立少依因長者不遐棄垂眷意益
肫側身望橫流欲濟茫無津離心浩難裁緒言若爲親
惟祝松筠姿後彫在自珍

華陽縣城東宋文憲公祠墓咸豐元年 先大父官蜀
藩嘗捐奉重修越五十年慶坻重至蜀謁祠夢椽剝陟
榛莽塞路乃與同鄉同官釀金補葺復還舊觀祠中有

清風亭明月池青蘿山房潛溪別墅落成而祭爲文勒石以記其事並補刻先大父昔日記事詩於石同里王詠齋丈詩人也成六絕句云儵留飛光五十春疏鐘細磬婉流塵空餘狔穿雞埒地零落弦歌雅誦人石馬金鳧委斷蓬蕭騷落盡古青楓可憐華表無歸鶴誰薦寒泉酌殯宮使者風流冠世賢溫溫祖德述當年金邊玉豆重蠲絜一曲迎神咽素絃披榛乍見石龜趺蘚碣苔碑手自摹生恐牧童更敲損遺邱分付禁樵蘇點綴煙螺一簣山歸思繚繞故鄉關清風明月曾無恙合補青蘿宿翠鬟話到難噴息同狂瀾誰障百川東登堂三

拋靈解鼓髣髴驂蜺下太空

蕉廊脞錄卷六

三
求如齋

蕉廊脞錄卷六終

蕉廊脞錄卷七

錢塘吳慶坻撰

吳興劉承幹校

余門人范鵬叔侗系出范文正公嘗攜文正所書伯夷頌長卷來杭州出覽示乾隆中此卷上邀 乙覽首行

御題范仲淹書伯夷頌高義園墨寶十一字又 御

書聖之清三大字朝臣奉 命題詩者尹繼善莊有恭

于敏中也文正自署款曰皇祐二年十一月戊申高平范仲淹書元祐三年范純仁跋云先公書此以寄京西轉運使蘇公蓋蘇舜欽也宋人題跋者自文潞公以下

凡二十九人其末一人爲秦檜元人自趙孟頫以下凡三十三人明人自夏原吉以下凡十七人 國朝自范承勳以下凡十三人後有翰林院編修二十四世孫范來宗跋工部左侍郎兼鑲紅旗副都統二十一世孫范時紀謝 恩摺卷中有江寧開國秦氏藏書二小印秋壑珍玩賈似道印秋壑三小印蓋南渡後爲秦賈二相遞藏故虞道園題有潞韓並識何春應秦賈爭藏寶點汙句不知何年歸范氏祠堂叔侗假得迻寫全卷先賢名蹟 先朝宸翰永鎮祠宇垂輝億齡范氏子孫宜世守之

乾隆二十二年 純廟二次南巡梁文莊告養在籍與
沈文慤被 命同修西湖志纂時趙意林信進側理於
行在拜宮錦四端之賜意林因以賜錦名其堂文慤爲
撰賜錦堂記意林賦詩爲謝復用元韻乞文莊書之曩
在京師嘗從濮梓泉前輩許見此冊蓋文莊旣爲意林
書之而別爲副墨尋奉 詔還朝攜以自隨故得留傳
都下也意林與文莊以詩相往復有同林倡和集之刻
文莊號薌林故云

明永樂十二年榜葛刺國貢麒麟命學士沈度繪圖作
頌事見明史圖舊藏海昌陳梅亭所嘉慶壬申歸學士

十世孫觀成觀成識語謂是當日進呈副本先曾大父夔州府君先伯祖曼雲府君皆有詩同時題者有楊芳燦嚴學淦陳廷璧馬若虛諸人光緒乙巳養疴里門得此圖圖上方書瑞應麒麟頌并序下方之右書麒麟圖三字爲一行永樂十二年歲次甲午秋九月榜葛刺國進貢臣沈度寫爲一行絹本色黝黯微剝而文字並完好頌文乃應制之作不具錄結銜曰翰林院侍講學士奉訓大夫臣沈度謹撰按明史大小沈學士受知成祖逮事宣廟並賜織金衣鏤姓名於象簡泥之以金學士書不多見畫則尤爲難得吾家兩世遺墨獲之意表後

之人宜永守之

王文成公燕居授書小像幕客蔡少壑畫文成弟子張

子蓋藏王龍溪爲之贊亦文成弟子也有高鶴望梅朱

南雍子肅

山陰人

朱賡少欽

諡文懿

趙錦元朴

諡端肅

餘姚人

葛曉雲岳諸跋雲岳言先生像爲蔡世新所傳

者極多惟以多故隨手輒肖然至小者亦徑尺今如此
小者不爽毫髮令觀者肅然畏敬云云卷爲黃再同前
輩藏光緒己卯得之秀水金爾珍者卷中明人數跋外
本朝惟嘉慶壬申山陰茅豫觀款二行最後有李越
縵先生長跋攷證既詳兼之感噴越縵於金石書畫題

跋皆經意爲之多在日記中沒後日記數十巨冊若存若亡不可蹤跡無人理董遂至亡佚可爲雷歎因錄此跋以存千百之一云吾友貴筑黃再同編修以此卷見眎整襟再拜文成公像越中舊家多有傳者皆袞冕大幅里中西光坊東光坊之間有公祠相傳其壻像出公家經面虬髯上上有七痣氣象凜凜望之竦畏張陶庵逸民所輯有明三不朽圖像亦相同間見小幅則清癯頎秀頗若不類宋人傳歐陽文忠蘇文忠朱子像肥瘦及須絲多寡亦往往不同蓋冠紳與道服各有所稱也此像峩冠深衣秀眉疏頤目光炯炯雖容色怱恨而神

采穆然道範德輝千古猶可想見後有王龍溪朱金庭
趙麟陽諸公題贊先正筆蹟經亂日稀心畫儼然典刑
彌仰朱越崢以績事名其字見者絕少府縣志雖有傳
而事跡不詳此贊語重氣醕字亦適古自稱後學蓋亦
私淑文成足裨志乘之遺金庭著述僅見朱文懿公奏
議爲吾家舊笈亂後已燬幸存此卷兩贊皆吉光片羽
也再同由黔家湘南竺學邵文收藏極富又承其尊公
子壽先生之學兼綜漢宋無門戶主奴之見平生服膺
陽明搜采遺書已十餘種其爲王學者如彭南昫王門
釋非錄等書亦無不備此卷將持歸黔陽勸其勒之公

祠壁間庶俾黔人瞻仰遺像如見當日龍場講授有泗
水西河氣象非鷺湖鹿洞暖暖姝姝守一先生言者比
也近日湘中如羅羅山孫芝房等一孔之見詆訾陽明
拾當湖之唾至不可道亦自形其浮游而已所媿慈銘
生公之鄉早讀公之書而衰老多病一無建樹性天至
道嘗乎未聞徒於南雷鮎埼文獻職志稍窺一二而怠
於輯錄粵寇之禍楹書盡焚今老矣十九不能記憶家
居西郭近鹽倉橋爲公與公考龍山先生歌哭之地今
無一椽存者祠亦焜於兵火近歲有人營復之而市儈
不學堂廡庫陋禮器非秩士大夫無過問者安得好事

勤力如再同者使先賢桑梓蔚然重秀俎豆管弦日新
有功乎此卷實於吾浙學派所系至重再同以重價得
之京師而余鄉里末學限於貲力不能購以還之越祠
展卷摩挲能無歎息然公之教澤遠被天南黔士謳思
轉有過於越人者此卷既得所主又以永貴陽之思知
公之靈爽在天亦當忻然以笑也謹爲跋而歸之編修
光緒十有七年正月會稽李慈銘識

四忠遺墨合裝一冊亦再同前輩藏一爲楊忠愍公爲
饑民請錢粟書子壽先生前後兩題一爲趙忠毅公詩
稿自題曰雜感十二首子壽先生跋云詩當作於削籍

追贓時一爲黃忠節公

涪耀

真書羊祜讓開府表題者

最夥如何峻叟張石舟鄭子尹莫邵亭何願船鄧昭伯
顧幼畊何鐵孫或詩或跋皆精妙而唐鄂生一跋在刑
部獄中書尤奇崛最後則瑞安黃漱蘭師宗室寶竹坡
侍郎皆僅書觀款一爲陳忠裕公子龍草書詩稿子壽
先生一詩一跋四忠翰墨萃於一冊真瓌寶也

杭大宗先生畫山水冊凡十二幀每幀有題記第一幀
第六幀各七絕句一首亦道古堂集外詩文也錄之

塵緣害馬諒成虛結習雕蟲尙未除願得乞身長埽地
秋風黃葉勝儼書西隱禪房 歐冶池環棘牆之外廣

表數畝居人占其漁利露桃呈頰風柳誇腰凡所以盪
客心而悽游子之魄者以是爲覽勝之奧區焉 三品
石何竦特兄鬼峩弟岌業仰若跂俯猶挈碧雞神各分
裂荆樹花互榮瘠詎若茲儼成列支中分冗相接羞秘
醇永無極銘詞古奧當置飛梯百尺鏤勒山背仁和杭
世駿 過口嶺有廿八都見郵舍壁上題記一官已脫
颺颺穴九度空過虎豹關末署西湖十九松居士堇浦
世駿 建寧亦有淨慈寺寺瀕溪結宇前爲放生池僧
房蜂綴林木窈窕亦一大選佛場也 上水艱難千里
多柴枝米粒易消磨今朝到岸多歡喜小武當山一笑

過 崔殿生十三能詩自號西竺村童相傳有渡頭扶

傘一僧歸句雅近長吉真可傳也大宗并記 青衣鄭

蘭子以月明黃葉路花隱赤欄橋句得名葦浦 艚篷

船廷建人呼為鴨母櫟園閩茶曲鴨母船開朱口 學到

是也 青湖臨江有小江郎祠在石厓上林木虧蔽下

罩江水過客多染翰廡壁間葦浦 張德南為南大理

署中有奇竹竹產簷下已乃屈曲循簷出德南援筆為

瑞竹賦諸郎競傳詠之 五顯嶺祠山僧施茶結客多

吾鄉人操土音慰勞一路密樹深篁綠上衣帶詩家唯

大小二謝堪以圖狀按此幘當是應聘分校閩闈時作

沈乙庵比部藏余嘗爲題二絕句

湘陰李黼堂桓藏周忠介公伯子子佩先生血疏貼黃
有彭允初紹升跋見二林居集忠介以闕禍被逮坐贓
三千金其友朱完天從之京師奔走吳橋定與乞貸諸
公間冀如數輸金得不死已而金雖集而忠介瘐死獄
中矣又二林居集有朱德升告周忠介公文跋蓋闖黨
欲羅織吳中士夫以德升尤與公密指爲渠魁將更起
大獄賴徐公會陽言之而止兩朱君者於忠介可謂不
負完天名祖父縣學生德升名陞宣吳縣人與忠介同
舉於鄉居父喪以毀卒

黃伯雨

以霖

藏明遺老尺牘爲嘉興馮硯祥文昌物凡

七冊都一百一札惜札尾署名多不著姓或不能確定爲何人中可辨識者劉念臺先生三通陳老蓮一通楊龍友二通陸鯤庭十七通又陸札內有六人聯名者爲汪颯關鍵丁澎吳百朋皆杭人惟繼恩一人不可攷硯祥嘉興諸生有吳越野民集明祭酒開孫後徙居塘棲晚年復居河渚以守祭酒之墓冊中多識語有吳越野民小印

湘陰李幼梅輔燿藏史忠正公上薛韓城書牘卷子題跋者皆指爲真蹟余嘗見俞曲園師與吳又樂書辯論

此牘略言忠正以崇禎元年進士授西安府推官累官分守池州太平安慶監江北諸軍自是以後皆居封疆之任未嘗一日讀書東觀而牘中云濫廁東觀事繫職掌不能忍默不言則與公厯官不合韓城於崇禎十年拜禮部左侍郎兼東閣大學士入參機務是年公已擢右僉都御史巡撫安慶不在朝中安得如牘中所云約同諸詞臣面爲剖陳乎書中又云此牘卽不出史公亦是明季人遺墨味其詞意亦必出於端人正士云云按此牘尾文義未完無署名沈雲伯跋謂舊藏禾中錢文端家有王良常翁覃谿諸公跋今王翁跋均不存余諦

審之此牘當爲劉公理順手筆公杞縣人崇禎七年廷對帝親擢第一拜修撰歷南京司業左中允右諭德入侍經筵兼東宮講官楊嗣昌奪情理順昌言於朝嗣昌奪其講官嗣昌薛國觀周延儒迭用事理順一無所附出溫體仁門而言論不少徇賊犯京師亟捐家資犒守城卒城破投繯死羣盜多中州人入唁曰此吾鄉杞縣劉狀元也羅拜號泣而去後贈詹事諡文正乾隆朝賜諡文烈觀牘中濫廁東觀及僕嵩穎一鄙人耳語其爲劉公無疑劉公官侍從與韓城同在朝列風骨峻厲不附權要牘中語似爲韓城作爭友者可貴也

太倉王西廬家書卷子葉奐彬吏部藏書凡十通密行
細字絮絮道家常時年已七十五思慮縝密乃如此勝
國遺老戢景家巷有子八人並名在志乘海內無不知
太倉王氏者書中言當日有司苛虐狀幾無人理蓋順
康之間戕亂恊定綱紀尙弛江南官吏踵明季餘習催
科嚴迫淫刑以逞迨仁廟親政而後吏治澄肅政崇寬
大務休養生息以馴致百數十年太平之盛軌也今世
變日亟國用匱乏外人且獻加賦之策以熒我政府之
聽脫用其說奉行之吏其不至敲骨吸髓如書中所云
者幾希

黃梨洲先生小象古裝風帽束帶貌奇古畫象者新安
吳旭補松者宋暉字逸子補石者猶子深也先生自題
曰初錮之爲黨人繼指之爲游俠終廁之於儒林其爲
人也蓋三變而至今豈其時爲之耶抑夫人之有遐心
題贊者朱嘉徵止谿陸嘉淑冰修陳令升之問陳奕培
子厚陳奕昌子粲陳謙廷益楊中訥言揚楊中垣季直
陳奕禧子文楊冲默陸駒朱爾邁人遠陳燾允大陳燾
允文自陳奕培以下皆稱門人且多海昌人疑是像乃
先生講學海昌時所繪也余避地滬上從張讓山美翊
得見此像謹記之

王船山先生及夫人陶遺象用西法攝影先生象紗帽
方鞞蟒衣束帶上方篆書八字曰孝思恬品霞燦松堅
中間書玉音二字陶夫人象高冠補服上方有先生自
書贊曰孝而殉國人所聞弗待余云慈以鞠不究其弼
奚以相暴靜好爾音函之於心有言孰諶借隱之思陸
沈已而焉用文之天或假而以後昆昔髣髴不迷唯斯
焉之爲儀重光大淵獻亥月望日夕堂老人題光緒丙
午過武昌梁節庵攜贈

船山先生于永歷元年十一月遭父喪既葬留守瞿公
式耜疏薦之先生疏請終喪得旨云具見孝思足徵恬

品著服闋另議比服除就行人司行人見先生之子敬
所爲行狀遺像上方題孝思恬品四字蓋卽用永厯旨
中語也 先生自題畫象小詞曰把鏡相看認不來問
人云此是蘊齋龜子朽後隨人卜夢未圓時莫浪猜
誰筆仗此形骸閒愁輸汝兩眉開鉛華未落君還在我
自從天乞活埋

倪文正公小象莆田曾鯨畫左方爲董文敏題曰玉汝
學士四十小象右方陳眉公題曰义手而坐凝目而思
壇坫英雄玉汝我師爲趙味辛懷玉所藏有味辛及翁
方綱蔣士銓周肇韓朱方藹方薰周有聲張埴諸公題

詩

諸暨陳悔遲洪綬詩詞手彙四巨冊裔孫蓉曙同年得之先生在崇禎間嘗召入爲供奉不拜監國中待詔南都南都破固山頰真慕其名優禮之後卒亡歸冊中如乙酉春雪六首大都故君亡國之感又有丙戌夏逃命山谷多猿鳥處借僧爲活語詩中往往自稱老僧其夢見先帝泣賦三絕句有云老僧幸得覲先皇八彩重瞳永不忘蒿呼頓喚彌陀佛淚滿袈裟荷葉裳題畫詩云國破筆端傳恨處水仙須學趙王孫老學東坡栽樹法祇栽苦竹滿溪頭他如少時讀史感孤臣不謂今朝及

老身想到蒙羞忍死處後人真不若前人始覺人無忠
義志不須去讀古人書山河舉目非無感詩酒當前又
自如直可爲一般無心肝人痛下鍼石國亡家破之恨
時時見之篇什蓋不勝錄卷首有康熙癸丑春先生自
書題記歷一百七十餘年完好無恙國變後容曙隱居
楓橋珍弄此冊彌當鄭重矣

禮烈親王爲 太祖第二子當開國時凡征葉赫烏拉
諸部及薩爾滸之戰王功最多所乘克勒馬姿狀偉異
腹下有旋毛如鱗甲然蓋龍種也常時不受羈勒聞鼓
聲輒奮迅欲往惟圉人命王甚愛之戰陣中多藉其

力王薨馬亦死汪編修琬嘗爲之傳王裔孫汲修主人屬張檢討問陶仿唐本昭陵六馬中特勒驃者爲之圖克勒馬者猶漢言棗騮馬也

李南礪書札卷子官嶺南時與周書倉者大率論刻貸園叢書事蒐討商榷往復不勌然南礪實循吏不獨經生也書中述讞定恩平民婦陳氏之獄新安黃文二氏世仇十一案互毆之獄可稱明允其曰過於爲民而不爲官尤良吏之用心矣

順治辛卯亭林先生以行賈至淮上訪萬年少於隰西草堂自稱名曰書年自謂從原字再轉注而成此音蓋

寓逃名意也年少方變服爲緇流名曰慧壽臨別繪秋
江別思圖贈亭林各題詩卷中圖後爲程易疇所藏易
疇有跋後又歸蔡友石道光間張石州屬江陰吳儁重
摹手錄顧萬詩及程跋又自題一詩於上寘之顧祠原
圖轉入葉潤臣所重摹之圖展轉復出厥肆歸武清朱
九丹光緒之季士鑑乃得之又何子貞年丈亦嘗摹此
圖蓋從友石之子小石所借摹者東洲草堂詩鈔於創
建顧祠及歲時祀事皆有詩獨繪圖事無一字及之而
胡光伯焯跋吳畫卷有云月齋子貞各摹其畫祁文端
詩亦有石翁仙去蝮翁老之句楊芷姓雪橋詩話載之

頗詳今吳畫幸存何畫不知尙在人間否

杭州艮山門外辯利院

又名井亭庵

舊藏歷代名人觀音大

士畫相相傳有一百數十餘軸吳道子畫僅石刻拓本其餘或水墨或丹青皆真蹟以趙松雪爲最古宋明及

國朝諸名家不可勝記張仲甫舍人彝壽軒詩有二

月十七日詣艮山門外辯利院瞻禮大士畫相七古一

篇云臨江鄉人百八幅於今更益六十餘又云唐刻宋

繪世固罕陳

老徐青蓮

壽金門禹鼎

今亦無是其時祇百七

十餘幀也每歲春仲夏仲秋季三月寺僧出諸幀張壁
縱人瞻禮庚辛兵後多散佚糧儲赫舍里冠九如山夙

耽禪悅嘗詣寺中出資搜集丁松生徵君助之乃還舊
觀辛亥之變主僧竊售蕩然無存矣又無量寺有呂賡
六畫十八羅漢潮鳴寺有戴文進功德畫象張樗寮書
華嚴經殘本亂後皆不可問

道光間海昌吳子律衡照創吟社於杭州始道光甲申
訖癸巳凡十年爲集百入社者七十餘人時振綺堂汪
氏擅池館之勝藏書甲一郡汪氏有靜寄東軒社集在
東軒爲多費山人曉樓爲作東軒吟社圖庚辛之亂汪
子用丈曾唯攜之武昌未遭兵火圖作於道光壬辰先
大父居憂里中亦與槃敦之會圖中狀貌與花宜館輯

詩圖同蓋同出山人手也光緒丁丑余游武昌子用丈
出以見示越三十年由京師還丈亦謝病歸再見之辛
亥避地上海三見之則圖已歸頌閣社耆兄弟收藏矣
戴文節爲汪蓉垞先生畫山水卷長丈許題識謂蓉垞
贈書數種畫此爲報蓋晚年最經意之作後爲族姪錫
侯所得攜至長沙一覩名蹟庚戌冬錫侯權宜章縣事
明年秋亂作僅以身免此卷不知流落何所

文待詔拙政園圖冊子嘉靖十二年癸巳五月畫圖中
諸景凡三十有一曰若墅堂夢隱樓繁香鳴倚玉軒小
飛虹芙蓉隈小滄浪志清處意遠臺釣碧水華池深淨

亭待霜亭聽松風處怡顏處來禽圍玫瑰柴珍李坂得
眞亭薔薇徑桃花汧湘筠隴槐幄槐雨亭爾耳軒芭蕉
檻竹澗瑤圃嘉實亭玉泉每一景繫以一詩詩有小引
述命名意詩後拙政園記一首亦待詔作園主人王敬
止字槐雨又字獻臣以御史忤權貴逮繫赦歸卷首有
林庭棉小泉題識署款曰太子太保工部尙書恩賜廩輿馳驛致仕云文字有
聲畫無聲詩兩臻其妙又云槐雨在詔獄禍且不測先
文安官南銓冢宰抗奏論救始獲從輕文安論救事見
明史本傳小泉諡康懿此圖舊藏吳門蔣氏後歸海甯
胡豫波道光間歸朱仲青中翰有吳槎客騫錢棣溪咏

查仲湛人僕殷雲棲樹柏文後山鼎程已伯慶華蘇厚
子惇元項芝生廷綬顧蘭厓翎錢叔美杜黃霽青安濤
徐子勉林陳登之延恩張叔未廷濟諸人詩跋何子貞
張子祥吳平齋諸公題識最後子貞丈一詩并跋云此
冊歸鄞縣蔣君芝舫則同治乙丑春也冊面錢梅溪書
衡山先生三絕冊文待詔拙政園圖七字爲俞曲園師
題錢題之前別有戴文節畫拙政園圖一幀丙申七月自題
云余平生所見文畫無如拙政園之多者可謂極文之
大觀又云予於文畫愛之入骨此偶爾與發爲之自忘
其陋近時松壺後山兩先生皆深於文者仲青尙能爲

予就正則予於文或可得進步爾末署文衡山私淑弟子戴熙則文節他畫所未有也此園二百年來興廢無常雲煙變幻尤足爲東吳掌故畫矣今爲南林蔣孟蘋以重直得之光緒中游吳門曾訪茲園時已爲八旗會館屋宇敝陋而水石林木之勝金閭諸園皆不逮也園在明嘉靖間王御史獻臣築侵大宏寺基以闢之其子與里中徐氏子博一夕失之歸於徐氏 國初歸海甯陳相國之遴陳敗時方添設駐防兵改將軍府駐防兵撤又爲兵備道行館旣而吳三桂壻王永康一作永甯居之尋籍沒入官康熙十八年改蘇松常鎮道官署旋

栽園散入民居郡人蔣太守聚得之名曰復園嘉慶中
查儋餘孝廉人倏購得之道光中家菘圃相國又得之
至今雖屢易主而談者尙呼爲吳園云

壽陽祁文端公在政府日於海淀之東賃居僧舍數楹
以去圓明園近也其地曰雙橋自書榜曰雙橋精舍屬
戴文節繪雙橋精舍圖文節有五言古詩題其上時道
光乙巳正月也先大父道光癸卯入都嘗至所謂精舍
者與文端談讌累日見花宜館詩鈔光緒壬辰余從文
端孫君肩段觀因爲一詩紀之

文節又嘗爲文端作憶松圖跋云春浦祁大前輩籍隸

壽陽自號鴈鴝亭長地近方山山有龍池雲洞諸勝多
松澗谿彌谷曠望無際嘗月夜行萬松中遇要氏兄弟
結茆讀書其下賦詩贈答慨然有卜鄰之志後來京師
每直風和月霽輒追憶之屬寫憶松圖落落五稔未有
以報丁未早春僑寓都下頗憶故山松徑遂假酒盃一
澆壘塊云文端自題二絕於後云五十年來影答形眼
中山色夢中青萬松圍住三間屋可是鴈鴝第二亭鹿
牀居士謫仙才借我離愁付酒杯十載孤山鶴飛去孔
賓何事不歸來跋云此錢塘戴侍郎道光二十七年爲
余作憶松圖也侍郎高隱已及十年而余仍以老病留

滯都門展卷慨然題二絕句記之時咸豐七年歲在丁
巳正月廿又八日此卷余亦假觀雄深蒼古大似麓臺
蓋文節生平最經意之作

道光戊申暢月平定張石舟穆屬文節畫小栖雲亭圖
旋爲偷兒攫去復以詩索畫第二圖圖成道州何子貞
紹基題其端石州自有小栖雲亭記及索圖詩皆書其
後文節及祁文端用石翁原韻各一詩又有代州馮魯
川志沂一詩迨咸豐辛酉八月文端復見此卷重爲之
跋時石翁已歿文節已歿難文端方謝病歸老山中矣
最後有上元端木子疇塚一詩亦用石翁原韻者

文節山水為 國朝大家殉節後畫以人重獲真蹟者

尤不惜重金購之余讀孫琴西太僕題文節山水畫軸

有曰畫之佳惡余不能知然聞文節直南齋時貴王某

索畫公不與也王頗以為恨公遂引疾歸有此胸次筆

下安得復有塵俗耶此數語今日賢公畫者能道之否

黃小松嵩洛訪碑圖凡二十四幀藏武進費屺懷所為

李竹朋物小松有自記一首茲節錄如左

開元寺鄭州城西等慈寺汜水東關二里許 鞞鞞關一名峒嶺口在少室北登嵩境始

於少林寺少室五乳峯下 少室石闕邢家鋪西荒原 嵩陽書院太室南麓門下

有漢柏 開母石闕崇福宮東數十步闕此啟母疑星隕也 中嶽廟

嵩山黃蓋峯之陽廟石淙城西四十里平洛澗於此會

前太室神道雙闕善寺積翠峯下門前嵩嶽寺嵩陽觀右維山城南一峯隆然

嵩少諸峯三面環列誠仙境也武后昇小石山房

仙太子碑題目一行碑陰上半皆薛稷書小石山房

武虛谷得晉征東將軍平等寺北洛陽界荒原白馬寺

劉韜碣因構小石山房碑在義井鋪

洛陽寺大覺寺東魏大覺寺碑韓毅書武虛谷得龍門

有方塔大覺寺於洛陽城在四眼井僅存篆額

山洛陽城東老君洞龍門伊闕洞壁刻經明人鑿伊奉

先寺老君香山伊水之東自龍門舟渡沁山嵩洛歸

及巔見黃河如帶南瞻嵩嶽北眺太行秋色渡河至孟

太行輿人指宋八陵隱隱可見太行秋色縣出城東

返無日不見太行秋色晉碑呂望表盧無忌文嘉慶元

秋樹丹黃真畫境也

年九月自開封至嵩洛十月經懷慶衛輝南還往返四

蕉廊脞錄卷七

六求恕齋

十日得碑四百餘種遊屐所經成此廿四圖以志快幸
錢唐黃易圖中皆記某地得某碑而翁正三學士每圖
各爲之記書作小行楷精妙無匹真名蹟也

覃谿得樵場本大觀帖名其堂曰晉觀作歌紀之冊首
自題云大觀帖第六卷樵場殘本凡十一葉九百七十
三字除題目年月九十三行北平翁方綱鑒藏後歸壽
陽相國乃題其齋額曰觀齋作觀齋歌長古一章以志
忻幸余於甲午歲從相國孫景沂借觀今屢更喪亂聞
已兩易主吾友王子展百計求之以直過昂卒不可得
符藥林魯竹里勘書圖卷子王無我畫吾鄉諸老題者

甚夥又藥林自寫詩冊藏閩人李某家沈子培云十年前在廠肆見之凡十冊李得其九餘冊不知椒歸何許此冊前有松逸程士械畫山水一葉署辛酉孟冬蓋乾隆六年也詩凡三十九首中有六月五日早朝 太和殿雨中謝 恩一律 恩賜官紗上幣恭謝 上賜白金各一律

岳襄勤鍾琪公武功彪炳爲 國朝名將願好爲詩所著有蛩吟薑園復榮諸集公歿後王廷松校刊王蓋與公同被逮繫後復同起辦金川軍事者光緒戊子公元孫維垚官粵東覆刻之公又有手書詩草維垚裝池成

卷丐名流題詠維垚之子世傑攜來京師余得觀之字頗雄健詩凡五首武侯祠懷古一首音節抗厲山居二首又復沖夸澹遠相傳公落職後居成都百花洲閉門種菜有遺榮之志余在蜀聞父老言如此

余秋室學士畫二喬觀書圖爲盧氏莫侍郎瞻棊作莫自題識同時老輩題者甚夥貴筑花曉亭方伯燕有七絕二首方伯爲余婦之大父有寶硯齋詩鈔方伯嘉慶戊寅科鄉舉第二名時解元爲黃燮人謂之黃花榜云先高祖退庵府君手臨趙文敏千字文跋云趙文敏臨智永禪師千字文本真草二體延祐中被旨與其子雝

所書有至元危素至正元明善二跋茲但臨其真書以
便初學字多破體未盡改正也乾隆五十九年甲寅春
退庵氏書于嘉興縣齋按乾隆甲寅府君年六十五書
法勻整首尾一律仰見老輩好學之篤而精神彊固逾
越常人此冊庚子歲得于蜀中世世子孫當永寶之

先大父舊藏陸日爲

鳴

棧道圖卷子故爲婁姚公一如

方伯家物壽陽祁文端公題七古一章云天以山水作
圖畫赤縣一紙鋪塵界蠶叢魚鳧闢奇格鬼斧神工逞
狡獪畫工巧奪造物忌繩繫幽險驚脫械褒斜鳥道矗
千里石棧天梯天亦隘大江奔流去不還古火燒痕今

尙壞裏羶行人小於螳插崖亂木紛如蠶捫參厯井仰
長歎狼叫鶻啼吁可誠空堂暑雨鳴簷鈴展卷秋毫認
烽砦近代丹青推陸癡當時筆墨壓嚴怪驢背詩人劍
門客年少遠遊氣豪邁歸來意境頓超突收取雲巒入
警欬更從何處得此本覓句呼朋同一快雪峯舊圖搜
宋譜驟綱妙繪分唐派坐中王褒亦蜀人便思翦燭從

君話

謂王
蓮洲

牛山種樹圖少白山人張宜尊爲舒蘇橋觀察作道光
己亥 先大父與蘇橋同官於皖嘗爲題句圖中有梅
伯言記黃樹齋湯海秋陳雲伯諸公詩余在長沙葉奩

彬吏部舉以見貽距題圖時蓋七十年矣蘇橋名夢齡
滋浦人由庶吉士散館官巢縣有惠政牛山在縣城內
嘗於其地建書院與邑諸生講學於山中種樹無竿亦
循吏也後官廬鳳穎道

丁龍泓隱君手書貝葉經歌與經同弄靈隱寺借秋閣
此歌凡七易棗張芑堂全得之嘗以贈魏春松侍御侍
御裝池爲長卷並藏閣中爲山中故事云

明楊忠烈公手札五通皆與姚現聞者現聞爲文文肅
甥札中言令母舅文起是也李申耆跋考據頗詳第一
札天啟元年冬因賈繼春黨誣公公乞去時也二札天

啟二年起太常少卿時現聞已假歸三札當在三年中
言汪文言之獄也四札乃四年正月八日公三年冬拜
左僉都御史四年春進左副都御史札中有上不能保
其妃與子語則三年七月間事四年夏卽有劾忠賢二
十四罪之疏矣其曰接數次手教孰非爲世道人心先
事遠慮夫使當事諸君子盡有此心此識無事豫有照
理臨事妙有劑量已不受焦頭爛額之功而世自享清
寧太平之福皞皞氣象自是如此而惜乎君子亦未必
能也諸札有憂有憤如聞啜泣如聞長歎讀之悚然起
敬

左忠毅公手札五通亦皆與姚現聞者一札乃公出督
畿輔學政時作天啟元年二札同三札賀文支肅大魁
二年四札現聞假時作五札同中有云年來世道清明
正人尙在似覺門面可觀而小人不得志于清議者往
往鋌而走險投身中璫以求奇勝如南昌景陵晉陵吉
水長安芮城益都婺源安邑潼關皆以中旨去其法專
用于內而以外合之近又兼用挑激之法使外之人離
心異志譎譎訛訛千態萬狀乘間而發而以內收之諸
札繫心君國與忠烈同而詞氣稍異忠烈縝密忠毅豪
邁書跡亦如之有李申耆同日跋

先大父舊藏張卿子隱君像一幀天啟壬戌閩人曾鯨
波臣畫上有丁敬身杭大宗厲樊榭梁薌林葑林周穆
門柳潔夫沈塙士彭芝庭諸先生詩汪氏東軒吟社嘗
以此命題先大父及汪小米胡書農黃薌泉皆有詩見
清尊集隱君詩分湖上白下蓬宅衰晚四編先生手定
歿後刊板散亡康熙戊辰外孫金張重爲補刊丁松生
丈藏有抱經堂手鈔校本

光緒丙午冬於武昌之勸業場書肆見吾鄉吳石倉先
生小象新羅山人畫題詠多鄉先輩以索直昂議未諧
後爲同年桂陽陳復心所得戊申歲復心來主嶽麓學

堂余語前事曰此吾鄉先輩也吾將爲仇池之易可乎
辛亥春余謝病歸過武昌復心置酒話別酒酣出此圖
贈行余深感之其年秋武昌亂作復心還湘又二年鬱
鬱以死每展此幀泫然流涕

劉念臺先生海天旭日硯其十一世族孫瀚以墨拓徵
題硯長方形中圓如日四面作波濤洶涌狀上方刻海
天旭日四字硯背刻山島形在海中水面作日象左側
有崇禎壬申宗周珍賞八字瀚自記云此硯藏家廟子
孫世守之先大父西桓公由孝廉官楚北道光甲辰奉
諱回里修葺宗祠捐置祭器宗老嘉之乃貽此硯咸豐

癸丑任漢陽縣賊由豫章侵江漢嬰城固守力竭身殉
當烽煙告急公誓與城存亡遣孥出走持硯告曰此祖
宗遺澤二百餘年宜保護之先考星六公以龔職橐筆
軍中積勞以卒此硯幸存爲累葉忠貞之氣所默寄謹
摹鍍諸木紀其崖略西桓名鴻庚道光元年舉人大挑
知縣官湖北沔陽州蘄州遠安天門黃岡等縣咸豐三
年移署漢陽九月粵匪陷漢陽死之大吏疏聞 優詔
褒卹星六名憲官湖北枝江長樂知縣

吾浙多詩僧而以西湖諸名刹爲尤盛如南屏淨慈寺
自亦諳珽虛讓山主雲惠荃樾堂小顛人各有集儀徵

阮文達所爲書南屏七代詩僧之室扁額者也。瑛虛主
雲皆善畫山水。余嘗見主雲淡墨山水畫冊爲竹雪亭
主人所藏。今不可再觀矣。日本高洲太助來長沙得實
蔭和尚山水畫卷。實蔭亦瑛虛法嗣。瑛虛於乾隆六年
主 聖因寺。二十二年移住淨慈。南巡 賜紫三次。
三十三年退院。命實蔭代其事實。蔭工詩善畫山水。見
杭大宗道古堂集。其後實蔭乃移主乾峰寺。終焉。此冊
署款無年月。而自稱西湖南屏實蔭。則正當繼席瑛虛
之年。畫法純用枯墨。而蒼莽之氣溢乎毫楮之外。洵足
瑤也。余又嘗見歸安金丈彥翹獲掌大冊子。爲主雲。真

蹟蕭淡中得蒼秀之致謂日夕對此可抵一服清涼散也文善畫性孤潔自號竹雪亭生

蕉廊脞錄卷七終

蕉廊脞錄卷八

錢塘吳慶坻撰

吳興劉承幹校

讀閻懷庭先生

循視

困勉齋私記曰居敬窮理是一事

靜坐覺有閒念卽是不敬正念相發卽是窮理又曰存
心處事當與古人較得失不可與今人較得失又曰譽
有益於名無益於實毀有損於名無損於實故君子務
實而已不以毀譽動於中也又曰有人待我以橫逆便
當思聖賢處橫逆是如何有人愛我敬我便當思聖賢
處人愛敬是如何其引林逋之言如勉強爲善勝於因

循爲惡耳不聞人之非目不視人之短口不言人之過以責人之心責已則寡過以恕已之心恕人則全交子不可待父慈而後孝弟不可待兄友而後恭語人之短不爲直濟人之惡不爲義皆名言也其文士詆程朱論曰予觀近代文士以著述自命者往往傳會經義以立言然於程朱之學則或者尋壘索疵而深寓其不好之意予惑焉夫程朱之言卽六經也學者苟近思而求之則有見其理之一而本末之無殊致矣又有說焉文士所愛者辭也六經之辭古雅深奧利於引据增文章之光悅故雖棄其實而猶取其華程朱之言直陳事理或

雜以方言無雕琢之觀華實兩無取焉而其言又顯切
近今情事足以刺譏吾之所爲而大有所不利則安得
不攻也哉然不敢攻其大者何也其大者君臣父子之
經修己治人之理皆燦著于經詆之則爲詆經詆經則
犯眾誅故不敢乃摭其訓詁字義考論故實之異於他
說者窮極其辨至刺刺累幅不已或詆之爲愚爲悞嗚
呼六經程朱之所傳者非字義故實而已也其道在於
君臣父子之經修己治人之理人道之所以經緯天地
之所以貞固鬼神之所以昭明者皆在焉如以字義故
實而已則古之善是宜莫如記醜而博之少正卯而見

棄於聖人何也況其所據以攻程朱之說又多程朱所辨而廢之者而非其博聞之有不及也誦先生此篇深切著明可爲詆宋儒者痛下鍼砭

滇處西南邊徼而文章氣節代不乏人昆明李復齋先生文耕尤能以宋儒之學服官治民非空言道學者比先生嘉慶壬戌進士由山東知縣累官至貴州按察使其官鄒平冠縣膠州皆有惠政民呼之爲李青天著有喜聞過齋全集二十三卷山左文移黔中文移亦在其中多至誠惻怛之言余在滇嘗假諸吳肅棠學使得讀之中有云近日功利之害偪天塞地徹骨透心勿論富

貴貧賤高明沈潛之人舉凡交際往來倫常日用之事
非利不動非利不行直以趨便求益鍊成人心鑄成世
界一舉足而不忘利一涉念而不忘利其正人君子倡
爲義舉者則子立無與孤掌難鳴除貼心貼力任勞任
怨外仍須以利脂秣以利灌溉然後各得其欲爲我所
用而隄防少疏仍恐爲所刼制其旁觀之忌者惡者阻
難之中傷之又無論矣嗟嗟一舉事而傷仁人孝子之
心短英雄豪傑之氣殆無過于今日之世局世態世味
世情者矣先生當盛時而其言若此殆亦有所激有
所指然以今日之世局世態世味世情殆又過之安得

如先生所謂滌垢穢之肝腸剔腥羶之骨髓漸復本心
知有廉恥者乎

江陰楊文定公教子孫語 取人以剛明爲最次則取

其刻苦者爲其終有成也若浮游淺薄則爲廢材 寒

花耐冬春夏之花則不然故生於憂苦亂離之人多堅

實風霜之威天之殺物正以成物禍患之降天之困人

正以成人遇之而摧者乃凡卉庸流耳 陽善陰惡驗

之一身卽可見神氣陽也體質陰也人之惡端皆起於

耳目口鼻四股之欲非陰惡而何陽之有惡亦爲陰所

累耳天之生人使各有身乃與以爲善之具也誠知此

而使神氣常靜一爲身之主而百體從令焉所以矯氣質之累而復天命之原也

漳浦蔡文勤公二希堂集云大臣以身任事必有公清之操有愷惻之懷有明通之識有強毅之概有儆懼之心無公清之操則不免有寵利之疾矣無愷惻之懷則不能有納溝之恥矣無明通之識則膠執而鮮通矣無強毅之概則雖知其然發之不勇守之不固矣無儆懼之心則自信太過禍且隨之矣讀此因歎 國初至乾嘉間中外大臣能兼是數語者尙可用事實言論而想見其人近百年來學術日卑人才日乏自林文忠胡文

忠曾文正數公外殆未足語於此治術無本原國家將何所倚賴乎

讀錢警石先生曝書雜記學識精博直接乾嘉老輩之緒其開示後學垂訓孫子尤多見道之言節錄數則如左 湯文正公家書云家下書籍用心收著一本不可遺失有人借當定限取來書冊愈舊者愈當珍之不可忽也我回家賴此延年此要務也文正以書籍爲延年眞萬金良藥 余初至海昌意有所語輒覺心悸蓋家居時父兄朋友相與無猜乃竹垞翁曹文學墓誌所謂田居往還者寥寥數子相見肝膽畢露妄謂天下無不

可交之人無不可言之言也及病甚始自悔因讀近思錄於存養克己諸條再三涵泳宿疾頓瘳文端公每教人讀小學近思錄悔不早讀是書以變化氣質也 孫徵君孝友堂家訓語永興姪孫曰吾家沐陽公以廉吏起家爾祖能繩其武我輩俱爲清白吏子孫較以金帛田宅遺後人者榮多矣爾祖常語余曰沐陽公一任止受新生公宴綢一匹弟今日仍覺於先德有愧也惟自覺有愧始無愧耳留餘忌盡天之道也常處其不足以爲可增可加之地若增無可增加無可加立刻索然矣

謹按坻先世夔州公亦以廉吏起家今縣延已七世矣敬念舊德昕夕皇悚

錢文端行解

割記中一條云大凡人家興旺每一二世必衰從此後或遲一二世又興者亦有之總未有赫奕不衰者譬諸花木果實連年燦爛稠繁間一二年必稀俗名歇枝葢亦盛衰循環之道易繫辭曰剝窮上反下又易窮則變變則通陰陽消長理所必然孟子曰君子之澤五世而斬人家子弟常須自思身當斬澤之時何可無培養之功如臨深淵如履薄冰念念積累事事積累一世培養世世培養自然連綿不斷續箕裘而振家聲亦所謂君子存之者也

才力智慮之人不可無慈祥之氣以養其福富貴聲望

之家不可無渾樸之子弟以存其元氣 甘槌齋語

處逆境難處人倫盤錯之逆境尤難天地鬼神以此試其人而鍊之也宜憂勤惕厲喜怒啼笑總勿輕用而此中一主於正無稍詭移也 毛稚黃語

不辱人以不堪不愧人以不知不傲人以不如不疑人以不肖不輕出詩文示人制毒性以化殺機養喜神以延壽脉教兒童放生不拈蟲弄雀留心教女爲人家造奕世之福 沈大匡語

王文莊公封翁文山先生雲廷嘗輯國子監志卷帙繁多富惜佚不傳 先高祖退庵公嘗稱先生所著實言堂

家戒云人家出一斲削元氣進士不如出一培植元氣
秀才又嘗寓書文莊云詞章之學祇求文理無疵刻意
求工則害道進取之途須知得失有命稍事馳騫則喪
品悠悠忽忽便虛度一日便虛度一年便虛度一世戰
戰兢兢始不負所事始不負所生始不負所學此可書
作座右銘也

汪文端公雍正甲辰二甲一名進士官至吏尙協辦大
學士太子太傅 贈太子太師乾隆間直南齋入樞府
御書松泉二字以賜因以自號有松泉詩文集性謹
厚嘗謂爲大家子弟倍難面諛多則無從聞過屬耳目

則不能藏拙故須謹之又謹誠至言也

趙橫山先生大鯨由進士歷官左副都御史相國永貴其門下士也初撫浙詣辭問曰此去政當奚先曰劾貪先生笑曰貪吏贓入己者不必劾也相國愕然先生曰贓入己而不分潤上官上官早劾之矣不待君也今之巧宦全取諸民而半致之上或且全致之以貢媚而營私上下固結牢不可破譬如獲盜胥篋百萬有所恃焉則無敢蹤跡之其所禽者皆竊鐵攘雞輩耳相國再拜曰微先生無能言及此也

海寧梁伊澗履祥篤信朱子之學案頭置考亭全集正

襟循覽日有程課及門問曰學幾時纔到悅地答曰卽
學卽悅無兩候也畏難不悅俗學不悅外此雖學佛老
者亦有得心之時况吾道之精微廣大乎君之不悅正
坐不學反于學外求悅不亦左乎聞者歎爲至言

凡家道所以可久者不恃一時之官爵而恃長遠之家
規不恃一二人之驟發而恃大眾之維持 老親舊眷
貧賤族黨不可怠慢待貧者亦與富者一般當盛時預
作衰時之想自有深固之基矣 處此時世負此重名
總以錢少產薄爲妙一則平日免於覬覦倉卒免於搶
掠二則子弟略見窘態不至一味奢侈 處茲亂世錢

愈多則患愈大每年足塹一年之用便是天下之大富人間之大福家中要得興旺全靠出賢子弟若子弟不賢不才雖多積銀積錢積穀積產積衣積書總是枉然吾家現雖鼎盛不可忘寒士家風味子弟力戒傲惰戒傲以不大聲罵僕從爲首戒惰以不晏起爲首以養生六事勸兒輩一曰飯後千步一曰將睡洗脚一曰胸無惱怒一曰靜坐有常時一曰習射有常時一曰黎明喫白飯一碗不沾點茶皆聞諸老人累試毫無流弊者有福不可享盡有勢不可使盡福不多享總以儉字爲主少用僕婢少花銀錢自然惜福矣勢不多使少

管閒事少斷是非無感者亦無怕者自然悠久矣

曾文正公

家訓

曾文正公家書垂訓子弟精理名言殆不勝記獨其將
赴天津示二子書中不忤不求二書嘗書之當座右銘
詩曰善莫大於恕德莫凶於妬妬者妾婦行瑣瑣奚比
數已拙忌人能已塞忌人遇已若無事功忌人得成務
已若無黨援忌人得多助勢位苟相敵畏逼又相惡已
無好聞望忌人文名著已無賢子孫忌人後嗣裕爭名
日夜奔爭利東西騫但期一身榮不惜他人污聞災或
欣幸聞禍或悅豫問渠何以然不自知其故爾室神來

格高明鬼所顧天道常好還嫉人還自誤幽明叢詬忌
乖氣相迴互重者災汝身輕亦滅汝祚我今告後生悚
然大覺悟終身讓人道曾不失寸步終身祝人善曾不
失尺布消除嫉妬心普天零甘露家家獲吉祥我亦無
恐怖 知足天地寬貪得宇宙隘豈無過人資多欲爲
患害在約每思豐居困常求泰富求千乘車貴求萬釘
帶未得求速償既得求勿壞芬馨比椒蘭磐固方太岱
求榮不知猷志亢神愈怵歲燠有時寒日明有時晦時
來多善緣運去生災怪諸福不可期百殃紛來會片言
動招尤舉足便有礙戚戚抱殷憂精爽日凋瘵矯首望

八荒乾坤一何大安榮無遽欣患難毋遽懣君看十人
中八九無依賴人窮多過我我窮猶可耐而況處夷途
奚事生嗟愾於世少所求俯仰有餘快俟命看終古曾
不願乎外

左子異方伯寄贈文襄公家書印本錄其最切要語

既讀聖賢書必先求識字所謂識字者非僅如近世漢
學云云也識得一字卽行一字方是善學終日讀書而
所行不逮一邨農野夫乃能言之鸚鵡耳縱能掇魏科
躋通顯於世何益於家何益非惟無益且有害也馮鈍
吟云子弟得一文人不如得一長者得一貴仕不如得一

一良農文人得一時之浮名長者培數世之元氣貴仕不及三世良農可及百年務實學之君子必敦實行此等字識得數箇足矣科名亦有定數能文章者得之不能文章者亦得之有道德者得之無行誼者亦得之均可得也則盍期蓄道德而能文章乎此志當立 丈夫事業非剛莫濟所謂剛者非氣矜之謂色厲之謂任人所不能任爲人所不能爲忍人所不能忍志向一定併力赴之無少夾雜無稍游移必有所就以柔德而成者吾見罕矣 近來時事日壞都由人才不佳人才之少由於專心做時下科名之學者多留心本原之學者少

且人生精力有限盡用之科名之學到一旦大事當前
心神耗盡膽氣薄弱反不如鄉里粗才尙能集事尙有
擔當試看近時人才有一從八股出身者否八股愈做
得入格人才愈見庸下此我閱歷有得之言非好罵時
下自命爲文人學士者也 我生平於仕宦一事最無
繫戀慕愛之意亦不以仕宦望子弟諺云富貴怕見開
花我一書生忝竊至此從枯寂至顯榮不過數年可謂
速化之至絢爛之極正衰歇之徵惟當盡心盡力上報
國恩下拯黎庶做我一生應做之事爲爾等留些許
地步爾等更能蘊蓄培養較之寒素子弟加倍勤苦力

學則詩書世澤或猶可引之弗替不至一旦漸滅殆盡也 古人經濟學問都在蕭閒寂寞中練習出來積之既久一旦事權到手隨時舉而措之有一二樁大節目事辦得妥當便足名世目今人稱之爲才子爲名士爲佳公子皆諛詞不足信卽令真是才子名士佳公子亦極無足取耳 吾湘於咸豐初年首倡忠義至今二十餘載流風未沫諸英傑乘時樹績各有所成爲自來未
有盛事此時正宜韜光匿采加以蘊釀冀後時俊民輩
出以護我梓桑爲 國幹輔不宜更事鋪張來讒愿之
口而壞老輩樸愿之風也 吾平生志在務本耕讀而

外別無所尙三試禮部既無意仕進時值危亂乃以戎幕起家厥後以不求聞達之人上動

天鑒建節錫封忝竊非分嗣復以乙科入閣在家世爲未有之殊榮在國家爲特見之曠典此豈天下擬議所能到此生夢想所能期子孫能學吾之耕讀爲業務本爲懷吾心慰矣若必謂功名事業高官顯爵無忝乃祖此豈可期必之事亦豈數見之事哉或且以科名爲門戶計爲利祿計則并耕讀務本之素志而忘之是謂不肖矣

長沙王葵園師嘗與人書云平生願爲讀書人不欲貌

襲名士願爲正人不欲貌襲道學願爲建言之人不欲貌襲直諫先生立身本末爲學大指數語盡之矣

袁忠節公小漚巢日記云孝達督部出詩四卷枉示某對公言此安石碎金故當流傳世間公笑曰那得便爾殆不過陶公木屑耳憶壬午年謁左文襄時以病在告予對言公晚境可務自全正宜如裴晉公放意機衡外收身矢石間耳文襄蹴然改容云吾安敢望裴公今雖政府殆不過束縛酬知己蹉跎效小忠而已且吾位爲宰執豈容依阿浮沈專務自全子言非也兩公之於談諧中出莊語箭鋒相直皆此類

孟子爲滕畫策二或皮幣將事或效死勿去魏絳之謀
傳稱五利漢過不先亦師老氏柔能剛之誼以息事寧
人爲用其利敗之幾未可以一言定一策決也苟利社
稷貴因時弛張耳吾觀至元十二年世祖與宋議和獨
松關守將殺使者廉希賢激世祖之怒而宋社旋墟天
聰六年我太宗文皇帝與明修好賜大同巡撫沈棨
書議互市明人治棨罪絕邊市有以激王師之怒而明
社遂移絕之未知其利通之不聞其害班固上疏兩國兵交
聘問之使往來其間利敗之幾豈一端盡哉袁忠節跋
胡忠簡遺

象研搗
文書後

袁忠節公在京曹日才名甚盛而實篤志於身心性命之學余嘗聞其緒論心折之一日以書貽余曰方今九流溷濁人材衰少之會必得篤實慈祥有大根器者起而相摩相盪乃足以消世變而引善機君以太邱蟬嫣之門地負沈深篤雅之姿天之予君者厚則所以自待者自不應薄區區之竊望于先生者重遠之學濶大之規而非所望于刻瑀眾形無實之言也竊謂近代名流之學非所以期高流其唯潛齋先生沈端恪之遺書乎余服膺期語而汨于世法末由實踐愧負良友多矣

忠節師事劉融齋先生服膺其說屢見於文字中其論

爲學之方尤足爲後學準的嘗見其與宗人敬齋觀察
書牘卅餘通錄其二則云爲學之方鄙意以爲兩漢至
今風氣屢變凡前人立一宗旨皆有致用方略不可偏
廢正須集長去短博採兼收如九流有九流之用西漢
人主陰陽五行多喜黃老東漢人多主訓詁陸子靜王
文成用曹溪宗旨 國朝諸老先多講考證皆各有派
頭各有方略至于北宋義理之學又元和以來降及虞
道園歸熙甫至近代方氏姚氏爲古文之學尤爲學術
穿綫統宗之處近年論經濟之學以曾文正爲正軌左
文襄才氣優于問學似不逮遠甚論經義以陳蘭甫爲

正軌論古文以姚姬傳氏爲正軌此三家之書子弟能
熟讀亦可以束身自立獨往獨來于濁世之中若夫經
師家法門徑亦不可不知其梗概文筆之事去病求利
亦吾身之甲冑干櫓也 夙昔雅信曾文正公云功業
之事天命居其七人力居其三學問之事人力居其七
天命居其三此知命之談也蓋功業之來全視乎時讀
子雲解嘲篇可知其理仕途亦由命定不可強求惟學
問盡其在我可以自我爲政第成器與否亦視根器之
大小年力之修短爲衡古今學者如牛毛成者如麟角
可太息也我輩年已□□去者如此來者可知功業二

字不必厲之夢寐徒勞煩擾矣惟力學以希炳燭之明其可乎

中材以下非有盤根錯節之遇貧賤憂憾淬厲玉成之境尠有能自立者如于北溟宰羅城郝浴窮居尙陽堡使之困心衡慮體認本來面目刊落浮華鞭辟入裏乃得治心養氣工夫而後德慧術智生焉若置之豐腴安逸之地愚者固靡然結習賢者亦筋骨不堅最爲敗壞人才之具 分一日光陰以其日力精力之半游心於无爲法以其半程功於有爲法動與靜交相養智與愉交相養藏修息游量力而動如是則和理日濟榮衛之

間血氣融通，蠲除煩苛，精氣不竭而應務不窮。袁忠節公書牘

接物處事，隨固不可激，亦不宜郭。有道貞不絕俗，吾又嘗刻小印文曰：夷惠之間，可知吾之志也。然此中卻須實有貞力，否則隨俗而靡矣。又曰：於已則是之中求其，或有未是於人則不是之中求其，亦有是古人嘗謂

諸葛公三代下一人，其教子祇澹泊寧靜四字。又曰：才須學也，才賦於天，學勉於人，可以自主。人之志氣固貴自立，而亦關乎精神興趣。發憤忘食，卽是精神樂以忘憂，便是興趣。心總不能無所安著，既不著於讀書，做人卽軼於規矩之外。驕之一字，誤盡古今人物。周

公尙不能驕况下此萬萬 我生平不肯向人稱貧不
欲輕受人惠 從來絕大事功皆從平實做出來未有
不平不實浮夸誕妄而能有成者 近來人總膠漆於

一私所言或公及治事便營私

陳藍洲
訓子語

乾隆杭州府志成於杭州知府儀徵鄭楓人澐先是邵
閻谷齊然嘗創修已具稿未刊而邵公卒繼事者爲王
燧以已意竄易之故今印本有異同未幾王敗所刻本
遂不行鄭公乃賡續成之邵公以文學起家温然儒吏
巡撫王直望惡其迂拙百計窘辱之邵公憂憤以沒如
皋王燧巧黠人也覲得是缺陰擠邵邵劾王遂權知府

事相傳王受事日入內署瞥見邵公衣冠出手批其頰
悚息不敢入署假鹽運分司署居之未幾巡撫被逮王
亦見法聞王最工逢迎多機智一日巡撫命兩縣令置
竹榻欲久用光澤之竹而未經人坐臥者索之急縣令
計無所出請於守守曰易易耳市上線鋪理線竹具多
年久極光澤可以新竹遍易之頃刻可成也如其言巡
撫大悅其警巧多類此沈文輔之云

世傳扶乩率有仙人降其處其實眞仙孰與人間事殆
靈鬼託之耳然其言往往有可動人者杭州某孝廉游
食京師後以貲得內閣中書而不迎養其母書問亦罕

達庚申賊破杭州乃倉皇歸覓其母不得有請卜者往
焉詢母存否盤中書云仕則慕君便把庭幃冷落清夜
自思能不潛潛否貧而爲祿亦仕之常但求忠臣必於
孝子之門此言何解爾問爾母爾母自逍遙也向西覓
之可得某塔焉若喪逾數月附舟至嘉湖間卒于舟中
舟人舁之岍將藁葬矣檢衣中得一木牌書姓名官爵
甚悉有馬翁者素相識聞之爲具棺斂而葬之卜壇數
語婉而多風雖鬼也吾猶敬之

山陰徐大綸字香莊乾隆六十年官鎮筮五寨司巡檢
時紅苗焚掠乾鳳永三廳鎮軍以輕進陷苗攻筮益急

大綸奮挺大呼募敢死士百餘人殲苗甚眾苗始却復
團練鄉兵守禦苗不敢近呼爲徐三將軍大綸行三故
云嘉慶二年中丞傅公時爲鳳凰廳同知大綸在軍中
其冬一夕以勞疾卒將斂忽大聲作北音曰奉神命傅
傅公至又作山西音曰忠義吾所佑徐大綸有活生靈
功爲請于帝得不死呼傅公至前以指畫掌作百餘字
且曰善視若吾去也大綸病遽起當時譁傳以爲異事
余至長沙故老猶有能述其事者

仁和施三成章業米湖墅咸豐庚申賊圍城亟城中米
殆盡成章輟業家居積米尙夥乃廣給鄰里之餓者人

來乞與之米未嘗取值城破逸出奔走飢甚遇一老嫗
施粥道旁因就食後屢逃徙所至輒得食自言流離困
苦中未受一日餓也亂定後仍業米行凡至他縣販米
遇鄉人逃徙不得歸者挈之返問其家而還之無家者
輒代營生計買人子爲善于鄉而知之者鮮余故爲表
之

蕭山鄉民有忤其母者其平日悖德事不知也言者但
謂其子嘗出外屬妻具蔬飯俟歸而食之及出婦以奉
姑夫歸索食不得妻畏夫不敢隱夫怒撻其妻母慚憤
自縊死鄰里咸莫喻其故越數日天大雷雨擊其子死

始知其母死之由云

潁州之鄉八里松居民鄔姓

音近鄔亦不知其爲鄔抑爲伍也

兄弟四

人而不能養其母蓋家素貧子長各使營生計而四子以次排日供膳伯與仲家稍裕而供養甚薄久且生厭叔貧縫紉爲業季爲圻者尤窶叔與季懟曰母不能與兩兄校兩兄不乏甘旨乃徒食兩貧子耶母由是怏怏會除夕當伯供食則先闔扉示弗納母至呼不應以杖擊扉亦不應母哭而返季之婦賢者也居恆奉姑謹母旣不得食於長子乃走告季嬭嬭勸慰且留之食季弗欲嬭乃乞鄰得米一碗又鐫底焦飯升許以布縛之使

姑攜歸路側有大池母以悲憤不克自申過池上坐地
哭竟投水死明日有過之者見池上遺杖一布橐一水
面浮婦人尸因相聞於路季婦聞之色然駭趨視姑也
發橐則米與焦飯具在乃大慟呼其夫入水撈姑尸夫
不善泅亦俱沉焉而其兄嫂六人者聞之若罔聞也俄
而天陰晦霹靂驟起攝三子及婦並踞池上同時震死
鄰里遠近咸來瞻睹莫不悚慄三子皆無嗣獨季生兩
兒存亦此嬪孝謹之報歟

謹慤之士必信必果雖死不改其志乃至沒旣數稔而
初心耿耿亟欲自白者徐文居夏縣日與邑之幕客張

君交其言訥其行拙張之戚屬有官于秦而歸者其子
病張邀徐丈往診之既愈其人以白金來謝張爲代致
徐丈辭不可時張方俶裝北行徐丈卽以金屬購京師
高麗參旣而病歿京寓逾兩年徐丈自夏縣入都宿盧
溝逆旅恍惚夢其來深以得金未買參爲已咎委宛謝
過云

夏縣二明經人稱之分東學西學焉東學忘其姓西學
盧某文學素荒陋偶作書與人語多俚俗東學見之輒
大笑盧慚甚後學宮老柏爲風所仆東學裁其一枝作
皮書板盧遂具詞控於上官誣以學宮柏作壽具幾至

落職久之乃免一譚笑頃耳而身名之禍隨之世之輕於非笑者可以儆矣

姚丈益齋家一輿夫執役有年矣一日令齋帷幙枕簟之屬於他所輿夫適逋負不獲償竟投諸質庫太夫人怒將逐之姚丈陰使人詢質何所得錢若干爲贖還而留輿夫弗使去曰因此事見逐彼無復噉飯地矣又縫人某竊其絮衣將盡爲爨媪所覩丈則微告焉而善遣之辛酉杭州破賊所至率用土人爲導而一輿夫一縫人適皆在賊中脅以指示過姚丈宅門給賊曰是貧家無財物可勿入也因得免於剽掠云

江西太學生羅含康熙甲辰客京師館於真定梁氏一日感暴疾有二卒引至冥司殿下甫入門冥官傳呼乘輿出儀從甚盛羅視冥官貌清癯弱不勝衣而丰度端整心知爲正神不辨爲誰有執卷而隨者乃羅亡友錢塘洪貞孫也因詣揖問無恙外卽叩輿中人洪微哂曰此吾鄉柴公虎臣爾豈未之間耶羅故聞柴名趨向長跪以功名請不應叩至再乃曰此非吾職汝但體天地好生一念自能致之言訖而甦時嚴司農沆施侍講閏章聞其事同詣羅羅述其年貌舉止皆與柴合此事見天津沈文和兆澧蓬牕襍錄柴先生名紹炳仁和諸生

生平篤守宋學孝友爲鄉里矜式歿而爲神宜哉

長沙朱雨田原籍安徽南陵以寒士起家操計然術致富生平以濟人利物爲己任自道光己酉振水災爲致力善舉之始其後歷咸同光三朝五十年中善行不可枚舉所居距長沙省城十餘里築室先塋之旁奉母以居顏曰萱圃性好蒔花春秋佳日必以花時讌客年七十餘矣而神明不衰中歲苦羸疾服鍾乳硫磺諸品疾愈甚後乃服大黃黃連元明粉小薊檳榔諸藥遂大瘥自言生平所服大黃已在千觔以外黃連等涼劑亦四萬餘帖亦可謂異稟矣壽至九十而終

有屠者居餘杭之鄉門外隙地悉種瓜方春墾土見土
中有古泉掘既深所見益夥數日竟得萬餘紫色深黝
多宋年號鄰人聞之將謀爭掘其妻吝之拵土而坐其
上比夜與夫潛出將盡取焉則土以下輒石層累無所
施鋤揭矣所得泉萬餘亦莫知所究竟云

活蝦蟇一個縛挂風際勿見日既死復擊之埋入土中
遇月食時速掘起置地上覆以銅盆以錐擊盆作聲勿
少閒俟月食復吐則蝦蟆活矣旋即擊死焙乾研末作
小丸收藏備用遇有縊死人急將此丸強納入喉周時
便蘇仁和陸子安嘗製此藥屢試必驗惟救一童子則

蘇少頃復絕抑亦奇矣

芭蕉根內有實每夕五更必從下躍上有聲人於此時靜聽得之俟其躍上速取之形如橄欖核但不知何所用也

小說記義馬義犬者多矣惟余所聞於先大父者爲西安副都統雙就園所乘馬爲最奇花宜館詩集有義馬行一篇序云咸豐三年就園督兵剿北路賊賊夜襲營所乘馬爲礮火驚逸賊牽馬馬踉蹌不肯行遂獲賊乃并獲馬就園義之五年北路賊平還軍西安作圖以表其義

余表伯朱雨泉官陝西甯條梁巡檢殉于任所喪還西
安有所蓄黑犬名曰大漢隨行二千數百里日在靈輦
左右一日偶失道犬獨在前乃折回尋柩及之仍隨行
比至西安城外厝所表伯母華乃挈之入城在余家數
年守戶綦嚴視常犬高大故以大漢呼之云 又仁和
王子展存善云其封翁官粵時有輿夫買一犬將宰而
食之粵人性喜食犬習爲故常封翁見犬受束縛哀鳴
問輿夫知以銀六錢買得者如數給之解犬縛牽歸畜
之後數年封翁病卒犬先六日卽不食日蹲封翁臥榻
側不去封翁卒後一日犬亦死王氏哀之每於忌日以

小紙書犬名粘於祭案之下以示不忘犬名阿黃以其毛色黃也

湖南耒陽縣城外濱河有地鞞洲洲上有杜工部墓余泊舟登岸訪之一坏完好有墓碣字漫漶似是元至元某年立按元稹杜君墓係銘云子美之孫嗣業啟子美之柩襄祔事於偃師舊書文苑傳甫于永泰二年卒于耒陽子宗武流落湖湘而卒元和中宗武子嗣業自耒陽遷甫之柩葬于偃師縣西北首陽山之前是耒陽不當有公墓或當日慕公者爲公營宅兆葬衣冠未可知也湘南人俗傳公死于水一鞞浮見茲地至今名其地

曰鞞洲則傳會不足信也

嘉慶元年仁和孫文靖公以四川總督征白蓮教匪於西陽州累戰大捷六月薨於軍余夙聞西陽州境長干嶺有公祠按州試畢乃屬州牧訪問紳士無知者尋飭吏胡吉亭至其地繪圖貼說以歸則地名馬鹿溪又名長干嶺有自生橋土人尙知嘉慶乙卯年孫中堂帶兵至此薨逝並不聞有祠宇今祇土地廟一極庫隘廟側一碑相傳是中堂神道碑字跡澆漶不可辨云云按公薨後命內臣護其喪歸非葬西陽則神道碑之說乃傳訛意當日州民感公以死勤事作祠樹碑以誌不忘

歲久傾圮夷爲土地廟而碑則猶存惜剝蝕過甚竟不能拓得一字耳

梓潼縣長卿山有李節士祠祀漢御史李業入祠則李君闕在焉道光十四年知縣徐凝績於田野中得之移置祠中闕凡二行行四字曰漢侍御史李公之闕字大四寸許無缺蝕廊右有碑二一爲明嘉靖壬辰縣中林下七十三翁金獻民舜舉讀李節士詩一又題李節士新祠詩一跋云嘉靖戊子巡按御史李東分巡僉事戴鰲始建祠樹碑其一碑爲草堆所蔽不能辨一字

成都布政使署亦園乾隆辛丑宛平查儉堂先生禮所

闢有怡情育物之堂不波館紅蓼橋種山臺小綠天亭
依花避樹廊花陽校書房引涼徑此君亭接翠軒諸勝
先大父少時嘗讀書園中時婁東姚公一如方伯爲布
政先大母姚太夫人方來歸也後四十年先大父爲四
川布政有亦園感舊詩儉堂爲蓮西先生弟嘗從征兩
金川累官至四川布政使擢湖南巡撫著有銅鼓書堂
遺稿卅二卷光緒丁酉余至蜀問亦園之名竟無知者
詠齋王文言藩司官廨幾經修葺意所謂園者卽今附
設廨中之各局耳

成都西郭外青羊宮不知建自何代志乘闕載所祀者

或謂太史儋或謂老萊子或謂李耳皆無塙據蓋自唐
初崇祀李耳肩錫隆號曰太上曰大聖祖起於麟德至
天寶而彌盛靈符遺像一時讐言遂成故實至今羽流
居之日事崇飾世俗皆以爲老子之宮矣相傳舊有青
羊二一已逸去今尙存其一範銅爲之而以鑱鍊錮其
足謂防其更逸尤爲可哂余幼時曾往游焉二三月間
花市最盛士女雜遝光緒丁酉再至成都則無暇言游
事每逢花時率在外郡不復能重尋陳迹矣

蜀多奇姓若芍若首若銀若竹若寸按試各郡往往有
之石砭廳有隆肇周劍州有嘉炳南會理州有大澤宇

皆他郡所無西昌縣附生買旭升文字甚佳試列一等
發落日詢以得姓之始自言爲微子之後蓋其族譜相
傳如此不知何所據

湖南永州府桂陽州童試皆有獠童名額號曰新童蓋
自嘉慶間苗獠歸化之後特設學額以文教化其獠俗
也新童皆盤姓其漢槃瓠氏之苗裔歟

先高祖退庵公官遂昌訓導先曾祖妣程太夫人率先
伯祖當塗公先大父光祿公隨侍學署後有高樓三楹
軒爽可喜啟牕則眾峰在目相傳樓有恠人莫敢登程
太夫人有膽攜當塗公光祿公居樓下值風日晴和時

往登覽一夜月色甚朗又擬登樓遠眺行至梯半聞樓中履聲橐橐須臾樓門啟有前代衣冠者闐然而出急滅燭返尋亦寂然蓋明末時有殉節於茲樓者毅魄長留要不爲厲也

蜀中文學頗盛而士習多漸染汙俗者余於課尊經書院日嘗以貶俗詩六章發題用白文公新樂府體拈三字爲題一日多暇日戒廢學也荀子曰其爲人也多暇日者其出人不遠矣荒於嬉安於陋汨沒于利均之廢也戒之哉一日莠亂苗止橫議也學術歧誤莠言亂政非聖無法厥禍滔天蜀士誠敦本尙義不惑異說比於

齊魯今猶古矣所願後生小子毋搖於聞見毋恣爲論
議葆我嘉種衛我道藩教者之責學者之幸一曰鼠無
牙懲好訟也訟則終凶大易明訓人能充無欲害人之
心而仁不可勝用也積習深痼牢不可破庸詎知害人
者卒自害乎一曰捉刀人惡槍替也槍之名不知緣起
無已姑以捉刀字比坳之彼乃英雄此則穿窬類耳機
械變詐廉恥道喪無怪憤激者之欲廢科舉也曰阿夫
容痛煙毒也天降巨毒毘我中華浸淫百年戕賊無算
愚頑無論已賢知不免槐蘭之根而漸之漭可弗痛歟
一曰哀六朝正書體也篆分草隸遞嬗遞變隋末唐初

八法正軌近世好異乃學六朝卽論六朝亦自有其平
正者刁遵鄭羲差爲傑出誌銘造象石工龕書不足言
矣不觀碑版不識書勢詖險側媚銜名駮俗雖曰小道
亦人心世運之憂也

湘鄉楊石泉中丞以書生崎嶇戎馬從左相國援浙由
衢州太守游歷開府於吾浙建勳甚多培養士類用意
尤厚嘗自言少時讀書羅忠節公門下與王壯武龔同
受業湘鄉有相士言奇中一日偕王詣之曰二君皆貴
人也旣又曰何兩君皆不能享大年王問壽幾何曰顏
子之年耳楊問之則曰可多十六年已而兩人皆隨忠

節入戎幕王戰沒果如其年楊撫浙時年甫四十餘甲
戌冬大閱砲子及其座隅幾中傷時議者謂必嚴究中
丞曰此誤發耳置不問是歲年正四十六也踰年中丞
始以告人曰吾今日固當告存矣

蜀中無蟹有南貨客者多越人販南中食品至以一陶
器盜貯一蟹直白金二流至成都官吏爭買以饒客一
肴卽費數金其實遠致失真味大無謂也 先大父嘗
作瘦蟹行以風之其結句曰薑新酢醱一杯羹價抵貧
家三月粥藹然仁者之言也

蜀中產綠菜山谷令蘆山作綠菜頌今則嘉定雅州水

石間多有之色味形狀與吾鄉紫菜絕相似

嘉州荔支色香味雖不逮閩粵然故是雋品昔過納谿有餉此者舟中飽啖之聞近歲種植漸廣結實頗繁固不止嘉州一樹矣

蜀名山縣蒙山產茶最有名中頂所產至少而至寶貴山凡五頂中頂最高土僅寸許相傳漢甘露祖師吳理眞種茶八株今尙存其七高四五寸其一高尺二三寸夏初發芽不過數十卽有雲霧覆其上每將採必先祭之祭畢而采采畢卽如枯枝平時樹柵扃鑰以守護之中頂茶每歲入貢爲四川方物之一知縣歲以貢餘餽

省中大吏一小瓶中祇一葉耳茶譜云獲蒙頂茶一兩以本處水煎服除宿疾四兩卽成地仙

成都有年景花作紫白淡紅三色臘盡抽穗作花以盆盎雜栽之作饋歲物置軒檻間亦楚楚可愛

蜀中子規到處有之余所至則以宜遠府考棚內外樹間爲最多夜深聞之其聲慘淒又有烏名悔悔降者以其鳴聲類此三字而名之三四月間有之 先曾大父有補禽言詩此其一也

敘州府考棚倚山爲屋山上多蛇土人云有蛇神山半建亭祀之值試事掃除屋舍官必祭蛇神余所居屋後

卽山亭每夕聞蛇鳴其聲閣閣然終試無出而爲害者
峩峩山有萬年松枝葉根鬚如縷如髮視之若已枯者
置水中則頃刻間黃萎者皆蒼翠儼然一小松具體而
微然日久則葉落宜風戾之或夾置書葉中仍可復活
幼時在太原正月燈市最盛城守營中有所謂黃河九
曲燈者於廣場多立竹木以繩係之設爲曲折徑路狀
黃河之九曲也男女中夜穿行過之謂之銷百病初未
知其緣起後見仁和吳南礪可馴所葺宣化府志言之
頗詳蓋此俗起於宣府明武宗在宣府盤游無度俗極
奢靡其時宣大毘連浸淫及於太原數百年後遂成故

事也南礪爲中林司馬廷華子隨宦西北最久

事有絕可笑而絕相類者張勤果公撫山東日有某縣

孟氏後裔某

非鄒縣孟子嫡裔蓋他縣分支有家祠者

具稟以孟子祠廟傾

圯請發款修葺勤果批准撥公款給之後二年勤果巡

閱至某縣憶前事欲親往孟廟行禮某本其縣之豪猾

也領款乾沒并未修廟其鄉人亦無敢言者至是倉卒

以縣有瘟神廟方葺治完美乃急易扁聯神牌一切陳

設一夕而成明日勤果來祭祭畢瞻仰殿中素象大詫

曰孟子象何以面色全青耶乃窮究罪之又陳伯潛師

傅督學江西檄南康府縣修白鹿書院捐廉撥帑輪奐

一新書院舊有文廟至聖先師四配十哲皆有瘞象所
司不察皆用金裝如佛象然伯潛瞻拜之餘以爲駭怪
命更瘞之此二事相類可發噤也

外大父晴峯程公家書四通蓋咸豐間戍新疆時予其
家人者其最後一通劄自江右道衢嚴過杭州時書爲
咸豐五年乙卯之夏時先王父巡撫陝西先大夫得學
官巷壽松堂孫氏老屋葺而新之公來涖止先妣金太
夫人率慶坻兄弟姊妹出拜公于堂下故有情意殷諄
視同所生語書中所云第四年六七歲者卽慶坻也駿
齋表妣來游杭州出以見示七十之年萬里行役而敘

迹綜密翰墨腴美若是累經兵火遺墨僅存追念前塵
相距六十五寒暑昔日髻鬢今已頽齡鮮民餘痛彌用
感愴

李黼堂中丞桓病中作自挽聯句云作秀才十年作外
吏十年作江湖野老三十年來日無多於願已足刻聖
蹟百卷刻自箸百卷刻者獻類徵七百卷幾生修到其
書滿家中丞嘗刊闕里文獻考一百卷刊奏議書牘詩
文爲寶韋齋類稿一百卷

日本相傳有唐代歌舞每歲天長節於宮中演之先期
演習文部介紹于式部導余輩至所謂雅樂稽古所者

廣廈九楹陳設華美外爲舞臺臺正方而高飾以青幃其舞有三一曰久米舞神武天皇率久米部之軍擊土賊於大和國免田縣平之賜將士宴作國歌將士拔劍舞誅賊之狀遂以爲名中立一人撫箏左右二人舉箏侍立左四人緋衣執笏右四人黃衣執笏又吹笛者二人擊板者二人歌半四人者起舞旣而拔刀跪起而舞舞罷有舉琴者有吹簫吹笙者合而歌歌罷徐徐而退一爲春庭花自唐朝傳來臺上凡十二人列坐於地一人擊羯鼓諸樂齊作又四人作二列束帶佩劍披繡衣立而舞乃擊大鼓旣而四人拱立樂止少頃樂再作復

盤旋良久乃退一爲蘭陵王亦唐朝樂北朝蘭陵王長
恭美容儀常被假面臨敵擊周師于金墉城下齊人壯
之擬其指擣奮戰之狀作此舞也一武士被赤甲戴面
具危冠舞蹈出旁十二人吹管擊鼓以應節手執鞭長
裾曳地盤辟作戰狀久之亦徐徐而退卽此知其國保
存古制之一端矣


日本維新而後學制更改而保存故籍所在都有黎蕪
齋所刊古逸叢書得入中土夫人而知之矣余至東京
所見帝國圖書館有宋本廣韻姓解卽黎氏景刊本也
又有唐人寫經卷數種館中閱覽室中國書最多有伏

案就鈔者二人一鈔古詩源一鈔曝書亭集也早稻田
大學書庫見唐寫禮記皇侃疏喪服小記卷子極精嘉
納治五郎之外舅竹添光鴻字漸卿號井井尤竺耆經
籍箸左氏會箋所藏宋元槧本有淳化三年校進本毛
詩正義卷首列李沆賈黃中張齊賢李昉等銜名紹興
九年紹興府雕造又唐卷子本漢書揚雄傳一卷自反
離騷以下至卷終止紙色如黃麻書體與唐寫經相似
同年陳蓉曙遁聲甲辰十二月朔夜夢與古今人合試
於保和殿論一策一賦一五言二十韻詩一忘其題須
臾榜發宋潛溪弟一吳草廬弟二蓉曙名列二十四余

名列四十八丙戌同年尙有天津徐菊人其名次不復
記憶元明以後名人多與其列余輩皆衣冠集于舊翰
林院宣詔謝恩如庶吉士授職禮畢頒賜蓉曙得賜金
余賜表裏聯騎而歸蓉曙有詩記異

辛丑夏五月西安寓齋患腹疾極委頓病愈兩次夢見
戴文節公一在橋邊恩恩相遇余問見夏穗卿否公曰
未見一在公室中着貂馬鞋也

辛丑三月十二夜夢至一處有大橋橋有垣門土題東
鏡塘橋四字過橋又至一處室極寬無人後乃見吳佩
葱在焉爲人檢拾滿地字紙



列仙傳

欽定四庫全書提要

列仙傳二卷舊本題漢劉向撰紀古來仙人自赤松子至元俗凡七十一人人係以讚篇末又爲總讚一首其體全仿列女傳陳振孫書錄解題謂不類西漢文字必非向撰黃伯思東觀餘論謂是書雖非向筆而事詳語約詞旨明潤疑東京人作今考是書隋志著錄則出於梁前又葛洪神仙傳序亦稱此書爲向作則晉時已有其本然漢志列劉向所序六十七篇但有新序說苑世說列女傳圖

頌無列仙傳之名又漢志所錄皆因七畧其總讚引孝經援神契爲漢志所不載涓子傳稱其琴心三篇有條理與漢志涓子十三篇不合老子傳稱作道德經上下二篇與漢志但稱老子亦不合均不應自相違異或魏晉間方士爲之託名於向耶振孫又云館閣書目作二卷七十二人李石續博物志亦云劉向傳列仙七十二人皆與此本小異惟葛洪神仙傳序稱七十一人此本上卷四十人下卷三十人內江斐二女應作二人與洪所記適

合檢李善文選註及唐初藝文類聚諸書所引文亦相符當爲舊本其篇末之讚今槩以爲向作隋志載列仙傳讚三卷劉向撰醜續孫綽讚案醜續一字蓋有續傳一卷故爲三卷也今無從校補姑仍舊文又列仙傳讚三卷劉向撰晉郭元祖讚此本二卷較孫綽所讚少一卷又劉義慶世說新語載孫綽作商邱子胥讚曰所收何物殆非真豬儻遇風雲爲我龍攄此本商邱子胥讚亦無此語然則此本之讚其郭元祖所撰歟以舊刻未列郭名疑以傳疑今亦姑闕焉

列仙傳序

列仙傳漢光祿大夫劉向所撰也初武帝好方士淮南王宏亦招賓客有枕中鴻寶之書先是安謀叛伏誅向父德爲武帝治淮南獄得其書向幼而讀之以爲奇及宣帝卽位修武帝故事向與王褒等以通博有俊才進侍左右向又見淮南鑄金之術上言黃金可成上使向與典尙方鑄金費多不驗下吏當死兄陽成侯安民乞入國戶半贖向罪上亦奇其材得減死論詔爲黃門侍郎講五經於石渠至成帝時向旣司典籍見上頗修神

仙事遂修上古以來及三代秦漢博採諸家言神仙事

○此序不知何人所作藏本脫去依御覽六百七十二增入

列仙傳目錄

卷上

赤松子

甯封子

馬師皇

赤將子輿

黃帝

偃佺

容成公

方回

老子

關令尹

涓子

呂尚

嘯父

師門

務光

仇生

彭祖

卬疏

介子推

馬丹

平常生

陸通

葛由

江妃二女

范蠡

琴高

寇先

王子喬

幼伯子

安期先生

桂父

瑕丘仲

酒客

任光

蕭史

祝雞翁

朱仲

修羊公

稷丘君

崔文子

卷下

赤須子

東方朔

鈎翼夫人

犢子

騎龍鳴

主柱

園客

鹿皮公

昌容

谿父

山圖

谷春

陰生

毛女

子英

服闋

文賓

商正子胥

子主

陶安公

赤斧

呼子先

負局先生

朱璜

黃阮正

女几

陵陽子明

邢子

木羽

玄俗

夕
介
傳

目
金

二

列仙傳卷上

漢 劉 向 撰

赤松子

赤松子者神農時雨師也服水玉以教神農能入火不

燒○原作自燒依文選游仙詩注御覽三十八又八百五改往往至崑崙山上常止

西王母石室中隨風雨上下炎帝少女追之亦得仙俱

去至高辛時復為雨師今之雨師本是焉

眇眇赤松 飄飄少女 接手翻飛 泠然雙舉

縱身長風 俄翼元圃 妙達冥坎 作範司雨

甯封子

甯封子者黃帝時人也世傳為黃帝陶正有神人過之

○原脫神字依初學記二十五藝文八

十御覽三百七十五又八百七十一補為其掌火○御覽八

百三十三無其字能出五色煙凡則以教封子封子積火自燒

○藝文八而隨煙氣上下視其灰燼猶有其骨時人共

十火作薪葬於甯北山中故謂之甯封子焉

奇矣封子 妙稟自然 爍質洪鑪 暢氣五煙

遺骨灰燼 寄墳甯山 人覩其跡 烏識其元

馬師皇

馬師皇

馬師皇者黃帝時馬醫也知馬形生死之診治之輒愈
後有龍下向之垂耳張口皇曰此龍有病知我能治乃
鍼其唇下口中以甘草湯飲之而愈後數數有人龍出
其波告而求治之一旦龍負皇而去

師皇典馬

廐無殘駟

精感羣龍

術兼殊類

靈虬報德

彌鱗銜轡

振躍天漢

粲有遺蔚

赤將子輿

赤將子輿者黃帝時人

御覽八百三十二有也字

不食五穀而噉
百草花至堯帝時爲木工能隨風雨上下時時於市中

賈繳亦謂之繳父云

蒸民粒食 孰享延祚 子輿拔俗 餐葩飲露

託身風雨 遙然矯步 雲中可遊 性命可度

黃帝

黃帝者號曰軒轅能劾百神朝而使之弱而能言聖而預知知物之紀自以爲雲師有龍形自擇亡日與羣臣辭至於卒還葬橋山崩柩空無尸唯劍舄在焉仙書云黃帝採首山之銅鑄鼎於荆山之下鼎成有龍垂胡鬚下迎帝乃升天羣臣百僚悉持龍鬚從帝而升攀帝

弓及龍髯拔而弓墜羣臣不得從仰望帝而悲號故後世以其處爲鼎湖名其弓爲烏號焉

神聖淵元 邈哉帝皇 整蒞萬物 冠名百王

化周六合 敷通無方 假葬橋山 超升昊蒼

偃佺

偃佺者槐山采藥父也好食松實形體生毛長數寸兩

目更方○御覽六百六十三目方瞳能飛行逐走馬以松子遺堯堯

不暇服也松者簡松也時人受服者皆至二三百歲焉

偃佺餌松 體逸眸方 足躡鸞鳳 走超騰驥

遺贈堯門 貽此神方 盡性可辭 中智宜將

容成公

容成公者自稱黃帝師見於周穆王能善補導之事取
精於玄牝其要谷神不死守生養氣者也髮白更黑齒
落更生。文選遊仙詩注辯命論注兩更字並作復事與老子同亦云老子
師也

壹壹容成 專氣致柔 得一在昔 含光獨游

道貫黃庭 伯揚仰儔 元牝之門 庶幾可求

方回

方回者堯時隱人也堯聘以爲閭士練食雲母亦與民

人有病者隱於五柞山中夏啟末御覽百八十四又六百八十三啟並作

桀爲宦士爲人所劫閉之室中從求道回化而得去更

以方回印封其戶印原誤掩依書鈔百三十一御時覽百八十四又六百八十三改

人言得回一丸泥塗門戶終不可開

方回願生 隱身五柞 咀嚙雲英 棲心隙漠

卻閉幽室 重關自廓 印改掩封 終焉不落

老子

老子姓李名耳字伯陽陳人也老子釋文有受學於容成句生於殷

時為周柱下史好養精氣貴接而不施。御覽六百二云貴无名接而

不轉為守藏史積八十餘年史記云二百餘年。文選征西官

屬詩注後之流沙莫知所終蓋百六十餘歲或言二百餘歲與今本大異老子釋文亦引西過流沙莫知所終

時稱為隱君子諡曰聃仲尼至周見老子知其聖人乃

師之後周德衰乃乘青牛車去入大秦過西關關令尹

喜待而迎之知真人也。御覽六百二為守藏吏積年乃知其真人也仲尼師之去入

大秦亦與今本不合乃強使著書作道德上下經二卷

老子無為 而無不為 道一生死 跡入靈奇

塞兌內鏡 冥神絕涯 德合元氣 壽同兩儀

關令尹

關令尹喜者周大夫也善內學常服精華隱德修行史

記老子傳集解作行仁

時人莫知老子西遊喜先見其炁知有真

人當過物色而避之

史記集解物色上有候字避作迹索隱以尋迹釋之則迹字不誤

果得老子老子亦知其奇為著書授之後與老子俱遊

流沙化胡

史記集解文選臨終詩注御覽九百八十九並作俱之流沙之西

服苜勝實

莫知其所終尹喜亦自著書九篇號曰關尹子

尹喜抱關

含德為務

挹漱日華

仰玩元度

候氣真人

介焉獨悟

俱濟流沙

同歸妙趣

涓子

涓子者齊人也好餌木接食其精至三百年乃見於齊

著天人經四十八篇

○文選琴賦注御覽六百七十一並作三十八篇

後鈞於

荷澤

○御覽九百三十六作河澤

得鯉魚腹中有符隱於宕山能致

風雨受伯陽九仙法

○文選早發定山詩注受作授

淮南王安

○王原誤山依

文選琴賦注御覽六百七十一改

少得其文不能解其旨也其琴心三

篇有條理焉

涓老餌木

享茲遐紀

九仙既傳

三才乃理

赤鯉投符

風雲是使

拊琴幽巖

高棲遐峙

呂尙

呂尙者冀州人也生而內智預見存亡避紂之亂隱於

遼東四十年西適周匿於南山釣於磻溪初學記二

藝文七十八御覽八百三十四並作卞溪三年不獲魚比閭皆曰可已矣尙

曰非爾所及也已而果得兵鈐於魚腹中藝文七十

三十六並作果得大文王夢得聖人間尙遂載而歸至

武王伐紂尙作陰謀百餘篇服澤芝地髓藝文七十

髓此脫且二百年而告亡有難而不葬後子伋葬之無

尸唯有玉鈐六篇在棺中云

呂尚隱釣 瑞得鱗鱗 通夢西伯 同乘入臣

沈謀絕世 芝體鍊身 遠代所稱 美哉天人

嘯父

嘯父者冀州人也少在曲周市上○曲周原誤西周依文選魏都賦注初學

記二十六改又御覽六百九十七作曲州補履數十年人不知也後奇其不

老好事者造求其術不能得也唯梁母得其作火法臨

上三亮上與梁母別列數十火而昇西邑多奉祀之

嘯父駐形 年衰不邁 梁母遇之 歷虛啟會

丹火翼輝 紫煙成蓋 眇企昇雲 抑絕華泰

師門

師門者嘯父弟子也亦能使火食桃李葩為夏孔甲龍

師孔甲不能順其意殺而埋之外野一旦風雨迎之訖

則山木皆焚

○文選魏都賦注作燔

孔甲祠而禱之未還而道死

○原脫未字依文選注補與御覽八十二又九百六十七合

師門使火

赫炎其勢

乃豢虬龍

潛靈隱惠

夏王虐之

神存質斃

風雨既降

肅爾高逝

務光

務光者夏時人也耳長七寸好琴服蒲韭根殷湯將伐

桀因光而謀光曰非吾事也湯曰孰可曰吾不知也湯曰伊尹何如曰強力忍詭吾不知其他湯既克桀以天下讓於光曰智者謀之武者遂之仁者居之古之道也吾子胡不遂之請相吾子光辭曰廢上非義也殺人非仁也人犯其難我享其利非廉也吾聞非義不受其祿無道之世不踐其位況於尊我我不忍久見也遂負石自沈于蓼水

○文選北山移文注作窾水

已而自匿後四百餘歲至

武丁時復見武丁欲以爲相不從武丁以輿迎而從逼不以禮遂投浮梁山後遊尚父山

務光自仁 服食養真 冥遊方外 獨步常均
武丁雖高 讓位不臣 負石自沈 虛無其身

仇生

仇生者不知何所人也當殷湯時爲木正三十餘年而
更壯皆知其奇人也咸共師奉之常食松脂書鈔百
六十作松
柏在尸鄉北山上自作石室至周武王幸其室而祀之

異哉仇生 靡究其向 治身事君 老而更壯
灼灼容顏 怡怡德量 武王祠之 北山之上

彭祖

彭祖者殷大夫也姓錢名铿帝顓頊之孫陸終氏之中

子愿夏至殷末八百餘歲○文選征西官屬詩注薛合論注作號年七百藝文六十

四御覽百七十四作號七百歲殷並作商常食桂芝善導引行氣愿陽有彭

祖仙室前世禱請風雨莫不輒應○御覽百八十作禱祠風雨應期而至

常有兩虎在祠左右祠訖地即有虎跡云後昇仙而去

遐哉碩仙 時惟彭祖 道與化新 綿綿愿古

隱淪元室 靈著風雨 二虎嘯時 莫我猜侮

叩疏

叩疏者周封史也○書鈔百六十史作吏能行氣練形煮石髓而

服之謂之石鍾乳至數百年往來入太室山

書鈔中無入字

有臥石牀枕焉

八珍促壽 五石延生 叩疏得之 鍊髓餌精

人以百年 行邁身輕 寢息中嶽 遊步仙庭

介子推

介子推者姓王名光晉人也隱而無名悅趙成子與遊

且有黃雀在門上晉公子重耳異之與出居外十餘年

勞苦不辭及還介山伯子常晨來呼推曰可去矣推辭

毋入山中從伯子常遊

御覽七百二後辭祿與母入介山從伯陽遊

後文公

造數千人以玉帛禮之不出後三十年見東海邊爲王
俗賣扇後數十年莫知所在

王光沈默 享年遐久 出翼霸君 處契元友

推祿讓勤 何求何取 遜隱介山 浪跡海右

馬丹

馬丹者晉耿之人也當文侯時爲六夫至獻公時復爲
幕府正獻公滅耿殺恭太子丹乃去至趙宣子時乘安
車入晉都候諸大夫靈公欲仕之逼不以禮有迅風發
屋丹入迴風中而去北方人尊而祠之

馬丹官晉 與時汗隆 事文去獻 顯沒不窮

密網將設 從禮迅風 杳然獨上 絕跡元宮

平常生

穀城鄉平常生者不知何所人也數死復生時人以爲不然後大水出所害非一而平輒在缺門山頭大呼言平常生在此云復水雨五日必止止則上山求祠之但

見平衣帔革帶後數十年復爲華陰門卒 ○書鈔七十

變姓名爲

吳市門卒

穀城妙匹 譎達奇逸 出生入死 不恒其質

元化志形

貴賤奚恤

暫降塵汗

終騰雲室

陸通

陸通者云楚狂接輿也好養生

御覽四
十養性

食橐盧木實

及蕪菁子遊諸名山在蜀峨眉山上世世見之歷數百

年去

接輿樂道

養性潛輝

見諷尼父

諭以鳳衰

納氣以和

存心以微

高步靈緜

長嘯峨眉

葛由

葛由者羌人也周成王時好刻木羊賣之一旦騎羊而

入西蜀蜀中王侯貴人追之。○藝文九十四貴作遣上綏山綏山

在峨眉山西南高無極也隨之者不復還皆得仙道山

上有桃。○此四字原脫依藝文九十四御覽九百二補正故里諺曰得綏山一

桃雖不得仙亦足以豪山下立祠數十處云

木可爲羊 羊亦可靈 靈在葛由 一致無經

爰陟崇綏 舒翼揚聲 知術者仙 得桃者榮

江妃二女

江妃二女者不知何所人也出遊於江漢之湄。○文選詠懷詩

注初學記六又二十六書鈔百二十八御覽六十六又六百九十二並無漢之二字湄作濱逢鄭交甫

見而悅之

○廣記五十九鄭交甫嘗遊漢江見二女皆麗服華裝佩兩明珠大如雞卵交甫見而悅

之御覽入百三鄭交甫將往楚道之漢臯臺下見二女佩兩珠大如荆雞卵據此則今本有脫文不知

其神人也謂其僕曰我欲下請其佩僕曰此間之人皆

習於辭不得恐懼悔焉交甫不聽遂下與之言曰二女

勞矣二女曰客子有勞妾何勞之有交甫曰摘是柚也

○廣記柚作橙下同我盛之以筥令附漢水將流而下我遵其傍

采其芝而茹之以知吾為不遜也。○廣記我遵其旁舉之知吾為不遜也餘

並無願請子之佩二女曰橘是柚也我盛之以筥令附漢

水將流而下我遵其旁采其芝而茹之遂手解佩與交

甫交甫悅受而懷之中當心趨去數十步視佩空懷無

佩廣記此佩字作珠顧二女忽然不見詩曰漢有遊女不可求

思言其以禮自防人莫敢犯況神仙之變化乎自詩曰

下並脫去坊本並作詩曰漢有遊女不可求思此之謂也今依廣記補正

靈妃艷逸 時見江湄 麗服微步 流盼生姿

交甫遇之 憑情言私 鳴佩虛擲 絕影焉追

范蠡

范蠡字少伯徐人也事周師太公望好服桂藝文八十九御覽

九百五十七 服並作食 飲水為越大夫佐勾踐破吳後乘輕舟入

海變名姓適齊為鳩夷子更後百餘年見於陶為陶朱

君財累億萬號陶朱公復棄之蘭陵賣藥後人世世識

見之○藝文無識字御覽作世人往往見之

范蠡御柱 心虛志遠 受業師望 載潛載惋

龍見越鄉 功遂身返 屣脫千金 與道舒卷

琴高

琴高者趙人也以善鼓琴為宋康王舍人○原脫善字依初學記十

一書鈔行涓彭之術浮遊冀州涿郡之間○原注涿一作楊按廣記

四御覽九百三 二百餘年後辭入涿水中○文選魏都賦注江賦注

十六並作涿

並作
取龍子與諸弟子期曰皆潔齋待於水傍設祠文
選魏都賦注及
廣記並有屋字
果乘赤鯉來出坐祠中日有萬人觀之
留一月餘復入水去

琴高晏晏 司樂宋宮 離世孤逸 浮沉涿中

出躍鱗鱗 入藻清冲 是任水解 其樂無窮

寇先○御覽千
作寇先生

寇先者宋人也以釣魚爲業居睢水旁百餘年得魚或
放或賣或自食之常着冠帶○御覽千
作寇先生好種荔枝食其葩實

焉宋景公問其道不告卽殺之後數十年○後字依
御覽補踞

宋城門上鼓琴

○上字依御覽補

數十日乃去

○御覽無十字

宋人家

家奉祀焉

寇先惜道

術不虛傳

景公戮之

尸解神遷

歷載五十

撫琴來旋

夷侯宋門

暢意五弦

王子喬

王子喬者周靈王太子晉也好吹笙作鳳鳴

○鳳下原
有鳳字依

初學記五藝文七書鈔百十御覽三十一又三十九又六百六十二剛正

遊伊洛之間道士

浮丘公接以上嵩高山三十餘年後求之於山上見桓

良曰告我家七月七日待我於緱氏山巔至時果乘白

鶴駐山頭望之不得到舉手謝時人數日而去後立祠
於緱氏山下及嵩高首焉。後原誤亦依廣記四改

妙哉王子 神遊氣爽 笙歌伊洛 擬音鳳響

浮江感應 接手俱上 揮策青崖 假翰獨往

幼伯子

幼伯子者周蘇氏客也冬常着單衣盛暑着襦袴形貌
歲異後數十年更壯時人莫知世世來誠祐蘇氏子孫
得其福力也

周客戢容 泯跡泥盤 夏服重纊 冬振輕紈

作不背本 義不獨安 乃眷周氏 祐其艱難

安期先生

安期先生者瑯琊阜鄉人也賣藥於東海邊時人皆言

千歲翁

○文選海賦注登江中孤嶼詩注江文通雜體註注並作自言千歲

秦始皇東遊

請見與語三日三夜賜金壁度數千萬出於阜鄉亭皆

置去留書以赤玉舄一量為報曰後千歲求我於蓬萊

山下

○千歲原作數年又脫下字依文選海賦注藝文七十八御覽三十八又四百七十八又六百七十

五補

始皇即遣使者徐市盧生等數百人入海未至蓬

萊山輒逢風波而還立祠阜鄉亭海邊十數處云

寥寥安期 虛質高濤 乘光適性 保氣延生

聊悟秦始 遺寶阜亭 將遊蓬萊 絕影清冷

桂父

桂父者象林人也色黑而時白時黃時赤南海人見而
尊事之常服桂及葵。此二字藝文八十九作皮葉以
文選吳都賦注亦云常服桂葉以
龜腦和之干九十斤桂累世見之今荊州之南尚有桂

丸焉

偉哉桂父 挺直遐畿 靈葵內潤 丹桂外綏

怡怡柔顏 代代同燦 道播東南 奕世莫違

瑕正仲

瑕正仲者甯人也賣藥於甯百餘年人以爲壽矣。御覽九

百八十四 有後字 地動舍壞仲及里中數十家屋臨水皆敗仲

死民人取仲尸棄水中收其藥賣之仲披裘而從詣之
取藥棄仲者懼叩頭求哀仲曰恨汝使人知我耳吾去
矣後爲夫餘胡王驛使復來至甯北方謂之謫仙人焉

瑕正通元 謫脫其跡 人死亦死 泛焉言惜

遊步觀化 豈勞胡驛 苟不觀本 誰知其謫

酒客

酒客者梁市上酒家人也作酒常美而售日得萬錢有過而逐之主人酒常酢敗窮貧。御覽八百二十八梁酒更酸敗遂至貧窮梁市中賈人多以女妻而迎之或去或來後百餘歲來爲梁丞使民益種芋菜曰三年當大饑卒如其言梁民不死五年解印綬去莫知其終焉

酒客蕭綽 寄沽梁肆 何以標異 醇醴殊味

屈身佐時 民用不匱 解紱晨征 莫知所萃

任光

任光者上蔡人也善餌丹賣於都市里間積八十九年

乃知是故時任光也皆說如數十歲面顏復長者識之
趙簡子聘與俱歸常在柏梯山上三世不知所在晉人
常服其丹也

上蔡任光 能鍊神丹 年涉期頤 擘爾朱顏

項適趙子 縱任所安 升軌柏梯 高飛雲端

蕭史

蕭史者秦穆公時人也善吹簫能致孔雀白鶴於庭

文七十八御覽百

七十八鶴並作鶻

穆公有女字弄玉好之公遂以女妻

焉日教弄玉作鳳鳴居數年吹似鳳聲

○初學記十藝文九十御覽九

百十五並云
吹簫作鳳聲
鳳凰來止其屋公為作鳳臺夫婦止其上

不下數年一旦皆隨鳳凰飛去故秦人為作鳳女祠於

雍宮中時有簫聲焉
○焉字原作而已二字依御覽百七十八改又藝文四十四又七十

入時並作世初學記十六御覽五百八十一並作代

蕭史妙吹 鳳雀舞庭 羸氏好合 乃習鳳聲

遂攀鳳翼 參翥高冥 女祠寄想 遺音載清

祝雞翁

祝雞翁者洛人也

○御覽八百三十六又九百十八洛下並有陽字

居戶鄉北

山下養雞百餘年雞有千餘頭皆立名字暮棲樹上廣

記四百六十一作樹下書放散之欲取原作引依廣記御覽改呼名即依呼

而至藝文九十一依呼作種別賣雞及子得千餘萬輒置錢去之

吳作養魚池後升吳山白鶴孔雀數百廣記雞雀數百常止

其傍云

人禽雖殊 道固相關 祝翁傍通 牧雞寄驩

育鱗道洽 棲雞樹端 物之致化 施而不刊

朱仲

朱仲者會稽人也常於會稽市上販珠高后時下書募三寸珠仲讀購書笑曰直值汝矣齋三寸珠詣闕上之

○原誤書依御覽百
五十四又八百三改
珠好過度卽賜五百金魯元公主
復私以七白金從仲求珠仲獻四寸珠送至於闕卽去
下書會稽徵聘不知所在景帝時復來獻三寸珠數十
枚輒去不知所之云

朱仲無欲 聊寄賈商 俯窺驪龍 捫此夜光

發跡會稽 曜奇咸陽 施而不德 歷世彌彰

脩羊公

脩羊公者魏人也在華陰山上石室中

○藝文七御覽三十九又七百

六又九百八十九在
並作止又中字重
有懸石榻臥其上石盡穿陷略不

食時取黃精食之後以道干景帝帝禮之使止王邸中
 數歲道不可得有詔問脩羊公能何日發語未訖牀上
 化為白羊題其脇書鈔百六十作背曰脩羊公謝天子後置石
 羊於靈臺上羊後復去不知所在

卓矣脩羊 韜奇含靈 枕石大華 餐茹黃精

漢禮雖隆 道非所輕 應變多質 忽爾隱形

稷丘君

稷丘君者太山下道士也武帝時以道術受賞賜髮白
 再黑齒落更生後罷去上東巡太山稷丘君乃冠章甫

衣黃衣擁琴來迎拜武帝曰

藏本曰字誤作指帝二字坊本又脫武下帝字依

御覽三十九又

陛下勿上也上必傷足上必欲上

四字此

原脫又衍指字並依御覽剛補

及上數里

上字依御覽補

右足指果折上諱

之故但祠而還為稷邱君立祠焉為稷承奉之云

稷邱洞徹

修道靈山

鍊形濯質

變白還年

漢武行幸

攜琴來延

戒以升陟

逆觀未然

崔文子

崔文子者太山人也文子世好黃老術潛居山下

術原誤

事又潛居二字倒並依初學記五改

後作黃散赤丸成石父祠賣藥都市

自言二百歲後有疫氣民死者萬計長吏之文所請救
文擁朱幡聚黃散以徇人門飲散者卽愈所活者萬計
後去在蜀賣黃散故世寶崔文赤丸黃散實近於神焉

崔子得道 術兼秘奧 氣癘降喪 仁心攸悼

朱幡電麾 神藥捷到 一時獲全 永世作效

列仙傳卷下

赤須子

赤須子豐人也豐中傳世見之云秦穆公時主魚吏也
數道豐界災害水旱十不失一臣下歸向迎而師之從

受業問所長好食松實

○文選東京賦注藝文八十八
御覽九百五十四並作柏實

天門冬石脂齒落更生髮墮再出

○藝文八十一及文
選注並作細髮復出

服霞絕穀

○此字依
文選注補

後遂去

○文選注有之字初
記二十三有止字

吳山

下十餘年莫知所之

赤須去豐

爰憩吳山

三葉並御

朽貌再鮮

空往師之 而無使延 顧問小智 豈識巨年

東方朔

東方朔者平原厭次人也

○文選會吟行注初學記七藝文一並作楚人

久在

吳中為書師數十年武帝時上書說便宜拜為郎至昭

帝時時人或謂聖人或謂凡人作深淺顯默之行或忠

言或戲語莫知其旨至宣帝初棄郎以避亂世

○文選注棄郎

去以避亂政

置幘官舍風飄之而去後見於會稽賣藥五湖

智者疑其歲星精也

東方奇達 混同時俗 一龍一蛇 豈豫榮辱

高韻冲霄 不羈不束 沈跡五湖 騰影暘谷

鈎翼夫人

鈎翼夫人者齊人也姓趙少時好清淨病臥六年右手

拳屈飲食少

○廣記五十九有漢武帝時四字

望氣者云東北有貴人

氣推而得之召到姿色甚偉武帝披其手

○御覽三百五十四披作

發與廣記合

得一玉鈎而手尋展

○藝文六十二手尋下不拳御覽作手亦舒

遂

幸而生昭帝後武帝害之殯尸不冷而香

○御覽百四十四又三百

五十四冷

一月間

○廣記無間字御覽百四十四作數月亦無間字

後昭帝即

位更葬之棺內但有絲履

○廣記御覽內並作空

故名其宮曰鈎

翼後避諱改爲弋廟闈有神祠閣在焉

婉婉弱媛 廟符授鉤 誕育嘉嗣 皇祚惟休

武之不達 背德致仇 委身受戮 尸滅芳流

犢子

犢子者鄴人也少在黑山採松子茯苓餌而服之且數百年時壯時老時好時醜時人乃知其仙人也常過酤

酒陽都家陽都女者市中酤酒家女眉生而連○文選魏都賦

注御覽三百六十五又耳細而長衆以爲異皆言此天

九百眉字並在連下 人也會犢子牽一黃犢來過都女悅之遂留相奉侍都

女隨犢子出取桃李一宿而返皆連塊甘美邑中隨伺

逐之出門其牽犢耳而走人不能追也且還復在市中

數十年乃去見潘山下冬賣桃李云御覽九百六十七見下有在字

犢子山棲 採松餌苓 妙氣充內 變白易形

陽氏奇表 數合理冥 乃控靈犢 倏若電征

騎龍鳴御覽九百二十九鳴作鴻

騎龍鳴者渾亭人也年二十於池中求得龍子狀如守

宮者十餘頭養食結草廬而守之龍長大稍稍而去御

覽無而字後五十餘年水壞其廬而去一旦騎龍來渾亭下

語云吾馮伯昌孫也

○吾字依御覽補

此間人不去五百里必

當死

○御覽作百里皆當死

信者皆去不信者以為妖言

○此字依御覽

補至八月果水至死者萬計

騎鳴養龍

結廬虛池

專至俟化

乘雲驂螭

紆轡故鄉

告以速移

洞鏡災祥

情眷不離

主柱

主柱者不知何所人也與道士共上宕山言此有丹砂

可得數萬斤

○書鈔百五十九無得字

宕山長吏知而上山封之砂

流出飛如火乃聽柱取為邑令章君明餌砂三年得神

砂飛雪服之五年能飛行遂與柱俱去云

主柱同窺 道士精徹 元感通山 丹砂出穴

熒燄流丹 飄飄飛雪 岩長悟之 終然同悅

園客

園客者齊陰人也姿貌好而性良邑人多以女妻之容

終不取常種五色香草積數十年食其實一旦有五色

蛾○文選琴賦注止其香樹末○初學記二客收而薦

之以布生桑蠶焉至蠶時有好女夜至自稱客妻○文

云自稱我道蠶狀客與俱收蠶○文選注初學記御覽

與君作妻○文選注初學記御覽

得百二十頭蠶皆如甕大
○初學記御覽並作繭大如盆
繅一蠶六十日始盡訖則俱去莫知所在故濟陰人世祠桑蠶設祠室焉或云陳留濟陽氏

美哉園客 顏暉朝華 仰吸元精 俯捋五葩

馥馥芳卉 采采文蛾 淑女宵降 配德升遐

鹿皮公

鹿皮公者淄川人也少爲府小吏木工舉手能成器械岑山上有神泉人不能至也小吏白府君請木工斤斧三十人作轉輪懸閣意思橫生數十日梯道四間成上

其巖作祠舍留止其旁絕其二間以自固食芝草飲神
泉且七十年淄水來三下呼宗族家室得六十餘人令
上山半水盡漂一郡沒者萬計小吏乃辭遣宗家令下
山着鹿皮衣遂去復上閣後百餘年下賣藥於市

皮公典思 妙巧纏綿 飛閣懸趣 上挹神泉

肅肅清廟 悒悒二間 可以閒處 可以永年

昌容

昌容者常山道人也自稱殷王子

○文選魏都賦注初學記五御覽九百九

十六子並作女食蓬萊根往來上下見之者二百餘年而顏色

如二十許人能致紫草賣與染家得錢以遺孤寡歷世
而然奉祠者萬計

殷女忘榮 曾無遺戀 怡我柔顏 改華標蓓

心與化遷 日與氣鍊 坐臥奇貨 惠及孤賤

谿父

谿父者南郡鄘人也居山間有仙人常止其家從買瓜

教之鍊瓜子與桂附子苳實○御覽九百七十
八作附子桂實共藏而

對分食之二十餘年能飛走昇山入水○御覽有往後
來海邊四字

百餘年居絕山頂呼谿下父老與道平生時事云

谿父何欲 欲在幽谷 下臨清澗 上翳委葍

仙客舍之 導以秘籙 形跡埃壒 心在舊俗

山圖

山圖者隴西人也少好乘馬馬蹋之折腳山中道人教

令服地黃當歸羌活獨活苦參散。初學記二十三無散字苦參作元參

服之一歲而不嗜食病愈身輕追道人問之自言五嶽使之名山採藥能隨吾使汝不死山圖追隨之六十餘年一旦歸來行母服於家間暮年復去莫知所之

山圖抱患 因毀致全 受氣使身 藥輕命延

寫哀墳柏 天愛猶纏 數周高舉 永絕俗緣

谷春

谷春者機陽人也成帝時爲郎病死而屍不冷家發喪行服猶不敢下釘三年更著冠幘坐縣門上邑中人大驚家人迎之不肯隨歸發棺有衣無屍留門上三宿去之長安止橫門上人知追迎之復去之太白山立祠於山上時來至其祠中止宿焉

谷春旣死 停屍猶溫 棺闔五稔 端委於門

願視空樞 形逝衣存 留軌太白 納氣元根

陰生

陰生者長安中渭橋下乞兒也常止於市中乞市人厭苦以糞灑之旋復在里中衣不見汚如故長吏知之械收繫著桎梏而續在市中乞叉械欲殺之乃去灑者之家室自壞殺十餘人故長安中謠曰見乞兒與美酒以免破屋之咎。御覽八百二十七星作家

陰生乞兒

人厭其黷

識真者稀

累見囚辱

淮陰忘吝

況我仙屬

惡肆殃及

自災其屋

毛女

毛女者字玉姜在華陰山中獵師世世見之形體生毛
 自言秦始皇宮人也秦壞流亡入山避難遇道士谷春
 教食松葉遂不饑寒身輕如飛百七十餘年
 西漢時已百七十餘年矣所止巖中有鼓琴聲云
 ○廣記五十九云至

婉變玉姜 與時遁逸 真人授方 餐松秀實

因敗獲成 延命深吉 得意巖岫 寄歡琴瑟

子英

子英者舒鄉人也善入水捕魚得赤鯉愛其色好持歸
 著池中數以米穀食之一年長丈餘遂生角有翅翼子

英怪異拜謝之魚言我來迎汝汝上背御覽九百三十六作汝上我

背與汝俱昇天即大雨子英上其魚背騰昇而去歲歲

來歸故舍食飲見妻子魚復來迎之如此七十年御覽作

七年故吳中門戶皆作神魚遂立子英祠云

子英樂水 游捕為職 靈鱗來赴 有焯厥色

養之長之 挺角傳翼 遂駕雲蟠 超步太極

服閭

服閭者不知何所人也常止莒往來海邊諸祠中有三
仙人於祠中博賭瓜顧閭令擔黃白瓜數十頭教令膜

目及覺乃在方丈山在蓬萊山南後往來莒取方丈山上珍寶珠玉賣之久久一旦髡頭著赭衣貌更老人問之言坐取廟中物云後數年貌更壯好鬚髮如往日時矣

服間游祠 三仙是使 假寐須臾 忽超千里

納寶毀形 未足多恥 攀龍附鳳 逍遙終始

文賓

文賓者太丘鄉人也賣草履爲業數取姬數十年輒棄之後時故姬壽老年九十餘續見賓年更壯他時姬拜

賓涕泣賓謝曰不宜至正月朝儻能會鄉亭西社中邪
姬老夜從兒孫行十餘里坐社中待之須臾賓到大驚
汝好道邪知汝爾前不去汝也教令服菊花地膚桑上
寄生松子取以益氣姬亦更壯復百餘年見云

文賓養生 納氣元虛 松菊代御 鍊質鮮膚

故妻好道 拜泣踟躕 引過告術 延齡百餘

商丘子胥

商丘子胥者高邑人也好牧豕吹竽年七十不娶婦而
不老邑人多奇之從受道問其要言但食木蓴蒲根飲

水不饑不老如此傳世見之三百餘年貴戚富室聞之
取而服之不能終歲輒止憶慢矣謂將復有匿術也

商正幽棲 韞積妙術 渴飲寒泉 飢茹蒲朮

吹竽牧豕 卓犖奇出 道足無求 樂茲永日

子主

子主者楚語而細音不知何所人也詣江都王自言甯

先生雇我作客三百年 ○御覽五百七十
七作一百餘年 不得作直以

為狂人也問先生所在云在龍眉山上王遣吏將上龍

眉山巔見甯先生毛身廣耳被髮鼓琴主見之叩頭吏

致王命先生曰此主吾比舍九世孫且念汝家富有暴
死女子三人勿預吾事語竟大風發吏走下山比歸宮
中相殺三人王遣三牲立祠焉

子主挺年 理有所資 甯主祠秀 拊琴龍眉

以道相符 當與訟微 匡事竭力 問昭我師

陶安公

陶安公者六安鑄冶師也數行火火一旦散上

○原有行字依

初學記四藝文七十八又八十御覽八百三十三又入
百六十八又九百二十九刪正又御覽三十一云一朝
火散紫色衝天安公伏冶下求哀須臾朱雀止冶上曰
冶上

安公安公冷與天通七月七日迎汝以赤龍至期赤龍

到大雨而安公騎之東南上御覽八百三十三有天宇一城邑數

萬人衆共送視之御覽三十一云邑中數萬人預共送之皆與辭決云

安公縱火 紫炎洞熙 翩翩朱雀 銜信告時

奕奕朱虬 婉然赴期 傾城仰觀 迴首顧辭

赤斧

赤斧者巴戎人也為碧雞祠主簿能作水瀕鍊丹與消

石文選蜀都賦注丹下有砂字服之三十年反如童子毛髮生皆赤

御覽九百八十八無生字後數十年上華山取馬餘糧餌賣之於

蒼梧湘江間累世傳見之手中常有赤斧焉○原作手

斧焉依御覽七百六十三改又九百八十八常作長

赤斧頤眞 發秀戎巴 寓跡神祠 頌鍊丹砂

髮雖朱黠 顏暉丹葩 采藥靈山 觀化南遐

呼子先

呼子先者漢中關下卜師也老壽百餘歲○藝文七御覽三十九並

無老字臨去呼酒家老嫗曰急裝當與嫗共應中陵王夜

有仙人持二茅狗○文選遊沈道士館詩注云有異人持二竹竿來至呼子先

子先持一與酒家嫗得而騎之○藝文作因各騎之乃龍也上華

陰山○初學記常於山上大呼言子先酒家毋在此云

三靈潛感 應若符契 方駕茅狗 蜿爾龍逝

參登大華 自稱應世 事君不端 會之有惠

負局先生

負局先生者不知何許人也語似燕代間人常負磨鏡

局狗吳市中街磨鏡得一錢因磨之○得字依藝文八十一補輒問

主人得無有疾苦者有輒出紫丸藥以與之○有字依藝文七十

八御覽九百八十四補又藝文紫丸下有赤字得者莫不愈如此數十年後大

疫病家至戶到與藥活者萬計不取一錢吳人乃知其

真人也後上吳山絕崖頭

○上原誤主依御覽三十八又五十九又九百八十四改

又藝文引作止

懸藥下與人將欲去時語下人曰吾還蓬萊山

為汝曹下神水崖頭一旦有水白色流從石間來下○

文七十八御覽五十九又九百八十四並無流字

服之多愈疾立祠十餘處

負局神端

披褐含秀

術兼和鵲

心記宇宙

引彼萊泉

灌此絕岫

欲返蓬山

以齊天壽

朱璜

朱璜者廣陵人也少病毒瘕就睢山上道士阮正正憐

之言卿除腹中三屍有真人之業可度教也璜曰病愈

當爲君作客三十年不敢自還正與璜七物藥日服九
九百日病下如肝脾者數斗養之數十日肥健心意日
更開朗與老君黃庭經今日讀三過通之能思其意正
遂與璜俱入浮陽山玉女祠且八十年復見故處白髮
盡黑鬢更長三尺餘過家食止數年復去如此至武帝
末故在焉

朱璜寢瘕 福祚相迎 真人投藥 三屍俱靈

心虛神瑩 騰贊幽冥 毛頰髮黑 超然長生

黃阮正

黃阮正者睢山上道士也衣裘被髮耳長七寸口中無齒日行四百里於山上種葱薤百餘年人不知也時下賣藥朱瓚發明之乃知其神人也地動山崩道絕預戒下人世共奉祠之

葱藟巖嶺

實棲若人

被裘散髮

輕步絕倫

含道養生

妙觀通神

發驗朱瓚

告徧下民

女几

○原作丸依御覽
八百二十八改

女几者陳留市上沽酒婦人也

○留字依御覽補

作酒常美遇

仙人過其家飲酒以素書五卷爲質几開視其書乃養

性交接之術凡私寫其文要更設房室納諸年少飲美

酒與止宿行文書之法如此三十年顏色更好○此字依御覽

補如二十時仙人數歲復來過笑謂凡曰盜道無師原

誤私依御覽改有翅不飛遂棄家追仙人去莫知所之云

元素有要 近取諸身 彭聃得之 五卷以陳

女几蘊妙 仙客來臻 傾書開引 雙飛絕塵

陵陽子明

陵陽子明者銜鄉人也好釣魚於旋溪○文選遊仙詩注作延溪又初

學記二十三魚作鈞鈞得白龍子明懼解鈞拜而放之後得白魚

○御覽八百三十四又九百二十九又
九百三十六後下並有數十年三字 腹中有書教子

明服食之法子明遂上黃山采五石脂沸水而服之○御

覽八百三十四又九百三年 ○御覽四十
二十九沸水並作石肺 六年作五年 白龍來迎原

脫白字依初學記二十二藝文九十八
御覽八百三十四又九百二十九補 去止陵陽山上

百餘年山去地千餘丈大呼下人令上山半告言谿中

子安當來問子明釣車在否後二十餘年子安死人取

葬石山下有黃鶴來棲其塚邊樹上鳴呼子安云○御
覽九

百十六聲
呼安安

陵陽垂釣 白龍銜鉤 終獲瑞魚 靈迹是修

五石漑水 騰山乘虬 子安果沒 鳴鶴何求

邢子

邢子者自言蜀人也好放犬子時有犬走入山穴邢子

隨入十餘宿行度數百里上出山頭上有臺殿宮府

鈔百五十八作殿屋居府青松樹森然仙吏侍衛甚嚴見故婦主洗

魚與邢子符一函并藥便使還與成都令喬君喬君發

函有魚子也著池中養之一年皆為龍形復送符還山

上大色更赤有長翰常隨邢子往來百餘年遂留止山

上時下來護其宗族蜀人立祠於穴口常有鼓吹傳呼

聲西南數千里其奉祠焉

邗子尋犬 宕入仙穴 館閣峩峩 青松列列

受符傳藥 往來交結 遂樓靈岑 音響昭徹

木羽

木羽者鉅鹿南和平鄉人也母貧賤主助產嘗探產婦

兒生便開目視母大笑其母大怖○文選魏都賦注兒生自下喙母母大怖

夜夢見大冠赤幘者守兒言此司命君也○文選注司命上有兒字

御覽九百二十五作郎當報汝恩使汝子木羽得仙母陰信識之

○御覽無信字 毋後生兒字之為木羽所探兒至年十五○至原誤

生依選注
御覽改

夜有車馬來迎去

選注御覽並作之

遂過母家呼木

羽木羽為我御來遂俱去後二十餘年鸛雀且銜二尺

魚著毋尸上毋匿不道而賣其魚三十年乃沒去毋至

百年乃終

御覽云四十餘年毋乃終

司命挺靈 產母震驚 乃要報子 契定未成

道足三五 輕駟宵迎 終然報德 久乃遐齡

立俗

立俗者自言河間人也餌巴豆雲母此二字原脫依御覽七百四十三

又九百三十三補又文選魏都賦注御覽九百九十三並作雲英賣藥都市初學記二十四御

覽七百四十三賣
藥下並有於字
七九一錢治百病河間王病瘦買藥

服之下蛇十餘頭問藥意俗云王痕乃六世餘殃下墮
卽非王所招也王常放乳鹿麟母也仁心感天故當遭
俗耳王家老舍人自言父世見俗俗形無影王乃呼俗
日中看實無影王欲以女配之俗夜亡去後人見於常
山下

質虛影滅 時惟立俗 布德神丸 乃寄鹿牘

道發河間 親寵方渥 騰龍不制 超然絕足

讚曰易稱太極是主兩儀兩儀生然後有人民有人民

然後有生死之義著明矣蓋萬物施張渾爾而就亦無所不備焉神矣妙矣精矣微矣其事不可得一論也聖人仰則觀象於天俯則觀法於地日月運行四時分治五星受制於太微監無道之國吉凶預見以戒王者動靜言語應効相通有自來矣夫然雖不言其變化云爲不可謂之無也周書序桑矯問涓子曰有死亡而復云有神仙者事兩成邪涓子曰言固可兩有耳孝經援神契言不過天地造靈洞虛猶立五嶽設三台陽精主外陰精主內精氣上下經緯人物道治非一若夫

草木皆春生秋落必矣而木有松柏檀檀之倫百八十
餘種草有芝英萍實靈沼黃精白符竹嬰戒火長生不
死者萬數盛冬之時經霜歷雪蔚而不彫見斯其類也
何怪於有僊邪余嘗得秦大夫阮倉撰仙圖自六代迄
今有七百餘人始皇好遊仙之事庶幾有獲故方士霧
集祈祀彌布殆必因迹託虛寄空爲實不可信用也若
周公黃錄記太白下爲王公然歲星變爲甯壽公等所
見非一家聖人所以不開其事者以其無常然雖有時
著蓋道不可棄距而閉之尙貞正也而論語云怪力亂

方介

卷二

三

神其微旨可知矣

列仙傳卷下終

列仙傳跋

世說文學篇注引劉向列仙傳云歷觀百家之中以相
檢驗得仙者百四十六人其七十四人已在佛經故撰
得七十可以多聞博識者遐觀焉今列仙傳無此文必
後人以劉向時未有佛經而刪之然開元釋教錄載舊
經錄一卷稱爲劉向校書天祿閣所見則唐以前有此
說不足異也百四十六除七十四尙有七十二人蓋世
說注脫二字內江妃二女共爲一條故李石續博物志
稱七十二人而葛洪神仙傳序則云七十一人其說似

異實同今本七十一人爲七十條視原本逸其一遍檢諸書若史記注六十三之引老萊子初學記五之引馬明生御覽二十八之引西王母廣記七十六之引趙廓並不見於今本類書展轉援引未知何者爲劉向原文若盡取之則人數又過多卽世說注所引雖似總贊中語亦不詳其連屬何文故今之校刊概不增入寧遺毋濫冀以存古籍之真焉傳後有贊文頗古雅俗刻刪去惟道藏本有之今據藏本爲主而以諸書所引校其異同覆閱之下差爲詳審爰付之梓以廣其傳云金山錢

熙祚錫之甫識

乃在傳

出

二

成都氏族譜

元 費 著撰

前記並載人物不載氏族自今記晉常璩嘗記蜀大姓成都
有柳杜張趙郭楊朱郫有何羅郭繁有張新都有楊董汝鄭
其它不一著列皆可槩見是數十姓果大曾不記人物豈喬
木之謂乎司馬文園遺稿僅得之妻揚墨池有子曰烏能與
玄文裁九齡天然則人物有其傳尤可重矣記今自人物外
載氏族不徒以補前之缺亦以表宋朝以來世系之盛凡次
第以起家後先而見之今者書其名不書其事皆口也

吳氏

吳氏入蜀以唐左武衛兵曹參軍爲始祖四世孫蕞僞蜀時

最顯至衮六世矣仕宋朝至太子舍人贈都官員外郎七世孫
季良弟端拱二年進士至都官郎中贈中大夫九世諸孫師
孟第進士官至左朝議大夫門望始大王公安石當國謂師
孟同年生也自鳳州別駕擢爲梓州路提舉常平倉兼農田
水利差役事師孟疏力言法不便寧罷歸故官後知蜀州又
論茶法害民繼謝事去蘇文忠公軾刺新法書有曰吳某乞
免提舉如逃垢穢至言茶病民以矯矯六君子稱之師孟其
一也子縝以世科官至左朝議大夫知邛蜀洋萬四州子景
知漢州官至朝散大夫景之子璘如遷蜀州今崇慶府惟師
孟從兄弟師益三世猶居成都其嘗應賢良科科廢老死布
衣族最舊子孫亦蕃十世皆葬成都繪於寶歷寺之水陸凡

數十人今錄其槩

范氏

范氏自杜温叔奔晉四世食采於范遂爲氏世遠譜落唐相履冰下十有一世曰隆廣以間入蜀家成都孫紹温處唐季歷王孟僞蜀雖不仕三世一能自立爲著姓子曰昌佑有令德二子曰球曰璨球贈太保公也太保生二子曰度曰祥度贈太師公也太師生三子長曰鏊以進士甲科終隴城令次曰錯終衛尉丞贈太尉季曰鎮是爲蜀忠文公子孫曾三世登科曰百揆曰祖漳曰墳墳官至左中大夫歷使蜀移使荆湖北路卒太尉有子曰百祿位至中書侍郎贈榮國公榮公有從子曰祖禹位至翰林學士兼侍講有從孫曰冲位至翰

林學士曰溫位至明堂班朔郎有曾孫曰仲芑故爲右諫議大夫曰仲藝今爲中書舍人曰黼前爲著作郎兼禮部郎中皆世其官曰仲較曰仲綸曰仲芸以辭章世其門不克顯元孫曰子長曰子垓又世其科子長今爲飛鳥宰被命召榮公兄曰百之不但有如祖禹孫如中如溫而諸孫曰洄諸曾孫曰仲圭仲受仲循仲徽仲南各以文學行義政事名四世諸孫暮故國子監丞孫嘗位於朝今知邛州榮公之仲兄曰百朋有子曰祖睿諸孫曰游諸曾孫曰仲愷仲侃獨不第三子後先登科曰子修子奕子庚典州除節矣翁無恙稠人中莫覺有貴子賢德蓋相襲也蜀父子兄弟登科至聯四世諸子登科世又掌絲綸人共推范氏論其世德皆有傳太抵其積

也遠其施也博其傳也不已凡范氏父兄子弟名位雖不盡
皆通顯而施爲率從厚爲部刺史爲郡守相門第蓋相望三
歲一舉中選者多記不勝書至以賞以恩以封以贈又略焉
宅族什如其二三號曰盛至范氏則人人以爲當然實自太
保以下而太保之弟璨四世孫寥寥徽宗時有功避不以自
名官猶至右武大夫寥從孫仲壬武舉中第裁八年出知金
州今爲利路鈐轄按譜璨尙俠氣鄉里敬服故其後又以武
聞云

郭氏

郭氏自及爲廣都令家焉其自敘系出子儀子儀六世孫甫
爲御史中丞從僖宗幸蜀及其弟也故中丞死因以葬廣都

石子山及三孫曰全介鈐全之孫震以詩名號漁舟先生李
旼序其詩澤化四年先生詣闕上書言蜀將有變未幾順賊
作亂先生留中原不歸無子皆旼云鈐諸孫早著鈐生貞時
孟氏納上朝廷謂四州豪右可任郡檄補貞吏貞稱疾不就
子仁渥當順賊亂率鄉黨保別墅獲免均賊繼起道遇害贈
職方外郎二子軫輔軫子子定子安皆以賞以恩得官孫衢
亨登崇寧上第終宣教郎曾孫南義以詩名死布衣輔起家
登天聖乙科范公仲淹龐公籍韓公琦皆表其丰器可任自
鳳州擢知興元平均金房叛卒有功璽書褒美繼二持節後
以梓州轉運使皇祐二年平涪井夷死賞延三子中子子皋
最知名子皋知大邑均三邑灌漑人號爲平歷知昌劍利三

州子瑠瑜皆以賞得官瑜獨顯嘗提學京東後知懷州諸子曰眉壽曰暘諸孫曰儻曰偉曰俟曰億曰傑眉壽俟億皆登第餘以世賞或以舉恩惟傑在介諸孫麟輯輕軾麟生由儀登慶歷第終南浦令由儀生忱登元豐第以博學名通判棊州年五十會蔡京用事忽忽不樂丐祠遂老生時敏終通直郎時敏生晞嘗爲大金留豫司幹辦公事受金人所歸疆進二秩佐劉公錡爲東京留守司幹辦公事順昌之捷不肯上功當時躉之從子屋傳皆登第屋終通直郎傳今從事郎子堪均皆世賞堪終通直郎均今從事郎輯曾孫綱輕三世諸孫畋國寶惟肖僅疇四世諸孫樗年震相畋國寶震相登第餘以舉恩或以賞銓又有七世孫漸九世孫光選皆登第叔

宜今迪功郎光選今丞議郎爰自廣都散居雙流獨成都爲
多

李氏

李氏唐胄也太宗四子少卽曹王王五子少卽武衛大將軍
德武氏擅政偃入蜀來眉丹稜伏民間五世孫瑜明皇西幸
時抗表言狀得通屬籍尋拜長江令卒官歸葬丹稜瑜四世
曰遠遠二世曰同爲始建令葬口縣同生全始居華陽又三
世曰惟吉惟吉三子曰莊曰允曰毅莊以學行名毅以科第
顯又一世盛矣莊子大厚博學工文辭從兄天章公大臨自
謂不如大厚及長子陞同登第後三年子降亦登第陞五典州
號循吏降行義克著范公鎮薦之朝爲金郎郎中宣和間提

學秦鳳路列郡刺史拜宣撫使童貫降獨長揖曰我師儒官也遂丐祠去力致其仕陪太厚季子也有子時亮伯父陞欲官之辭治命又以遺長官之章已上會陞子從政郎時任卒時亮亟追還以與時任之子識後時亮二子登第三子以恩得官諸孫一以舉恩得官一登第去允子大臨第進士宋朝仕至天章閣待制事在國史知制誥時繳李定辭頭其一也子陶隲陶從司馬公光于洛當時大老皆喜之在錢塘蘇公軾送之詩忠文文正二大老蘇李廣平三舍人喜見通家賢子弟因言得邑少風塵其趣遠矣隲通達明敏吏事有能名尤工於書子時雍時敏皆世其學時雍口廟稱之弟兄多顯者賞延凡二世毅嘉祐二年進士李氏初起家者仕至殿中

丞子大昕大昕生公濟公濟生謨謨生崧凡四世登科大昕
學行謨能文章謨以下從導江派盛時仕者不能悉書此其
槩也曰頊者亦出自遠與同並世孫丞璨三世孫謹修謹交
謹微謹思能登進士第謹修位至郡守三子賞皆傳嚴卿最
顯官至朝散大夫郃又與謹微子椿登第郃官至朝議大夫
丞炳三世孫彤四世孫觀登第丞哲四世諸孫象先厚登第
象先應賢良方正科厚位至鴻臚少卿厚五子皆官孫洋亦
登進士第族大子孫眾多近世有以世科名聞其世一曰自
遠而下邵第進士四子樵孫稷孫材父今興州矣凡散居異
邑者多不書

張氏

張氏韶州曲江人至唐相九齡顯九齡弟九皋九皋子抗抗
七子仲方仲孚子孫在蜀可譜仲孚孫奉常博士隨扈僖宗
幸蜀傳三世曰載陽貲產鉅萬豪待四方士子維峻待士益
厚悉散之或相戒止笑曰吾遺子孫者不在是也以子起贈
大理寺丞起寶元中登進士第官至太常博士是故族也起
家猶難如此三子太初太寧太和太寧登治平四年第知邢
漢渭等州四入爲尙書部三持使節遷陝西路爲都轉運使
二子察字察以大小篆名入爲左司郎中出知鼎州字初名
犯欽廟諱易名字三丞寺監使淮西東路知濟滎果合四州
娶榮國公百祿女故其學得之范氏子晦侍學中原有外家
典型筆法尤工歷知雅蒸簡三州子仲堅是則家成都者太

初家於崇慶之新津太和家於眉州之眉山仲方之後徙漢州之綿竹族尤大

宋氏

宋氏唐季有任崇文館校書郎諱玘者隨僖宗西幸因家成都玘生綿州團練副使可思可思生太子舍人顥顥第進士仕唐顥生武信軍節度推官格格仕宋朝生惟吉惟亮號無爲先生生太常博士世修世修生球球與從兄弟璋後悉登第球終職方外郎按譜惟吉惟亮子孫眾多相似也惟吉後爲盛璋球諸從兄弟子孫相似也球後爲盛按家傳無爲先生嘗授經任公玠晚究易球仕至郡守潔身早退子先因世賞至縣令亦中年退休子昌宗典榮資三州將曹東蜀會鹽

酒法弊坐籍沒者又所在繫捕充斥獨論列爲不可法爲士
改猶申言不已由是罷歸諸子曰訓曰誨諸孫曰邈曰述曰
道曰運邈運登進士第邈終宣教郎餘皆至郡守運總領財
賦四川及卒蜀士爲當時惜之元豐末昌宗初仕時尙富
強名 **■** 爲宰相執政過用天下告病軍興征取析秋毫
病益痼宋氏家法雖尙嚴獨於民寬如爭鹽酒法亦一事也
故昌宗至誨皆退居享上壽至曾孫復名以祖爲行亦多在
官非徒曰人事其亦天理歟

句氏

句氏隸新繁隸華陽句龍氏隸華陽隸郫隸温温皆祖句望
孔氏七子曰井疆三國蜀曰扶其裔也唐末有曰惟立以

扈衛僖宗爲將軍二子弇會王建攻彭州弇與勇烈侯楊晟死之會匿新繁民間遂隸新繁四世孫七良登慶歷六年第官至朝請大夫七子以賞以第皆有官第二子宗顏官至朝奉大夫第四子宗召與顏之長子濤送登進士第濤貴在高廟時宰相趙鼎實薦之鼎言蜀有鴻儒可充載筆之任然姓與御名音同臣未敢薦高宗曰古人有句龍氏遂自涪陵召濤而句氏著矣濤言事稱上意繇郎曹閒歲除給事中大抵以薦士爲己任士因濤薦召凡數十人後多爲名臣唐公文若其一也序其外制集云爾以是爲權相忌遂出除潭州力辭乞祠許之夕歸蜀不許寓居秀之華亭卒子躍從子距路蹈躒典三州兩持使節除職帥夔卒餘以賞在官官至縣云曰

詠登宣和第第二其子輔登紹興第嘗爲四川類省第一亦
族子也隸成都者自居體始著三世以上惟曰出井疆莫可
考居體登熙寧第官至朝請大夫王公素使東蜀知其賢延
請權領懷安軍事卒懷安居體素號鄉先生著書爲多請生
從之廣多知名凡子二以賞得官梈獨久游太學以恩得官
二子昌世昌泰皆登第昌世官至朝散大夫位至郡守昌泰
爲四川類省第一嘗除太學博士後徙將作丞又丞太府兼
戶曹郎出提舉常平浙東移節浙西旋報罷歸起知利州除
職帥夔卒從子子皆有官卽成都溫江以句爲氏猶曰句惟
立唐末入蜀卽其祖亦曰避高宗諱改爲復姓而世次率不
合曰廉登進士官至朝議大夫諸子皆有官從子震雱同登

進士卽自鄆隸成都者温江則以中立爲祖曰是在雍熙閒
以宗學名曰中正之兄也中正生希仲亦世其學以科第位
至光祿卿王公安石銘其墓曰句宗華陽世實兆京其爰據
云爾而世亦莫可考又如眉之鉤嘉普之句永康榮之句龍
其先皆稱同族然永康句龍紹興閒爲御史中丞曰如淵其
復姓亦有旨至今諸族莫能一大抵氏族學廢今爲廣識之
以勸來者

常氏

京兆常氏爲蜀人自宥始衮相唐母兄偕偕三世孫官戶部
郎中扈衛僖宗駕入蜀者宥也謫授蜀川戶掾卒塋江原二
子包荒包蒙包荒子達選達子延昱負其才雷公有終來平

蜀寇一見奇之率從之謀有終守蜀數以書招致之延昱始
來自邛家成都卒鄉人謚曰廉貞先生子禧禧四子琪琮
玘皆登科琪守三州長子景修守彭州景修二子時中執中
爲郡守相自景以下名從中從才者爲一世從士者爲一世
城垣蓋琪諸曾孫城知均州垣有隱操蚤與薦以親喪不復
就類省隱居東山餘四十年蜀人大帥欲識之不可聲聞于
今隱然琪弟琮之子縝禧弟利涉之子鎮踵登崇寧二年第
初延昱出從雷公選子守元留邛其後多通顯以隸他郡故
不書

房氏

房氏以重爲入蜀之祖重丞相元齡八世孫也終新都今子

諤爲蜀太常少卿子四人皆以從爲名從之諸子八人皆以知爲名知之諸子亦八人皆以昭爲名曰昭應號虛谷子有傳定文無律名詩皆諧理曰昭庶洞曉樂仁宗朝以大臣爲薦得旨賜對特受祕書郎今樂書行世國史有傳昭之諸子十八人皆以審爲名審能審基皆舉進士審能官至朝請大夫審權著大樂演義卽昭庶子也審之諸子三十八人皆以希爲名希聲甫冠與貢常官太學希參登元豐第官至通議大夫希之諸子六十四人或薦或第或蔭或恩或贈而名率不齊其知名者五人曰淵太學上舍生克太學錄曰偉以恩得官而博學文口知名西州又審權孫也曰璣曰永登政和宣和第曰時中贈官至通議大夫又一世諸子踰百人名

尤不齊曰與之曰軟曰子申曰子邵曰震仲曰鉅皆登科與之視諸從弟行獨年高宣和進士官至中奉大夫持節潼州路故諸從弟今多在子邵典州官至朝請郎震仲官朝請郎又一世諸子踰二百人惟大亮以典三州顯威以世科顯餘子及諸孫以賞得官者五今在官者二曰燾曰壽卿

呂氏

呂氏自眉彭山遷成都三世始著曰懷玉曰公立曰陶世以風節聞陶遂爲元祐名臣三子傳嗣延嗣緣嗣緣嗣坐黨人子不達終右通直郎子焯當用給事遺奏補官靖康多難格不行商隱宜之疑之皆登第商隱第雖晚以四川類省第一與素望合胡公元直鎮蜀薦之禮部侍郎李公燾以自代召

入除國子博士兼國史院編修官遷宗正丞兼史院如初凝之以才爲茶馬使者陳公彌作宣撫沈公復見知後茂州除閬州入對又以易學受知孝廟留爲大府寺丞與高隱同時會疑之卒商隱亦乞歸除守崇慶卒子盧宜之登第最早所至有治聲而坎墮率多異除通判彭州改辟通判茂州移黎州丁母憂辟通判成州除知簡州擬通判綿州黎州簡州罷非其罪復積二年送聞兄弟喪卒于綿兄弟皆不得中壽子孫今官學故家聲爲不長

杜氏

杜翊世以死節顯蜀舊守名其居曰忠義坊蓋以勸也事詳見于先賢志矣因其世祖甫來依巖武武卒甫旅遊衡陽二

子宗文宗武留蜀甫卒葬耒陽後返葬偃師故元微之誌甫墓謂孫嗣業終父志或者其家竟莫能出蜀也家青城寶宗文裔十世孫準皇祐五年第進士官至朝散郎宰綿竹以卒妻黎攜諸孤外氏家成都黎教子嚴必使世其家第二子卽翊世紹聖元年第進士官至朝議大夫通判懷德軍靖康元年虜寇作西羌亦張奄至城下凡三旬援兵不至城陷翊世先火其家乃自縊死事聞特贈正議大夫命官其後十人五子慥忱以賞得官孫逸老俊老廷老曾孫光祖大臨以忠義遺澤得官翊世沒時慥棄官走視死所慟幾絕見者皆爲流涕遂以喪招母魂歸葬餘孫自曾及元今爲士人指其門猶曰忠義杜云

宇文氏

宇文氏望河南自得氏以來有譜其以史學傳自唐諫議大夫籍籍子從禮爲渠州司馬因家于蜀後徙成都子孫又分六院曰成都曰雙流曰廣都曰綿竹曰嚴道曰閬中三院隸成都自司馬至院莫知其世世有從仁者後可譜再世後元又一世從廷從卿又一世從崇從緒從惟繼是子孫行率不類按譜始可類耳雙流院自崇而次始登第曰冊冊登嘉祐第仕郡邑閒卒李公大臨爲西州顏子昌齡喬齡昌齡少年登進士甲科神宗朝遷監察御史詔言事如侍御史徽宗初爲刑部侍郎子常千宰諸孫伋僕价子震與喬齡之孫仁皆顯价子震任任之子机皆第進士子震典著作兼爲郎出總

賦淮東晚知潼川价位至兵部尚書出以徽猷學士歷典大
藩邑人見其家迭盛凡四世幾百年初令中成州其諸從兄
弟又寢顯賞傳至孫矣廣都院自緒而下凡三世始登第曰
邦彥邦彥初名襄登元豐第仕至郡相卒子閎中粹中虛中
迭登第粹中第在第三後爲尚書右丞虛中後爲簽書樞密
院事終國信使謚忠愍天下聞其謚哀而敬之時中賜進士
第後以直龍圖閣知潼川閣中及其子師尹師舉從子師申
師獻孫紹直紹良從孫紹寅紹奕嘗爲吏部郎典三州卒紹
節典二州今被命紹直自郡守參議大藩今奉祠紹獻紹彭
紹莊今方典州子孫又多傳視雙流亦不勝書也惟成都房
自崇至降凡三世始以子樸貴贈官樸登政和第樸族弟谷

從子臨望久望日華孫如石如圭曾孫開仲繼登第開仲今
在官積世名位視雙流廣都爲顯而科第不媿族望矣綿竹
房亦未爲顯然緒下孫之紹登第仕元豐間年餘四十與時
論不合致其仕號止止先生母舅范公鎮也賦詩敬之司馬
公光亦敬之程公珣後守漢州其子顥頤從之游子輝以明
經第一及第仕至郡守邦彥與輝同世次視之猶兄弟然粹
中時中亦待輝之子思忠猶同母兄弟粹中任思忠以官時
中又任思忠之子師孟輝從弟彬登元豐第仕至郡守復自
綿竹遷郫子仔仲仔仕至郡相二子猶世其賞仲亦登第是
又隸成都矣綿竹房率聯得書故略

北劉氏

唐劉再思以御史從僖宗自蜀還京師留其子孟温成都孟
温以儒學傳授成都中三子長璵偽蜀廣政十年補石室教
授卒門人共謚爲寶中先生五世孫處厚處厚始登第四子
靖蟻竑翊蟻翊世其科處安四子竑端竑竑竑亦登第劉
氏家法方嚴長身偉貌世世稱其家家城北異鄉人入北門
問劉氏鄉人至謂之長劉然莅民率從厚至臨難其方嚴始
見處厚官至左朝請大夫范公祖禹第元祐循吏居之第三
靖蟻皆爲張公浚幕客靖議不合流落州縣蟻受浚令往熙
河劉惟輔軍時惟輔軍驕宅屬莫往獨靖蟻往惟輔戰北蟻
爲敵所殺後十餘禩河南境後惟輔將屬米知柔等來歸始
言狀范公成人榜其所居節義坊爲此翊竑賞皆傳端雖不

第士從之游甚眾自孟温至是八世今又一傳矣鄉人以其五世不異籍尤義之

南劉氏

劉氏譜載三世名字本月日耳曰世曰惟正曰惟盛曰惟道始詳惟正之子欽惟盛之子長源後先登進士第欽使湖南官至朝議大夫黻後賜第入館遷戶部郎官官至朝請大夫後長源紹興初爲監察御史典州除節官亦至朝請大夫兩家子弟賞得官黻弟蕤知荆門軍卒子述今典州長源子思學賞今亦傳子參惟道三世孫始登第曰晉或贈或賞而不年者不書

北郭氏

蜀郭氏眾多而家於北城者人號北郭矣其自敘亦曰出汾陽王有藏汾陽王丹書鐵券可證也譜失其傳今以稹爲祖稹生承詵承詵生希朴博極羣書晚精於易鄉人號曰有道先生李公畋爲作知命錄希朴前知死知命錄所以作也四子仲曰友直蓄書嘉祐求遺書友直上千餘卷皆祕閣所闕者叔曰友諒季曰友聞友文經學鄉人號曰北郭先生仲叔氏子孫或家廣都或從唐鄧獨北郭子孫不遷四子逢通選迪逢三子行中剛中閔中選行中迭登元豐元祐第通七子倫師中久中大中宜中時中由中倫久中同登崇寧第皆居甲科倫最通顯初仕太子學錄繼遷博士出爲部刺史凡四十任其提舉江南西路忤蔡京罷其帥潼川奏蠲虛額與都

轉運使不合遂致其仕蔭補子孫十有三久中大觀二年召入冊定敕令後提舉常平河北東路嘗因星變上封事言新開邊皆不毛地小人邊功肆爲誕謾書首入邪等罷歸吏部後復爲郡守爲刺史年裁六十一竟致其仕大中有聲太學上舍以釋褐後召爲諸王府記室兼講書守兩州三持使節事有異政由中擢上舍異等登宣和第後給事中句以濤薦之高廟題其姓名屏閒歷守二州一持使節其學深文亦高政事自儒學出常守簡州人至今思之選五子勉中美中登第迪二子黃中登第三子皆有惠政官皆博士而二子至大夫餘子又多以子貴贈官北郭以中名者凡二十六人大抵多賢也後皆亦復名中之子曰知知之子曰公公之子曰仲

仲之子曰叔叔之子曰孫自中而下取科第延世賞典州郡者不乏至以中爲行者亦多在官曰盛宜矣

楊氏

楊氏自潼川徙郫自郫徙成都譜寶祖唐盈川令炯炯謫梓州司法參軍遷盈川旣卒官還葬潼因家焉盈川十一世孫元惠始家於邛以儒學稱自號回光居士元符末應詔上書入崇寧黨籍生伯詹伯詹遊太學十年不成受世賞四十二年以迪功郎年勞陞從政郎以卒時又謂不成鄉人以其道不行於時而自樂終其身其以靖安先生易其名其成乃如此子祖識家成都登第後不樂仕棲遲州縣閒沈公价汪公應辰鎮蜀聞其名辟置幕府自是持節典藩視再世爲顯蜀

士論世不稱其官稱其德又諡曰樂行先生三子韶甫第進士諸孫叔寅以賞得官餘皆學

城南郭氏

自陳來成都居來寨郭氏從曰一亦祖汾陽曰吾蔡州司徒家以子貴贈朝奉郎子溥登大觀第初名將後更今名進士題名中實二名也嘗爲樞密院編修官遷國子監丞出守劍州積官朝請大夫贈至左金紫光祿大夫四子伸似儀儔伸登宣和第儔登紹興第似儀則賞延者伸官至朝請大夫職直敷文閣鎮興元兼安撫利州似儔早死金紫蓋伸儀累贈云伸及儀賞及世至似儔之子於是三畏三聘三握三接皆傳又傳至諸孫曰可道曰德柄在子孫散居城中城南尤顯

亦成都百年故家

施氏

施氏謂魯施李叔之後唐及諒從僖宗入蜀不歸居岷山下
七世孫光作始居成都碧雞坊又三世庭臣德修同登宣和
第從兄弟也庭臣高宗朝爲中書舍人晚居潭州卒德修嘗
除將作簿兼祕書丞出守洋邛二州除簡州卒子次高次尹
皆以賞得官次尹官至朝請大夫今傳其子坤之昔登紹興
第曰晉鄉又德修從子也庭臣子淵然仲舒仲舒登紹興第
位至司農少卿遷中書門下省檢正諸房文字子棐又世其
科淵然雖不顯以文稱于時初庭臣置田二頃贍宗族之貧
微猷閣直學士胡公寅爲之記其族至今賴之家遠矣猶若

未出蜀然者此義也

楊氏

楊最晚出自簡徙成都祖慶安至孫始有登進士第者四世孫承承子景温又世科其盛也四世孫至同薦者十有二是舉登進士第者四又同堂兄弟皆復名以望爲行蜀人器四望從望民望最顯從望知蜀州有子曰之言登進士第今知州民望位于朝歷左司郎中移大常少卿出知綿州甫半歲復以太府少卿總蜀賦又移兩節職句直祕閣加直顯謨閣有子曰之復今通判綿州民望有清名又名文章嘗自敘其世自四世慶安已上得三世墳墓七世而上無咨者至謂唐宋氏族之學不明譜牒遂廢特起者恥其初微而不誌昭穆

甚者或求附甲族而過於傳會近世言其先者必自唐扈僊宗西幸或游至蜀居焉何古之蜀獨無人也且以楊氏之言在華在蜀皆承姓於姬而受氏於晉霍楊韓魏皆姬姓也儻於其支別考證未明則不必慕他郡之盛而必求其遷徙之故也其說詳矣近世以族著者因以附見焉

郫縣何氏

漢自何武死後不絕亦幸矣子況載武喪如北邙山瘞焉廬其下公孫述誅蜀平況以喪歸郫葬縣東南按史武兄霸弟顯兄弟五人皆有名按志武後曰隨顯後曰包兄弟五人包子攀又皆有名曰英曰宗曰祗雖見之志第曰郫人爾莫知爲武後否也按譜武二世孫曰英五世曰宗宗子攀然英見

之志在武兄弟前攀父曰包又與譜異或者譜爲未詳不然
何氏世世有譜當爲蜀氏族第一矣然自漢至晉武弟顯之
後猶傳如志云亦盛也譜遠不可盡考或居長安或徙江南
唐李有乾符進士待詔翰林知節自謂武裔後僖宗幸蜀加
知制誥因歸郫卒葬膏澤鄉孫偉登太平興國進士第嘗記
景德寺邑人推爲先生七子子孫散居成都崇慶遂聞彭之
崇慶永康之導江而武之族蕃矣偉三世孫邦基登元豐第
官至朝議大夫賞及從子孫又三世俊茂登紹興第從崇慶
者偉從子繼甫繼甫曾孫援登大觀第元孫碩頤預又世科
而家成都者曰騰登紹興第至郡守亦自郫徙云

王氏

王氏曰簡隨唐僖宗入蜀因留蜀四世坦爲郫人贈通奉大夫子冕定國覽定國登治平四年第更名覺政和二年以直龍圖閣知桂州討殺溪洞蠻有功進顯謨待制三年丐祠得提舉成都玉局觀卒累贈特進冕子梅以覺蔭補將仕郎覽補登仕郎覺三子曰穢補登仕郎隨覺宦南方充廣西經略司內機法檄至邕州染瘴卒朝廷以穢死特命長子煥以官煥官至從政郎曰權補將仕郎曰棣補承務郎累官朝奉大夫通判巴州棣子燾將仕郎燾卒于承議郎

邵氏

邵氏以唐郃城令錫爲祖燕其始封也宋初至丹陽聞崑山勝槩來家於岷之陽曰慶餘後三世曰才始登治平第嘗入

尚書爲郎贈其父仲良爲太中大夫子孫皆官長子充官至
朝請大夫賞又傳三子贈才官至銀青光祿大夫邵公溥撫
蜀帥言丹陽邵公必嘗薦洛邵公雍於神廟溥蓋雍之孫故
溥講丹陽好待充如兄邵氏在蜀於是爲故家矣

申氏

申氏貫北京蜀廣政中曰幹臣始來青城子孫居郫幹臣四
世孫曰起曰宗起累贈朝請大夫有子曰祖錫曰積中同登
元豐五年第祖錫終朝奉大夫積中終奉議郎永興軍路提
舉學事祖錫子說終宣教郎說迪功郎積中子詮以臣僚列
奏積中孝行特受將仕郎終於雒縣丞孫伯時登濼熙四年
進士第終晉原主簿宗始從溫江四世孫曰叔度五世曰叔

儉叔懷皆登進士第

詹氏

詹氏貫邛州安仁曰文舉以子貴累贈正議大夫子曰權登元豐進士第終於巴州權子廷哲廷碩廷彥自邛始遷居郫廷哲終通直郎廷碩終朝請郎廷彥終從政郎廷哲之子隸彥之子籲皆登進士第

張氏

張氏俞隱居岷山七被詔命不赴賜以官又乞回授其父號曰白雲先生大節見國史事見先賢篇俞二子石民楚民登元豐八年進士第官至正奉大夫子曰吉甫以賞終朝奉大夫子伯振又以賞爲青城令卒官石民死子雲從孫文叔夏

會孫山父

王氏

王氏望太原唐末避亂入蜀居郫曰彥生四子次子曰延壽生四子次子曰景又生四子以孝名邑人號王孝子上兩世皆絕而景諸子曰慶祖慶柔慶餘慶宗傳世特盛遂散居成都永康資中富順惟慶宗之後不遷至曾孫隲登大觀第位至郡守元孫曰樸爲朝議大夫賞傳至孫宅院子孫或賞或第大抵相似也每歲上巳闔族無遠近共修祀事於縣東之塋人猶指爲孝子家

楊氏

楊氏居郫縣凡四世至邁始第進士官至左朝議大夫直祕

閤主管環慶路經略安撫司公事累贈父叔淵光祿大夫邁
卒累贈宣奉大夫邁子衍朝請大夫邛州曰思成儒林郎久
成二子蕃卿從政郎萃卿修職郎思成一子漢卿將仕郎

張氏

張氏昔望崇慶之永康門望如初有遷於郫之犀浦鎮其爲
族望亦稱克尙五子第三子曰礪卽遷犀者礪之孫曰天迪
曰煥曾孫曰汾曰洙曰漠元孫曰峰曰岐皆擢進士第又有
遷於彭之崇寧者其後視犀浦尤顯而犀浦院以山爲行者
今傳之曾元矣諸孫尙力學曰吾家三世登科云

文氏

文氏以丹淵先生同爲望同貫潼川之安泰位雖未高以蘇

先生軾爲友名重當時其文號丹淵集同官西川樂崑山勝
槩欲家焉不果子孫始來居邨有丹淵集曾孫仔紹興丙子
進士青城尉卒四世故尙書無恙

新繁彭氏

彭氏曰景直唐中宗時爲太常六世孫敬先常以左拾遺隨
僖宗入蜀家於普州敬先孫濟民攜二子由普徙益長子生
福次子生乘乘於宋仁宗朝翰林學士國史有傳乘卒三子
不克歸國史載乘乘爲萊陽人繁華陽皆隸成都而乘實以太
平興國八年生于繁見於故待制韓公駒所爲跨鼇先生李
公新集序曰繁上則彭乘之文辭云福生顯行顯行曾孫登
政和二年進士第官至左朝散大夫知彭州贈其父望官至

朝議大夫二子極林以廕補官卒季子傑從子仁徹同年貢于鄉仁徹登第官至文林郎極子亦第進士不待年致仕

周氏

周氏望汝南入蜀家于繁曰贊之孫頊有隱德號正晦先生一子曰洙曰濠洙生表權濠生庚庚生尹及申表權尹同登慶歷六年進士第表權後知漢州尹知梓州蘇文忠公軾文定公轍時皆在朝各賦詩送之初李稷使蜀摧茶爲蜀病表權與尹論合興稷異爲稷誣奏罷去尹嘗知利州後爲侍御史奉使入蜀迎母面賜五品服還至陝除節荆湖北路後知眉州丁母喪喪除入爲主客郎中遷考功兼權吏部元祐四年表權再知漢州表權奏改名表臣尹自是出守梓梓漢相

望卽此時也兩家二大人年又高表臣初知漢州尹知利州
 交皆及見之朱衣銀章子所遜也表臣三子克冕元尹四子
 禔禧祁祠元及祠後先登第餘子以賞得官庚弟庾表臣弟
 表民尹弟申庾之子丙吉平申之子禴祉禩丙之子壽松而
 表民之孫夏卿或以賞或以恩皆在官祉典二大州曰劍曰
 漢仕爲顯

雙流宋氏

宋氏望京兆隨諫官遂以直言得罪流蜀隆山卒葬隆山隆
 山後以元宗諱改彭山比及四世少長踰二百人及琿譜一作珽
 入中朝爲正議大夫扈僖宗狩復還歷眉彭二州刺史歸瘞
 彭子五人號五房宋長子渝生覽一作千覽生祚始居成都之

雙流祚二子承榮承慶承榮生堂舉賢良方正成都府府學
說書名載國史承慶生文禮以子右賢右仁同登慶歷第後
贈朝散大夫右仁生桓桓生京京生衍登科聯四世右賢孫
良儒曾孫德之祖孫又相繼登科德之嘗爲四川類省第一
皆文禮之後也熙寧中邑令徐九思表其坊曰叢桂作堂於
邑東延壽院繪五世像號叢桂堂邑人榮之有散而居汴居
大安客歷陽徙依政者皆祖諫官今居崇慶者又自雙流徙
其居汴者卽莊惠公延渥之後譜稱延渥後更名渥有女孝
章皇后其後譜聞惟彭山雙流依政譜可考子孫文行聞于
時者眾獨雙流以隸成都故詳

鄧氏

鄧氏曰元明居梓中江以富名王建繇聞來圍成都元明開帑廩惟建取前後數百萬計建欲官之元明曰不願也願公安輯一方不然兩川皆魚肉矣建欣納官其子宏忠州刺史宏生隆孟蜀時爲資州刺史二子曰鎔曰釗釗生文溥文溥生琛均順荐亂琛又謁琛貲且諭諸富人無靳高色人以故保全家頓貧徒雙流以經學誘進後生羣聚至數百人翕然知學有子曰至學益大號二江先生范公鎮爲之友榮公百祿從之游以子貴至贈太師琛亦贈太保琛生六子至其一也至四子綰續纘先後登科綰試禮部爲第一季登第時神宗臨軒綰爲翰林學士侍唱名至纘綰下殿謝子洵仁洵武從子邵聯唱名於是綰聯謝執政因奏鄧至善教上曰知之於

是時鄧氏以爲寵綰後除龍圖閣直學士知鄧州改知滁州
洵仁尙書右丞洵武知樞密院洵武子雍亦以侍從終以故
賞延子孫爲多凡子孫之散居者曰成都曰瀘曰嘉曰廣安
曰懷安之古城鎮曰普曰夔而雙流族所未顯者惟二江先
生至之兄弟之後亦異矣雍子椿機位至郡守椿念再世名
位在宣政童蔡問率太息一日得洵武諫伐燕疏亟乞蜀守
汪公應辰識之應辰曰事具國史矣亦爲之跋椿哭先墓下
以告蜀士謂爲人孫如此皆賢之

張氏

張氏漢名綱之後綱卒瘞犍爲武陽唐大中時有天祺者自
武陽徙江源卒瘞後有白檀生墓閒號白檀張氏五傳至中

理舉逸民不就卽拜將作監主簿子曰公謹元祐五年五經
出身累贈少師公謹之子深徙雙流登崇寧第累遷夔州路
轉運判官張丞相浚宣撫川陝承制出陟除潼川路提點刑
獄改轉運副使遷知夔州中書舍人句濤論馬政力薦深除
管川陝茶馬繼除都轉運使以制置使胡公世將議酒法不
合改除瀘州因丐祠請老子孫多以賞得官子珏慎孫徽之
安之皆郡守

張氏

張氏先世曰守珪朝奉大夫若訥若愚孫協口再世弟兄登
科協口爲詩有唐人風協口終於宣議郎其弟終茂州別駕

郭氏

郭氏先世曰絳以至孝有聲州里子卯貢上庠中第官終于部刺史秦丞相檜與卯有庠序之舊及當國卯絕弗與通歷相三郡家食凡一十八年晚年號亦樂居士子皆以賞惟明復世其科嘗入爲宗正丞知崇慶府除夔州路轉運判官未赴卒孫以祖賞得官曰道子

梁氏

梁氏七世曰介紹興丁丑進士第三人爲校書郎乞彭州歸遷利州路轉運判官兼四川宣撫司參議官改知瀘州居歲餘民夷便安之詔改瀘南兼安撫一路以旌其能瀘州爲一路安撫自介始梁丞相克家薦之有旨詔赴行在道遇病辭得主管冲佑觀再召又辭除知遂寧府未赴卒二子皆得官

曰种曰穆從子自類省奏名曰梓

李氏

李氏系出隴西自敘云七世祖騏隱五季閒聞蜀多名山遂
挈二子及宗屬自鼎澧入蜀遊岷峩棲於雅州之瓦屋世祖
迪爲儒生其家雙流自曾祖元義元義生文顯文顯生元義
亦學道因出遊學放浪山水閒不歸其葬也以衣冠三子師
尹庾崧鄉庾入太學與四方賢士交獨於李光泰發最厚晚
樂善好施子大年甚似之二子嘉謀嘉獻同登第嘉獻好學
工詩文官至宣教郎嘉謀嘗入爲宗政丞出守二州繼持節
作牧又典州云

廣都費氏

費氏自敘曰大費佐禹平水土有功今其裔也史冊費氏多賢其入蜀莫知何自從常璩華陽國志贊先賢曰師義至仁費奉君貽字也貽不仕公孫述陽狂漆身墓今在成都東南則蜀有費舊矣曰禕曰詩墓皆在詩子立孫盛蜀世譜云益州諸費有名位者多詩之後南宋時游爲寧蜀郡太守墓亦在雙石闕甚偉廣都北有鄉曰石柱指雙闕也王氏僞蜀有曰宗陶曰叔熊皆爲輔佐宗陶之後爲廣都房叔熊之後爲沙渠鎮房宗陶生曰順初順初有族子曰黃裳舉孟蜀進士第一孫曰韜韜生傳誨傳誨生得珪得璋得珪生惟亮惟古惟亮生襄舉孝廉惟古生二子曰策調蒲江簿曰木登熙寧第官雖止眉山令而博學於鄉先生木生開開生樞機桓樸

桓子申之孫士歿士寅士威皆後先登第申之孫士寅又於
四川類省第一士寅終於石史士歿典州策之子曰汝弼孫
曰安中曾孫曰行之元孫曰士充汝弼行之安中士充亦後
先登第行之常於中書門下省檢正諸房公事終直寶文閣
沙渠房亦蕃登第相望實隸邛州惟雙流蓋廣都別名在漢
曰廣都隋以諱更爲雙流唐兼存之故雙流房曰振舊遊太
學登紹興第三子太獻太川太臨實世其科太川後爲四川
類省第一太獻典州雖兩邑子孫繁簡不齊族望蓋相似也

馬氏

馬氏族七世曰捷嘗登進士第不克顯曰騏始著騏登紹興
進士第執政楊公椿薦之高朝有旨召騏辭召乃發賜對除

軍器監主簿孝宗初元遷起居舍人兼侍講權中書舍人有旨權直學士丐祠除知遂寧眉州使權潼川路知潼川除祕閣修撰奉祠知瀘州再知遂寧除右文殿修撰再知潼川卒有子覺世其科自郡守召爲太府少卿從子興孫亦登第故兩家子孫以賞在官者半

張氏

張氏族口世曰大同登紹興進士第嘗教授成都解官不復出三奉祠祿多著書號淡齋先生子敬修從子聿修皆登科故邑人推爲儒家

溫江文氏

文氏自謂漢文翁裔有龜年者唐乾符中明經及第至彰明

今孫曰谷爲孟蜀侍御史再傳曰大章在宋爲國子祭酒谷兄弟五人一居漢州一居梓一居綿一居邛一居温江云居温江者曰祚有經學邑人師之曾孫察遂登元豐第積官及贈至中奉大夫二子振道張奇孫人中族子振德振鷺諸從孫定中安中衡中達之繼世登第自大觀後或賞或恩如之

袁氏

袁氏以天綱爲祖史曰天綱益州成都人也温江西二十里曰淘霸鎮有井號天綱井其裔環居井側有名芝者於鎮建寺有異應費元量楊徽胡叔豹皆蜀賢大夫爲之記載芝子孫蕃衍鎮莫能容四世子昌年遂徙温江鴻爲廣文館生試中上游縣爲立擢秀坊子孫遂連取名第自省大才大明大

聲仲午桂凡七人鄉舉中選者又過倍

蹇氏

蹇氏祖蹇叔唐有侍臣蹇道原從僖宗西隨僖宗謂曰蹇不利東北因更氏曰蹇後有居懷安軍金堂曰逢生二子長曰綬綬生汝明皆登第爲金堂聞家次曰綰徙温江子汝礪迪功郎汝能贈承事郎子孫登第者曰克諧曰誼曰騏曰寅望

新都沈氏

沈氏唐口有工部郎中穆之隨僖宗入蜀居新都之彌牟鎮穆之世孫卣紹興進士官至朝奉郎知榮州一世孫曰浚明日子震曰恪曰樞十一世孫曰仲巽俊民子震仲巽皆第進士進民子震官至通直郎仲巽修職郎恪以賞樞以恩皆得

官樞迪功郎

大正十一年

三十一

成都氏族譜終

成都氏族譜一卷元費著撰著成都人仕履無攷此書專記成都氏族詳悉不苟夫三代以前姓與氏分三代以後姓與氏合六朝矜尙門第士大夫始以郡望自矜唐宋重進士科士皆投牒就試無流品之分而唐世猶尙氏族奉敕第其甲乙唐書有宰相世系表燉煌新出有唐氏族攷殘卷宋樂史撰太平實字記歷舉大族強宗鉅室能與國家兩相維繫成都元明之未殺戮最重存者亦散之四方業已無從查考然費氏編輯有法雖自全蜀藝文志鈔出而亦自可單行歲在柔兆執徐壯月吳興張鈞衡跋

1362358

I242.1
39

片書上方書目

三ノ

類
林
雜
說

十
五
卷



146388/01

吳興劉氏
嘉業堂刊

重刊增廣分門類林雜說序

傳記百家之學率皆有補於時然多散漫不倫難於統紀故前賢有區別而爲書號曰類林者其來尙矣惜乎次第失序門類不備予因暇日輒爲增廣第其次敘將舊篇章之中添入事實者加倍又復增益至一百門逐篇裨之以贊爲十五卷較之舊書多至三倍若夫人君之聖智聰明臣子之忠貞節義父子兄弟之孝慈友愛將相之權謀大體卿士之廉潔果斷隱遁之潛德幽光文章之麗藻清新風俗之好尙陰德之報應酒醴之耽沈恩怨之報施形軀之長短容貌之美惡男子之任俠剛方婦人之妍醜賢愚神仙之清修鬼神之情狀宮室

之華靡屋宇之卑崇天地之運移日星之行度山海之
靈潤醫筮之精專草木之奇秀金玉之精良蠻夷之頑
獷禽魚之巨細凡六合之內所有无不槩舉雖不敢謂
之知所未知亦可謂之具體而微矣其於善者不敢加
於褒飾惡者不敢遂有貶斥姑取其本所出處芟其繁
節其要而已覽者味其雅正則可以爲法視其悖戾則
可以爲戒豈止資談柄而詫多聞不爲無可取也鄉人
李子文一見曰專門之學不可旁及至如此書無施不
可好學通變之士之所願見我爲君刊鏤以廣其傳如
何予謹應之曰諾於是舉以畀之併爲之序時大定己
酉歲夏晦平陽王朋壽魯老序

重刊增廣分門類林雜說總目

卷第一

孝行門

孝感門

孝悌門

孝友門

禮賢門

卷第二

勤學門

勸學門

志節門

高士門

廉儉門

儒行門

卷第三

敦信門

烈直門

忠諫門

納諫門

拒諫門

聖明門

行果門

卷第四

權智門

斷獄門

清吏門

酷吏門

聰慧門

恭敬門

卷第五

機巧門

辨捷門

隱逸門

方術門

相徵門

仁友門

友人門

卷第六

貞潔門

賢女門

女禍門

醫藥門

卜筮門

占夢門

異識門

烈女門

卷第七

文章門

感應門

報恩門

報怨門

嗜酒門

卷第八

別味門

豪富門

貧窶門

貧達門

攻書門

卷第九

善射門

音樂歌舞門

壯勇門

美婦人門

美丈夫門

卷第十

醜婦人門

醜丈夫門

長人門

短人門

肥瘦門

怪異門

祥瑞門

謠謠門

卷第十一

天文門

歲時門

佛教門

道教門

神仙門上

卷第十二

神仙門下

女仙門

鬼神門上

鬼神門下

卷第十三

婚姻門

死喪門

牀席門

扇枕門

舟車門

燈燭門

冠履門

酒食門

羹肉門

奴婢門

四夷門

卷第十四

經典門

史傳門

書字門

講說門

筆墨門

硯紙門

金銀門

珠玉門

錢絹錦繡門

印綬門

都邑城郭門

宮殿樓臺門

卷第十五

堂宅門牆門

園囿道塗門

市井門

果實門

花竹木植門

禽獸蟲魚門

重刊增廣分門類林雜說總目終

重刊增廣分門類林雜說卷第一

平陽王朋壽編

孝行篇第一

虞舜尚書帝曰朕在位七十載耄期倦於勤有能庸命
 岳曰瞽子父頑母嚚文王禮記周文王之為世子也朝
 象傲烝烝乂不格姦
 門問內豎之御者曰今日安否何如內豎曰安文王乃
 喜日中亦如之暮亦如之其有不安節內豎以告文王
 色憂行不能正履王仲由禮記仲由曰傷哉貧也生無
 季復膳然後亦復初仲由以為養死無以為禮孔子曰
 啜菽飲水盡其歡
 心是之謂孝行
 公明儀禮記曰公明儀問於曾子曰
 何言歟君子之所謂孝者先意承志董黯字孝治會稽
 論其父母於道參直養也安能為孝乎董黯豫章人也少
 亡其父獨養母孝敬甚篤每得甘果美味輒即奔獻於
 母母常肥悅比舍有王寄者其家大富寄為人每
 為非法惡事母懷憂愁身體羸瘦寄母曰我子孝順不為
 家貧年高有何供養而常肥悅黜母曰我子孝順不為

頁一

讀書堂校刊

非法身不憂愁故肥悅耳遂問寄母曰夫人入往來常使
 充饒何為羸瘦如此寄母曰我子不孝出入往來常使
 我愁是以瘦耳寄聞之候黠不在遂入黠室內捉黠母
 拽於牀下手搥腳踹苦辱而去黠歸見母在牀顏色不
 悅跪問曰老人不能自慎多言黠知之恐母憂嘿而不
 言及母亡葬送已訖乃斬寄頭祭母墓乃自縛詣官會
 赦得免後晉申生獻公先娶齊女為后生子申生齊
 漢時人也晉申生女卒乃立嬖姬為后生子申生齊
 子嬖姬欲立奚齊為太子讒申生於公曰妾昨夜夢申
 生之母從妾乞食公信之即令申生往其母墓祭之申
 生祭還嬖姬潛以毒藥安肉中申生欲上公祭肉姬謂
 公曰蓋聞食從外來可令人嘗試之公以肉與犬犬死
 與婢婢死姬曰為人子者乃如此乎公以此時非但殺
 不得終天之年而欲毒藥殺而早圖其位此時非但殺
 公亦當及于諸子請將二子自殞於狐貉之地無為被
 太子見其魚肉也公大怒賜申生死大夫李克謂申生
 曰何不自治申生曰吾父老矣臥不得姬則不安食不
 得姬則不飽吾若自治公則殺姬為人子者殺父所
 安非孝也遂自縊眉閒尺謂眉閒闊一尺也楚人干將
 而死出孝子傳眉閒尺莫邪之子也楚王夫人當於
 夏取涼而抱鐵柱心有所感遂懷孕後產一鐵楚王命
 其邪鑄此鐵為雙劍三年乃成劍一雌一雄莫邪乃留

雄而以雌進楚王劍在匣中常有悲鳴王問羣臣對曰
 劍有雌雄鳴者雌憶其雄也王大怒即收莫邪殺之莫
 邪知其應乃以雄劍藏屋柱中柱下有石礫因囑妻曰
 卿懷孕若生男可語之曰日出北戶南山之松松生於
 石劍在其中妻後生男眉間廣一尺年十五問母父在
 時事母因述前事乃思惟剖柱得劍日夜欲報殺楚王
 王嘗聞有一人眉廣一尺欲來殺王乃購募覓其人
 乃宣言能得眉間尺者賜金千斤汝是孝子無分寸之罪枉
 乃便起入山路逢一客客問曰汝是孝子無分寸之罪枉
 曰是客曰吾能為子報讎眉間尺曰父無分寸之罪枉
 被荼毒君今惠念何所用耶客曰欲得子頭并子劍眉
 間尺乃與劍并頭客受之與王王大賞之即以錢煮其
 頭七日七夜不爛客曰此頭不爛須王自臨之王即往
 臨看之客於後以劍擬之王頭即墮鏊中二頭相齧客
 恐眉間尺不勝乃自復劍擬之王頭即墮鏊中三頭相齧
 經七日後乃一時俱爛乃分葬之在汝南宜春縣今三
 王墓是也伯夷叔齊伯親兄弟也遼東孤竹君之子
 出孝子傳伯夷叔齊父薨伯夷伯長子當立乃讓位與弟
 叔齊不受乃讓與異母弟伯僚僚乃為君夷齊皆仕周
 值文王薨其子武王伐紂夷齊乃叩馬諫曰父死不葬
 而起兵伐殷豈謂孝乎武王怒將誅之太公諫曰此義
 士也但未通權變耳王悅乃用為左丞相夷齊曰臣不義

二

忠唐突君威豈敢受君之爵祿也遂隱首陽山噉果瓜
 采薇而已不食周粟王靡子入山見之謂曰君是何賢
 人獨在山中夷齊答曰吾適東孤竹君之子兄弟相讓
 父位來歸于周值武王不義隱此山不食周王之粟以
 菜果為糧耳靡子難之曰普天之下莫非王之土率土之
 濱莫非王臣雖不食周粟乃食周之菜果何有異哉於
 是夷齊遂不食七日俱餓死
 般末周初時人出烈土傳
 愈郁察母顏色不平輒復不食宗親異之因字曰叔異
 食郁嘗抱持涕泣不肯飲食母憐之強為之食欺言已
 黃香東觀漢記黃香字文強舉孝廉无奴僕香躬自勤
 冬則温席而後陸績吳志陸績字公績年六歲於九江
 極其處者矣陸績見袁術術出橘績懷三枚去拜辭
 墮地術曰陸郎何乃作賓客而懷橘績曰廣濟孝子
 平績跪曰欲以遺老母術大奇之殷渾傳渾生而
 謹愿七歲喪父哀號毀悴不為戲弄得鮑永東觀漢記
 瓜果可啖之物懷待進母未嘗先食鮑永字君
 長上黨人少有志節事後母盡心
 至孝其妻於母前叱狗即出之

贊曰 孝乎惟孝 百行之先 大哉虞舜

聖性自然 頑父鬪母 不格于姦

象慚傲狠 罔敢恣專 文王盡禮

寢門問安 供勤子職 萬世師焉

孝感篇第二

杜孝 蕭廣濟孝子傳杜孝巴郡人少失父與母居至孝

頭塞之以草 呪曰我母必得此魚 因投江中 婦出江湄 因

見筒橫來 觸岸 異而取 視見二魚 含哭曰 必我婿所寄

取而進之 聞 陳業 董永 亡無以葬 乃從人貸錢 一萬

者皆駭然 曰後若無錢 還君當以身作奴 永曰今貧若

永謂錢主曰 後若無錢 還君當以身作奴 永曰今貧若

畢將為奴 於路 忽逢一婦 人求為永妻 永曰 願為君婦 不

恥貧賤 永遂同婦 人至錢主 主問曰 本言一人 今何有

二永曰 言一得 二理何 乎主問 永妻曰 何能妻 曰織

耳主曰 為我 織千 正絹 即放 爾夫 妻遂 索絲 七旬 之內

千正 緝成 主驚 遂放 夫妻 而去 行至 前來 相逢 處妻 謂

永曰 我天 之織 女見 君志 孝天 使償 償今 君事 了不

得久停語訖忽飛而去蔡順字君仲汝南人少失父養
 承凋悵而已前漢時人蔡順母至孝王莽未定天下大
 飢荒順摘椹赤黑異器赤眉賊見問之順曰黑者與母
 赤者自食賊感其孝遺斗米令順養母嘗往他家飲
 酒者自吐順恐母被毒乃嘗其吐順養母嘗往他家飲
 順大酒勤一身不能遷移遂伏棺上後飛過燒西舍失火
 墳大內唯順得免母生時畏雷及葬後每有雷即給順車馬
 往墓後姜詩字上遊廣漢人母好食鄰家供養不取詩水不
 漢人後姜詩及詩遂棄妻便寄鄰家供養不取詩水不
 又好食生魚每作鱸倩人送之陰養如故詩母感之遂
 命還舍舍傍忽有水泉湧出味如江水中有鯉魚因以
 奉母後漢人辭包字孟嘗汝南人後母惡之分包出外
 事逐列女傳包至於晨昏竊來門外灑掃而去母怒
 復逐之包心不易每得美膳倩人送門外灑掃而去母怒
 父母之包漸之召包即還後漢人送門外灑掃而去母怒
 事之蘭婦誤以火燒母韓伯瑜泣母時有過母杖之為母
 面應時髮落出孝子傳韓伯瑜泣母時有過母杖之為母
 受之今者杖汝何得泣悲瑜對曰往者得杖常痛知母
 康健今杖不痛知母乃衰是以悲泣事出韓詩外傳母

贊

孝悌篇第三

盧毓

漢書盧毓字子家涿郡人父植有大名於時毓十歲而孤遇本州亂二兄死難當袁紹公孫瓚交兵

幽冀年荒毓奉養孤嫂山偉魏收後魏書山偉弟早死

及兄子以孝行稱之業卜式漢書卜式河南人以田畜

年恩義甚篤不營產業卜式為事有少弟欲分年閒羊

身死之後賣宅以葬業卜式盡以與弟十餘分與之

身出止取羊百餘口田宅財物盡以與弟十餘分與之

至千餘口買田宅而弟基業破費盡式輒復分與之

李充汝南記李充兄弟六人貧無擔石之儲易衣而出

分異獨居人多費極無為空自苦也充乃前跪呼鄰里室家

相對共訣妻信之悉召鄰里親戚充乃前跪以妻言白

母出其妻去趙孝東觀漢記趙孝字長平沛國人建武

泣而出門去婦俱出外孝乃與其妻飯蔬菜比弟魏霸謝

令弟禮夫婦俱出外孝乃與其妻飯蔬菜比弟魏霸謝

夫婦還即曰我已食訖以穀飯獨與弟夫婦弟魏霸謝

後漢書魏霸字喬卿濟陰人為鉅鹿太守臨郡終不遣

吏歸鄉里妻子不令到官舍嘗念兒嫂在家勤苦已獨

躬耕與兄弟同居甘苦如一而鄉里化之

一

四

贊曰

人之愛厚

莫甚天倫

連枝之戚

同氣之親

孔融敬讓

蔡順誠純

長少以異

尊卑以陳

當時播美

千古揚芬

著之方冊

以勸人羣

孝友篇第四

王修

字叔治北海人十七歲母以社日死來歲社日號泣感感鄰里為之罷社後任青州別駕後漢末魏

初吳猛

字世雲豫章人年七歲對曰恐蛟螭餓賊捉將欲

身與食之晉時

趙孝宗長平人也弟禮為餓賊曰禮瘦不欲

如孝宗肥請代弟死

賊相謂曰此義士也賊曰禮瘦不欲

遂共釋之漢明帝時為

長樂尉出孝子傳也賊曰禮瘦不欲

行至夏日伏於父母牀下

問其鮑山字文才京兆人也

故曰恐蟲侵父母晉時

人鮑山兄弟三人山最長

與母至孝值漢末飢荒兄弟在田將蓬子斗餘使弟歸

與母至孝值漢末飢荒兄弟在田將蓬子斗餘使弟歸

待之山從母斬賊數人賊懼遂還山母卻歸北舍嫗亦
被驅將嫗回頭向山山又斬賊賊曰還君母訖何斬不
止山乃指嫗視賊是尹伯奇周之上卿吉甫之子父更
我嫂也賊又放之尹伯奇娶後妻又生圭伯奇至孝
後母嫉之欲殺奇乃取蛇密安登中命奇圭視之圭年
小見蛇乃驚便號叫走稱奇打我母問吉甫甫不信又
謂甫曰奇存非法向我君不信今與奇遊後園君遙觀
之甫信其言於是母與奇至園中詐云被刺腳令奇看
之父遙見謂如母言呼奇責之奇恐傷母意終不
自洽遂自抱石投河而死周宣王時人出孝子傳

贊曰 友愛教育 功歸厥兄 趙禮化盜

孔氏趨刑 常棣萼韡 紫荆後榮

庫封虞舜 樓美唐明 閔損自苦

鄧攸逃兵 鄙夫管蔡 不義垂名

禮賢篇第五

西伯 史記太公望呂尙者東海人姓姜從其封故曰呂
年老以漁釣奸周西伯西伯將出獵卜之曰所獲

非龍非影非虎非熊乃霸王之師果遇太公於渭之陽

與語大悅曰自先君太公望子久矣故號曰太公望載

與俱歸桓公史記齊桓公立欲殺管仲鮑叔牙曰君欲

立為師桓公霸王非管夷吾不可公乃從之佯為召管

仲欲甘心實欲用之管仲來及堂阜鮑叔文王文史記周

脫其桎梏見桓公厚禮之遂以為上大夫待之士多歸之

伯夷老慈少禮下賢士日中不暇食以待歸之士多歸之

散宜生鬻子辛甲沛公史記沛公過高陽酈食其謂監

之徒皆歸之矣沛公門曰諸將過此者多吾視沛公足

下必欲誅無道秦不宜踞見長者於是沛公起攝衣謝

之延之烈侯寡人有愛可貴之乎公仲曰富之可也烈

上座鄭歌者二人吾賜之田八萬畝公仲曰富之可也烈

侯曰鄭歌者二人吾賜之田八萬畝公仲曰富之可也烈

一月來謂公仲曰君好善今未有可者頃不期番吾居

自代來謂公仲曰君好善今未有可者頃不期番吾居

公仲曰未也番吾君曰牛畜荀欣徐越皆公仲進士乎

三君說使使謂公仲曰義荀欣徐皆公仲進士乎

史賜公仲衣二襲內文侯段干木過其間未嘗不軾秦

嘗欲伐魏或曰魏君晏子齊春秋越石父賢在縲綬之
 賢人是禮未可圖也晏子中晏子出遇之塗解左驂贖
 之載歸弗謝入閨久之越石父請絕縲曰不然吾聞
 嬰雖不仁免子於厄何求絕之速也石父曰不然而
 君子子誦於不知己而信於知己吾在縲繼彼不知我
 夫子贖我是知我也知我而無禮不如在縲繼之中晏
 子於是延騶爽齊世家騶爽采騶衍之術以紀文齊侯
 為上客矣騶爽齊世家騶爽采騶衍之術以紀文齊侯
 侯致賓客覽之言齊魏無忌魏世家公子無忌封信陵君
 能致天下賢之士齊魏無忌魏世家公子無忌封信陵君
 皆謙而禮交之不以其富貴驕士士以此方侯嬴史
 數千里爭歸之諸侯以公子多客不敢加兵侯嬴史
 魏有隱士侯嬴年七十家貧為大梁夷門監公子信陵
 君厚遺之不肯受乃置酒會賓客公子從車騎虛左自
 迎侯生侯生攝敝衣冠上坐不讓欲此觀公子引車入
 恭又曰臣有客在市屠中願枉車騎過之公子引車入
 市侯生乃見其客朱亥故久立微察公子顏色愈和時
 賓客待公子舉酒市人皆罵侯生曰嬴抱關者也公孫
 侯生坐座上客皆驚侯生曰嬴抱關者也公孫引
 迎嬴嬴欲就公子之名故久立嬴抱關者也公孫引
 為小人也遂以侯生為上客能公孫弘漢書公孫弘為丞
 下士也遂以侯生為上客能公孫弘漢書公孫弘為丞

頁一

六

下賓客賢士後封平津陳蕃後漢書陳蕃為豫章太守
 侯丞相封侯白弘始太宗為秦王既平天下乃銳意經
 特設一榻太宗唐書太宗為秦王既平天下乃銳意經
 去則懸之太宗唐書太宗為秦王既平天下乃銳意經
 立齡魏徵以本官兼弘文館學士圖其形狀凡十八人
 命褚遂良為贊號十八學士給五品珍膳分為三番更
 直時號為周公史記周公嘗戒伯禽曰我文王之子武
 登瀛洲沐三握髮以趙勝史記平原君趙勝居第有
 三吐哺一沐三握髮以趙勝史記平原君趙勝居第有
 待土唯恐失一賢人而笑之釐者造勝請所笑者頭平
 跚而行樓上美人見而笑之釐者造勝請所笑者頭平
 原君曰以一釐者而殺吾美人賓客以為君輕士而愛
 色栩栩引去平原君於是殺釐人賓客以為君輕士而愛
 笑者而謝躡者賓客復集孟嘗君史記田文靖郭君
 食客嘗三千人夜與客食一人蔽火光客怒以為飯不
 等輟食請辭文起持已飯比之無異客慙自縊士自此
 益歸蔡伯喈後漢蔡伯喈嘗大會賓客王粲至謁伯喈
 之遂取家籍文也伯喈倒屣迎之曰此王孫有異才余不及
 章舉以與之

贊曰 太平基本 資於禮賢 古聖垂法

明王則焉 詩歌樂只 實美周宣
蘇公必飽 式閭必虔 黃金峻極
白璧詳延 果能此道 何千萬年

重刊增廣分門類林雜說卷第一

重刊增廣分門類林雜說卷第二

平陽王朋壽編

勤學篇第六

董仲舒

廣川人也少耽學下帷讀書弟子莫見其面十

至江都守前

漢武帝時人車侑取螢於網囊盛之以讀書家貧無油朱

買臣

字翁子會稽人家貧好學不事產業其妻羞之求

否其妻不信而去明年買臣隨計吏至長安上書待詔

金馬門值邑人嚴助薦於武帝帝拜買臣為會稽太守

至發民治道妻與後夫治道買臣見而識之命後車載

之引至郡後舍居之給與衣食其妻大羞不逾月而死

書出漢匡衡字稚圭東陽人好讀書後仕至丞相出前漢書陳

子昂唐書陳子昂梓州射洪縣人居獨坐山下苦志讀

王適見而奇之謂曰此子必為天下文宗詰闕上書拜

麟臺正字武后嘗問調元氣以何道子昂勤后興明堂

太學后不能用史臣譏其以王充後漢王充字仲任家
 於市閱所賣書此不足則之於彼未始闕澤吳闕澤字
 少暇後博通經史自所著書號曰論衡闕澤德潤山陰
 人家世業農桑志好學家貧為人傭書以供給紙筆
 所寫既畢誦讀亦徧究覽羣經兼通麻數後位至侍中
 中書崔儵隋書崔儵清河人少與范陽盧思道隴西辛
 令書崔儵德源同志友善每以讀書為務恃才忽略大
 署其門曰不讀五千卷書無入此孟仁吳書孟仁字恭
 室不數年博覽羣書多所通涉此孟仁武江夏人少從
 南陽李肅學其母為作厚禱大被或問其故母曰小兒
 無德致客輟肅奇之多貧故作廣被庶得氣類相接矣其讀
 夙夜不輟肅奇之王儉南史王儉字仲寶生而父僧綽
 日卿宰相器也王儉遇害為叔父僧虔所養幼篤學
 手不釋卷寒暑不易賓客或相稱美僧虔曰我不思此
 兒無名政恐名太重耳丹陽戶袁粲見之曰宰相之門
 枯柏豫章雖小已有棟梁之器楊震字伯起弘農華陰
 矣終當任人國事後為僕射楊震字伯起弘農華陰
 時人為之語曰關西孔子楊伯孫敬楚人字文寶常閉
 起漢明帝時仕至太尉後漢人孫敬戶讀書睡則以繩
 繫頭懸之梁上常入市市人見甯越衛人也時苦耕而
 之皆曰閉戶先生帝特徵不就甯越勞謂友人曰何由

免此苦也友人曰勤學三十年當免曰他食吾不食他
寢吾不寢勤學十五年以當三十年如比廣通典籍周
成王師之拜為上路温舒字長君鉅鹿人也少為人牧
卿出春秋外傳
守行見而奇之將歸使
學仕至郡守出漢書

贊

勸學篇第七

志節篇第八

高士篇第九

光夏時隱士為人大賢禹受禪禮聘光為莊周楚人也
楚王聘為相周曰為犧牛乎衣以繒絺食以葷葷牽入
太廟之時欲作耕犢不可得遂感而不仕六國時人

王燭齊人隱居不仕齊宣王往見之不取屈致耳往高
就席欲用為上卿燭固辭不受六國人出孟子

鳳字文通南陽人好學不仕漢明帝徵之終法真卿字喬
不赴遂詐與寡嫂訟自毀得免後漢人